

24
J. can. P.

97

c

ADDENDA
LIBRIS
DE AUXILIIS.

2^o 7. Can. P. 97^e

CONVENTVS



MONACENSIS

g Can f

Conuentus Monacensis Carmel. Sifcali.

**ADDENDA
SUIS LOCIS
IN HISTORIA
CONGREGATIONUM
DE AUXILIIS
SUB SUMMIS PONTIFICIBUS
CLEMENTE VIII.
ET
PAULO V.
CELEBRATARUM,**



Anno M. DCC. edita.

TYPOGRAPHUS LECTORI.



*H*ujus Historiæ Scriptor eximius dum suum Opus recognoscit, ac virgâ plusquam Censoriâ ipse castigat, loca non pauca offendit, quæ vel additamentis nonnullis illustranda, vel etiam meliori stilo polienda emolliendave putavit, quo altera, quam propediem publicandam parabat, Editio tibi, Lector erudite, acceptior & publicæ rei utilior fieret. Eo consilio Exemplar Historiæ suæ ad me transmitti curavit, ex his quæ subjicimus & aliis plurimis additamentis ornamentisque longè concinnius ac locupletius, simul animos addens, ut ad Editionem alteram, priori jam propè exhaustâ, properarem. Autoris consilium, meis certè utilitatibus non incommodum, exosculatus, illi exsequendo jam me accingebam. At statim in mentem venit id quod proprio meo compendio conducturum erat, non parum detrimenti tuis rebus allaturum. Recusâ enim cum tam multiplici accessione Historiâ, necesse foret ut qui primam editionem sibi pretio comparaverant, vel alteram rursus emerent, vel insertis illuc amplissimis auctuariis frustrarentur. Rejecto igitur in aliam tempestatem novæ Editionis consilio, annuente Autore, seorsum hic in unum velut manipulum collegimus publicoque damus quæcumque sparsim variis locis inferenda venient in Editione aliquando procuranda. Et hæc quidem, præter ea quæ modò prodeunt in lucem, alias particulas repræsentabit accuratiori dispositas ordine, stiloque nitidiori exaratas.

I N P R Æ F A T I O N E.

AD §. 1. *Paginâ III. lineâ 39. post hac verba : contestati sunt aliâs adde :*

Hoc S. Congregatio sancti Officii significavit, cum Decretum in Comitibus Generalibus Religiosi cujusdam Instituti, à Generali Ministro & Definitoribus Romæ 28. Junii a. 1691. conditum rescidit, & à domesticis Ordinis Tabulis expungi jussit; quo Decreto statuerant boni Patres, ut ad evitandas quasdam, ut aiebant, doctrinas quæ quandam affinitatem cum propositionibus jam olim contra Baium, Jansenium aut similes per summos Ecclesiæ Pastores damnatis habere videntur, quæque in Provincia Flandrico-Belgica, si non explicitè & directè, saltem indirectè & implicite sustineri à non paucis affirmabantur; ad illas, inquam evitandas statuerant, ut gratia purè Molinistica & prædestinatio à meritis prævisis pendula, à suis illarum Partium Professoribus docerentur; quasi damnatis per Ecclesiæ erroribus hærent Thomistica dogmata, aut certè non longè inde distarent. Hoc nuper &c.

AD FINEM EJUSDEM.

Pag. IV. lin. 19. Post hac verba, religioni litasse.

Hoc præsentis testor, hoc posteros meminisse volo.

Orandus modò superùm Regnator & hominum, ut qui vicem Christi ejus in terris gerit, supremam intentatæ liti, cujus integram tractationem oculis subicimus, diem imponat; & oppigneratam vulgandi olim meditati judicii fidem exsolvat. Etsi enim decretam sententiam, tandem aliquandò promulgandam, non pauca olim momenta suadere viderentur, graviores tamen causæ usu temporis accessere, ex quo Calvinianæ sectæ Professores injudicatam Auxiliorum controversiam, in Ecclesiæ Romanæ dedecus vertunt, tanquàm periisset lex à sacerdote, & consilium à senioribus: fiduciarium Pauli V. Rescriptum, quo partes dissidentes futuri judicii expectatione suspensas filere interim jussit, jocum ludumque faciunt: litem demum in suspensio positam, uti autantis Apostolicæ Sedis, & deficientis apud Pontificios, ut aiunt, Traditionis argumentum, petulantius obtrudunt. Audaciæ hujus specimen prodidit profugus Calvinianus, in libro gallicè inscripto: *Critique generale de l'Histoire du Calvinisme*, seu *Examen critique de l'Histoire Calviniana*, pag. 206. secundæ

Editionis, anno 1683. curatæ: ubi Clarissimi Thuani verba recales, lib. 131. Historiarum, *A prudentissimo Pontifice Controversia ita * composita est, ut eam non motam ab initio optasse ostenderet; & in ea decidendâ nihil existimationi illorum qui eam moverant detractum vellet: ita demum in Romanam Ecclesiam stylum acuit vir illius delictor & fidei: (a) Auxiliorum Controversiâ sub Clemente VIII. Thomistas inter & Molinianos agris animis agitât, id unum ab indeficienti Apostolica sedis Tribunali extundi potuit, optandum scilicet, ut ne ipsa quidem quæstio mota fuisset, nil tamen illorum existimationi detrahendum, qui eam initio moverant. Ecquis unquam decretum usque adeo festivum & joculare pronunciatum audivit? Ut quid illud Ecclesiæ Tribunal falli nescium, lumenque Traditionis indeficiens, si lis anno 1604. judicata, partes inter dissidentes, longè quàm antehac obstinatius recrudescit? Verisimile porro est, hanc non nisi cum Ecclesiæ Romana finem ultimum habituram. Hæc ille, cujus inanem declamationem festinatâ sancti judicii promulgatione cohiberi, bonorum omnium votum est; ne filii egreges in spem novam erecti; ob dolendum illud scholarum divortium, contumaci fronte minitentur, bellumque in Ecclesiam, non tam suo robore quàm nostris diffidiis, animosius instaurent.*

§. SECUNDUS.

De recentiorum &c.

que l'on n'eût point remuée cette question; mais que l'on n'entendait pas néanmoins, que l'honneur de ceux qui l'avoient remuée reçût aucune sorte d'atteinte. Qui a jamais ouï parler d'une aussi plaisante manière d'arrêter? A quoi sert ce Tribunal infallible de l'Eglise, cette lumière infallible de la Tradition, si le Procès décidé l'an 1607. regne encore plus que jamais entre les parties? Il a bien la mine de durer autant que l'Eglise Romaine.

Pag. VI. lin. 29. post hac verba, pari utrimque confidentia.

Gibieusum præsertim infectatus est Theophilus Raynaudus, in nova libertatis Explicatione: ejusque *de libertate Dei & Creatura* eruditissimum Opus, velut hæreseos Jansenianæ prodromum fugillavit, in syntagmate de libris propriis, numero 21. ubi perbellam hanc calumniæ suæ rationem prodit: quod ab Abbate S. Sygirani rogatus Jansenius, ut suum vulgando Gibieusi libro calculum adderet, hoc ei per literas responsum dederit: *Son fait ne me semble, qu'une fantaisie d'esprit: & je ne me trompe point, si on lui donne sur les doigts. Il*

ne

* *Aberrat*
eò loci
Thuanus,
dum con-
troversiam
compositâ
atque deci-
saminnuit;
nisi fortè
compositio-
nem ac deci-
sionem fi-
duciam
intelligi
velit.

(a) *La*
question
de Auxi-
liis aiant
été vive-
ment agi-
tée à Ro-
me sous le
Pontificat
de Cle-
ment
VIII. en-
tre les
Thomi-
stes & les
Molini-
stes, tou-
te la deci-
sion que
l'on put ti-
rer de l'in-
faillibilité
du S. Siè-
ge fut,
qu'il eût
été à sou-
haitter,

GIBIEUS.

ne me semble pas voir les racines de tout l'affaire : ce qui fera, qu'il lui sera mal aisé de se tenir dans les bornes de la vérité : & je ne doute point, qu'il ne fasse des escapades, s'il ne fait rien de pis. Ita certè legere est, Epistolâ 126. insertâ collectioni Epistolarum Jansenii & Abbatis S. Sygiri, ad Jansenium natales detegendos, editarum; quod ita latinè dixeris : *Gibieufi Opus, merum exerrantis ingenii figmentum est. Nec mirum si is contrariâ scriptione aliquando exagitetur : neque enim argumenti radicem attingisse mihi visus est. Quamobrem non nisi agere intra veritatis limites continere se poterit. Nec dubito, quin sæpè exeret, liberum quidpiam effutens; nisi fortè quid peius ac deterius admittat. At næ cachinnis omnibus dignus Raynaudus, qui Gibieufum, Jansenii Præcursores, ea ex Epistolâ colligit, unde oppositum maximè colligas ! Eccur enim albos Gibieufi libro calculos hîc negat Jansenius, eumque velut exerrantis ingenii foetum irridet, si is, ut Raynaudus quidem obtendit, Jansenianæ Hæreseos summam complectebatur, ipsiusque Jansenii libri prodromus erat ? Itane secum ipse, suoque cùm Præcursores Jansenius depugnasset ?*

Feliciusne &c.

AD §. 4. Pag. XI. lin. 7. à fine, post subscriptionem Jesuitarum.

Hanc supplicis excusationis formulam, ante diem alterum perscripserat Augustissimi Senatus Princeps; hujusque exemplar, datis ad Illustrissimum Archipræsulem, & ad Societatis Provincialem binis Epistolis, transmisserat : ut rem totam concordî confilio brevi conficerent.

Ad Societatis Provincialem scripserat in hæc verba, die 21. Januarii. *Admodum Reverende Pater. Transmitto exemplar Formulae à me, secundum mandata Regia, perscriptæ, meoque Chirographo communitæ. Ut illud exscribi cures, propriaque manu obsignes; necnon etiam R. Patris Valesii, ac Rectorum Collegii & Novitiatus signaturâ muniri studeas, rogo : tum ut illud quantocius D. Remensi Archiepiscopo domi offeras : illumque iis verbis adeas, quæ tibi congruentiora & efficaciora prudentia suggeret, quæ enata res sedari omnino possit; ipsaque etiam semina, unde alia non absimiles enascerentur, penitus extinguat. Rogo insuper, ut quantum in auctoritate tua positum erit, provideas, ne ullus e Societate ea de re quidquam deinceps scribat : neve supplicis Monitionis, quæ typis edita vulgataque est, exempla disseminet : immò potius omnes de ea sobriè dicant, ubi dicendi*

necessitas acciderit. Nullus dubito, quin D. Remensis Archiepiscopus, pro parte sua, omni humanitate atque prudentiâ oblata excusationi respondeat, quanta à meritissimo Præsule expectari potest. Quia verò necesse existimavi, ut quidam prima notæ viri coram adsint, quæ tempore D. Archiepiscopum Remensem convenietis; in DD. Episcopos Sueffionensem & Laudunensem, ejusdem Comprovinciales, oculos conjeci, tamquam qui maximè congruant. Idcirco Versallias mitto qui D. Episcopum Sueffionensem meo nomine roget, ut redeat quantocius, unâque cum D. Archiepiscopo de die & hora conveniat. Quæ de re certum te facient, quod simul cum cæteris designatis Societatis Præpositis, præfatum Archipræsulem adeas, ultimam enato negotio manum impositurus : quod ut ne cœpisset quidem, optandum esset; ac ne quid inde sinistrum eveniat, nusquam satis præcaveri à vobis poterit.

Hanc autem Illustrissimo Archiepiscopo Epistolam dederat, hac ipsa die, transmissa etiam superioris exemplo.

*In eundem fasciculum addo exemplar Formulae à me perscriptæ, meoque Chirographo communitæ, quam ad Societatis Provincialem transmissi; necnon etiam transmissum datæ ad illum Epistolæ, quæ eum ut propria manu subscribat rogavi, & à cæteris Parisiensium domorum Præpositis subscribi provideat; eamque quæ tibi die & hora placuerit, demum exhibeat. Rogo pergratum habeas, DD. Episcopos Sueffionensem & Laudunensem presentes adesse, quo tempore Patres illos domi excipere dignaberis : quod quidem nusquam sat cito fiet, ut ultima emergenti negotio manus imponatur. Versallias mitto qui D. Episcopum Sueffionensem meo nomine roget, ut huc quamprimum fieri poterit redeat. Interim me summa cum reverentia profiteor humillimum & obsequen-
tissimum servum. DE HARLAY.*

Steterunt, &c.

Pag. XVII. lin. 11. à fine, post hæc verba, AD §. 6. Commentarios usurpavimus.

Quocirca libros 2. 3. & 4. in duas veluti partes secare necesse fuit : alteram quæ res in Congregationibus agitatae atque sancitæ exsequeremur; alteram quæ litis urgendæ ac tractandæ modos, variosque extra Congregationes eventus, referremus. Ne si omnia rectâ serie pro dierum ordine in Diurni modum, lectorum oculis fisterentur, sejunctæ ab invicem Congregationes, disjuncta judicia, ac peregrinis læpius eventibus intermixta, dogmaticam Historiæ partem implicarent magis, novisque ambagibus involverent.

AD EUN-
DEM §. 6.

Pag. XXIV. lin. 5. sic lege.

Nec mirum cum die 8. Novembris, qua quinta hujus examinis Congregatio fuit, ægritudine detineri cœperit, & ab hujus anni congressibus abesse, uti passim in Actis legere est. Bossutii chirographum, &c.

AD §. 8.

Pag. XXX. ante Paragraphum nonum.

Id clarissimi Augustinienſium Ordinis gloriæ debebatur, ut in ſacro conſeſſu, ubi de tuendâ ſanciendâque S. Auguſtini doctrinâ agebatur, ejuldem Inſtituti Profeſſor, publici Actoris officio deſungerentur: qui univerſo conſeſſui ab Actis & Commentariis eſſet; ad ea potiſſimum ſtatuen- da dogmata, quæ uti clariffimus Doctor extremis operibus, diſcipulis ſuis velut ex aſſe hæredibus reliquit, ita religioſiſſimus Ordo filiis ſuis hæreditaria eſſe voluit. Sic enim in Generalibus Comitibus, anno 1679. habitis, definitione 13. ſtatutum legimus: *Pro ſeſſiori ſtudiorum noſtri Ordinis progreſſu ac ſplendore, deſinitum fuit quod quilibet ex noſtris Religioſis, tum privatim tum publice diſcens vel docens, teneatur in omnibus ſequi & tueri inconcuſſam doctrinam SS. Patris noſtri Auguſtini, præſertim in materia de gratia primi hominis & Angelorum; quod à primo inſtanti fuerint à Deo creati recti, & proinde bona voluntatis: Item de noſtra gratuita electione & prædeſtinatione in Chriſto, etiam ad gloriam, independenter à præviſione noſtrorum meritorum: necnon de gratia per ſe efficaci, quâ Deus operatur in nobis velle & perficere.* Cui publico ac generali Ordinis Statuto ſanciendo præluſerat Capitulum Provincia- le, anno 1677. Francopoli in Gallia celebra- tum; ubi ita à piis ac Religioſis viris, ſancitum erat: *Nos inſcripti Definitorii Patres ſtatuiſſimus, deſinimus & ordinamus, ut quiſque in Provincia noſtra Theologia aut Philoſophiæ Profeſſor, immaculatam & inconcuſſam ſanctiſſimi Parentis Auguſtini doctrinam, juxta interpretationum fundatiſſimi Doctoris noſtri B. Egidii Romani ſequatur, doceat, & defendat. Eiſdemque Profeſſoribus inſubemus ac prohibemus, ne ſequantur opinio- nem Ludovici Molina, circa Controverſias de ſcientiâ media, & Concordiâ Libertatis cum Gratia; utpote adverſantem, ſicut ipſe Moli- na teſtatur, Divi Auguſtini doctrinâ atque ſententiâ. Secus facientes privamus in perpetuum gradu Doctorum in Provincia noſtra privilegiatorum. Datum Francopoli in Comitibus Provincialibus 19. Maii 1677.*

§. I X.

Pag. XXXIII. lin. 20. post hæc verba, ſen- tentiam dixit. AD §. 10.

A Paulo V. unâ cum aliis Cognitor da- tus, ad forenſia Status Eccleſiaſtici judicia reformanda, curam arduam ac perplexi moliminis, ingenti animo aggreſſus eſt, inexplicabiles ambages reſcidit, moras ſu- ſtulit, cuncta demum ad antiquum morem exegit. Ortâ Pontificem inter & Hiſpaniæ Regem contentione, de jure nominandi ad pingua quædam Sacerdotia, ab utro- que ſelectus Arbiter, nullâ Regis heri ſui ratione habitâ, jus Eccleſiæ Capiti adjudica- vit: cujus arbitrio non modò ſtetit piſſi- ſſimus Princeps, ſed ob id potiùs ſubditi ſui, cujus judicio cauſâ ceciderat, integri- tatem pluris fecit, præmiis donavit. Hiſ- paniarum Oratoribus, &c.

Pag. XXXV. lin. 5. post hæc verba, cauſa arripuerit. AD EUN- DEM §. 10.

Sed & velim hîc obiter ſcire, cur cla- riſſimi Pegnæ ſuffragium hoc maximè nomine elevandum putet noviffimus accu- ſator, quod & Hiſpanus eſſet, & Galliæ ſubinſenſus, & in Henricum IV. minùs æquus? Itane Gallos in clariffimum virum concitare libuit, ac cæcis illis accuſationi- bus occupare? Si ſic eſt, minùs prudenter cauſæ ſuæ commodis conſulit. Neminem enim Gallos inter fore puto, qui vanas illas criminationes, unâ gentium ac ditionum differentiâ nixas, aut commodatâ Principi- bus inter ſe diſſidentibus advocatone, non rideat, non exſibilet. Nemo quippe pru- dens ſubdito viro ſuccenſet aut vitio ver- tit, quod Principis ſui jura pro ſua virili adverſus exteros tueatur, atque promoveat. Sic ſanè ſuum officium exſequitur, debitas viri probi partes implet, futurus etiam im- probus, ſi ſecus ageret. Id porrò unum hac occasione tentavit clariffimus Pegna; nec aliâ de cauſa adverſum Henrico IV. ani- mum geſſit, quàm ut Hiſpaniæ jura, quæ illi juſta videbantur, vindicaret ac tuere- tur. Quamquam quid iſta moramur? Non uni Galliæ, ſed Eccleſiæ univerſæ noſtram hanc Auxiliorum Hiſtoriam conſecramus. Ac ſi quis fortè Gallos inter, minùs æquus rerum iſtarum æſtimator, adverſus Pegnæ ſuffragium, vel hoc uno nomine excipien- dum duceret, quod Hiſpanus eſſet, & Gal- lis fortè ſubiratus; longè aliter cæterarum omnium gentium eruditi nihil ſeciùs judi- carent, ejulque ſuffragium admitterent, uti omni exceptione majus; quod nulla hîc quæſtio veniat, quæ Galliam cum Hiſpa- nia commiſerit. S. Ignatii, &c.

Pag.

AD EUN-
DEM §. 10.

Eadem pag. XXXV. ante Paragraphum
undecimum.

5. Junii
1596.

Instrum.
Erecl. Cap.

Pegnæ famam non mediocriter obscura-
ret, quod scribit Cardinalis Ossatus, in sua
ad Henricum IV. Epistolâ: illum nempè
*adversus Regis maximi absolutionem scriptu-
rientem, non paucas hæreses effutisse, atque
ob id ad fidei Tribunal vadimonium obiisse:*
nisi certo certius esset, id ab eo Henrici
auribus dari; ut illius genio respondeat,
virumque deprædicet Majestati suæ minùs
acceptum. Exstat enim verò in hanc diem,
Libellus hac occasione à Francisco Pegna
elaboratus, nimirum *Responsio Canonica in
Causa Henrici Borbonii*. In eo quidem ad-
versus ejusdem Canonicam absolutionem
totis lacertis depugnat; qua parte probari
à me non potest. At sis licet Argus, aut
lynceos oculos habeas, nullum in fide næ-
vum invenies: à vero licet abeat, attamen
intra fidei limites continetur. Ad hæc,
Pegnam nunquam sua Romæ fama deferuit,
immò aucta indies pietatis ejus & Religionis
opinio. Constanti Romanorum Pontifi-
cum Clementis VIII. & Pauli V. gratiâ
potitus, ea munia, nusquam sibi dissimilis,
ad ultimas vitæ metas obiit, quæ illum
nedum integræ fidei virum probent, sed
ab omni quoque erroris suspitione remo-
tissimum. Tantumque abest, ut illi ob
procusos errores, coram supremis fidei In-
quisitoribus dies dicta sit, ut contrâ potiùs
federit posthæc eo in Tribunali Consultor
& Judex; & adversus hæreses, consiliis &
scriptis locupletissimis depugnarit. Audi
Alexandrum Marlium Protonotarium
Apostolicum: *In Tribunali Sacra Rota ubi
Decanus evasit, juri dicundo & decidendo præ-
fuit, integerrimus & incorruptibilis, exem-
plaris. Mox ad sanctissimam Inquisitionis Tri-
bunal vocatus, sedit & consuluit, Consultoris
officio fide & laude plenus fungens.... hære-
ticas pravitates confutare conatus, diu noctu-
que studuit, indefessè gravam operam consu-
tationibus dedit. Nulli labori propterea peper-
cit: pro defensione libertatis Ecclesiæ acerrimè
pugnavit, & contra falsorum dogmatum
Authores & Scriptores sanctissimè ac do-
ctissimè scripsit, atque respondit.... Munia
omnia ad amissim obivit, usque in finem om-
nis expertis reprehensionis.... Christiana &
Catholica Religionis propugnator, pietatem,
justitiam, charitatem coluit, &c.* Quibus
paria habent Antonius Frances, in Præfa-
tione ad Decisiones Rotaes, Paulus Ru-
beus in discursu ad Juris studiosos; & ante
omnes, Janus Nicius Erithræus, in sua
Pinacotheca Imaginum virorum illustrium,
parte 1. n. 80. ubi Pegnam multum apud

omnes autoritate, existimatione & gratia va-
luisse scribit; virumque fuisse planè egregium,
multa operâ atque industriâ in Romana Aula
cognitum.

Accedit quòd passim Scriptores Galli,
clarissimo Pegnæ vitio vertunt, illum sci-
licet Inquisitionis Jura, autoritatem, digni-
tatemque præter fas & æquum, extulisse,
commendasse. Non est hæc profectò vi-
rorum illorum indoles, qui tremendi Tri-
bunalis virgam experti sunt. At quid ista
moramur, ut Cardinalem Ossatum, hu-
mani quidpiam ea in Epistola passum de-
monstremus? Ipse se prodit, nihilque hu-
jusmodi quidquam Pegnæ contigisse, vel
nolens innuit, dum summum Pontificem;
ad deferendam Pegnæ Purpuram inclina-
tum scribit: *Mais quand aujourd'hui Sa Sain-
teté voudroit promouvoir le Sieur Pegna, Au-
diteur de Rote, Espagnol, qui s'étoit tant di-
stillé à écrire contre Votre Majesté pour empê-
cher l'absolution, avec tant d'ardeur, qu'il
avoit écrit plusieurs heresies, & s'en étoit fait
mettre à l'Inquisition; ce nonobstant Votre
Majesté, ni pas un de ses Ministres ne vou-
droit avoir ouvert la bouche pour l'empêcher.*
Hoc est, *Tametsi vellet nunc Sanctitas Sua,
Purpuram deferre Domino Pegna, Rota Ro-
mana Auditori Hispano, qui Majestatem Ve-
stram scriptis infectatus est, ingeniumque ut
illius absolutioni Canonice obicem poneret,
adeò torsit ut hæreses non paucas effutierit, ob
idque ad supremum fidei Tribunal citatus sit;
ne hisceret quidem Majestas Vestra, illiusus
Ministri repugnarent.* Quis verò putet Pon-
tificem de conferendâ Pegnæ Purpurâ co-
gitasse, ut Ossatus videtur illic significare,
si is ante dies aliquot, ob procusos errores,
coram supremo fidei Senatu, vadimonium
obiisset? Minùs ergo secum ea in Epistola
consensit Cardinalis Ossatus, mordaciori-
que sale virum Hispanum defricat Gallus,
adversis studiis occupatus. Tametsi vel ob
id veniâ dignus haberi possit, quòd hoc illi
verbum exciderit obiter, ac minùs oblo-
quendi animo, quàm flagranti in Herum ze-
lo, ardentique in Regem Maximum studio.

§. XI.

Pag. XLII. linea 4. sic lege.

AD §. II.

Molanus è Divorum albo Faustum ex-
punxit, quem S. Isidorus libro de Viris il-
lustribus cap. 14. *Profunda calliditatis virum*
appellat. Eundem sacro titulo primùm
exiit Cardinalis Baronius, donec Reicensis
Ecclesiæ schedis acceptis, antiquum illi
honorem restituit: constanter tamen, vul-
peculari, versipellem nuncupat in Annali-
bus. Sed quid tandem? &c.

Pag.

Ad §. 12. Pag. XLIV. linea 14. à fine post hac verba, non humanæ historiæ credulitatem.

Accedit Prosperi Fagnani suffragium observatione dignissimum. Erat is, uti notum est, Juris Pontificii consultissimus, utriusque, ut vocant, signaturæ Referendarius, vir ingentium virtutum, atque in Sedem Apostolicam meritorum; qui cum multos annos Sacræ Congregationi Cardinalium Concilii Tridentini Interpretum à secretis esset, plurima in suis ad Libros Decretalium Commentariis, Decreta, Responsa, Consulta laudavit, ut in publicis Congregationis Actis ac Tabulis legerat. Vix unam alteramve eruditi Operis paginam evolve- ris, ubi non aliquod hujusce Congregationis Statutum aut Rescriptum occurrat. Jam quis hæc amabo fabulis accensenda putet, eo vel nomine, quod illorum bene multa secundum publicas juris formulas vulgata non fuerint, Cardinalis Præfecti & Secretarii subscriptione sigilloque communita? Esset id profecto lepidè festivum, viroque celeberrimo, qui tot illa Decreta ad Actorum & Tabularum fidem exegit, injurium nimis. Et is tamen, is ipse Fagnanus singulari Præfatiunculâ lectorem initio monuit, nequaquam pro authenticis haberi posse tot illa ab semetipso laudata Rescripta, nisi Cardinalis Præfecti Chirographo sigilloque munita prodeant. *Qua in his Commentariis, inquit ille in Monito ad Lectorem, Responsa S. Congregationis Eminentissimorum Patrum Concilii Tridentini Interpretum sparsim pro re natâ referuntur, quamquam ferè omnia exscripta fideliter, dum eidem Congregationi essem à secretis; ea tamen minimè habenda pro authenticis, scire debes, quando Emin. Cardinalis Præfecti & Secretarii subscriptione, signoque carent. Nec aliud mihi consilium, aut voluntas alia, &c.*

Hoc ipsum ab Emin. Cardinali Albizio factitatum observamus, in libro *De incon-*

stantia in fide. Ut enim Romanæ Inquisitionis Generalis Assessorem diu egerat, infinita propemodum Sacri Senatus judicia, statuta, rescripta, ex ejusdem publicis Commentariis eruta, pro re nata laudavit, ac sæpius etiam exscripsit: quorum tamen pars maxima nusquam ex juris præscripto vulgata fuit. Quis hic Eminentissimum Virum, uti fabularum venditorem idcirco traducat? Id ergo certissimè statuendum, posse scriptum aliquod publicæ authenticæ titulo ac dignitate defraudari, tametsi privatâ aliunde stet fide, & quavis suppositionis labe purissimum; eaque idcirco de causâ, Innocentium X. nonnullas Congregationis Auxiliorum scriptiones authenticæ titulo exuisse, ne certam & omnimodam in judicio fidem facerent, quod illis publica juris solennitas nondum accesserit: tametsi fabulis accenseri nullatenus possint. Sed certam Historiæ fidem faciant, omnemque suppositionis suspicionem procul amoveant.

Addiderim, &c.

Eadem pag. XLIV. lin. 7. à fine post hac verba, & Patribus Societatis.

Quis dixerit in causa Veneti Interdicti, nihil sani coloris aut editum hætenus, aut edendum in posterum? Et tamen universis lucubrationibus hoc de argumento adornatis nigrum theta præfigit idem ille librorum vetitæ lectionis Indiculus: non ut universis scriptoribus in alterutrius partis studia venientibus, invidiosam notam inuratur; sed ut pace Pontificem inter ac Rempublicam tandem inita, odiosæ litis documenta æterno silentio involvantur. At nihil, &c.

Pag. LI. in fine adde.

Quamquam ut est aliquid conditioni temporum tribuendum, nolim hodie duriores illas loquendi rationes à nostratibus usurpari, sed alias mitiores quæ minùs invidiæ & calumniæ pateant.

AD EUN-
DEM §. 12.
Idem longè
potiori jure
dicendum
de prohibi-
tione libro-
rum om-
nium, qui
spectant di-
rectè vel
indirectè
ad contro-
versiam ex-
ortam inter
Cbalcedo-
nensem E-
piscopum
& Regula-
res An-
glia.

Ad §. 13.

ADDENDA

IN HISTORIA.

AD LIBRI
I. CAP. I.

Pag. 4. lin. 10. à fine, post hac verba, eorundem Actorum.

Quocirca Ambrosius Catharinus, liberioris ingenii Theologus, qui ab Augustini doctrinâ, in causâ justificationis, prædestinationis, & gratiæ procul abibat novaque in scholas inferebat, hoc de argumento paradoxa, reliquis Theologis inau-

data, de Laynii suffragatione sibi plaudit in suâ adversus Dominicum Soto Apologiâ; ubi se illum suæ sententiæ vindicem habere solitum scribit in Congressibus Tridenti celebratis; eidemque tenaciter adhæsisse ait, maximè dum de justificatione quæstiones moverentur, in quibus illum turpius errasse notum est.

Fuerunt &c.

Pag.

AD LI. Pag. 6. lin. 21. post hac verba, deformasset
BRI I.
CAP. I. abjectio.

Hac eadem in gratiæ hostes usum indulgentiæ Divum Augustinum colligimus ex libro de Gestis Pelagii cap. 22. *Salubrius sanè adversus illos agi putabam, si hominum nominibus tacitis, ipsi refutarentur & redarguerentur errores.* Et cap. 23. *Nec tamen operi meo, quo eundem librum refelli, Pelagii nomen inserui, facilius me existimans profuturum, si servatâ amicitia, adhuc ejus verecundiæ parcerem, cujus literis jam parcere non deberem.*

Nec solum &c.

AD CAP. 2. Pag. 7. lin. à fine post hac verba, instar canonis haberetur.

Hos die 8. Decembris 1594. quæ Deiparæ Conceptioni sacra erat, Gregorii XIII. vestigiis stetit Præpositus Generalis, Benedictionem Apostolicam percepturos, ut auspiciatò negotium tam operosum inchoarent. Benè illis precatus est Pontifex, quòd eos ad reformanda, ut aiebant, Societatis studia convenisse arbitraretur; sedulitatemque ac celeritatem operi ad eò salutare ut adhiberent, est adhortatus. Neque verò Pontifex solum, sed & Cardinales nonnulli, doctrinâ & auctoritate præcipui, quos tantæ rei certiores fecerant, institutam, ut putabant, studiorum reformationem vehementissimè comprobarent. Domicilium peropportunum & commodum selectis Theologis est attributum, ut semotâ turbâ in id opus intenderent; hybernis quidem sex mensibus, in Poenitentiarîâ S. Petri; æstivis autem caloribus, ad S. Andream in Monte Quirinali. Horæ ternæ singulis diebus in consultatione ponebantur: tempus reliquum legendis doctoribus & Commentariis, quos aliqui manu scriptos ex Provinciis attulerant, traducebatur. Novem mensium spatio integrum opus ad umbilicum perductum est: duplex scilicet confectus Tractatus, unus de opinionibus seligendis, alter de scholarum administratione. Uterque subinde ad incudem revocatus, relectusque omnibus audientibus, & emendatus, ac demum singulorum subscriptione munitus, jubente Generali Præposito in Collegii Romani Professorum manus traditus est; ut ab iis primùm, à reliquis deinde per Societatem Provinciis expenderetur. Anno vertente, sub finem mensis Augusti, cùm Decembris initio cœpisset, Theologorum deputatorum Conventus solutus est. Stephanus Tuccius, Joannes Azorius, Gaspar

Gonzales in urbe relictî sunt; ut, sicubi desideraretur, eorum quæ constituta fuerant, interpretationem vel rationem redderent; cæteri domum quisque ad consueta munia rediére.

Speciosam edendi Operis rationem legimus, in Tractatu de &c.

Pag. 31. lin. 19. sic lege.

AD CAP.

4. Quasi verò id Henriquezii verba postulent; virumque è sacro pulpito dicentem ad populum intelligere necesse sit, quoties quidpiam ab aliquo prædicatum legimus. Næ dignum Palæmone commentum! Nugacem ludimagistrum ad scholas amandare fat est, ut ancipitem hujusce vocabuli vim ediscat. At interim rogo nobis aperiat, quem alium loci ac temporis notæ ita minutatim expressæ nobis indigent? Quis ea ætate temporum inconditas de prædestinatione opiniones Lovanii cuderit? Quis Academiam offenderit? Quis ad Sixti V. tribunal delatus sit? Quamquam nec de iis vitiligare necesse est. Seu etenim Lessius aut Hamelius, seu quisvis alius in scholastico suggestu docens, aut in Ecclesiastico pulpito dicens ad populum, Sixti V. severam animadversionem concitaverit, quòd contra gratuitam prædestinationem declamasset, perinde nobis est; perinde dogma Catholicum ab imprudenti declamatore sugillatum, summi Pontificis judicio vindicatur.

Nec verò &c.

Pag. 45. lin. 3. post hæc verba, perhibent
testimonium.

AD CAP.

7.

Unius Theophili Raynaudi verba dabo, qui ut rugosæ frontis & obducti supercilii Censor esse solet, in laudando viro minùs Societati propitio fidem sibi faciliùs conciliabit. In Clausulâ operis de libris configendis numero 571. de humilitate post justam confixionem tenendâ sermonem habens, *Quo in genere, inquit, Michael Bayus æternum quibusvis scriptoribus exemplum sapientia ac virtutis statuit. Cùm confixis à Francisco Toletò per Pontificem ad id delegato, nonnullis ejus libris, oblataque Censurâ, an acquiesceret rogatus, malle se dixit, porcos pascere, quàm cujuscumque per Ecclesiam delecti judicio de scriptionibus suis, pervicaciter oblectari.*

Quare &c.

Pag. 54. lin. 34. post hac verba, replican-
tibus Jesuitis.

AD CAP.

8.

Qua loquendi ratione satis innuit quàm altè de Censura Lovaniensi sentiret, quo ve pretio

pretio ejusdem Defensionem haberet.

Sed & celeberrimæ &c.

AD CAP.
12.

Pag. 83. ante Caput XIII.

In Thef.

Paul. Fass.
in vanit.
Triump.

Quò ergo se vertent Lessianæ causæ Actores, ut vulnus illi celeberrimarum Academiarum Censuris illatum, quoquo pacto obliniant? Cælum forte in partes trahent; & sanctissimum Præsulem Franciscum Salesium Lessio propitium jactitabunt. Extremam hanc tuendæ causæ viam init Philippus de Vos: Epistolam nescio quam, Lessio à piissimo Præsule datam obtendit, die 27. Augusti 1618. ubi de prædestinatione meritis prævisis nixâ, ita fertur pronunciassè: *Sententia illa, antiquitate, suavitæ, ac Scripturarum nativâ auctoritate nobilissima, de prædestinatione ad gloriam, post prævisa opera, sanè mihi gratissima fuit: qui nimirum eam semper, ut Dei misericordiæ & gratiæ magis consentaneam, veriore ac amabiliorem existimavi: quòd etiam tantisper in libello de Amore Dei judicavi.* Nos ipsam Epistolam, & viro Dei suppositam dicimus; quam & alii antè nos, uti adulterinæ tœturæ partum exsufflarunt. Ecce enim si genuina certaque est, suum etiam tot inter alias, summo studio & accuratâ diligentiam conquistat, locum nec habet, nec habuit unquam? Maxime cum diligentissimi illius Operum Editores, cætera quæque vel minutissima Epistolarum fragmenta publicâ luce digna judicarent? Quamquam si certâ & indubitatâ fide constaret, nullum inde Lessianis paradoxis, ab Academiâ Lovaniensi & Duacensi proscriptis, præsidii accederet: cum levem hinc scholæ difficultatem duntaxat attingat sanctissimus Præsul, quæ de duplicis vocationis ordine, ad gratiam & ad gloriam, à Theologis innoxia fide disputatur; atque id quidem obiter, pro officiosæ Epistolæ conditione: ab iis verò, de quibus maxime Lessio intentata lis erat, ne verbum quidem habeat.

Sed age, fac si lubet si libet, Tractatum integrum de agitatâ ea ætate divinæ gratiæ Controversiis, adornasse sanctissimum virum; quod tamen nusquam ab illo tentatum, certò liquet: fac, si eò usque fabulari placet, Lessium absolvisse, quod tamen nusquam illi in mentem venisse compertum est: quid ni reponere liceat, quòd Eruditissimus Præsul Jacobus Benignus Bossuetus, Meldensium Episcopus scripsit non ita pridem, in Præfatione adversus Institutionem Pastoralem, Cameraci datam, die 15. Septembris 1697. ubi hæc inter alia multa, de D. Francisco Salesio no-

tat sectione II. §. 126. *Hoc primum principii loco ponam, de quo nulla possit controversia suboriri: honorem viris sanctis, solenni apotheosi cælo adscriptis, ab Ecclesia universa deferri solitum, quantusquisque sit ille, non obesse, quominus ea damnari possint, quæ scripto forte reliquerunt. Quod S. Cypriani, aliorumque benè plurium exemplo confirmat; quorum errores, salva sanctitatis opinione, & nulla delati publici cultus injuriâ, proscribuntur. Tum addit è vestigio: At inquires, eximiâ sanctitate fuit Franciscus Salesius. Sic certè: verum non illi idcirco indeficientia privilegium arrogandum est. Neque enim quemquam fugere potest, quo pacto, post divini amoris initia, ingenitis humani cordis viribus attributa (quin tamen ad Deum super omnia diligendum assurgant, ut vera dilectionis ratio postulat) equiori quidem animo, quàm doctrinâ, probandum sibi sumat, naturalem illum amorem, nequaquam inutilem esse: ob id maxime, quòd etsi hac una nativâ propensio, ad Deum sicut oportet diligendum, assurgere nequeat, si tamen eâ fideliter uteremur, Deus nobis auxilio præsto esset, quò possemus ultrâ progredi: atque ita nos ad supremum amorem sensim eveheret. Certè dum sacros honores D. Francisco Salesio Ecclesia detulit, non illi mens ea fuit, ut vel dictum hoc auctoritate sua consecraret, vel Theologis aliter sentiendi facultatem adimeret; si quis forte sub sanctissimi Præsulis umbrâ paradoxum istud in scholas rursùm induceret: Deum iis gratiam elargiri, qui natura viribus, quidquid in ipsis est operantur. Quæ porro à Sanctissimo Viro hujus sue sententiæ ratio fertur; Deum scilicet iis ad virtutis profectum gratiam elargiri, qui fidem in minimis probant, quique pro viribus adnituntur, locum quidem habet in donorum gratuitorum usu, non itidem naturalium. Quid tandem? Pro ea quæ viro Theologo censendi libertas est, pronunciare ausim, D. Francisci doctrinam, minus sibi coherentem & accuratam, ei visum iri, qui ejus vestigia presserit, & calcem calce triverit. Nemoque non spontè fatebitur, eum pro ætatis & seculi genio, plus fortè in lectitandis recentioribus scholæ Magistris studii posuisse, quàm in evolvendis Ecclesiæ Patrum monumentis.*

Et hæc de Belgicarum Academiarum Censuris nimis fortasse multa. Sed hanc prolixè dicendi necessitatem nobis imposuit, novus earum accusator, qui vulgato non ita pridem Romæ *Veri ac falsi Thomismi Paralello*, hæreseos labem eis aspergit; ipsaque Literarum capita, virosque superum cultu reverendos, integrâ lucubratione concidit, asperisque dictis jocum

Lib. I. de
amore Dei
cap. 16. 17.

Vide Pref.
§. I.

jocum ac ludibrium facit. At amaras ipse quoque historias audire coactus est. Nunc demum sermonem ad alia convertimus, nostroque instituto propiora resumimus.

CAPUT XIII.

Liber &c.

AD CAP. Pag. 87. lin. 2. post hac verba, Censurâ dignum.

Exstat de-
clamatio in
Append.

Sed & ante Henriquesium, Balduinus Rythovius, Regius in Academia Duacena Theologiæ Professor, Joannem Deckerium, eandem illam Ferreiræ approbationem superbè jactantem retulerat, in publica Declamatione, anno 1589. An quia unus Deputatus sacre Inquisitionis, ac Librorum Censor testatus est, in Opere Molina nihil à se animadversum esse, quod nostræ Religioni adversetur, &c. ideo nihil in eo est, quod ullo nomine mirari, aut improbare quisquam possit, citra calumniam?

Sunt quidem &c.

Pag. 89. lin. 4. post hac verba, Ambitiosius efferre.

In quem idcirco illud Theodreti de nonnullis meritò cadat: *Neminem volunt ex antiquis Patribus sibi comparari, neque illos quibus nos ab ineunte ætate usi sumus præceptoribus, sibi pares existimari sinunt: immo verò ne unum quidem Collegarum nostrorum vel ad mediocrem sapientiam pervenisse censent: sed se solos ipsos sapientes, & sibi solis ea doctrina patefacta mysteria, quæ in nullius unquam sub sole cognitionem ac mentem venerint, arbitrantur.* Lib. I. Hist. Eccles. cap. 4.

Ea de re &c.

AD CAP. Pag. 97. lin. 5. post hac verba, Quantum possumus.

Si quid tandem in censendo autoritatis obtinet fama publica, clarissimorum Virorum de novis Molinae inventis acre iudicium publicâ Censurâ roboratur. Quo etenim tempore Romæ Controversia fervebat, pervagata apud exterarum gentes fama erat, Molinam Pelagianismum suscitasse, in Augustinum petulanter insurrexisse, iis etiam in capitibus, queis stat Ecclesiæ Catholicæ fides; nec ab summo Pontifice, nisi gravi Divinæ Gratiæ injuriâ irrogatâ, absolvi posse. Audi Petrum Matthæum anno 1604. in Galliis scribentem, in Historia septem annorum pacis, lib. 7. narratione 4. *Tertia demum Controversia mota est occasione libri Ludovici Molinae Societatis Jesu Professoris, de Concordia Gratiæ & Liberi Arbitrii, qui Pelagianam heresim maxima ex parte suscitasse ferebatur: quique*

audaciùs quàm par esset adversus S. Augustini sententiam scripturierat; tamen hac uti Ecclesiæ Catholicæ fides habenda sit, in his que ad Gratiæ & liberum Arbitrium pertinent. Fratres Predicatores, qui primas in Hispania & Lusitania Theologiæ Cathedras moderantur, Molinae doctrinam velut erroneam traduxerunt. Lemos, quem nulli doctrinâ & eruditione secundum habent, multum in eo demonstrando studii ac laboris impendit. Res coram Pontifice maximo, Cardinalibus, & Generalibus Ordinibus, Romæ publicis disputationibus ventilata est, cujus definitio in annum alterum missa fuit. Tunc demum experiri licebit, an Romani Pontificis iudicium libero hominis arbitrio vires addet, & istud divina Gratiæ virtuti anteponet.

CAPUT DECIMUM-QUINTUM.

Molina Concordia, malè à multis habita ut quæ errores Petri de Rivo à Sixto IV. proscriptos, denuò suscitabat.

Id etiam Ludovico Molinae vitio datum à multis, quod & Leonardo Lessio crimini verterant Theologi Lovanientes, in celebri Censura; quod proscripto aliàs ab Sixto IV. Petri Rivii Axiomate, suam illam indifferentem ac versatilem gratiam superstrueret. Quippe qui divina Decreta atque Auxilia seipsis efficacia, ob id præsertim eliminabat, quod humanæ libertati officerent: ratus nempe, id omne necessarium fore, quod ab antevergente atque indeclinabili principio certò fluere. Hoc enim arasse vitulo Petrum Rivium, atque ob id virgam promeritum, ex Lovanientis Academiae tabulis discimus; totamque de divinis Decretis futurisque contingentibus doctrinam polluisse, hoc unoposito fundamento: *Quidquid per necessariam consequentiam sequitur ex inimpedibili, hoc est inimpedibile & necessarium.* Rem uti gesta est, paucis exponam. Erat is publicus Philosophiæ Professor in Academia Lovanienti, anno 1470. Nonnulla de futuris contingentibus, de scientia Dei, deque decretis æternis, suis in prælectionibus habuit; ob quæ à doctissimis Viris Henrico Zoemerio, & Jacobo Scheluvæerto, Facultatis Parisiensis Doctoribus, in Lovanientem Academiam cooptatis, in iudicium vocatus est. Res Lovanii primùm in sacro Theologorum Confessu ventilata, Romam coram Sixto IV. ascita est. Cognitâ causâ, ad palinodiam, ex Pontificis jussu, Novator adactus est: quam quia prono ac humili in speciem animo decantavit, Brevi com-

commendatitio, suæ velut innocentiae obfide donatus, ad Lovaniensem Academiam missus est. Verum ut domesticos lares attingit, Pontificis commendatione abusus homo versipellis, ejuratos errores Lovanii recudit: & quidem longè quàm antehac petulantius; quòd se sub ea Pontificis umbellâ ab æmulatorum insultibus tutum crederet.

Rem ut didicit Sanctissimus Pater, novos in partibus Judices dedit, qui de nova Rivii molitione quæstionem facerent, anno 1474. singulari missò Diplomate, in fastis Academiæ Lovaniensis typis edito, pag. 351. quo Petrum Rivium non ob aliud absolutum, ac Brevi commendatitio, ejus velut innocentiae obfide, donatum significavit, quàm quòd demissò supercilio, animoque in speciem humili, palinodiam, uti ei jussum fuerat, decantasset: cæterum datâ erranti veniâ, errores damnatos fuisse, seque illos secundo damnare professus est. Nos, inquit, qui Propositiones prædictas, velut scandalosas, & à Catholica fide semita devias, tunc damnavimus, prout etiam in præsentiarum damnamus, &c.

Totum id ex Lovaniensis Academiæ Tabulis delibatum: queis etiam certò liquet, Petrum Rivium eo maximè posito fundamento, suos illos de divinis decretis futurisque liberis proscriptos errores derivasse: *Quidquid per necessariam consequentiam sequitur ex inimpedibili, hoc est inimpedibile & necessarium.* Quo non absimiliter nixus Molina, Decreta atque Auxilia seipsis indifferentia commentus est: ne si ea seipsis efficacia, atque (ut schola loquitur) inimpedibilia poneret, fatali necessitate evenirent, quæcumque inde in humanis voluntatibus sequerentur.

Equidem invidiâ temporum excidit Sixti IV. diploma Pontificium, quo Viri versipellis errores proscripti fuerant. At quis illos idcirco proscriptos neget? Aut quis novatorem eo principio nixum inficietur, facti fidem locupletissimam facientibus celeberrimæ Academiæ Commentariis; ipsis etiam Magistris hanc ipsam Sixti Censuram, in Leonardi Lessii os illidentibus, in Defensionis Præfatione? Fidem augent Balduinus Rythovius Professor Regius, qui Joannem Deckerium hoc telo petiit in Declamatione Academicâ, in Appendicem missâ: Franciscus Sylvius Duacensis Academiæ lumen, Libro de primo Motore: Didacus Alvares Opusculo de origine hæresis Pelagianæ cap. 32. cui Actorum copiam fecerant Theologi Lovanienses anno 1630. ut planè illiberalis in-

genii sit, ac studio partium nimis abrepti, latam in Rivium damnationem in dubium vertere, aut rem aliter gestam fabulari. Sed & dubitationem, si quæ fortè suboriri posset, amovet celebris Concertatio coram Clemente VIII. habita die 22. Martii 1604. ubi Dominicanus Interlocutor, Rivii Censuram in Molinianos regerens, inventa ad se Romæ damnationis Acta professus est, Societatis Oratore nihil in oppositum mufitante. *Sed quare isti Patres, aiebat ille, non adducunt Bullam Sixti IV. qua damnavit Doctorem Petrum Rivium, qui negabat contingentiam rerum, propter efficaciam divini concursus? Ex qua videtur damnata pariter sententia horum Patrum, qui putant per efficaciam antecedentem divinæ Gratiæ tolli libertatem Arbitrii.* Utebatur autem principio fundamentalis Patrum Societatis, videlicet quòd præsuppositâ aliqua suppositione antecedenti, ex qua infallibiliter sequitur hominem operari, tollitur contingentia rerum. Hanc Propositionem referunt Patres Lovanienses, & dicunt damnatam fuisse à Sixto IV. & ego feci maximam diligentiam pro inveniendâ illa Bulla in alma Urbe, sed inveni tantum omnia Acta hac de re, non tamen inveni Bullam. Cui nihil ab Societatis Oratore responsum legimus, quo vel Rivii Censuram elevaret, vel Molinam suum alio arasse vitulo demonstraret.

Ludunt igitur illuduntque Joannes de Lugo disp. 26. de Incarnatione sectione 6. & Paulus Leonardus parte 3. sectione 8. dum rem aliter gestam obtundunt, quàm ab Alvaresio scripta est: & Rivium alio principio nixum suos errores procudisse aiunt, ne Molinam iisdem ventis enavigantem proscribere compellantur. Quo etenim suffragatore, quo teste Alvaresii fidem sollicitabunt? Ab Guilielmo Mercero transmissâ privati cujuscumque Theologi, qui Rivium fertur exagitasse, scripta venditat Joannes de Lugo, ut principium ab eo positum, ab ipsis ejus impugnatoribus quodam sensu admissum ostendat. Verum quis privati viri lucubrationem publicis Academiæ tabulis anteponat; queis certò liquet Rivii Axioma ab summo Pontifice unâ cum derivatis erroribus fuisse proscriptum? Quis incertas scriptiones, nec quidem typis vulgatas, ac sine temporis nota, integræ fidei documentis præferenda putet; nisi qui Historiæ fidem pro nutu atque arbitrio metiri velit? *Vultis vera esse, quæ in vestris comprehensa sunt scriptis? Et quæ in nostris consignata sunt litteris, confiteamini necesse est, vera esse.* Arnobius libro 1. adversus Gentes. Sed age, neglecto fonte, veri-

Lege Joan.
de Lugo lo-
co laudato.

veritatem ab rivulis derivemus; demum integram fidem laudatis à Lugo quaternionibus; & sic quoque confecta res erit. Lovaniensis siquidem Academiae Propositiones, Rivii erroribus oppositas, recensens Theologus ille, hanc tertio in ordine constituit: *Dei praescientia de futuro rerum eventuum contingentium ac futurarum, inferit per necessariam consequentiam, res illas fore: cujus tamen consequentia necessitas, non tollit contingentiam consequentis.* Opposito igitur errore laborabat Rivius: atque ex consequentiae necessitate, ab inevitabili ac seipso efficaci decreto derivatâ, consequentis necessitatem colligebat. Hac porro argutiâ millies usum Molinam, ut decreta atque Auxilia seipsis efficacia exploderet, suaque illa indifferentia effutiret, is unus negabit opinor, qui se in ejus lectione peregrinum fatebitur. Quocumque ergo se vertant Molinae Vindices, laqueum non effugient; nec novum illum indifferentis gratiae Architectum à Sixti I V. Centurâ liberabunt.

Sed quid vetera confectamur? Certè, si quæ à nonnullis Molinae Interpretibus fertur Decretorum indifferentium expositio Molinae menti respondet, nil dubium, totam illam lascivientis ingenii fœturam, nostris demum temporibus damnatam esse. Nonnulli quippe, ut hanc Decretorum indifferentiam, ab humanâ voluntate pro nutu & arbitrio flectendam, & ad certum effectum determinandam, cum divina omnipotentia concilient, id demum effutunt, suam Deum omnipotentiam, seu quod idem est, omnipotentiae suae vim, humanae voluntatis arbitrio committere, ac veluti subdere, ut hanc homo pro nutu suo flectat, quove libuerit verlet atque convertat. Ita Molinae sui systema interpretatur ac defendit ex instituto Christophorus Ortega, primi in Societate subfellii Theologus, Controversia 3. de Decretis disp. 2. quæst. 4. Certamine 3. Deum ita decernentem inducens: *Decerno concurrere ad actionem etiam pravam, vel ejus oppositam, vel non concurrere ad illam, pro libito voluntatis create: id est, meam illi omnipotentiam ad concurrendum, vel non concurrendum extrinsecus preparo subdoque, ut eâ utatur creata voluntas, non secus atque habitibus infusis, quos ad actus supernaturales ipsi inherentes immitto.* Tum Certamine 4. num. 6. *Deus decreto suo activitatem omnipotentiae suae applicat ac subdit arbitrio voluntatis create.... Et cum ea sibi applicatâ, atque arbitrio suo subditâ activitate omnipotentiae utitur....* Subinde num. 7. *Deus suae*

omnipotentiae activitatem, & virtutem activam, create voluntatis arbitrio ac libera determinationi subdit. Ac demum disp. 3. quæst. 2. Certamine 1. num. 5. & Certamine 2. num. 1. & Certamine 3. num. 4. hunc prolixæ disputationi Colophonem apponit: *Deus voluntatis suae, seu quod idem est, omnipotentiae suae activam ad extra virtutem, quoad usum applicat create voluntati; ut eâ sicut habitui ipsi infuso utatur, ut diximus; nec concursum suum aliter voluntate sua prosequi ac preparare debet, aut potest.* Ita eruditus Interpres. Nec satis scio, an alia Molinae mens esse possit. Ecquo enim pacto divinae Omnipotentiae decreta auxiliave humanae voluntati committi, subdique possunt, ut ab ea pro nutu atque arbitrio flectantur, nisi ei quoque commissâ subditaque omnipotentia censeatur, cujus & ipsa decreta sunt, & auxilia? Certè Bastida in Congregatione 10. coram Paulo V. non absimiliter contendebat, Deum omnipotentiam suam nostro arbitrio dimississe. Has porro luxuriantium ingeniorum ineptias, solenni decreto damnavit Innocentius XI. post habitum accuratum Theologorum examen anno 1679. ut hic habes.

Feria quarta die 23. Novembris 1679.

In Congregatione Generali S. R. & universalis Inquisitionis, habitâ in Palatio Apostolico Montis Quirinalis coram SS. D. N. Innocentio Papa XI. ac Eminentissimis DD. S. R. E. Cardinalibus, in universa Republica Christiana adversus hereticam pravitatem Inquisitoribus Generalibus, à sancta Sede Apostolica specialiter deputatis.

Cum supradictis Eminentissimis & Reverendissimis DD. delata fuerint duae Propositiones, scilicet, Deus donat nobis omnipotentiam suam, ut eâ utamur, sicut aliquis donat alteri villam vel librum: Et, Deus subijcit nobis suam omnipotentiam; eorundem jussu per Theologos ad id specialiter deputatos diligenter examinatae fuerunt. Quorum Votis auditis, & re Sanctissimo D. N. relatâ, & coram sua Sanctitate proposita, unâ cum Votis ipsorum Eminentissimorum & Reverendissimorum Dominorum S. R. E. Cardinalium, Sanctitas sua decrevit & mandavit, ut ambae Propositiones omnino prohiberentur, sicut eas presenti Decreto damnat & prohibet, ut temerarias, ut minimum, & novas: mandatque ne quisquam deinceps, cujuscumque sit gradus, ordinis aut conditionis, illas vel illarum alterutram audeat imprimere, vel imprimi facere, siue scriptis aut etiam ore tenus docere, vel asserere; sub pœnis & Censuris, in Indice librorum prohibitorum contentis;

aliisque Sanctitatis sue bene visis. FRANCISCUS RICARDUS S. R. & Universalis Inquisitionis Notarius.

Die 2. Decembris 1679. supradictum Decretum affixum & publicatum fuit ad Valvas Basilicæ Principis Apostolorum, Palatii sancti Officii, & in aliis locis solitis & consuetis Urbis, per me Franciscum Perinum SS. D. N. Papa, & sanctissima Inquisitionis Cursorem.

Vis aliud ad mensuræ cumulum? Rem dabo in Orbis theatro tractatam nuper. Palmaria duo scholæ Thomisticæ dogmata, de gratuitâ Electorum Prædestinatione, ac de Gratiâ seipsa efficaci, quibus oppugnandis totus incubuit Ludovicus Molina, suamque, quanta quanta est, Concordiam consecravit, usque adeo nuper supremæ Inquisitionis iudicio vindicata assertaque sunt, ut non modò præcipites eorumdem accusatores Censorio stigmatæ confixerit sacertuendæ fidei Senatus, sed & hanc communem Patrum doctrinam judicavit. Cum enim anno 1692. die 27. Augusti, Adrianus Van Wick, vulgatâ per Hollandiam Epistolâ, Assertionem hanc, quâ severiorum Thomistarum sententia expressa est, multis conviciis proscidisset: *Deus omnibus jam hominibus ob Ada lapsum aterna damnationi obstrictis, per æternum Decretum mera sua misericordia, aliquos absque respectu tunc ad futura eorum merita, ex illis eligit, quos proposuit salvare; reliquis omnibus in damnatione relictis. Deus illis omnibus quos proposuit salvare, huiusmodi dispensat gratiam, quæ facit illos bonum velle & operari, subtrahens interea omnibus aliis gratiam, quæ ipsis est necessaria, ut bonum velle & operari possint. Adeo ut illi infallibiliter omnes salventur, & hi indeclinabiliter omnes pereant: cum hanc, inquam, assertionem conviciis proscidisset, Romam post Menses aliquot delata res est. Dedit sacer Ordo Theologos Viros, qui de vulgata Epistolâ sententiam dicerent. Sic illi de scripto censuerunt: *Nos infrascripti attentè consideravimus translationem Latinam Epistolæ Adriani Van-Wick Presbyteri, Belgico sermone impressæ die 27. Augusti 1692. & unanimi Voto judicamus, illam esse manifestè transgressivam Decretorum sanctæ Sedis Apostolicæ, gravissimè censurando sententiam communem sanctorum Patrum & Theologorum, de gratuita Prædestinatione, & Gratia per se efficaci: atque ex isto capite, nec non ex audaci & injurioso modo procedendi, turbando unionem & pacem inter Missionarios Catholicos, existentes in partibus hereticorum, censemus esse valde seditiosam & scandalosam, atque adeo prohibendam. Salvo tamen, &c.**

Ita censeo ego F. THOMAS MARIA BOSIUS Commissarius S. Officii.

Ita censeo ego F. PHILIPPUS A S. NICOLAO Qualificatore S. Officii, Ord. Carmelitarum Discalceatorum.

Theologorum Deputatorum iudicium probavit, suumque fecit Eminentissimorum Patrum Confessus. Apostolico Internuncio Bruxellis commoranti injunctum, ut latum iudicium Adriano significaret, eundemque ad parendum & subscribendum adigeret. Quod cum ille detrectasset, & in audaciæ suæ defensionem sacris fidei Quæstoribus libellum supplicem typis editum obtulisset, sub hoc titulo: *Ad Eminentissimos & Reverendissimos S. R. E. Cardinales & Inquisitores supremos, Supplicatio Adriani VanWick Presbyteri secularis, & in Hollandia Missionarii, ut non cogatur subscribere iudicio Patris Commissarii, & alterius Qualificatoris;* meruit fulmen secundum. Iterato mandato jussum illi, ut iudicio subscriberet: ejusque libellus, unâ cum aliis ejusdem solenni Decreto confixus est, die 19. Maii 1694. Quidni verò totum id in Molinam regeramus, qui hæc ipsa Thomistica dogmata, mitioribus etiam verbis expressa, proscidit, modisque pessimis habuit? Legatur, si per otium licet, quæst. 22. art. 1. disp. 2. Item quæst. 23. art. 1. & 2. disp. 3. Item art. 4. & 5. disp. 1. Mem. 6. ubi *duram, crudelem, Deo indignam*, ac etiam *in fide erroneam* sententiam appellat, quam nedum censurâ liberam voluit sacer Ordo, sed communem Patrum doctrinam judicavit. Quod enim à delegatis Theologis iudicium latum est, suum fecit; atque ut illi præceps criminatorem subscriberet, iteratò jussit.

Sed & nunc tandem, atque hoc ipso anno 1700. sacer Cleri Gallicani Conventus, in Palatio San-Germano celebratus, Molinæ systema Molinianæque doctrinæ caput (De pacto inter Patrem æternum & Filium inito, ut quoties homo solis naturæ viribus id omne quod agere potis est adimpleverit, gratiam illi largiatur) gravi temeritatis & erroris notâ confixit. Abit igitur in fumum seu potius ad orcum relegatur commentitia illa lex gratiæ omnibus facientibus quod in se est conferendæ, in cuius defensione Gregorius de Valentia non operam modò, sed & animam posuit. Illi confutandæ magnam Institutionis suæ Pastoralis partem consecraverat Illustrissimus Remensium Archi-Præsul: quam uterque Cleri Gallicani Ordo in Comitibus Generalibus autoritate sua confirmavit, solennique sanxit Decreto 4. die mensis Septembris proximè elapsi, uti patet ex ejusdem Cleri Gallicani

licani Commentariis, quorum partem excerptam exhibemus.

Ex Actis quibus titulus:

CENSURA

E T

DECLARATIO

CONVENTUS GENERALIS CLERICI
GALLICANI

Congregati in Palatio Regio San-Germano anno millesimo septingentesimo, in materia Fidei & morum, ejusdem generalis Conventus jussu publicata, & typis edita.

§. I.

DE GRATIA.

„ 5. **A**xioma illud Theologicum, facienti
„ quod in se est Deus non denegat gratiam, non solum verissimum est atque doctrinæ Scripturæ, Conciliorum & Patrum
„ maxime consentaneum: verum etiam per illud significatur obligatio quam Deus habet dandi gratiam facienti quod in se est, nec solum facienti quod est ex se viribus gratiæ, sed etiam illi qui cum non habeat gratiam, facit quod in se est viribus naturæ.
„ 6. Quia tamen opera viribus solius naturæ elicitā omnino sterilia sunt atque incapacia merendi dona intrinsecè & Theologicè supernaturalia: ideo dicimus obligationem quam Deus habet conferendi gratiam facienti quod est in se viribus naturæ, seu viribus gratiæ purè naturalis, sive non Theologicè supernaturalis, non oriri ex bonitate talium operum, aut ex ullo merito sive condigno, sive congruo, quod insit in illis operibus in ordine ad gratiam; sed ex pacto inter Christum fidei iussorem nostrum & Patrem inito, ad gratiam hominibus conferendam propter Christi merita, respiciendo ea naturalia opera ut purum terminum, non ut meritum ullum aut rigorosam conditionem.

CENSURA.

„ Hæc duæ propositiones, quæ parte causam discernendi inter justos & non justos in operamere naturalia referunt, Semipelagianismum instaurant mutatis tantum vocibus.
„ Pactum autem quod inter Deum & Christum asseritur, commentum est temerarium, erroneum, nec solum tacente, sed etiam adversante Scripturâ & SS. Patrum traditione prolatum.

CAPUT DECIMUM SEXTUM. &c.

Pag. 99. lin. 19. post hæc verba, auxiliis gratiæ, sic lege

Ea quippe gratuita Prædestinatio est, quam uti perennem Ecclesiæ fidem totis viribus astruit Augustinus, partim Apostoli autoritate victus, partim singulari Dei revelatione perfusus: quamque citra erroris periculum negari non posse, constanter asseruit adversus inficetos obrectatores, qui sententiam hanc, aut primum ab illo invecram, aut opinione liberam dictitabant. In cujus quæstionis solutione, inquit ille libro de Prædestinatione Sanctorum capite 4. laboratum est quidem pro libero arbitrio voluntatis humana, sed vici Dei gratia. Nec nisi ad illud potuit perveniri, ut liquidissima veritate dixisse intelligatur Apostolus: Quis enim te discernit? Quid habes quod non accepisti? Si autem accepisti, quid gloriaris, quasi non acceperis? Quod volens etiam Martyr Cyprianus ostendere, hoc totum ipso titulo desinivit dicens, In nullo gloriandum, quando nostrum nihil sit. Ecce quare dixi superius, hoc Apostolico præcipue testimonio, etiam me ipsum fuisse convictum, cum de hac re aliter saperem, quam mihi Deus in hac quæstione solvenda, cum ad Episcopum Simplicianum, sicut dixi, scriberem, revelavit. Et libro de dono Perseverantiæ cap. 19. Hoc scio, neminem contra istam Prædestinationem, quam secundum Scripturas sanctas defendimus, nisi errando disputare potuisse. Et capite 20. libri ejusdem: Hæc est Prædestinatio manifesta & certa Sanctorum, quam postea diligentius & operosius, cum jam contra Pelagianos disputaremus, defendere necessitas compulit: nempe quod unum ex fidei Capitibus esset, sine quo vera Christi gratia stare non potest. Ac tandem capite 23. Ille itaque dicat, Ecclesiam aliquando in fide sua, non habuisse veritatem hujus Prædestinationis & gratiæ, quæ nunc contra novos hereticos, curâ diligentiore defenditur: ille, inquam, hoc dicat, qui dicere audeat, aliquando eam non orasse, vel non veraciter orasse, sive ut crederent infideles, sive ut perseverarent fideles. Quæ bona si semper oravit, semper ea Dei dona esse utique credidit, nec ab illo esse præcognita, unquam ei negare fas fuit. Ac per hoc prædestinationis hujus fidem, quæ contra novos hereticos nova sollicitudine nunc defenditur, nunquam Ecclesia Christi non habuit.

Hæc obiter notare libuit, ne quis Molinæ negotium faceffitum existimet, ob levioris momenti quæstionem, quæ citra fidei periculum inoffenso pede pro arbitrio percurri posset; neve quis falsò putet, Augustinianæ doctrinæ vindices, nimis in ea

intentanda lite obefæ naris exstitisse, nec satis ea inter sese Theologiæ dogmata feliciter discrevisse.

Si quis tamen Bellarmini mentem scire avet, de altera quoque Prædestinatione gratuita, quæ videlicet electionem ad gloriam ipsi etiam absolutæ electioni ad gratiam præviā facit (quæ communis Thomistarum opinio est) in eam illum pedibus manibusque venisse, inveniet libro 2. supra laudato cap. 14. ubi nonnullis Scripturarum ac Patrum locis facit satis.

Bellarminum excipit Franciscus Cardinalis Toletus, alterum ejusdem Societatis lumen clarissimum. Nullas quidem ille in Auxiliorum controversia partes habuit, utpote qui rebus humanis exemptus est antequam Romæ lis moveretur: at ea in editis pridem operibus dogmata statuit, queis gratiam congruam & scientiam circumstantiarum exploratricem suffodit: atque id quidem adeò dilucidè, ut Molinam, jam ante typis editam Concordiam sua in scholis paradoxa mustitantem exerto digito demonstrasse, atque ex instituto contutasse, certò colligas. De Matthæi quippe vocatione sermonem habens, in suis ad Evangelium Lucæ Commentariis, cap. 5. annotatione 54. primo intuitu, S. Chrysostomi sententiam, quâ Molinianum Systema videtur astrui obviam sibi facit: Cujus rei gratia, non cum Petro simul ac Joanne & aliis discipulis Matthæum vocavit? Certe quemadmodum tunc ad illos accessit vocavitque, quando obtemperaturos sciebat; sic Matthæum quoque nunc vocavit, quando miraculorum famâ perdomitum minime reluctaturum videbat. Qua de causâ etiam Paulum post Resurrectionem piscatus est. Nam qui corda scrutatur & occulta mentium perspicit, is etiam quando unusquisque ad obediendum paratus erat non ignoravit. Propterea non continuo quando durior ferit, sed post mille miracula & insignem atque pervagatam de se famam, aptiorem jam ad obtemperandum vocavit. Cui Chrysostomi sententiæ, objectionis loco positæ subinde satisfaciens Purpuratus Theologus, adversam Molinæ viam init; gratiamque congruam, & scientiam propitiarum circumstantiarum exploratricem, totis lacertis oppugnat.

Huic doctrina, inquit, adversari videtur, quod ipsemet Paulus de sua vocatione ad Galatas 1. scripsit: Cum placuit ei qui me segregavit ab utero matris meæ, & vocavit per gratiam suam, ut revelaret in me Filium suum, & Evangelisarem illum in gentibus, continuo non acquievi carni & sanguini. Non dicit Apostolus, quando novit

me obediturum, sed quando illi placuit, qui per gratiam me vocavit. Non exspectat Deus semper arbitrium nostrum; quia suâ gratia ipsum excitat, ipsique dat velle & perficere, qui etiam rebelles convertit & compellit voluntates. Tunc ergo vocavit quando illi placuit: & si ante vocasset, utique respondisset & obtemperasset. Non ergo ratio aut tempus vocationis hujus & similium referri debet in hominis arbitrium, sed in Dei beneplacitum, cui sic visum est, sicque disposuit. Potest autem intelligi Chrysostomus sic, tunc vocasse discipulos quando sciebat illos obtemperaturos, nimirum per gratiam suam. Sciebat enim quando ipse operaturus erat in eis, ut obtemperarent vocanti, & tunc vocavit. Nisi sic intelligas, doctrinam non probo. Nec solum doctrina huic Chrysostomi in hac parte non consentio, sed contrariam omnino veram existimo; nimirum tunc vocasse discipulos multos, & præsertim Matthæum, quando plus erant impediti, magisque distinebantur, ne venirent. Sic Petrum & Andream vocavit, quando retia mittebant in mare, nec exspectavit, ut jam essent missa, nec prævenit antequam mitterentur, sed dum mittebant: hoc enim majus adferebat impedimentum. Sic Paulum vocavit, quando in via erat, nec prævenit profectionem ejus, priusquam acciperet litteras à summo Sacerdote; & vocavit dum opus fervebat, minusque ad obsequendum paratus erat. Sic nunc Matthæum vocat, non antequam sederet, sed dum ad ipsum Telonium sedebat, & ipsi operi incumberebat. In hoc enim virius vocantis magis clarescit, & magnitudo gratia revelatur; minusque homo de sua virtute meritisque potest presumere. Totus est Augustinus in hac doctrina, quam in hac parte probo. Ita Cardinalis Toletus.

Domesticis Molinæ &c.

Pag. 102. lin. 23. post hæc verba, consulere liceat.

AD CAP. 15.

Mihi tamen ingentis piaculi loco fuerit, si quod idem ille Franciscus Macedo memorie prodidit, silentio prætermiserim: Cum Henrico, scilicet, omnes penè alios Hispania Doctores idem sensisse. Qua vel unâ gravissimi viri, iis temporibus & locis proximi, qui magnam in Societate vitæ partem exegit, adnotatione, Molinæ causa attonsa fractaque est: nisi quis fortè putet, universos penè Doctores, quasi in noctem datos, in erroris patrocinium conspirasse.

Verum &c.

Pag. 106. lin. 20. post hæc verba, in Apologia Thomistarum art. 6. adde:

ab Antonino Reginaldo in Thesibus Apologeticis

Hom. 31.
in Matt.

Coll. 10.
pag. 368.

logeticis, Thesi 7. à Joanne Cazalas in Candore Lili vindicato §. 160. à Seraphino Piccinardo tom. 3. de approbatione doctrinae S. Thomae lib. 2. quaest. 2. art. 2. nuper Illustrissimus Remensium Archiepiscopus &c.

Pag. 107. lin. 13. à fine post hac verba,
& animo aliena.

Certè si qua Gaspari Scioppio fides est, in Consultatione quam anno 1634. sub ementito nomine F. Juniperi de Ancona vulgavit, non est cur eam Marianae lucubrationem vertamus in dubium; cuius exemplar cum Francisco Cardinali Barberino, Nicolao Riccardio S. P. A. Magistro, nec non D. Conrio Thuamensi Archiepiscopo communicatum scribit; remque totam Urbano VIII. perspectam observat. At scriptori minùs Societati propitio integram hoc in capite fidem dare, religio mihi est. Tantum quisque ejus suffragio tribuat, quantumtribuendum judicaverit.

Quod alterum de morte & immortalitate &c

Pag. 109. lin. 20. à fine, post hac verba,
à fidei regula sancta.

Sed & adeo libri hujus author φιλόνομος est, ejusque animo penitus insedit immoderatum studium trahendi in contrarium, ut Augustinum novitatis reum egerit; quasi qui in exponendâ Prædestinatione, viam cæteris Ecclesiae Patribus imperviam aperuerit. *Augustinus*, inquit hoc ipso in loco quem antè notavimus, *primus, quod sciam, inter antiquos, in veteri spatio novam sententiam excogitavit: nova impressit vestigia. Videbat Paulum docentem, Non ex operibus &c. His victus argumentis novam Prædestinationis formam invexit post lapsum hominis, non fluxam quoad eventum & circumstantiam; quippe non ex libero arbitrio, sed ex gratia certam prorsus & ratam, atque ex vocantis voluntate. Quo telo, rubigine jam exeso, à Semipelagianis appetitum fuisse D. Augustinum, ex literis S. Prosperi & Hilarii notum est. Quippe qui sanctissimum gratiae vindicem inductæ novitatis incusabant; veteres tractatores aliter Apostolum interpretatos dictitabant; ipsiusque Prædestinationis certitudinem non ex vocantis, sed ex vocati proposito repetebant. Itane verò scripturuisse Marianam existimabimus; Marianam, inquam, veritatis amatorem, ac pietatis cultorem optimum? Absit. Quidni potiùs interpolatum, aut affictum ex integro dicamus opus illud, quo Semipelagianismus, non obscurè, sed palàm ac*

detractâ larvâ ab autore inducitur? Id ni dicamus, Marianam professum Semipelagianum habebimus. At de illo jam satis.

Pag. 111. lin. 33. post hac verba, primi
parentis &c. sic lege:

Sed & annis ferè triginta antequàm Concordiam suam typis ederet Ludovicus Molina, atque hac ipsa ætate qua suum imple systema cœpit mente concoquere, anno nimirum 1560. in eodem illo Romano Collegio defensæ fuerant Assertiones Theologicae ex 1. parte Divi Thomae, quas inter quatuor istæ habebantur, Augustinianis ac Thomisticis dogmatibus consentaneæ.

49. Prædestinati dicuntur ii &c.

Pag. 112. lin. 33. post hac verba, omnes ^{Ad cap. 15.}
ferè remiserunt, sic lege.

Quandoquidem autem ad antiqui ora Ludovico Molina tempora divertit oratio, præterire hoc loco nefas arbitror Alphonsum Salmeronem, è primis S. Ignatii sociis unum: qui licet obliquas oppugnandi Calvinismi vias in Concilio Tridentino iniisset primum, paternis attamen monitis abductus, & frequentibus venerabilium Patrum Collationibus doctior factus, ea demùm in editis lucubrationibus fundamenta posuit, quæ uti Calvinianam hæresim rectâ perunt, ita & oriturum Molinismum in antecessum occuparunt. De præscientia etenim sermonem habens ex instituto, disput. 1. præliminari in Epistolam ad Hebræos, duplicem duntaxat in Deo scientiam agnoscit; unam nimirum simplicis intelligentiæ, ut schola vocat, quam & is idealem interdum appellat; alteram visionis, mediâ quacumque procul ablegatâ. Quin & ea ipsa futura libera, conditione suspensa, queis internoscendis Scientiam-mediam Deo necessariam commentus est Ludovicus Molina, à Deo sciri decernit scientiâ visionis, si positâ demum conditione reipsa contingant; aut scientiâ simplicis intelligentiæ, si semotâ conditione non accidant: ut omnis planè Scientiæ-medix locus vacet.

Scientia simplicis intelligentiæ ad primam idealem reducitur, qua non tantum videt creabilia cuncta, quæ condidit; sed etiam possibilia omnia, quæ condere potuisset, si voluisset, non autem condidit. Quando ergo B. Thomas docet, futurum contingens, ut contingens est, nulli subjacere cognitioni, aut Angeli aut etiam Dei ipsius, intelligendus est loqui de scientia illa visionis, qua ab æterno res omnes ut in se sunt prævidit: nam tali cognitione Deus non attingit futurum contingens, nec in causis

causis quas non habet, quia contingens est, nec in seipsis, quia nullo tempore sunt sibi futura, sed sibi presentia. Quod si aliquando Scriptura dicant, eum prænoscere quæ nec certas causas habent, nec in seipsis sunt futura, ut ibi, Rap-
tusest ne malitia mutaret intellectum ejus,
aut ne fictio deciperet animam illius: &
cum dixit David, Si tradent me viri Cei-
læ, & viros qui sunt mecum in manus
Saul? Dixit ei Dominus: Tradent: ac rur-
sus Matthæi 11. Si in Tyro & Sidone fa-
ctæ essent virtutes, quæ factæ sunt in
vobis, olim in cilicio & cinere pœniten-
tiam egissent: & cum ad Apostolum dixit:
An putas quia non possum rogare Patrem
meum, & exhibebit mihi modò plusquam
duodecim legiones Angelorum? Videtur
ergo Deus futurum contingens sub ratione futu-
ri vidisse in libero arbitrio. Dicendum est,
hæc & quæ sunt hujusmodi, in illa scientia
visionis non vidisse; quia visibile non est in se-
ipso, quod nec in se nec in causa est, nec fuit, nec
futurum est; sed alia scientiâ, nimirum ideali,
non qua res vidit ut conderet, sed ut possibi-
les à se condi, in quibus habebant certas causas,
ut aliquo tempore existerent. Nec enim tantum
Deus vidit ea, quæ nunc sunt omnia, sed etiam
omnia, quæ aliter evenire potuissent, & quæ
ex illis consequerentur. . . . Quæ verò asserit se
videre ut futura, quæ tamen reipsa nunquam
existerunt in rerum naturâ, ut in prædictis
exemplis manifestum est relictum, non videt
scientiâ visionis, sed tantum scientiâ simplicis
intelligentiæ, quæ pars est visionis idealis.

Quin & ea subjungit vir eruditus, quæ
facile suspicer, eum jam jam Molinam,
cæterosque Angelicæ doctrinæ Olores inau-
divisse, novi systematis semina privatis in
scholis subtimidè jacentes, eisdemque de
industria confutasse; ne conceptos ignes
latè diffunderent. Hæc latius, inquit, pro-
secutus sum, quia video quosdam implicari,
nec facile modum assequi, quomodo Deus vi-
derit futura contingentia, quæ nunquam futu-
ra sunt: & propterea putant doctrinam B.
Thomæ falsam, quod dixerit futura contingen-
tia ut futura sunt, à nulla cognitione vel ho-
minis, vel Angeli, vel Dei ipsius attingi: quia
est sermo de scientia visionis, non de scientia
ideali.

Nil minùs eliquatè alterum Molinianæ
Concordiæ systema petit Alphonsus Sal-
mero disput. 21. in cap. 8. Epistolæ ad Ro-
manos; ubi Prædestinationem omninò gra-
tuitam multis adstruit, omnemque præ-
scientiam boni usus gratiæ exploratricem
eliminat, tanquam Deo prorsus indignam,
& sacri mysterii dignitatem & vim omni-
nò concutientem. Ut hinc noveris, quàm

meritò in Institutione Pastoralis observave-
rit Eruditissimus Remensium Archiepisco-
pus; Societatem eo dogmate, veluti pri-
mo nutricis lacte potatam esse eodemque
à primis Instituti Magistris informatam,
priusquàm nova Molinæ commenta plenius
ebiberet. Quidam, inquit Salmero peregri-
nam sententiam exponens, ad vitandam Pela-
gianam invidiam asserunt, Deum velle ex se, da-
re gratiam omnibus, unde & illam cunctis
ex se offert: & quia vidit, qui eam recepturi
& ea benè usuri essent, ideo istis statuit con-
ferre gratiam & vitam æternam; cæteris au-
tem non ita. Nec ex hoc sequitur, quòd gra-
tia detur ex meritis, quasi Deus prævidens
opera acceptaverit illa, tanquam digna gratiâ,
sed accipiuntur ut causa sine qua non. Exem-
pli gratia, Rex arma & coronam donat ex
liberalitate sua; ex prudentia tamen ea non
vult dare; nisi illis quos novit armis esse benè
usuros. Molinianos audire hîc mihi videor,
idem omninò statuentes, atque illa ipsa
exempla ad institutum usurpantes. Quibus
è vestigio os ita verberat Salmero: Sed &
hoc falsum est, & multis rationibus perimi-
tur. Quia etiam juxta hunc loquendi modum,
gratia non esset Prædestinationis effectus; sed
potius causa. Non enim prædestinatur quis,
nisi gratia benè usurus prævideatur: at hoc se-
quitur gratiæ collationem. Nec enim videri
potest bonus usus gratiæ futurus, si in potestate
ejus fuerit malè uti, nisi ponamus ante Dei
conspectum, quod verè acceperit gratiam, &
quod perseveranter ea benè usurus fuerit: quo-
niam futurum contingens, secundum D. Tho-
mam, à Deo non prævidetur ut futurum, sed
ut præsens. Si ergo prædestinatio requirit boni
usus gratiæ prævisionem, & hæc divina præ-
visio boni usus gratiæ requirit collationem gra-
tiæ; aperte infertur quod collatio gratiæ, non
esset effectus prædestinationis: quod est perple-
xum, & contra vim ipsius vocis, prædesti-
natio. Nam si in Dei Præscientiâ collatio
gratiæ præcedit bonum usum ejus, quomodo
ergo quod est posterius, potest esse causa aut
ratio prioris? Ubi verò momentis benè mul-
tis institutum illud exsecutus est Salmero,
ita demùm colligit: Infertur ergo prædesti-
nationis certitudinem, non ab operum bono-
rum præscientiâ, sed à benignâ Dei providen-
tiâ proficisci. Nec ideo quia quis præscitur sal-
vandus, sed contrà, quia prædestinatur sal-
vandus, ideo præscit eum salvandum sub ra-
tione futuri, & non sicut in contingentibus.
Ideo in prædestinatione continetur certitudo sa-
lutis; & in ea, certitudo conferendæ gratiæ,
& bonus usus gratiæ, & meritorum & per-
severantiæ in finem. Repugnat enim divina sa-
pientia, certo aliquid in finem ordinare, &
non

non ad certa, & promoventia in finem media. Quo Salmeronis iudicio Molinismus in antecessum attonsus est.

CAPUT DECIMUM NONUM.

Molinam, ejusque recens inducta Paradoxa, pari zelo exagitant Galli à Societate Professores, uti antiquæ Patrum Traditioni, maxime verò D. Augustino injuria.

Hispanis & Italis Molinianæ Doctrinæ Oppugnatoribus accinunt Galli: atque ii maxime, quos in Patrum Lectione versatissimos fuisse notum est. Prodit primus in ordine Claudius Typhanius, anno 1593. Societatem ingressus; quo tempore à prelo recens Molinæ Concordia vulgabatur: Vir morum sanctimoniæ & literarum cultu spectatissimus: Philosophiæ ac Theologiæ Professor emeritus: Academiæ Mussipontanæ Cancellarius: Collegiorum Remensis, Mussipontani, Metensis, Flexiensis Rector; ac demum Provinciæ Campaniæ Moderator: *Mitissimi ingenii vir*, ut loquitur Alegambe in Bibliotheca, & *sedatis admodum moribus*. Is libro De Ordine, deque Priori & Posteriori, quem quo tempore summam in Campania apud suos Præfecturam obibat, typis edidit, Scientiam Mediam, Molinianæ doctrinæ Caput, unde cætera penè omnia derivantur, fusiùs exagitat, tamquam Scripturis ac Patribus repugnantem, ac velut abortivum novissimæ fœturæ partum exsufflat; ejusque parentem multo sale defricat. Pauca hæc ex erudita lucubratione defloramus.

Capite 24. disertè proficitur, *Nullum alium Theologum ante Molinam, ne per somnium quidem, de Scientia Media cogitasse; nec illam ullibi vel supposuisse vel adhibuisse, ad ullam sive Scripturæ Sacræ, sive Theologiæ Scholasticæ difficultatem expediendam.* Tum sub initium Capitis sequentis, distinctè pronunciat, *Sententiam negantem Scientiam Mediam, & antiquitate & defensorum numero ac auctoritate longè esse meliorem.* Subinde Capite 26. post relata Molinæ verba, quæ triplicem Scientiam in Deo distinguendam decernit, nisi periculose in concilianda libertate Arbitrii cum Divina præscientiâ hallucinari velimus, hoc illis nigrum theta præfigit: *In qua Molina doctrinâ, multa occurrunt improbanda.* Ac primum id periculi, in concilianda sine ejus distinctione nostra libertate cum præscientia divina, quo minus cautos minusque intelligentes terrere se putat, non ego so-

lus non video, sed neque ulli ante eum Doctores Scholastici aut Sancti Patres animadverterunt. *Quasi verò Dei cum causis sive liberis sive necessariis agendi modus ex nostra mente nostrisque cogitandi & distinguendi modis pendeat!* Nam voluntas creata in eo statu, in quo Scientiâ Mediâ videri dicitur, ideo est libera, quia in eo, si vellet, re ipsa posset facere oppositum ejus, quod pro innata sua libertate factura dicitur; cum in eo etiam statu, in quo per scientiam visionis videtur, pro sua eadem libertate possit etiam, si velit, non facere quod facit, vel oppositum facere: quidni sine additâ vel cogitatâ ullâ Scientiâ Media, aut alia conditione positâ, verè & perfectè fuerit libera? Ac tandem capite 41. Num. 3. Molinæ audaciam, quâ se cæteris Theologis feliciùs pervidisse, atque expeditissimum concordie modum excogitasse gloriabatur, retundit, statuitque *Concordiam præscientiæ, providentiæ, & concursus divini cum nostra libertate, ab antiquis & præstantissimis Theologis, longè melius solidiusque declarari, quàm ab ullis recentioribus.*

Accedit Joannes Phelippæus, altero post Typhanium anno Societatem professus: vir, ut inquit Philippus Alegambe in Bibliotheca, *reconditiore doctrina, in Sanctorum Patrum & Conciliorum lectione admodum versatus; Rothomagensis Collegii Rector.* Annum ille vigesimum quintum duntaxat agebat, dum coram Clemente VIII. Molinæ causa tractabatur: atque idcirco junior erat quàm ut Principibus permixtus Achivis, intimis Societatis consiliis admoveretur, qui de nova tentata lite sententiam diceret, suosque ab instituto dehortaretur. Verùm annis ac literis auctus, quid de novo invento sentiret, in suis ad Oseam Commentariis adeò luculenter expressit, ut nemini dubium esse possit, Molinam ab Societatis scholis eliminandum, si penes Phelippæum iudicium stetisset. Liqueat id maxime ex ejus ad Caput secundum Commentatione, ad versus scilicet 14. 15. 16. & 17. ubi gratuitam Prædestinationem, & ingentem divinæ gratiæ efficaciam multis adstruit argumentis: tum varios exponendæ efficaciæ modos exponit. Quo officio feliciter exsolutus, ita in Scientiam Mediam & excogitatum à Ludovico Molina exponendæ efficaciæ modum stylum acuit, §. 11. *Non inclusi,* inquit, *in modis illis gratia efficacia aut statuenda aut declaranda, scientiam conditionalem, quam post Molinam Theologi benè multis incluserunt. Fulgentius eadem proximè ratione illam rejecisset, qua libro De veritate Præ-*

destinationis & gratia, agens contra illos, qui asserabant, Deum ideo Parvulis quidem aliis, ante rationis usum morituris, de Baptismo providisse, quod prœvidisset, si viverent, futuros bonos: aliis non providisse, quod prœscisset, si vixissent, malè victuros, quod est futurum conditionatum, Capite 7. ita scribit: Secundum rectam itaque Fidem, ac
 „perspicuam veritatem, quod attinet ad
 „parvulum qui sine beneficio secundæ
 „Nativitatis huic vitæ subtrahitur; si-
 „cut prœscisse fatendum est Dominum
 „parvuli futuram mortem, quæ verè fu-
 „tura erat; sic absurdè dicitur, Domi-
 „num prœscisse futura peccata, quæ fu-
 „tura non erant. Neque enim Domi-
 „nus rerum omnium conditor facienda
 „prœscisset, quæ facienda non essent, &c.
 Quod probare pergit ex cognitione rerum, quas Deus presentes habet in aternitate, seu futura nobis illa sint, seu nobis fuerint præterita, Deo uni presentes. Cum in ea aternitate, quæ facienda aut futura non sunt, nullam habeant præsentiam; qualia sunt futura conditionata, verè non futura. Quin etiam Augustinus libro de Prædestinatione Sanctorum scripsit, ut Epistolis duabus Prosperi & Hilarii faceret satis. In illa autem quæ Prosperi est, de reliquiis Pelagianæ Hæreseos, refertur quorundam Massiliensium de Infantibus opinio eadem, quam Fulgentius confutabat: Tales aiunt perdi, talesque
 „salvari, quales futuros illos in annis majo-
 „ribus, si ad activam servarentur ætatem, scientia divina præviderit. Quod pariter refellit Prosser eadem usus ratione, qua Fulgentius: quasi futura huiusmodi conditionata nulla sint, nec proinde scientia seu præscientia
 „conditionata: Sed in tantum quibuscum-
 „que commentitiis meritis electionem Dei
 „subjiciunt, ut quia præterita non ex-
 „stant, futura quæ non sunt, futura con-
 „fingant, novoque apud illos absurdita-
 „tis genere, & non agenda præscita sint,
 „& præscita non acta sint. Ac cum Augustinus capite 12. & sequentibus Libri illius de Prædestinatione, variis rationibus istam opinionem delirationis & falsi arguat; tum ista quoque, quod nulla sit in Deo futurorum conditionatorum præscientia: Capite
 „14. Hæc est tota causa cur dictum est à
 „quocumque sit dictum, Sapient 4. Rap-
 „tus est, ne malitia mutaret intellectum eius:
 „Dictum est enim secundum pericula vi-
 „tæ hujus, non secundum præscientiam
 „Dei, qui hoc præscivit quod futurum
 „erat, non quod futurum non erat: id
 „est, quod ei mortem fuerat largiturus,
 „ut tentationum subtraheretur incerto:

„non quod peccaturus esset, qui mansu-
 „rus in tentatione non esset. De hac quip-
 „pe vita legitur in libro Job, secundum
 „septuaginta, Nunquid non tentatio est
 „vita hominis super terram?

Quibus omnibus prolixè deductis, subjungit Phelippæus: Quæ non assero, ut negem futura conditionata, aut scientiam illam Dei, quæ à recentioribus conditionata aut media appellatur, quam & adstruxi hoc ipso Capite 2. ad versum 3. ne fortè expositiorem eam nudam: sed ut declarem, tres illos gravissimos Patres, qui præ cæteris omnibus doctissime & subtilissime de gratia disputarunt, longissime abfuisse ab eo gratiæ efficacis sensu, qui per Scientiam Mediam & conditionatam, rationem reddit efficacitatis quæ est in gratia cum Libero Arbitrio coherentis: cum illam ipsam scientiam & futura conditionata respuerint. Huc usque vir eruditus. An Augustini, Prosperi, & Fulgentii mentem attigerit, nil moror hic: mihi quidem non attigisse certum est; sed in extremum planè abiisse, nimio profligandæ Scientiæ Mediæ desiderio. Cum enim hoc unum demonstrandum illi esset, Deum futura libera, conditione suspensa, quæ nusquam re ipsa contingent, Scientiæ Mediæ lumine nosse non posse; venerandis Capitibus affingit, quod omnem prorsus futurorum illorum notitiam Deo eripuerint, qui tamen absolutam duntaxat negarunt, ex qua sola id posset fieri, quod Deum ex illa præscientiâ facere, Pelagiani fabulabantur. Ii quippe à se ipsis turpiter dissidentes, cum præscientiam illam verbo tenus conditionatam facerent, re tamen & usu absolutam esse monstrabant: cum & ob eas culpas, quæ numquam essent futuræ, reos infantes constituerent; & ob easdem illos præsentem multari poenâ dictitarent: quasi non & verum esse crimen oporteat, cui supplicium decernatur; & admissum ante, quod re ipsa plectatur. Hoc igitur unum inficiati sunt Pelagianæ sectæ Debellores, locis à Phelippæo ad crism vocatis; Deum futura hæc ita nosse, ut illorum ad poenas pueris infligendas rationem habeat: scire tamen aliter, non negarunt. Sed hæc ipsa falsi Interpretis aberratio, alienum ejus ab Scientia Media animum magis prodit; quod unum in præsentia postulamus.

Pergit Phelippæus. Institutum efficacissima ratione exsequitur toto Paragrapho duodecimo, & Scientiam Mediam explicando, efficacis gratiæ mysterio inutilem probat, gravissimisque difficultatibus circumseptam. Secunda ratio, subjungit,

git, qua probatur, ad explicandam rationem gratiae efficaci, male usurpari scientiam conditionatam, haec est. Quia Deum per scientiam conditionatam videre hac in hypotesi: Si deus huic homini hanc gratiam, cooperabitur; aut, Quis sit cooperaturus isti gratia; idem est ac videre, an haec gratia sit efficax: cum aliud nihil sit efficax gratia, quam illa cui homo cooperatur, in quocumque spectetur statu, siue absoluto, siue conditionato: & eodem modo & ordine bonus usus gratiae conditionatus terminat scientiam conditionatam, quo bonus usus ejusdem gratiae absolutus terminat scientiam visionis, seu absolutam: cum neque scientia conditionata faciat illud suum obiectum, sed aequè supponat ac scientia visionis. Ita ut si gratia efficax excitans adducens efficaciter cooperationem, sit prior saltem naturā tanquam causa, prior, inquam, cooperatione & bono usu gratiae, in statu conditionato, erit etiam prior in statu absoluto: & in conditionato, si gratia efficax adducat consensum, quocumque modo adducat, adducet similiter in absoluto. Quia quo ordine res se habent in statu conditionato, eodem se habent in absoluto, & vice versa: idque tum quoad obiecta, tum quoad scientias. Ergo efficacia illa, quae inest gratiae in statu conditionato, aequè explicari debet, & aequas habet difficultates, undenam petenda sit, ac in statu absoluto. Porro notio efficaciae hujus absoluti ab isto conditionato peti nequit; cum aequalis concursus Dei & energia gratiae aequalis in utroque requiratur. Quae omnia multis exsequitur toto Paragrapho, & variis Sanctorum Patrum momentis confirmat.

Ac tandem Paragrapho decimo tertio, invicto planè argumento Molinae somnium exagitat, in hunc modum. Ut scientia conditionata deserviat notioni gratiae efficaci, scilicet cognoscendo hoc futurum conditionatum, si dederō huic homini talem gratiam, cooperabitur, oportet ut futura conditionata sint priora futuris absolutis, verbi causa, cooperatione illa determinatē futura; quod tamen verum non est. Quandoquidem nulla esse possunt futura conditionata, quin intelligatur prior voluntas Dei conditionata, quae illa poneret. Proinde Patres ante producti voluntatem conditionatam negassent, sine qua nec conditionatus ullus homo, ut sic loquar, nec opera ejus ulla conditionata concipi potuissent, eadem ratione qua negabant futura conditionata. Futurae enim aetatis, ait Fulgentius lib. 1. De veritate Praedestinationis cap. 8. non absurdè praescita dicuntur opera, vel bona, vel mala: absurdè autem praescientia cujusquā humani operis in aetate asseritur, in qua futurus

homo ipse non esse monstratur. Sicut autem non nisi concipiendorum exordia, ita non nisi victurorum hominum actua- lia rectè dicimus Dominum praescisse peccata. Illius igitur praescius operum rectè dicitur Deus, quorum in consummatione non negatur subsequatur effectus. Adeo ut qui negant voluntatem conditionatam Dei, debeant etiam negare futura conditionata, quae sine illa esse non possunt: & proinde negare scientiam conditionatam, cujus illa sunt obiecta. Atqui voluntas conditionata Dei est posterior voluntate Dei absoluta; cum absoluta voluntas sit in actu, & illa ipsa quae vult; nec ulla fuerit actu in Deo voluntas, quae actu statuerit concurrere ad productionem futurorum, positis his vel illis conditionibus quae numquam ponentur. Quod autem est actu in Deo, prius est illo quod esset, si haec aut illa poneretur conditio. Unde & dicitur, voluntatem conditionatam Dei, quae esset de productione illius futuri, cognosci à Deo tamquam in medio, in sua voluntate absoluta, quae proinde prior est voluntate conditionata. Unde sic colligo: Nec futura conditionata nec eorum scientia inservire potest intelligendae gratiae efficaci, quatenus haec pertinet ad futura absoluta, si & haec priora sint conditionatis. At si voluntas absoluta Dei, quae est voluntas futurorum determinatorum, sit prior voluntate conditionata, qualiscumque tandem ea intelligatur, necesse est ut futura conditionata sequantur naturam & ordinem voluntatis conditionatae. Nam sicut futura absoluta esse nequeunt sine praevio Dei concursu, à quo futura pendent; ita futura conditionata intelligi non possunt sine praevio Dei concursu & decreto conditionato de concurrente. Cum in omni ordine verum sit illud Prosperi, quoad gratiam & Dei concursum: Si ergo in sanctitate vivitur, si in virtute proficitur, si in bonis studiis permanetur, manifestum Dei munus est, sine quo nullius boni operis fructus acquiritur. Ita ille Responsione ad Objectionem 14. Vincentianam. Huc usque Phelippæus.

In eundem censum venit Dionysius Petavius, indulgentis naturae miraculum: cui parem in veteri memoria, Patrumque Lectione Societas semper optabit. Hunc ingens eruditio, totiusque retroactae antiquitatis exculta notitia, ab domesticae scholae placitis abduxit; nulloque negotio deprehendit, quam longè Concellitas suos, Molinae adstipulatores, & ratio & Patrum autoritas fugeret. Quam interpretationem de gratuita Praedestinatione, fronte praeferat Augustinus, integro libro declaravit; intimos Sanctissimi Doctoris recessus

cessus pervasit, fibras dispunxit; nihilque intentatum reliquit, quo Thomisticae Scholae Doctrina communiri posset & illustrari.

Rem praesertim exsequitur capite 6. libri 9. Dogmarum Theologicorum Tomo 1. cui hunc titulum fecit, unde totius lucubrationis summam intelligas: *Demonstratur ex Augustini sententia, electionem ad gloriam, sive Praedestinationem ex nullis praevisis meritis à Deo fieri, sed ex gratuita voluntate: ad idque, octo ex ejusdem scriptis argumenta petuntur.* Tum ita integræ disputationi præludit numero 1. ut certos Canones præfigat, ad quos certa Ecclesiae doctrina, de Gratia & Praedestinatione, exigere debeat: *Cum de gratia, vel electione ac Praedestinatione disputandum est, minor haberi solet antiquorum Patrum ratio, qui ante Pelagianam ortam haeresim exstiterunt, quam eorum qui postea sunt secuti: Latinorum verò multò major quam Graecorum, etiam haeresi illa posteriorum.* Propterea quòd magis aliquando Latinam Ecclesiam, quam Orientalem exercuit haeresis Pelagiana, quæ iis de rebus altercandi occasionem præbuit. Sic ut Graeci plerique intima Pelagianorum dogmata vel ignorarint funditus, vel minùs accurate perspexerint. Omnium verò Latinorum, quorum hac in controversia majorem dixi auctoritatem esse, Princeps est consensu Theologorum Augustinus: cuius de gratia sententiam quotquot deinde consecuti sunt Patres ac Doctores, tum verò Romana Ecclesiae Praesules, Praesulumque Conventus, ratam & catholicam esse judicarunt; ut hoc satis magnum putarent veritatis argumentum, quod ab Augustino positum ac decretum esse constaret. Paucos duntaxat recentiores excipio, qui in electione potissimum ad gloriam, vel Praedestinatione pertractanda, ultrò se ab Augustini opinione discessisse profitentur; ut praeter ceteris Ambrosius Catharinus ac nonnulli de Scholasticis Theologis fecerunt. Alii ne tantum à se pondus auctoritatis abjudicarent, Augustinum quoquo modo trahere in partem suam conati sunt, & contra quam omnis retro antiquitas instituit, illius interpretati sententiam: quod inter alios aggressus est Gabriel Vasques.

Pergit Petavius capite septimo in eadem probanda Augustini sententiâ, cuius ex scriptis alia quatuor argumenta proferit, praesertim verò ex Perseverantiae dono, quod ex dandæ salutis proposito tribuitur: tum ex Christi Praedestinatione, quæ Praedestinationis hominum typus est & imago. Alia ex eodem momenta congerit capite octavo; quæ ostendit Praedestinationis decretum ex nullis electorum meritis à Deo manasse. Tum

Capitibus 13. 14. & 15. quæ à Molinianis in oppositum obtrudi solent, cumulatissime diluit: illudque imprimis suffugium intercludit, quo Augustinum nusquam de electione gratuitâ ad æternam gloriam locutum effutunt, sed de ea duntaxat quæ ad gratiam est, contra Pelagianos eorumque reliquias contendisse.

Ita planè doctissimus Petavius, cui Societas universa, tanquam litterarum Dictatori, venerabunda procumbere debuisset, Patrum ac praesertim Augustini doctrinam ex ejus manibus exceptura. At contra res accidit. Petavio ab suis denunciatum est, ni novis tibiis caneret, è Societate egrediendum. Sic enim ille Abbati Marolio, quo familiariter utebatur, significavit; dum palinodiam, libro qui proximè sequitur, decantatam exprobranti, festivè reposuit: Senior sum, quam ut vasa colligam: *Je suis trop vieux pour déménager.*

Non itaque Petavii genio tribuenda veniunt, quæ libro proximè sequenti, totus in sui dissimulationem compositus, in Augustinum effudit, sed duræ obsequendi necessitati; ne videlicet provectâ jam ætate vasa colligeret. Ecquis enim illum ea ex animo scripsisse putet, quæ toto passim libro decimo continentur, non modò Augustino injuria, sed & jactis antea fundamentis omninò contraria? *Quæ fuerit, inquit ille cap. 1. Augustini de Praedestinatione sententia, huc usque demonstravimus.* Atque est illa quidem hujusmodi, ut eam tuto Catholicum quisque possit amplecti, & est à multis hactenus defensa, atque etiam hodiè summâ cum doctrina ac pietatis commendatione defenditur. Sed si quis ita tueri illam instituit, ut contrariam tanquam falsam ac Scripturis adversam, repudiandam damnandamque censeat, magnopere is errat, ac plurimorum qui hanc anteponunt alteri Theologorum consensione refellitur. Quin & toto subinde libro probandum aggreditur, Augustinum Apostoli mentem minùs feliciter attigisse, atque ab ea toto cœlo aberrasse. Quæ sanè si vera sunt, consequens profectò erit, ut quotquot deinde consecuti sunt Patres atque Doctores, tum verò Romanæ Ecclesiae Praesules Praesulumque Conventus, quos Augustini sententiam amplexos Petavius dixerat, loco jam à me appellato, ab Apostoli Doctrinâ procul abierint. In hæc illum conjecit incommoda adversæ fortunæ metus: ac ne cogeretur componere sarcinulas suas, omnia miscuit. At injuriam viro doctissimo fecerit, qui veram ejus de Augustini sententia mentem judiciumque ex iis venari

nari velit, quæ in sui dissimulationem compositus, necessitati serviens scripto dedit: ac non potius ex illis quæ sensu & opinione liber, ex animo scripsit.

Plura addere facile fuerit, si propiora huic nostro ævo conspectari velim, & propugnatas non ita pridem, à Societatis Professoribus Theologicas Theses in indicem cogere; quæis perspicuum fieret, quàm multis nova Molinae commenta stomacho fuerint. Id mihi longè persuasum, quod Caramuel in Theologia fundamentali suos monuit, probavitque exemplo. *Molinae*

Fund. 1. Num. 64. Edit. 2. *Sectatores licet propria dialecto utantur, interdum quoad rem sententiam Thomistarum defendunt. Anno 1654. in Universitate Vienne*

nsi P. Herwart Societatis Jesu, magni ingenii Doctor, defendit iterum iterumque, esse possibilem qualitatem, quæ ex essentia sua physica & reali infallibilitatem illas libertate induceret. Fuit disputatio celebris &c. At minutias illas dispungere non vacat, cum non Theologicam, sed historicam duntaxat Superioris ævi tractationem habeam.

Non possum tamen &c.

Pag. 114. loco, DECIMUM SEXTUM, lege,

CAPUT VIGESIMUM.

Privata Molinae causa, communibus votis à Societate suscipitur, adversus FF. Prædicatorum oppugnationes.

REdimus è diverticulo, in quod nos Domesticorum Molinae oppugnationum concertatio deduxerat. Iis igitur insuper habitis, quæ in novâ meditatâ Concordiâ non paucis nec ignobilibus Societatis Theologis stomacho fuere? accessit ad Molinae causam, quinto post opus typis editum anno, Societas ipsa; nec jam privati hominis incauta velitatio fuit, sed amplissimi Ordinis studiosa contentio. Hieronymi dictum, diversâ licet occasione pronunciatum probarunt universi, *De parvulâ subdolâque Concordiâ, magnam in mundo ortam esse discordiam.* Ita porro res accidit.

Lib. 1. Cont. Rufinum.

Regentis munus in Collegio &c.

Pag. 116. lin. 8. à fine post hac verba, pro fide pugnavit.

Ex Relat. Dalm. Ama.

Scholasticæ velitationi Apostolicum zelum addidit Alfonsus de Avendaño. A Sacris Fidei Quæstionibus concionem habere jussus die Dominicâ, quæ disputationem proximè secuta est, ut sacri Senatus adversus hæreticos illorumque fautores Edicta promulgaret, dixit de Fide

Ecclesiæ, ad illa Evangelii verba: *O mulier, magna est fides tua*; quam & magnam & incorruptam ostendit. Hinc natâ occasione, in novellarum opinionum Authores sermonem acuit, dissimulato quidem nomine, sed tam apertâ sententiarum indicaturâ, ut omnes facilè intelligerent, in quos ille hanc fabam cuderet. Die alterâ, quæ Divo Thomæ sacra erat, Panegyricam sanctissimi Doctoris Orationem habuit: cumque plurima in ejus laudem protulisset, ostendit demum D. Thomam Scholasticæ Theologiæ clavem esse; illosque idcirco sibi totique Ordini sapientiæ clavem non immeritò arrogare, qui eum uti proprium Doctorem habeant. Quibus petulantis Adolescentis audaciam perstrinxit, qui Divo Thomæ & Ordini Prædicatorum nudiùs tertiùs insultaverat.

Apostolici viri zelo commoti plus justo Societatis Professores, Regem Catholicum & Apostolicæ sedis Nuntium occupant, quasi is plebem è sacro suggestu in Socios commovisset. Mandata, quæis Matritum vadimonium obiturus advocabatur, obtinere: eaque, ut gravior illi injuria accideret, ipso die Paschatis è recenti pulpito madenti significarunt; nè & in crastino quam sponponderat Auditoribus ultimam concionem haberet. Omnem etiam operam posuere, ut suorum unus abeunti sufficeretur, quò mutuam vicem inter concionandum rependeret, & malè mulctatum Molinismum erigeret. At brevî spes illa decoxit. Alfonso abeunti succedaneus datus est P. Garcias Mondragonensis Ordinis Prædicatorum, qui jacturam multo scenore resarsit. Alfonsus verò Regi Catholico & Apostolicæ Sedis Nuntio causam suam totamque agendi rationem probavit: reque intra tres menses feliciter confectâ, Vallisoleti postliminio receptus, cunctorum in se ora circumegit, majori quàm antehac pietatis ac religionis famâ usus: unde non leve æmulis accusatoribus cordolium fuit.

Inter hæc, festinante &c.

Pag. 119. lin. 24. post hac verba, satis patuit.

Hac eadem, immò & iniquiori fortunâ jactatos legimus primos Pelagianæ sectæ delatores. Zozimus summus Pontifex in Pelagianorum gratiam initio circumventus, graviores ad Episcopos Africanos Epistolas dedit in causâ Pelagii, quæis Erotem & Lazarum, Novatorum religiosissimos delatores, vocat *solitos criminatores, leves susurrone*, quorum scripta pendenda non sunt: Pelagium verò & Celestium

uti viros absolute Fidei, ac perperam infamatos tueri videtur. Tametsi postmodum re penitus inspectâ pristinum exuerit animum, & Pelagianos reipsa damnarit.

Rescripsit Cardinali Quirogæ Beatissimus Pater &c.

Pag. 125. lin. 16. post hæc verba, operam addituri.

Ferè per idem tempus, inquit Fuligatus libro 3. De Vita Bellarmini capite ultimo, cæpta Romæ agitari Controversia fuerat inter Religiosum Ordinem S. Dominici, & Societatem nostram, circa opiniones Ludovici Molina de Concordia Gratiæ & Liberi Arbitrii. Quam sententiam etsi aliqui, eo quod unius privati Scriptoris nata ingenio erat, minime censebant defendi debere à Societate universa; tamen ii qui tum præerant, aliter deliberarunt: tum quia nostrorum Professorum pars major in Academiis eam tuebatur; tum vero quia judicabatur in primis idonea ad nostri ævi hæreses pervincendas. Rem paulò distinctius exponit Mariana, S. J. capite 4. de Regimine Societatis; monetque Præpositum suum Generalem totius accusationis invidiâ onerandum non esse; cum & is qui ei Romæ Assisteat, & qui Provinciam Hispaniæ moderabatur, ac nonnulli juniores Hispaniæ Professores, suam etiam partem peccassent. Vir aliquis perillustis ac rerum istarum apprime conscius, Societatis Præpositos monuit, ne se liti huic altius implicarent. Nihil tamen obtinuit: tum quod ad litem urgendam proprii honoris stimulo duceretur Præpositus Generalis, ob datam Molina typorum veniam; minisque rei gravitatem persentirent juniores nonnulli Hispaniæ Professores: tum quod qui Generali Romæ Assisteat, quique Hispaniæ Provincialatum obibat (quorum artibus non omnia hæc movebantur) viri essent prorsus illiterati, qui publicis Societatis munia hominum ejusdem moris

& indolis gratiâ obtinuerant. Ita Mariana Latine redditus, ex Codice gallico, in celebri Remensis Archiepiscopi Centurâ laudato. *Sequitur*

CAPUT XXI.

Pag. 148. lin. 6. post hæc verba, dubitatum est.

Hinc Clarissimus Pegna, ad Clementis VIII. alloquium admissus die 31. Maii anno 1602. ut Inquisitionis Generalis Marticensis caulam ageret, optimumque Pontificem, quarundam assertionum Compluti defensorum occasione subiratum placaret, Decretum istud in memoriam revocans, interpolationem à supremo Senatu factam agnovit; quamquam errorem nullo malo animo admissum innueret, ac supremos Quæsitores veniam dignos significaret. Ideo autem, inquiebat, in hacce Auxiliorum controversia, ita blande se gesserant, quia Sedes Apostolica, erga quam singulari veneratione ducebantur, Causam illam ad se jam pridem advocaverat: postea vero licentiam dederat, ut eo de argumento rursus in scholis ageretur: quamquam Sanctitatis sue Mandata, sinistra, sed interim inculpatâ interpretatione, excepta fuissent. Cæterum eos in posterum majori sollicitudine acturos, tum agnitâ Sanctitatis sue voluntate, tum perspectis periculis inde secutis. Nec dubitandum omnino, quin eam omnem sollicitudinem & curam Inquisitores adhibaturi sint, qua damnis resarciendis abundè sufficiat.

Ut ut est &c.

Eadem pag. 148. lin. 19. sic lege.

Ea enim arte Jesuitas tunc maximè usos observat Franciscus Pegna. Libros suos sacris Fidei Quæsitorebus consecrabant, ut claritatem illis circumfunderent. Iisdem à Confessionibus esse ambiebant, ut incautam plebem speciosis titulis alerent. At non iis se capi &c.

Lib. 2.
cap. ult.

Ex Relatione 1602 die 10. Junii.

ADDENDA

IN LIBRO SECUNDO

HISTORIÆ CONGREGATIONUM

DE AUXILIIS.

AD CAP. PRIMUM. Pag. 160. lin. 32. post hæc verba, tacite significant; Adde:

& expunctâ Thomisticâ, Molinianam sententiam insertam esse; quam eo maximè titulo tuendam suscepisse Societatis Præ-

positos, monet Fuligatus ipse lib. 3. cap. ultimo, quod idonea in primis censeretur, ad hujus ævi hæreses pervincendas.

Quis eam interpolationem attentarit, pronunciare hinc certò nolim. Non erit tamen

men conjector imprudens, qui eam à Gregorio de Valentia tentatam suspicabitur. Ingolstadii enim publicum ea ætate Theologiæ Professore agebat: utque Molinianæ Doctrinæ patrociniū publicis The-
sibus susceperat non ita pridem, ita ean-
dem qua poterat arte atque industriā pro-
movere satagebat.

Prodierunt &c.

AD CAP.
3.

Pag. 178. lin. 9. à fine post hac verba,
præconceptus timor.

Num. 3. Prosper in sua ad sanctissimum gratiæ
Vindicem Epistola testatum reliquit: *Eo
postremo pervisacia tota descendit, ut fidem
nostram adificationi audientium contrariam esse
definiant: ac sic, etiamsi vera sit, non pro-
mendandam: quia & perniciosè non recipienda
tradantur, & nullo periculo, qua intelli-
gi nequeunt, conticeantur.*

In octavo &c.

Pag. 180. lin. 14. à fine post hac verba,
jure tueri liceret.

Has ipsas compositionis ac pacis condi-
tiones, sibi alia tamen in causâ à Pelagia-
nis oblatas, scribit Augustinus lib. 2. de
Peccato Originali cap. 23. *Volentes hæreseos
astute invidiam declinare, asserunt istam præ-
ter fidei periculum esse questionem: ut videli-
cet, si in ea fuerint exorbitasse convicti, non
criminaliter, sed quasi civiliter errasse videan-
tur. Perficitis id eum egisse hac prælo-
cutione præmissâ, ut si quid in illo apparuerit
erroris, non in fide, sed in questionibus qua
sunt præter fidem, videretur errasse: ubi etsi
corrigendus est error, non tamen tanquam hæ-
resis corrigatur; & qui correctus fuerit, ita
dicatur errare, ut non tamen tanquam hære-
ticus judicetur.*

Respondit &c.

AD CAP.
4.

Pag. 183. lin. 10. post hac verba, amotus
fuerit.

Vanæ huic ac futili de iudicibus expo-
stulationi id unum reponere satis fuerit,
quod aliàs Augustinus non absimili prorsus
occasione reponebat: *Si tales iudices, qua-
les definivit Salustius quereretis, sanctis Epis-
copis, qui de hac re, ab odio vestri, vel ami-
citiâ, vel irâ, vel misericordiâ pro vobis,
vel contra vos vacuum pectus habuerunt, quan-
do de hac re veras tranquillâsque sententias
protulerunt, utique cederetis. Quos nunc vobis
parum est iudices nolle, nisi etiam reos facere
insuper audeatis. Lib. 3. contra Julian. cap. 1.*

Addunt viri &c.

Pag. 186. lin. 14. post hac verba, propè
diem deferenda, sic lege: AD CAP.
4.

Utque ante annos aliquot non ita unctum
caput extulerant, ex Hispanicarum Aca-
demiarum Consultatione, à quibus Moli-
nismus Pelagianismi notatus erat, Ger-
manicas obscuri nominis Academias in au-
xilium invocarunt, quæ edito scripto cal-
culos adderent: ut hac arte committeren-
tur variarum nationum Academiae, & Jove
in Troiam pugnante, pro Troia staret
Apollo. Academias igitur Ingolstadien-
sem, Græcensem, Dilinganam, Wirce-
burgensem, Moguntinam, Trevirensensem,
Viennensem, ac etiam Mussipontanam oc-
cuparunt, quæ transmissam lucubratio-
nem editis suffragiis comprobarent. Aca-
demiasne dixerim, an veriùs Societatis ipsius
publicas scholas; quibus scilicet præsumunt, ubi
Cathedras moderantur, Theologicos gra-
dus dispensant, omnia pro nutu & impe-
rio agunt? Id saltem exploratum nobis,
quod fusiùs libro 4. cap. 18. exsequemur,
Theologorum scilicet, qui iis scholarum
iudiciis subscribere, partem quadruplo
majorem Jesuitas fuisse; qui dissimulatâ in
syngraphis Religiosâ Professione, sub ho-
nesto Academiae titulo latitantes, do-
mesticæ causæ iudicium affectabant.

Hanc tamen cautionem suffragiis suis ad-
diderant qualescumque illæ Academiae,
ut sicut &c. lin. 25.

Pag. 187. lin. 13. post hac verba, Theo-
logi subscripsissent.

AD CAP.
4.

Quorum etiam pars maxima, utpotè
Societatem professâ, ferendi hac occasio-
ne iudicii jure deciderat.

Hoc ergo &c.

Eadem pag. 187. lin. 21. post hac verba,
ratio est habita.

Nec haberi verò potest, si qua fides:
cùm totum, aut certè maximâ ex parte,
penes Jesuitarum quorum res agebatur,
suffragationem steterit. Hos quippe si de-
mas, tot fortè scholæ Thomisticæ minùs
propitios censores invenies, quot *Theba-
rum portas, & divitis ostia Nili.* Sed de
his plenius libro 4. cap. 18.

Cæterum &c.

Pag. 219. lin. 22. à fine post hac verba, no-
voque discrimini Ecclesia committeretur. AD CAP.
9.

Sic suam illi causam agebant, porrecto
Libello supplici, quem nos hîc Latinis au-
ribus damus.

BEATISSIME PATER,

*Ex Itali-
co Latine
reddiuntur.*

Significavit nobis Cardinalis Bellarmi-
nus instantes Hispaniæ preces, Sanctitati
Vestrae nuper oblatas pro maturandâ atque
vulgandâ Molinæ Censurâ: quod magna
ex eo libro incommoda ac diffidia in dies
acciderent, non sine sanæ doctrinæ peri-
culo. Verum cum author, vir utique Ca-
tholicus, ac huic S. Sedi in primis obe-
diens, audiri per sese postularit; ut vel
objecta diluere, vel mentem, ubi opus es-
set, aperiret: nec tamen ullus è Societate
latas Censuras obtinuerit, tametsi non se-
mel ab Cardinali felicis memoriæ Ludo-
vico Madrucio per Generalem nostrum
postulatas: de Sanctitatis Vestrae benigni-
tate sperare licet, ut pro more in scrip-
tores Catholicos atque in vivis degen-
tes servari solito, si quid fortè emen-
dandum occurreret, id ab ipso authore
emendari permittat. Interea ut certò norit
Sanctitas Vestra, nolle nos de industriâ
morasnectere, uti nonnulli insusurrant;
sincerâ & integrâ fide proponemus, quid
facto videretur opus, ut res brevî confici
posset.

Quocirca in memoriam revocandum
Sanctitati Vestrae, RR. PP. Dominica-
nos ratos se plausum facilius assecuturos;
si Controversiæ caput, quo eorum Theo-
logi benè multi cum nostris committun-
tur, declinarent, eò perpetuò se contu-
lisse, ut dicerent, nihil sibi cum nobis esse,
sed cum unico Ludovico Molinâ. Qua de
re Sanctitas Vestra certior facta est, uti eis
Cardinalis Madrucus significavit; ac de-
mum ex mutuâ Collatione, Sanctitatis
Vestrae jussu habitâ, & scriptis ultrò ci-
troque datis, in rem indubitatam abiit.
Jam verò cum passim in Hispaniâ, Polo-
niâ, aliisque ultra montes Regionibus evul-
garint, Societatis doctrinam in uno Moli-
na damnatam esse, id in præsentia adni-
tuntur, ut vel minimo saltem titulo, le-
vique Censurâ in Molinam ferenda, id de-
mum obtineant, quod optabant: ac per
speciem privati duntaxat authoris proscri-
bendi, in gravissimos simul Theologos,
ac etiam Academias damnationem extor-
queant: quandoquidem Assertionem in
scriptore aliquo malè sanam, talem ubivis
esse, necesse est.

Cum itaque, Beatissime Pater, ex ipsa
illorum professione (cujus & fidem facit
Patris de Avila nuper editus liber) certò
constet, Molinianæ doctrinæ summam &
fundamenta, nihil à præfatorum Theolo-

gorum sententiâ differre; consequens pro-
fectò est, integrum de libro Molinæ ju-
dicium ferri non posse, nisi prius commu-
ne doctrinæ caput expeditum fuerit. Id
porrò cum à multis, iisque gravissimis
authoribus Ultramontanis excipiat, uti
hæreticis è diametro magis oppositum, ac
decretis sacrae Synodi Tridentinæ magis
consonum; intelligit dubio procul, pro
summâ sua prudentiâ Sanctitas Vestra, diffi-
cile admodum, octo duntaxat aut decem
Theologorum audito suffragio, definiri
illud posse, nisi etiam Catholicarum om-
nium Academiarum judicia exigantur.
Quippè res in controversiam vocata, talis
tantaque est, ut dignam eam nonnulli ju-
dicent, quæ in Generali Concilio pertra-
ctetur; ut & nos eam in Concilio Tri-
dentino pertractatam existimamus.

Ut ergo compendio rem agamus, tria
in Molinæ libro secernimus. Primum,
doctrinæ summam, in quo scilicet sita sit
efficacia divinæ gratiæ, quove pacto vo-
luntatem moveat: quo capite, nihil eum
à laudatis Theologis distare existimamus.
Alterum, nonnullâ inde derivata consecta-
ria, cæteris fortè minùs communia, qui-
bus ea sententia probatur. Tertium non-
nullas loquendi rationes, minùs fortè in D.
Augustinum ac D. Thomam reverentes,
quæque nimiam arrogantiam, ac sui de in-
ventâ nitidiori doctrinæ expositione jactan-
tiam indicarent. Porrò eliquato semel Con-
troversiæ capite, quod illi cum cæteris
commune est, cætera duo nullo negotio
componi possent. Quandoquidem nedum
Censores, sed & nos ipsi ad ea limanda
ac temperanda, quæ fortè offensioni es-
sent, curam nostram & operam impende-
remus. Hanc si deputati Censores ju-
dicii rationem, ex Sanctitatis vestrae man-
dato ineant; ut suâ doctrinæ capiti pro-
babilitate adjudicatâ (uti Sanctitas vestra
in Hispania præscripsit) sententiam de-
mum ferant, quâ parte aberret, aut mi-
nùs statutæ doctrinæ hæreat, res tota bre-
vî ad exitum perducatur. Siquidem aut
pauca supererunt, aut hæc levioris mo-
menti, queis castigandis ac temperandis,
facilem se præbebit Author ipse, aliis usur-
patis loquendi rationibus.

Id verò pro certò habeat Sanctitas ve-
stra; fore ut vocatis tandem ad crisim
S. Augustini & S. Thomæ testimoniis
innotescat, non ita illos Prædicatorum
sententiæ adfavere; tametsi eorum sibi pro-
pitia nomina sæpiùs ostentent: quod eru-
ditè satis & apertè à Suaresio demonstra-
tum arbitramur. Neque id dictum teme-
rè:

re : quippe qui , quod attinet Augusti-
num, Complutensis Academiae suffragium
habemus, Apostolici Nuncii jussu datum,
quo id ipsum disertè significatur : quod
spectat D. Thomam , *Prædeterminationis*
vocem, maximè verò *physica* vocabulo
adjunctam, nusquam apud illum invenire
licuit, quamquam diu multoque studio
conquisitam.

Verùm Sanctitati Vestrae fortasse vide-
bitur, eò universa hæc collimare, ut rei
exitum protendamus in longum; qui ta-
men nolle nos morasnectere initio pro-
fessi sumus. Non alius tamen nobis est
animus, quàm ut Sanctitas vestra rei ca-
put attingat, eamque litis expediendæ
rationem ineat, quâ privatam Molinæ cau-
sam ab ea secernat, quæ illi cum cæ-
teris communis accidit : ut demùm seriò
perpendat, eâ neglectâ Consultatione,
Molinæ Censuram minùs æquè instrui
posse : aut certè fore illam minùs utilem
ad pacem inter commissos Ordines conci-
liandam, & afferendam, quæ maximè
quæritur, Hispaniæ tranquillitatem. Immo
verò res longè aliter cederet. Quotquot
enim Scriptores sese per Molinæ latus pe-
titos arbitrarentur, ac cæteri quique Re-
ligiosi Ordines, & Academiæ Profes-
sores, qui se tametsi numquam auditos,
eàdem cum illo Censurâ notatos existima-
rent, inclamarent haud dubiè; hæreti-
cos non modicâ lætitiâ afficerent, turbas-
ciant in Ecclesia, vestraque etiam San-
ctitati molestiam crearent longè maximam.

His ergò positis, expediendi negotii
ratio, quâ res tota brevè conficeretur ac cer-
tò, iniri facile posset; utpote quæ jam
ex parte inita est. Si nempe Sanctitas ve-
stra Breve Apostolicum ederet, quo nar-
ratis curis in hanc diem positis, celebratis
Congressibus, & Scriptis ultrò citròque
datis, aliquanto fusiùs confirmaret quod
pridem in Hispania præscripsit : nimi-
rum, ut donec Sanctitas vestra rem ul-
timò definiat, utraque Sententia defendi
possit, absque tamen adversæ partis mor-
su atque Censurâ. Hoc quippe semel con-
stituto, brevè dignosceretur, quid in Mo-
lina probabile sit, quidve minùs. Ac-
tum ille, ut est humilis, singula emen-
daret. Nihil erit quòd Patres Prædicato-
res conquerantur : horum nulli vulgare
fas erit, Societatem damnatione petitam
esse : Theologi non pauci & Academiae,
quibus ea Sententia probatur, nihil habe-
bunt quod mussitent in oppositum : at-
que ita Sanctitati vestrae satis otii dabitur
consultationis in re tanti momenti insti-

tuendæ, nec Molinæ Libri emendatio,
si fortè sit opus, feretur in longum. Aliàs
Molinæ causam, verbis quidem privatam
faciunt Prædicatores, at re ipsa cæteris
Theologis communem. Illi ipsi nolentes
litem protrahunt; cum contra nos finiri
eam optemus, salvo utriusque Ordinis no-
mine, ac bonæ totius Ecclesiæ pace, sum-
maque Sanctitatis vestrae voluptate : cui
rem totam Cardinalis Bellarminus, & Præ-
positus Generalis pacis amantissimus, fu-
siùs exponit, cum primùm illos audire
non gravabitur.

Sic certè viri juris & æqui tenacissimi,
Prædicatorum sententiam probabilem à
summo Pontifice pronunciari precabantur,
quam nudiustertius traduxerant ut hære-
ticam; modò tamen probabilitatis jure
donaretur & sua. Consulendas totius Or-
bis Academiæ significabant : hancque
finiendæ litis, expeditissimam viam ob-
tendebant, quâ nulla unquam, vel ma-
joribus difficultatibus circumseptâ, vel
diuturnioribus dilationibus involuta fuit.
Quare non eam modò despexit summus
Pontifex, sed & ipsâ die sequenti dele-
gatos Molinæ Censores acciri jussit, qui
secum de finiendâ Controversiâ mutuò
conferrent.

Actum ea de re trium & amplius ho-
rarum spatio : ac tandem Superiorum Con-
gregationum gestis compendio narratis,
lectisque Catholici Regis Epistolis, quæ
causæ definitionem urgebat, quatuor sta-
tuit Beatissimus Pontifex. Primò ut ma-
turiore examine Censuram à Secreta-
rio, totius Congregationis nomine adorna-
tam, recognoscerent. Secundò, ut Mo-
linæ Propositiones, Censurâ notatas, cum
ejusdem propriis verbis conferrent, ne
quid illis vel detraheretur, vel adderetur.
Tertiò, ut eam semel recognitam in bre-
viorem subinde formam, distinctis propo-
sitionibus contraherent. Quartò demum,
ut illam (si pristino judicio standum de-
cernerent) propriis chirographis munitam,
sibi traderent. Subjunxit, atque etiam
tertiò contestatus est, se causam omninò
Pontificiâ autoritate definire velle; quòd
scilicet res summi momenti & ad Catho-
licam fidem attinens ageretur.

Priorum etiam Censuram numero ad-
scripsit P. Hippolitum Masserium, Lu-
censem, Episcopum Montis-Pelusii,
quem servandi silentii juramento adstrin-
xit. Ac ne hujusce Examinis curam om-
nem apud Censores deponere videretur,
Censuram à Secretario jam pridem instru-
ctam, per juratum Inquisitionis Scribam
fibi

fibi quàm primùm transcribi voluit, ut eam ipse per sese legeret atque expenderet.

CAPUT DECIMUM.

Stat Pontifex in incipio : Tertium Cause hujus examen, seu verius novam primi examinis recognitionem edicit. Interea multa Jesuita moluntur, ut litem implicant.

*Ex 5. Relat.
D. Pegna.*

Vix dici queat, quantâ bonos omnes lætitiâ affecerit religiosa illa Clementis VIII. voluntas; quam nec vani terrores frangere, nec speciosæ adversariorum artes deludere potuerunt. Accessit totius Ordinis nomine, gratias acturus Prædicatorum Generalis, die 24. Aprilis. Spopondit Ordinem suum, futuræ definitionis expectatione suspensum, id omne lubenti pronoque excepturum animo, quod Pontificia auctoritate sanciret. Obsequii fidem pergratam habuit SS. Pater, aitque eandem se in Jesuitis vehementer optare. Tum familiari sermone habito, præconceptum ex oblata sibi nuper Societatis supplicatione dolorem significavit; jussitque ut illam quantocius ab aliquo è suis Theologis confutari curaret. *Si vede assai chiaramente, inquit, che li PP. Jesuiti vogliono tirar questo negotio alla lunga, volendo far mi temere un gran fracasso, se io fo publicare la Censura del Molina, senza haver inteso le loro difese. E per tanto, sono già due anni, che li sentiamo ogni giorno. Hoc est: Sat clare perspectum habetur, Patres Jesuitas velle huic negotio moras injicere, conantes timorem mihi inculcare de magnis turbis inde orituris, si Censuram adversus Molinam in publicum emittam, ante auditas omnes illorum Apologias: cum tamen jam per duos annos integros eorum Actores quotidie audiverimus.*

Prolixam itaque hujus supplicationis confutationem elucubravit Didacus Alvarez, Clementi VIII. à Generali Ordinis Procuratore, die undecima Maii traditam, addito Libello supplici, quo fusiorescriptionem in pauca contulerat. Hunc Latii jure donatum subjicimus.

BEATISSIME PATER.

*Ex Itali-
co latine
elatur.*

Sanctitati Vestræ quàm humillimè supplicamus, ut certa capita in Patrum Societatis Libello exposita, attento animo reputare velit.

1. *Pro more, inquit, in scriptores Catholicos, atque in vivis degentes servari solito, &c.* Mos servari solitus ille est, ut Libri ab institutis Congregationibus, aut aliis quibusvis ab Apostolica Sede de-

putatis, prius Censurâ notentur, quàm citentur Authores: tum si quæ notata sunt, emendari possunt, præsertim ubi fidei res agitur, suspenduntur: ac demùm ultra pergitur, ut doctrinæ ratio postulat.

2. *Dominicanos ratos se plausum facilius assecuturos &c.* Equidem si virorum eruditorum ac religiosorum plausus ambire Prædicatores, innuant, benè est: at si gregis auriti, & extremæ concionis acclamationes captare illos, intelligant; nusquam Prædicatores hujusmodi quidquam quæsiisse invenientur: quod in Patres Societatis æquiori fortassè titulo regeri posset.

3. *Si controversia caput declinarent. &c.* Controversiæ caput in hoc semper devolutum est, ac etiam hodie devolvitur; nimirum in efficaciam Divinæ Gratiæ, illiusque exponendæ modum, à Molina inventum atque vulgatum. Nusquam difficultatem illam Prædicatores effugerunt. Immo cum illorum Sodales Provinciæ Hispaniæ, conscientiae stimulo ducti, causam hanc totam ad Tribunal Inquisitionis Hispanicæ detulerint, in hoc deinceps continuò institerunt, ac in præsentia etiam instant, ut ea doctrina proscribatur. Idque ipsum est, quod Patres Societatis perpetuò declinarunt, ac declinant etiamnum hodie.

4. *Nihil sibi nobiscum esse, sed cum unico Ludovico Molina &c.* Equidem inter utriusque Ordinis Theologos, alias ab ea quæ Molinæ doctrinam attinet, enatas esse controversias, novit Sanctitas vestra, norunt Illustrissimi Cardinales, norunt & Theologi universi: quandoquidem & in publicis scholis, & in editis Libris, ac in ipsis quoque in D. Thomam Commentariis (quæ res præsertim stomachum movet) illibatam Sanctissimi Præceptoris doctrinam frequentius oppugnant. Uni tamen Molinæ in Generali Hispaniarum Inquisitione litem intenterunt Provinciæ Castellaniæ Prædicatores, religione ducti; quod ejus doctrina & pejor & periculosior eis visâ sit. Idcirco apertè atque ingenuè declararunt sæpe numero, in hunc unum actionem in præsentia instructam esse; in unam, inquam, doctrinam ejus, de efficacia divinæ gratiæ, ejusque quot fuerint Sectatores.

5. *Jam verò cum passim in Hispania, Polonia &c.* Cum bona venia Sanctitatis vestræ, debitaque veneratione, reponimus, totum id ab iis temerè dictum. Nihil quippe hujusmodi quidquam, aut ab Generali nostro, aut à deputatis Theologis,

logis, aut quovis alio quem sciamus, dictum vel scriptum, intra vel extra Italiam. Si verò fortè fortunâ inaudivere, id ab nostrum aliquo in Hispania, Polonia aut alibi dictum esse; eodem loco rumores illi ab eis habendi erant, quo nos alios longè plures, ac fortè veriores, de nonnullis illorum vulgatos habuimus: nec cæci rumores ad Sanctitatis vestrae aures temerè & inconsideratè deferendi ab eis erant.

6. *In presentia adnitimur, &c.* Id pro viribus pariter adnitimur & adnitemur, ut Ludovici Molinæ doctrina emendetur, & hujusce S. Sedis Censurâ configatur, si eam Censurâ dignam deprehenderit. At non eo quidem animo, ut hujus unius judicio Societatem universam aut quamvis Academiam involvamus; nisi fortè Societas universa vel Academia in ejusdem doctrinæ defensionem conspirarent. Idem nobis animus inest, voluntas eadem, in quemcumque Doctorem, aut Studium generale Societatis, si eandem illam propugnandam sibi fumerent. Perinde cum illis res nobis erit, Charitatis studium cum errorum odio probaturi.

7. *Certò constat Moliniana Doctrina summam &c.* Missis quæ à Patre Avila, uti privato Doctore scripta fuerint, profectos scilicet Prædicatores, Molinianæ Doctrinæ summam & fundamenta nihil à cæterorum Societatis Theologorum sententiâ differre. Immo & ex Libris eorum benè multis, & ex celebratis Congressibus, & ex scriptis Illustrissimo Cardinali bonæ memoriæ Madrucio datis, certò colligimus, eos multis capitibus, iisque gravissimis, à Molinæ doctrina procul abesse, uti Sanctitati vestrae faciliè demonstrabimus. Verùm tametsi ita res esset, uti effutiunt; cum harum opinionum vexillum extulerit Ludovicus Molina, eaque se scribere professus sit, quæ nulli antè mortalium, ac ne ipsi quidem Augustino, alterive Ecclesiæ Magistro in mentem venerint; de illo præsertim instituendum examen arbitramur, petendumque censemus totius causæ initium ab ejus novitatum emendatione.

8. *Cum à multis iisque gravissimis Authoribus &c.* Certè in hanc diem minus liquet, tot graves Scriptores Ultramontanos Molinæ doctrinam approbasse; nisi fortè aliquos Societatis Professores, eorumque discipulos; ac illos quidem nec tam multos, nec tantæ autoritatis viros, ut exponitur in libello. Hoc & addimus, nobis in hanc diem viam doctrinam illam, non paucis hæresibus admodum af-

finem, minimè verò iis ex diametro repugnantem: Decretis autem Concilii Tridentini, si penitiùs perpendantur, non ita consonam, ut obtenditur. Quæ duo, ab octo illis aut decem Censoribus, à vestra Sanctitate deputatis, observata fuisse, spes nobis est. Nec idcirco eò fiduciæ veniendum, ut etiam Concilium œcumenicum indicendum innuant, quò privati Doctoris & inferioris notæ Commentatoris Liber ad examen vocetur. Quandoquidem post collata hætenus studia, post accepta, ut fertur, Academiarum, Episcoporum ac Theologorum suffragia, potest Sanctitas vestra veritatem Catholicam sancire extremo judicio, cui nemo Catholicus repugnabit.

9. *Quo capite nihil eum à cæteris memoratis distare existimamus &c.* Quod attinet efficaciam Divinæ gratiæ, de qua sermo venit, censet Ludovicus Molina, uti multis in locis apertius exponit, gratiam prævenientem, ut à Deo est, non esse efficacem; sed suam sortiri efficaciam, ut ait, ab eventu, à consensu nimirum & cooperatione Liberi Arbitrii: qua in re à celebrioribus Societatis suæ Theologis impugnatur; uti & in aliis gravissimis doctrinæ suæ Capitibus.

10. *Nonnullas loquendi rationes, minus fortè in D. Augustinum & D. Thomam reverentes &c.* Immo loquendi rationes admodum injurias: quippe qui eò devenit audaciæ, ut dixerit, ex disputationibus Augustini contra Pelagianos, ejusdemque doctrinæ, totius Ecclesiæ judicio consecratâ, tot fideles fuisse turbatos, & ad Pelagianorum castra transisse. Tametsi opposium planè in S. Prospero & Rufino legere est.

11. *Controversia Capite, quod illi cum cæteris commune est &c.* Et id iteratò reponimus, Molinæ doctrinam, quoad ipsum Controversiæ caput, unde sit efficacia Divinæ Gratiae, nequaquam ei cum cæteris communem esse, sed singularem, & à multis etiam Societatis Theologis impugnatam.

12. *Uti Sanctitas vestra in Hispania præscripsit &c.* Decretum Sanctitatis vestrae in Hispaniam transmissum, datis ad Nuncium Apostolicum litteris Illustrissimi Cardinalis S. Severinæ, die 26. Februarii 1598. ita habet: Sanctitas sua, temperato pristino interdicto, FF. Predicatoribus facultatem concedit, ut libere possint de materia Auxiliorum Divinae Gratiae, & eorum efficacia, juxta doctrinam D. Thomæ, legere ac disputare, ut antea fecerunt: & par-

„riter Patribus Societatis, ut possint & ipsi
„legere & disputare de eadem materia, le-
„gendo nihilominus semper sanam & Ca-
„tholicam doctrinam. Ex quibus Decreti
„verbis, nullo pacto extundi potest, ius-
„sisse Sanctitatem vestram, ut ea sententia
„in Hispaniâ uti probabilis haberetur.

„ 13. *Id verò pro certo habeat Sanctitas ve-*
„*stra &c.* Ostendent Prædicatores Sanctitati
„vestræ, aut aliis pro arbitrio delegandis (quod
„& hætenus datis scriptis demonstrarunt)
„ab D. Augustino & D. Thoma procul
„aberrasse, qui novas illas opiniones in scho-
„las intulerunt; quod & Molina ipse sin-
„cerè atque ingenuè vulgatis Libris pro-
„fessus est. Aliter si sensit Academia Com-
„plutensis, scriptove testata est, (quod
„tamen ex ejus Censurâ minùs colligi exi-
„stimamus) potuit & illa aberrare, uti &
„aberravit aliàs Academia Parisiensis, al-
„tioris longè authoritatis & famæ, dum
„in doctrinam D. Thomæ Decretum edi-
„dit. Ut ergo Theologi Parisienses, rebus
„maturiùs expensis, Decretum illud suum
„resciderunt; ita & Censuram rescinde-
„rent Complutenses, ubi affulgente veri-
„tate, Molinæ librum notari cernerent &
„castigari. Quamquam & id addi posset;
„omnes penè hujus Academiæ Magistros,
„studiorum tyrocinia sub Societatis Pro-
„fessoribus posuisse, nec non etiam Sal-
„manticensem Academiam aliasque Hispa-
„nicas sentire longè aliter.

„ 14. Prædeterminationis vocem, maxi-
„mè verò physicæ vocabulo adjunctam, &c.
„Et hæc ipsa Prædeterminationis vox, &
„sensu & sono in D. Thoma inventa est:
„uti etiam *Physica* vocabulum quoad sen-
„sum in ejusdem doctrina reperitur mani-
„festè; quatenus nempe reale quidpiam si-
„gnificat, *ex parte potentie motæ, applica-*
„*tæ, ac determinatæ*, pro naturæ suæ con-
„ditione ac modo, seu necessaria illa sit,
„seu libera. Has ipsas *Physicæ & morales*
„voces usurpant Interpretes D. Thomæ
„benè multi, alique Theologi non pauci,
„ac ipsi quoque Societatis Professores.

„ 15. *Verùm Sanctitati vestra fortasse vi-*
„*debitur &c.* Ea excusatio nusquam petita,
„sed sponte data, plus satis probat, eos
„dubio procul suspicatos, Sanctitatem ve-
„stram id ipsum æstimaturam, quod &
„Prædicatores æstimarunt hætenus, ac re-
„ipsa tandem experti sunt; id unum scili-
„cet Societatem perpetuò spectasse, ut Mo-
„linæ causam singularem, ac peculiari ju-
„dicio eliquandam, aliis peregrinis involve-
„rent, ne unquam emendetur: nullum-
„que non movisse lapidem, ut iudicium

morarentur. Sed & id stupendum magis,
„tantâ eos fiducia jactare, privati Autho-
„ris Librum notari Censurâ non posse, ni-
„si ingens periculum subeat universi Or-
„bis commovendi. Prædicatores contrâ cer-
„tò statuunt, Catholicorum neminem re-
„pugnaturum, si quid ab Apostolica Sede,
„aut in eo quod vertitur fidei capite, aut
„quovis altero, sanciretur. Id probatum il-
„lis, hæreticos nusquam ex latis fidei de-
„finitionibus lætitiâ affectos, nusquam Ec-
„clesiam earum occasione perturbatam;
„quin potiùs ex iis & depressos hæreticos,
„& Ecclesiam pace donatam. Hoc demum
„illis alta mente repositum, ubi semel San-
„ctitas vestra Catholicam veritatem de
„controversia Quæstione definierit, nemi-
„nem planè repugnaturum, nisi qui Ponti-
„ficiam authoritatem in dubium verterit
„Petro datam, cui à Christo dictum est:
„*Rogavi pro te, Petre, ut non deficiat fides*
„*tua.*

„ 16. *Si Sanctitas vestra Breve Pontifi-*
„*cium ederet &c.* Quod attinet proposi-
„tam expediendi negotii viam, ut nempe
„Sanctitas vestra Breve Pontificium edat,
„quo utramque Sententiam suâ frui proba-
„bilitate finat, & unumquemque suo sen-
„tiendi committat Arbitrio, exponunt,
„qua par est reverentiâ FF. Prædicato-
„res, fidei causam hîc agi, quam à San-
„ctitate vestra opportuna definitione cer-
„toque iudicio eliquatum iri, bene sperant.
„Interim uti obsequentissimi Apostolicæ
„Sedis vestræque Beatitudinis filii, judi-
„cium suum omne Sanctissimis pedibus
„subjiciunt: Deum optimum adprecantur,
„perpetuòque adprecabuntur, ut in hoc,
„aliove quocumque negotio, vestræ San-
„ctitati suggerat, quid melius è re Catho-
„lica fuerit, Christi obsequio, Ecclesiæ-
„que tranquillitate ac pace: utque illos
„emendet ac deprimat, qui turbas agere,
„motusque excitare molirentur.

„ Ea Prædicatorum supplicatione, alio-
„que prolixiori scripto dato, & diffusæ &c.
„pag. 220. lin. 12. a fine.

„ Pag. 223 in fine post hæc verba, Molinæ-
„que damnationi subscripserit.

„Æquiori stetit animo Benedictini Or-
„dinis Procurator generalis, commendati-
„tis licet Epistolis laceffit a suis. Ab Vi-
„ro Instituti sui primæ notæ, Antonio
„Cornexo, Abbate S. Jacobi in Gallæcia,
„primariæ olim Cathedræ in Academia Sal-
„manticensi Moderatore, scire voluit, quid
„rei esset, quove animo in Molinæ defen-
„sionem suorum aliqui consensissent. Re-
„scripsit

scripsit eruditus Abbas totum id à nonnullis privato in Societatem studio factum, nulla cum cæteris habita collatione : Instituti Benedictini Professores, maximam partem, in Prædicatorum sententiam conspirare : atque idcirco nec audiendos Romæ Societatis Actores, si fortè vagos illos de impenso sibi ab Hispanis Benedictinis patrocínio rumores evulgarent ; nec ferendum omninò, universum Ordinem Molinæ partibus addictum effutirent, ob pauculos illos suffragatores, quorum studia à cæteris minimè probarentur. Do Epistolam integram, cujus autographum inter Clarissimi Pegnæ Adversaria videre contigit.

Ex Hispano Latine redditur.

Reverendissime Pater. Castellam atque inde Salmanticam profectus, ad examen religiosa nostra juventutis, qua in Collegio nostro S. Vincentii Theologia tyrocinia ponit, rem didici permolestam, qua mihi, ut verum fatear, dolorem intulit longè maximum. Romam scilicet missas audiivi Theses aliquas, in Comitibus generalibus proximè habitis Præsidi M. Salazario propugnatas, privato nomine atque sententiâ : quæ tota videtur Molina Doctrina de divinis Auxiliis, actuumque liberorum Prædeterminatione contineri. Has Romæ palam ab Jesuitis ostentatas audio, qui etiam hanc communem Magistrorum & Professorum Instituti nostri sententiam esse, dicunt. At si sic est, temerè prorsus id effutunt. Novit quippe Paternitas vestra, Instituti nostri Professores inter divi Thomæ Discipulos censerì, communi Scholarum nostrarum suffragio : atque adeò Thomisticam Sententiam, communem Instituti nostri doctrinam reputari oportere. Quamquam verò in ea, quæ Dominicanos inter ac Jesuitas movetur hodie controversia, varia circumferantur opiniones, tutiorem nihilominus viam init Professorum nostrorum pars nobilissima, eam nempe qua D. Thomæ ejusque Discipulorum est. Primariam Cathedram Vespertinam annos non paucos occupavi : Thomistarum Sententiam & ab aliis semper traditam audiivi, & tradidi ipse, non eo solum nomine, quod mihi ex Academia Statuto S. Thomæ Doctrina legenda esset, sed quod ea mihi semper sententia probata sit, quam mihi Magistri veteres velut ex asse heredi reliquerunt. Atque ita nostri communiter sentiunt. Quare si quid fortè Roma hac occasione moveri atque attentari contigerit, iis firmiter hæreat Paternitas vestra, quæ rescribo. Ita quippe se res habet. Quid de Molina doctrina sentiam, fusiùs scripto significarem, nisi ex publico Edicto S. Officii vetitum esset, ne quis

interim pendente lite Censuram ferat. Pergratum mihi faciet Paternitas vestra, si qua loco Auxiliorum Controversia sit hodie, rescribat ; numne certa spes affulgeat, ut brevi rem totam Sanctissimus Pater judicio dirimat. Vale. Datum Compostellæ die ultima Julii 1603. ANTONIUS CORNEXO, Abbas S. Jacobi in Gallacia. Sequitur

CAPUT UNDECIMUM.

Pag. 226. lin. 15. post hæc verba, per totum orbem publicetur. Ad Caput 10.

Sic ille de suscitatis controversiis blandè loquebatur. Eâ interim fiduciâ rem urgebat, ut illum Reipublicæ litterariæ dictatorem nemo non crederet. Novi, ut putabat, inventi beneficio, in Pontificis sacrarium irrepsit, desideratam pacem partibus dissidentibus allaturus. Expansa hilariter fronte atque ore renidenti à Clemente exceptus, de meditata pace, cum veniæ prætatione, dixit paulò prolixius. Quare bis terque admonitus ut sermonem in pauca contraheret, demum ad Cardinalem Bernerium Episcopum Asculanum missus est, ea de re majori otio tractaturus. At abfuit &c.

Pag. 229. lin. 16. à fine post hæc verba, est instrumentum.

De novo, ut putabat, invento sibi plaudebat bonus homo, tanquam cœli convexa digito tetigisset : cum contra palam omnes assererent, cum in mustaceo gloriolam quæsiisse. Quot enim capitibus aberret, quàmque Jesuitarum perinde ac Prædicatorum doctrinæ repugnet sublestinus ille conciliationis modus, nemo non videt ; ut planè illius inventori S. Prosperi dictum accomodare nobis liceat, lib. cont. Collat. cap. 5. Tu informe nescio quid, & utrique parti inconveniens reperisti, quo nec inimicorum consensum acquireret, nec in nostrorum intelligentia permaneres. Tantus tamen &c.

Pag. 230. lin. 12. post hæc verba, suffragium emendicabant.

Quibus etiam ut faciliùs ora sublinirent, dolum duplici falsitate cumulabant : Gallia scilicet Academies in Molinæ sententiam venisse, mentiebantur ; jactato unius Academiæ Mussipontanæ suffragio, quam nil nisi Societatis Gymnasium esse, nemo nescit ; atque illud quidem, non in Galliis, sed in Lotharingia situm. Ipsos quoque Theologos Lovanienses, Sixti V. judicio à pristina sententiâ revocatos, in Societatis doctrinam consensisse, dicebant. Immo & Doctores Lovanienses, (in-

quiebant suo illo transmissio Scripto) quamvis olim contrarium senserint, postquam intellexerunt, jussu Pontificis Sixti V. hanc secundam sententiam fuisse examinatum, & judicatum sanam doctrinam, nunc ei adhaerent, ut ex eorum Thesibus & subscriptionibus apparet. Quod quàm falsum absolumque sit, satis me alias arbitror demonstrasse. Lib. 1. Capitibus 4. 5. 6. 7.

Verum non diu &c.

Eadem Pag. 230. lin. 28. post hac verba, dicendi locus.

Interea notare obiter juvat, non absimili calliditate usos olim Massilienses in Augustinum. Quindecim Sententias breviores, & has prorsus absurdas, vulgarunt, velut ab illo assertas; ut quæ in Libris ejus damnabilia se reperisse jactabant, brevium capitulorum indiculis publicarent; talique commento, & detestationem ejus, quem impeterent, obtinerent; & ab his quæ infamassent, curam exterriti lectoris averterent. Ita S. Prosper in Præfatione ad Capitula calumniantium Gallorum. Idem in Prosperum ipsum aliosque Augustinianæ doctrinæ vindices tentavit Vincentius ille, cujus objectiones solidè diluit Sanctissimus Doctor. Absurda scilicet asserta vulgavit versipellis homo, quasi ab Augustinianis eadem illa defenderentur, ut communem illis invidiam concitaret. Quæ de re, ita in sua ad Objectiones Vincentianas Responsione præfatur doctissimus Aquitanus. *Quidam Christiana ac fraterna charitatis obliti, in tantum existimationem nostram quoquo modo student ledere, ut suam se evertere nocendi cupiditate non videant. Contextunt enim, & qualibus possunt sententiis comprehendunt, ineptissimarum quarundam blasphemiarum prodigiosa mendacia, eaque ostendenda & ingerenda multis publice privatimque circumferunt, asserentes talia in nostro esse sensu, qualia diabolico continentur indiculo: quæ falsò in nos ad excitandam invidiam jactitari &c.*

Sequitur

CAPUT DUODECIMUM.

Ad CAP. 12. Pag. 238. ad finem Capituli, prætulisset.

Romam sub idem tempus nuncius perlatus est, qui Ludovicum Molinam Madriti extinctum retulit. Observatum ab omnibus est, illum ea ipsa die 12. mensis Octobris fato cessisse, qua Romani Cognitores Censuram ejus secundis curis elaboratam obtulerant Clementi VIII. eodemque momento Pontificis simul ac Dei judicium subiisse. Hæc de illo scripsit

P. Oieda, Societatis in Curia Matritensi Procurator. *Vocatus ad Curiam Regiam civitate Conchensi, ex qua recesserat mense Septembri, paulò postquam adventasset, incidit in gravem febrim. Mox acciti Medici, omnem curam & medicinam opportunè adhibuerunt: sed aegritudine invalescente, memoriam omnium rerum humanarum amisit. Sed nec Librorum nec Scriptorum suorum est recordatus, nec Libri de Concordia liberi Arbitrii cum gratia donis: quasi ipse non fuisset, qui tot propterea tumultus in Ecclesia concitasset. Itaque cum nulla medicamenta profuissent, post aliquot dies obiit. Nimirum die 12. Octobris 1600. Cæterum Oiedam spissigrado usum Tabellario, necesse est, ac tardiori quàm sint Corbitæ in tranquillo mari: quæ enim vertente Octobri scriptæ fuerant, exeunte demum Februario Romæ sunt redditæ.*

Sequitur

CAPUT DECIMUM QUARTUM.

Pag. 317. lin. 19. post hac verba, publicè declamarint. Ad CAP. 24.

Hac arte usos Pelagianos S. Hieronimus monet, Epistolâ ad Ctesiphontem, & Dialogo 1. contra Pelagianos, ut errores suos latè diffunderent, & aurito gregi, ut minimum, fucum facerent. Hinc illa Sancti Doctoris verba: *Quid volunt misera muliercula, onerata peccatis, quæ circumferuntur omni vento doctrina, semper discentes & nunquam ad scientiam veritatis pervenientes: & ceteri muliercularum socii, prurientes auribus & ignorantes quid audiant, quid loquantur; qui vetustissimum cænum quasi novam suscipiunt temperaturam?* Cæterum &c.

Pag. 330. lin. 7. à fine, post hac verba, & judicia dignetur. Ad CAP. 27.

Plenum id calliditatis atque astutiæ. Idcirco enim Germanicarum Academiarum judicia audiri postulabant, quod eas Jesuitæ moderarentur, Theologicas ac Philosophicas Cathedras occuparent, gradus literarios dispensarent, omniaque pro nutu atque imperio regerent; ut non tam Academiæ, quàm Jesuitarum Gymnasia censerentur. Prostratis quippe Hæreticorum perfidiâ antiquis Catholicorum scholis, studia publica Sodalitii Jesu viri magnâ ex parte excitaverant, ac retento pristino Academiæ titulo universa penè Gymnasia occupabant. Quamquàm & hoc familiare Societati sit, ut sua Gymnasia Academiæ nomine cohonestent, uti 4. Constitutionum Parte, & passim in Congregationum

gregationum Generalium statutis, videre est. Suum ergo de sua ipsorum doctrinâ iudicium auscultari postulabant, dum Germaniæ Academiæ audiri precabantur. At de his plura damus Lib. 4. Cap. 18.

In eundem &c.

AD CAP. Pag. 348. lin. 31 post hæc verba, in re per-
30. gravi asseruerat.

Breve Pontificium, inter Clarissimi Pegnæ & Thomæ de Lemos adversaria inventum, damus ex integro, quod nusquam illud typis editum videre contigerit.

*Dilecto filio FRANCISCO ZUMEL Ordinis
B. Mariae de Mercede Sacra Theo-
logiæ Magistro.*

CLEMENS PAPA VIII.

DILECTE FILI, Salutem & Apostolicam Benedictionem. Et jam antea nobis nota erat virtus tua, & insignis doctrina, & quod caput est, ardor Catholica fidei tuendæ, & devotio erga Nos & erga hanc Sanctam Apostolicam Sedem, in qua nos humiles & indigni, autore tamen Spiritu Sancto, præsidemus: quod etiam venerabilis Frater Dominicus Archiepiscopus Sipontinus, noster in Hispania Apostolicus Nuntius

cumulatè & multa cum tui laude testatus est. Sed hæc omnia manifestius agnovimus & per-
speximus ex tuo Commentario, quem & tuo zelo incensus, & ejusdem Nuntii nostri cohortatione permotus nuper scripsisti, ut quorundam hominum novitates amantium parum consideratas, ne quid gravius dicamus, opiniones confutares, & veritatem in re pergravi assereres & roborares. Laudamus, Fili, pietatem tuam, & te merito in Domino commendamus; quod scientiam, quam à Patre Luminum accepisti, totam confers & adhibes ad ædificationem Corporis Christi, quod est Ecclesia: & re ipsa ostendis, te non solum scientiam habere, quæ sæpe inflat, sed etiam charitatem, quæ semper ædificat. Scito igitur laborem hunc tuum, & eruditam lucubrationem, pergratam nobis fuisse. Idque tibi his quoque literis nostris significare placuit, ut scias te à nobis amari. Atque ut tanto studiosius & ardentius pro virili tua labores in vinea domini Sabaoth, & talenta à magno Patrefamilias tibi credita, fideliter & fructuose negotieris, tibi etiam nostram Apostolicam Benedictionem benigne impertimur. Datum Roma, apud Sanctum Petrum sub annulo Piscatoris die 10. Martii 1603. Pontificatus nostri anno duodecimo. SILVIUS ANTONIANUS Cardinalis.

Quid hoc in &c.

ADDENDA

IN LIBRO TERTIO

HISTORIÆ CONGREGATIONUM

DE AUXILIIS.

AD CAP.
PRIMUM

Pag. 354. lin. 12. post hæc verba:
affisteret.

Nihil scilicet veritus in suprema totius orbis procuratore & ingentium curarum multitudine, Theologicarum disputationum tædium ferre, & sedentariam Actoribus per plures horas verba facientibus operam præstare.

AD CAP. Pag. 365. lin. 8. post hæc verba: Capuam
3. discessit.

Audiat & Fuligatum conceffit suum, qui hanc ipsam fabulam, de Bellarmino honoris specie Româ pulso, ab inficetis duntaxat consiliorum scrutatoribus vulgatam & creditam dicit; qui audaciori & malignâ sagacitate aulæ arcana rimarentur, ac in ipsum Pontificis sacrarium ir-

rumperent, ut ex levi specie monstra fingerent. Ob id scilicet unum, quod Bellarminum ob nimiam dicendi libertatem ardentiusque Molinianæ causæ tuendæ studium ab optimi Pontificis gratiâ excidisse, rumor esset. Libertas hæc, inquit ille Lib. 3. de vita Bellar. Cap. ult. sentienti adversum ea quæ Pontifici prima erant, fuit aliquibus occasio interpretandi, Bellarminum ex eo tempore speciem magis in amicitia Pontificis, quam vim tenuisse; nec positum esse, sicut prius, æquabili apud ipsum gratiâ. Crevitque rumor in Aula, quæ est rimandis offensionibus nimis interdum sagax, cum viderunt non multo post, eum Capuæ Archiepiscopum renunciatum, & Româ emigrare; tamquam Pontificis abalienata mente discederet, amovereturque de industria,

strid, ne promeret qua sentiret.

Sequitur

CAPUT QUARTUM.

AD CAP. Pag. 374. lin. 20. à fine post hac verba:
5. post horam vigesimam.

Unde & in Actis Congregationis duodecimæ, in qua de tota ista concertatione sententiam dixere Censores æquissimi, id à Notario observatum legimus: *Id evidenter constitit, tam Argumenta defensorum Molina esse captiosa & fallacia, quam Doctorum sententias falso intercisas & corruptas, ab illis fuisse allatas, ut infra lege-*
Cap. 15. re est. Quid hæc porro sibi velint, doceant nos qui Valentiaæ catastrophæ, fabulæ loco haberi vellent.

Accedit &c.

Pag. 376. lin. 18. post hac verba: concidisse.

Cæterum, totum id si libuerit naturæ dabo; ut contumeliæ impatiens, brevi mœrore citra miraculum contabuerit: quod nedum Diodono Crono dialectico, verum etiam Homero ingeniorum Principi contigisse, haud obscuri Scriptores prodidere. Hunc etenim pari sorte mœrore confectum ajunt, quod jocosum piscatorum ænigma solvere nescivisset. Scilicet in littore, cum mare turbatum ferias daret, novæ capturæ intenti piscatores, sordentium tunicarum rugis animalcula quærebant, quæ reperire nollent: visoque Homero, per ludibrium tamquam de tripode sententiam explorarunt. Nodus tanto vindice dignus hic erat, *Quos cepimus non habemus, quos non cepimus habemus.* Quem nexum cum expedire non posset Vatum maximus, ingenti pudore suffusus brevè contabuit. Ita planè Valentiaæ casum secundum naturam accidisse, Ziliolo dabo; nec eruditum Theologum irato numine malè mulctatum obtendam; modò (quod hic unum in animo est) facti fides in tuto sit.

Verum &c.

Pag. 378. lin. 10. post hac verba: immunis est.

„ Quin immò dicamus, eum ab Augustino occisum esse, quod ejus propositio-
„ nem falsò allegasset. *Non l'ho amazzato io, ma il Papa, quale non è capace d'irregolarità: o pure diciamo che l'haver ucciso S. Agostino per haver portato falsamente la sua propositioe.* Adeò scilicet aperta res erat, ut ludis palàm ac facetiis circumferretur.

Et tamen, si superis placet, Gregorium de Valentia, *Doctorem Doctorum* à Clemente VIII. vocari solitum, scribunt viri suis amplificandis unice intenti. Quafide, qua veri specie, dixerint alii. Ego quidem tantum abest, ut Societatis pugilem superbis apud suos efferri titulis ægrè patiar, ut potius gaudeam magis: hinc quippe reportatæ de illo victoriæ splendor accedit. Quibus enim titulis Lemosium coronare par erit, à quo Doctorum Doctor, in Litterariâ concertatione, atque in ipso Orbis theatro, prostratus est? Quibus notis excipienda Molinae causa, quam ne ipse quidem Doctorum Doctor feliciter peroravit? Certè

Si Pergama dextrâ

Virgil.

Defendi possent, etiam hac defensa fuissent.

Sequitur

CAPUT SEXTUM.

Pag. 382. lin. 22. post hac verba: versa- AD CAP.
tus esset. 6.

Hinc factum arbitror, ut Jesuitæ Galliarum, veriti ne pius Pontifex, toties de finiendâ Controversiâ rogatus, sententiam tandem pronunciaret, quæstiones de indeficienti Romani Pontificis judicio, ea ætate in Galliis excitarint: ac eâ quidem calliditate, ut maximam Clementi VIII. injuriam irrogarent, ejusque auctoritatem veluti de industriâ luderent. Certè si quæ ab iis tanto studio vulgata est, Henrici IV. Responsio, ad Harlæum Galliaæ Senatus Principem, de Societate non admittendâ perorantem, genuina esset, uti eam illi genuinam obtendunt, liqueret profectò, Galliaæ Jesuitas, sub id tempus defendisse, cæteros quidem Pontifices indeficientiæ privilegio frui, minimè verò Clementem VIII. Ita quippe Regem inter alia reponentem exhibent: *Vous ne dites pas, que ces jours passés les Jesuites ont soutenu, que le Pape ne pouvoit errer, mais que Clement pouvoit faillir.* Hoc est, *Id verò omit- tis, Jesuitas elapsis proximè diebus, propugnasse, Pontificem errare non posse, Clementem nihilominus posse.*

Exstat tcm. 4. Sem in Additionibus ad documenta D. de Villeroi.

Ego quidem prolixam illam Henrici IV. ad Harlæum Orationem, quâ alia non pauca Augustissimo Senatui injuria recensentur, spuriam habeo, ob Clarissimi Thuani, qui præsens tunc aderat, testimonium omni exceptione majus. Is quippe Libro 132. Historiarum, recensitâ Senatus Principis supplicatione, & Henrici IV. Responso, sic addit: *Qua omnia, ego qui*

anno 1604. 2. Januarii

actioni cum multis aliis interfui, eò diligentius perscribenda curavi, ut vanitas Relationis Italicæ linguâ scriptæ, & Turnonii in Vivariensi pago, anno post publicata pateat: in qua pleraque contumeliosa contra amplissimum Ordinem addita, quæ nunquam tunc Regi optimo ex ore exciderunt, quadam etiam ex rumusculis collecta, pro responso inculcata, ad ea quæ ab Harleo minimè dicta fuerant. At cum prolixior illam Regis Orationem Jesuitæ de industriâ vulgarent, uti Societatis Panegyricam, minùs certè molestè ferent, si quid inde repetamus. Aut enim insulsam illam assertionem re ipsâ tunc propugnarunt; aut si minùs, eam saltem propugnasse, videri volunt, qui ita Regem maximum loquentem inducunt.

Sequitur

CAPUT SEPTIMUM.

AD CAP. Pag. 383. lin. 38. post hac verba: Pontificem Maximum.

Dirimendæ controversiæ speciem, putumque Molinismum Pontifici instillabat, nec longè à Pelagianismo abibat. Gratiæ distinctionem in sufficientem & efficacem, uti prorsus insufficientem, inutilem, & à Sacris Literis, Conciliis, Patribus, ratione alienam explodebat, Capite 3. Tum non longè digressus pag. 17. Gratiâ se ipsa efficaci procul ablegatâ, rem totam ita demum dirimendam statuebat, ut sola Gratia indifferens sanciretur: Ergo cum fieri potuerit, ut aliqui conversi fuerint, aliqui non; aliud genus gratiæ censendum est, nimirum indifferens; cuique pro arbitrii libertate liceat consentire.

Fama fuit &c.

Pag. 386. sic lege:

CAPUT OCTAVUM.

Distincta quinti hujus Examinis Historia textitur. Quis in celebrandis Congressibus servatus ordo: quæ lex à Clemente VIII. antiquæ Traditionis hæredes, disputantibus data; ut videlicet ad S. Augustini mentem Controversiæ omnes exigantur.

Gregorius Coronellus, Auxiliorum Congregationi à secretis jam pridem à Clemente datus, universa quinti hujus Examinis acta duplici volumine complexus est. Primo disputationes omnes, Censuræque, ad decimam quartam Congregationem, Judicia comprehendit; altero, lata ad finem usque Judicia retulit.

Servatur utrumque autographum in Angelica Augustinienfium Bibliotheca: Illud quidem numero 1. sub hoc titulo: *Disputationes habita à Patribus Dominicanis & Societatis Jesu, super doctrina Molina de Auxiliis habita, coram Sanctissimo D. N. Clemente VIII. ab anno 1602. usque ad annum 1605.* Istud sub signo † nullâ præmissâ Epigraphæ. Ex hoc duplici fonte, universa delibabimus, quæ secutis capitibus referemus.

Congregationibus sexaginta septem stetit Examen istud, coram Clemente VIII. celebratis. Has inter, ne vel &c.

Pag. 387. lin. 12. à fine post hac verba: examinatae conveniebant, sic lege.

Primaria ab Clemente VIII. posita lex illa fuit, ut cuncta ad S. Augustini mentem exigerentur: quod is in eliquandis divinæ gratiæ Controversiis, Conciliorum ingenium omni retrò ætate sit habitus; cæterorumque Patrum exaggeratum altiùs nomen obtriverit, ac veluti minora sydera obscurarit. *Quamvis*, inquit S. S. in Prolusione Disputationum, *nemini nisi Deo rationem reddere debeam mearum actionum, dicam tamen inpraesentiarum rationes propter quas adstringere statui totam hanc disputationem ad normam Doctrinæ Augustini de Gratia.* Prima est, quod si teste B. Prospero, ferè initio Libri contra Collatorem, viginti annorum spatio Ecclesia Catholica acies ita dimicavit pro Gratia, contra Pelagianos, ut tandem Augustino Duce vicerit; oportet etiam ut in causa consimili, eundem Ducem agnoscamus & sequamur. Secunda est, quod idem Sanctus nihil videtur præterisse eorum, quæ ad præsentis controversiæ pertinent &c. Tertia tandem ratio est, quod cum multis Pontifices & Prædecessores nostri Doctrinæ S. Augustini tam acres fuerint assertores ac vindices, ut quasi hæreditario jure eam in Ecclesia relinqui voluerint, æquum non est, ut patiar illam hac hæreditate privari.

Ac re ipsa quidem Augustini ingenium, quod uti demissum cælo solem Ecclesia Catholica & Apostolica Sedes nunquam non coluit, ac tantum non adoravit: fatigatisque omnium Pontificum linguis, consumptaque veneratione, omni præconio majus semper agnovit.

Sic Innocentius I. quo sedente Pelagiana hæresis caput extulit, uno eodemque judicio nascentem errorem proscripsit, ac primas Augustini in eo confutando lucubrationes consecravit. Cum enim Patres Concilii Carthaginensis, variis Canonibus ex S. Augustini libris passim ex-

E

pressis,

pressis, veritatem Catholicam asseruissent, extremum iis sigillum posuit Sanctissimus Pontifex; remque ita cumulatè confectam pronunciavit, ut nihil illi addendum superesset. Satis, inquit, vestris monitis, sic abundantibus nostra legis exemplis, probatur esse responsum; nec quidquam superesse duximus, quod dicamus; cum nihil pratermissum à vobis, nihil constet esse suppressum, quo illi refutati, & penitus cognoscantur esse convicti. Ideoque à nobis testimonia nulla ponuntur, quia & his plena Relatio est, & satis constat, tot Doctissimos sacerdotes cuncta dixisse; nec decet credere vos aliquid, quod ad causam possit proficere, praterisse. Quibus non absimilia rescripsit Milevitanae Synodi Patribus; quorum Epistolam Sanctitati suae datam, adversus Pelagii & Celestii primos impetus, totius Sacri Ordinis nomine exaraverat idem Augustinus. Multifariis equidem, ad destruendum tale Pelagii Magisterium, uti possemus exemplis; nisi sciremus Sanctitatem vestram ad plenum scripturas omnes callere divinas: praesertim cum vestra Relatio talibus ac tantis testimoniis sit referta, ut his solis valeat praesens dogma rescindi; opusque non esse reconditis, cum & iis qua facile vobis occurrentia posuistis, nec audeant obviare nec possint. Ac tandem ad Augustini Epistolas, quatuor Collegarum, Aurelii scilicet, Alipii, Evodii, & Possidii subscriptione munitas, rescribens, has catholicae fidei plenas censet, & magnoperè celebrat. Fraternitatis vestrae literas, plenas fidei, totoque Religionis Catholicae vigore firmatas à duobus missas Conciliis, per Fratrem & Coepiscopum nostrum Fulium, pergrato suscepimus animo; quod earum tenor omnisque contextio est in consideratione quotidiana gratia Dei; & in eorum correctione, qui contra sentiunt, integra ratione consistit: ut & illis omnem tollere possit errorem, & idoneum dato quovis nostra legis exemplo, quem sequi debeant dignum possint praebeere Doctorem.... Nam hoc loco latius de lege disputare, velut coram posito repugnantem Pelagio, necessarium esse non duximus: cum vobiscum totam scientibus, parique nobiscum consensione gaudentibus colloquamur.

Neque verò communes duntaxat Epistolas, ab Augustino, suo & Collegarum nomine missas, probasse censendus est Innocentius; verum etiam privatas ab eo datas, ac ipsum etiam librum de Natura & Gratia, unà cum cæteris causae Instrumentis transmissum, Apostolicae Sedis suffragio confirmasse. Cujus rei locupletissi-

mam fidem facit Augustinus ipse, Epistola 106. ad Paulinum: *Scriptissimus etiam, inquit, ad Beata Memoria Papam Innocentium, prater Conciliorum Relationes, literas familiares, ubi de ipsa causa aliquantò diutius egimus. Ad omnia nobis ille rescripsit, eodem modo quo fas erat & oportebat Apostolicae Sedis Antistitem.* Tamen vel id unum S. Augustini gloriae consecrandae plus satis esset, quod earum Synodorum Canones extremo veluti sigillo muniverint Innocentius, ac tum postea Zozimus, quarum ille os fuerat & ingenium; eundemque uti primum contra Pelagianos Christiani exercitus Imperatorem venerati sint.

Non absimiliter Bonifacius, Innocentio ac Zozimo proximè succedens, Augustinum non coluit modò, sed uti Ecclesiae oraculum habuit, à quo etiam adversus divinae Gratiae hostes, responsa peteret. S. Memoria Papa Bonifacius, inquit D. Prosper contra Collatorem cap. 41. cum esset doctissimus, tamen adversus libros Pelagianorum B. Augustini Episcopi responsa poscebat. Pelagianorum siquidem scripta Romam delata, in Africam Augustino refellenda transmisit; quorum & refutationem, in quatuor libros distributam, ad Bonifacium direxit Sanctissimus Doctor, ejusdem suffragio muniendam. Unde consequens existimavit S. Prudentius Tricassinus Episcopus, in Epistola ad Hincmarum & Pardulum, ut nullius erroris calumniae patere possit Augustini Doctrina, ex quo tam illustri Apostolicae Sedis suffragatione communita est: Si eam Doctrinam, inquit ille, adversam fidei orthodoxa in quoquam conspiceret, nequaquam eam Romana Ecclesia Antistes venerabilis Innocentius, cum totius Orbis Episcopis suscepisset: neque Bonifacius ejusdem Apostolicae Sedis Praesul Epistolas Pelagianorum sibi delatas, ei ad respondendum misisset, aut Responsum ejus, quatuor libris editam, probabiliter & honorabiliter suscepisset. Quin & Suares, Proleg. 6. de Gratia cap. 1. n. 6. Bonifacium ipsum, quatuor illis libris adversus Pelagianorum Epistolas elaboratis, Augustini ore locutum ait; ut non minùs Romae Pontifex quàm Episcopus Hipponensis, contra Julianum Pelagianum decertasse putandus sit. Bonifacius, inquit ille, constanter Juliano restitit, & per Augustinum, ut sic dicam, contra illum scripsit. Adeo ut jure merito S. Augustinus dicatur esse os & lingua Ecclesiae; cum per eum Ecclesia & summi Pontifices locuti sint.

Longè

Longè luculentius Celestinus I. Augustino humanis rebus exempto, atque ad iuperos vocato, epinicium cecinit; doctrinam ejus elogio ære digno celebravit, illiusque calumniatores datis ad Gallicanos & Episcopos efficacissimis Epistolis repressit ac fudit. Monitus scilicet ab Prospero & Hilario, qui Romam idcirco se contulerant, nonnullos Galliae Presbyteros in controversiam vocare, quæ à Sancto Augustino scripta essent, & à Romanis Pontificibus, Innocentio, Zozimo, & Bonifacio confirmata, ac Synodorum Decretis stabilita; magnificentissimo Sanctissimi Doctoris encomio petulantium obrectatorum audaciam fregit, æternoque silentio damnavit. *Augustinum, Sanctæ recordationis virum, pro vita sua atque meritis in nostra communione semper habuimus, nec unquam hunc sinistra suspitionis rumor aspersit: quem tanta scientia olim fuisse meminimus, ut inter Magistros optimos etiam ante à meis decessoribus haberetur. Bene ergo de eo omnes in communi senserunt, ut pote qui ubique cunctis & amoris fuerit & honori. Unde resistamus talibus, quos malè crescere videmus. Nefas est hæc pati religiosas animas, quarum afflictione, quia membra nostra sunt, nos quoque convenit macerari, quamvis maneat hos beatitudo promissa, quicumque probantur persecutionem propter iustitiam sustinere. Et paucis interjectis (si tamen altera illa Epistolæ pars, Celestini re verâ est, ut eruditi nonnulli opinantur.) Quia nonnulli, qui Catholico nomine gloriantur, in damnatis hæreticorum sensibus seu pravitatē seu malitiā demorantes, piissimis disputatoribus obviare præsumunt. (Augustino scilicet ejusque discipulis) Et cum Pelagium atque Celestium anathematizare non dubitent, Magistris tamen nostris, tamquam necessarium modum exceßerint, obloquuntur &c.*

Cæterum cum nonnulli, quibus stomacho erat solennis adeo Augustinianæ Doctrinæ commendatio, sublestè reponerent, priores duntaxat illius libros, non itidem posteriores approbatos esse, quod eorum titulus hac in Epistola Celestini non fuisset expressus; malignam hanc calumniantium interpretationem datâ operâ confutavit D. Prosper lib. contra Collatorem cap. 43. omnesque Sanctissimi Doctoris libros æquo jure probatos ostendit; quod idem omnibus esset doctrinæ spiritus, eademque predicationis forma: ac propterea nulli fas esse, contra istam clarissimam laudationis tubam, contra istam sacratissimi testimonii dignitatem, maligna in-

terpretationis murmur emittere; & perspicua sincerissimæque sententiæ nubem obliqua ambiguitatis obtendere.

Si quid tamen huic Celestini oraculo obscuritatis inesset, ne extremos Augustini libros videretur approbasse, nebulas omnes discussit Hormisdas PP. in Epistola ad Possessorem. Cum etenim universus Oriens ob Faustæ Regiensis Episcopi libros in partes discissus esset, quidve de divinæ Gratiæ controversiis Ecclesia Romana sentiret, à quibusdam ambigeretur; rescripsit Sacrorum Præles, id ex Augustini libris, atque iis maximè quos sub vitæ finem adornavit, esse cognoscendum, ipsamque Augustini doctrinam, hac ultima divini ingenii foeturâ exaratam, Ecclesiæ veluti dotem ac patrimonium declaravit. *De libero Arbitrio & Gratia Dei, quid Romana, hoc est Catholica, sequatur & servet Ecclesia, in variis libris B. Augustini, & maximè ad Prosperum & Hilarium, abundè cognosci potest. Quo singulari præconio permoti Africani Præsules, in exilium ab impio Rege pulsi, eosdem illos Sanctissimi Doctoris libros præ cæteris consulendos pronunciarunt Epistolâ suâ Synodicâ: quod iis maximè Catholicam fidem adversus novas Massiliensium cavillationes asseruisset. Præ omnibus studium gerite libros S. Augustini, quos ad Prosperum & Hilarium scripsit, memoratis fratribus legendos ingerere; quorum mentionem beata memoria Hormisdas Sedis Apostolica gloriosus Antistes, in Epistola quam consulenti se Sancto Fratri Consacerdoti nostro rescripsit, cum magno præconio Catholica laudis inseruit.*

Suffragatur ac novo quidem gloriæ cumulo Felix IV. qui varia Augustinianæ doctrinæ capita, ex plerisque ac præsertim ex ultimis libris delibata, in Canones transtulit. Lites quippe de divinæ gratiæ Auxiliis, quæ per annos plus minùs centum Ecclesia Gallicana jactata fuerat, supremâ authoritate compositurus, sententias viginti quinque ex Augustini lucubrationibus excerptas, ad S. Cæsarium Arelatensem transmisit, in Canones transferendas, & ab universis Ecclesiæ Præsalibus subscribendas. Liqueat id ex Actis secundæ Synodi Arausicanæ, cujus Canones plerosque à Felice IV. transmissos, ex Augustini sententiis conflatos, nemo non videt. Qua de re lege, si vacat, Binium & Sirmondum in Notis, Baronium in Appendice ad tomum 10. Annalium, Bellarminum lib. 2. de Gratia & Libero Arbitrio cap. 11. Cardina-

lem de Noris lib. 2. Historiæ Pelag. cap. 23. Notanda verò præ cæteris Bellarmini verba, queis gratuita Prædestinationis Sectatores hac occasione potissimum carpit. *Post illa, inquit, Celestini tempora, cum nondum factio illa Gallorum quiesceret, S. Leo Pontifex (immò veriùs Felix IV.) misit ad Concilium Arausicanum, certa Capitula de Gratia & Libero Arbitrio ex libris S. Augustini verbatim decerpta, qua voluit ab Episcopis illis recipi atque subscribi, ut etiam factum est. Porro in illis Capitulis continentur omnia fundamenta sententiæ de Prædestinatione gratuita, ut non possit ullus Prædestinationem negare, nisi velit illis Capitulis contraire.*

Felici IV. in consecrandâ S. Augustini sententiâ accinunt Bonifacius II. & Joannes II. ille quidem Epistolâ ad Cæsarium Arelatensem datâ, qua Synodi Arausicanæ Decreta confirmavit: *Atque ideo, inquit, cum de hac re multa Patres, & præ cæteris beata recordationis Augustinus Episcopus, sed & majores nostri Apostolicæ Sedis Antistites narratione probentur discernisse latissime, ut nulli ulterius deberet esse ambiguum, fidem quoque ipsam nobis venire de Gratia; supersedendum duximus responsione multiplici.* Iste Epistola 3. ad Senatores, *Sanctus Augustinus, cujus Doctrinam secundum Prædecessorum nostrorum statuta Romana sequitur & servat Ecclesia, &c.* Quo suffragio nedum Augustini doctrinam approbat Joannes II. verum etiam quæ antea retulimus summorum Pontificum, de illius autoritate Decreta certissima esse pronunciat. Quid porro ad S. Augustini gloriam luculentius dici potest, quam quòd hanc secundum summorum Pontificum statuta, Romana sequatur & fervet Ecclesia?

Suffragantur & alii Romanæ Sedis Antistites, quos exscribere longum esset: Gregorius Magnus Epistolâ ad Innocentium Episcopum, Joannes XXII. Constitutione 2. Urbanus V. in diplomate Translationis S. Thomæ Aquinatis, cujus potissimam laudem in eo positam dicit, quòd Augustini vestigia insecutus sit: ac demum Martinus V. in altero, de transferendo S. Monicæ Corpore, Diplomate Pontificio.

Tot ergo Romanorum Pontificum exempla secutus Clemens VIII. Augustinum lydiū lapidem esse jussit, ad quem in solennibus hisce Comitibus, vera de divinis Auxiliis sententia probaretur. Nemini cuiquam licitum arbitratus, ab ea doctrina deflectere, quam tot supremi

Hierarchæ, uti sacram Sponsæ dotem, continuata serie exceperant, custodierant, consecraverant.

Sed ecce eximiam illam Doctore Sanctissimo gloriam invidet Franciscus Annatus libro 8. sui Augustini vindicati cap. 4. mutantque quadrata rotundis Augustino palam insultat, quasi non tam Molina suus, quam ipse Gratia vindex, coram Clemente VIII. ad examen vocatus esset, ac velut in ordinem missus. *Nam quod obijcere solent, inquit ille, Clementem VIII. jussisse tempore Disputationum de Auxiliis, ut Augustini potissimum sententia inquireretur, facile solvitur. Neque enim id præcepit eo præjudicio, quasi nefas duceret ulla in re dissentire ab Augustino, repudiata etiam Celestini distinctione illa, inter Propositiones quas esset, & quas non esset opus adstruere. Neque idem est, velle ut disputantes Augustini sententiam inquirant, & velle omnino ut in omnibus eam sequantur. Non itaque, si Annato credimus, sedit hoc in Judicio Arbitr Augustinus & Judex, sed reus causam dixit, manumque ferulæ supposuit. Heu quam ima fummis atra dies miscuit! Ille ille Conciliorum olim os ingeniumque, suâ nunc turpiter sede dejectus, causam coram Pontifice suppliciter dicit! Proh superi, mites animos! Num hæc Clementis VIII. mens fuerit, dicant qui præmissam publicis disputationibus Augustinianæ Doctrinæ commendationem, de qua paulò antè dicebamus, vel obiter legerint. Ut quid enim totam hanc disputationem ad normam Doctrinæ Augustini de Gratia adstringere statuit? Ut quid Ecclesiam Augustini doctrinâ hereditario jure acceptâ privari noluit; si (quod novus criminatorem obtendit) id non illi erat in animo, ut agitandæ Controversiæ Judices Augustini sententiam in omnibus sequerentur? Annati cespitationem castigat Leonardus Sherlogus, alter ejusdem scholæ Magister, sub Pauli Leonardii larvâ delitescens, in Apologia pro Scientia-media Part. 2. num. 39. In Disputationibus Roma agitis coram Sanctitate Clementis VIII. & Pauli V. sæpè & diligenter interrogatum est de mente S. Augustini, quòd eo speciatim in genere questionum exploratum esset, ab iis optima proferri, quibus tantus Gratia Hyperaspistes faveret. Quare anno 1602. tractatum, Quis majores vires ad bonum libero Arbitrio tribuat, an Augustinus, an Molina? Continetur ille Articulus septem Questionibus, in quibus singulis de mente Augustini disceptatur cum Molina &c. Ex quibus liquet altercationis penè*

penè omnem scopum fuisse, quidnam Augustinus sentiret.

At, inquiet importunus Augustinianus nominis osor: Ergone Celestini distinctionem repudiavit Clemens VIII. qua videlicet, post statuta certa fidei capita, Augustinianæ doctrinæ summam complexa, atque ex variis Romanorum Pontificum ac Synodorum sanctionibus delibata, cætera omnia fidelium opinionationi permisit? *Profundiores verò*, inquit Celestinus ad calcem Epistolæ laudatæ ad Galliæ Præsules, *difficilioresque partes incurrentium Questionum*, quas latius pertractarunt qui hæreticis restiterunt, sicut non audemus contemnere, ita non necesse habemus adstruere. Absit ut Clementem cum Celestino committamus; distinctionemve ab uno positam, ab altero rescissam existimemus. Verum hæc duo Annato probanda erant, ut quidpiam suâ illâ lasciniâ conficeret. Primum, certa fidei capita, Epistolæ Celestini adnexa, ultimamque illam de profundioribus Questionibus clausulam, Celestini ipsius esse: Alterum, controversias in Auxiliorum Congregatione ventilatas à certis illis fidei capitibus longè esse dissitas, & *incurrentium Questionum* loco numerandas. Primum etenim diffitentur, haud levibus argumentis, benè multi: duo in primis Purpurati Senatus lumina, Cæsar Baronius, in Annalibus, ad annum 431. & Henricus de Noris in Vindiciis cap. 7. Laurentius Surius in Historia sacra, Gerardus Vossius lib. 1. Historiæ Pelagianæ cap. 30. Curatores Editionis Conciliorum Colonienfis ac Sixtinæ; Quenellius in Notis criticis ad opera Sancti Leonis magni: quin & ipsi etiam Societatis Professores Franciscus Suares Proleg. 6. de Gratia cap. 1. num. 11. Jacobus Sirmondus tomo 1. Conciliorum Galliæ: Quibus omnibus visum est, Celestini literas in hæc verba desinere: *Dominus incolumes vos custodiat, Fratres charissimi*; cætera verò Capitula Epistolæ adnexa, vel à Prospero, vel ab altero quopiam fuisse addita. Alterum, quod ab Annato festivè supponitur, id ipsum est, quod in ea prægravi lite in controversiam vocabatur: annon videlicet Molinianæ doctrinæ paradoxa in hæreseos suspicionem adducta, contra fidei capita re ipsa peccarent; & an *incurrentium questionum* loco, de quibus pro arbitrio sentire liceat, haberi possent?

Quamquàm itaque adnexa Capitula, adeoque ipsam quoque Clausulam in controver-

siam adductam, Celestini esse fateremur, quod viri pariter eruditi persuassum habet; nihil ab eo alienum statuisset Clemens VIII. dum pendentem litem ad Augustini mentem expendi ac definiri voluit: sed Celestini ipsius cæterorumque Romanorum Pontificum vestigia secutus, non esse incurrentibus questionibus, opinione liberis, accensenda censuit, sed fidei Capitibus annumeranda, quæcumque Augustinus datâ operâ, certò & incunctanter velut Ecclesiæ fidem statuisset ac propugnasset.

Immò verò omnium cachinnis, ut mihi loquar, excipiendi veniunt, qui pauca illa Celestini Epistolæ adnexa fidei Capitula, ex Augustini Libris deflorata, uti fidei Dogmata de divinis Auxiliis duntaxat accipiunt; cætera verò vniuersa, ab Augustino contra Pelagianos de industriâ licet ac firmiter propugnata, uti liberas opiniones excipiunt, quas uti contemnere non est ausus Ecclesiæ Pontifex, ita necesse non habuit adstruere. Egregios sane Pontificiæ mentis Interpretes! Ut quid ergò, si sic est, vocato ad superos Celestino, Gelasius in Epistola ad Episcopos per Picenum constitutos, quatuor ejusdem Augustini sententias inculcat, & sacris dogmatibus accenset? Quorsum Felix IV: uti paulò antea notabamus, Canones viginti quinque ex Augustini libris digessit, & ad Cæsarium Arelatensem Episcopum transmisit, ab Ecclesiæ Gallicanæ Præsulibus subscribendos? Itane se gessissent supremi Ecclesiæ Hierarchæ, si pauculis illis exceptis Celestini Capitulis, reliqua Augustini dogmata inter adia-phora numerassent?

Iis itaque Articulis Celestini Epistolæ adnexis, veluti principiis ac primigeniis fontibus stat Catholicæ fidei summa, doctrinæque ab Augustino contra Pelagianos assertæ veluti basis; unde alia ad fidem pariter attinentia dogmata derivantur. Unde & Celestinus declarat, velle se ea sulcipi, non solum quæ illis Articulis expressa sunt, verum etiam quæ sunt iisdem adnexa. *Quod si quis*, inquit, *non nimium est contentiosus, agnoscat omnium disputationum connexionem ex hac subditarum auctoritatum brevitate pendere*, Capitulum scilicet, quæ subjungit. Quare Cardinalis Bellarminus lib. 2. de Gratia & lib. Arb. cap. 11. ex hac ipsa Celestini Epistola colligit, Prædestinationem gratuitam defendi à Catholicis oportere, non uti opinione liberam, sed uti Ecclesiæ Catholicæ fidem; licet expressè atque distinctè in dictis capitibus

minimè recenseatur : ob id videlicet inter alia quòd ex iis deriveretur facilè ; & ab Augustino, cujus doctrina totâ passim Epistolâ commendatur, inter fidei dogmata recenseatur.

Et certè, nisi totius Epistolæ contextus pervertatur, fieri omninò nequit, ut Celestinus aliquas Augustini sententias, ab eodem veluti Catholicæ fidei dogmata adversus Pelagianos & Massilienses constanter assertas, ad sententias opinione liberas amandarit, & à suis illis statutis articulis diffitas pronunciaret.

Primò enim, Semipelagianorum audaciam reprehendit Sanctissimus Pontifex, quòd Augustinum debitos disputationis limites prætergressum effutirent : *Magistris nostris, tamquam necessarium modum exceßerint, obloquuntur.* Non itaque necessarium modum excessit, iudice Celestino, immò nullus eum sinistra suspitionis rumor aspersit. Excessisset porrò maximè Augustinus, & suspicione admodum finisti à laborasset, si quid velut Ecclesiæ dogma posuisset, quòd Ecclesiæ dogma re ipsa non esset, & à quo procul abire liberum foret. Eo momento, gratuita Prædestinationis impugnatores exagitat Bellarminus loco paulò antè laudato : *Deinde Celestinus, inquit Purpuratus Theologus, in ea Epistola cap. 2. ita laudat Augustinum, ut dicat eum semper habitum à Romana Ecclesia pro Magistro optimo, & nunquam eum fuisse saltem rumore sinistra suspitionis aspersum. At quomodo ista dicere potuisset Celestinus, si Augustinus falsè scripsisset, fidem Prædestinationis in Ecclesia Catholica semper fuisse ; & contra eam neminem nisi errando disputare potuisse ? Nam si Augustini de Prædestinatione sententia falsa esset, non posset idem Augustinus ab ingenti temeritate defendi : quippe qui non solum tam acriter pro falsitate certasset, sed etiam pro fide Catholica venditare ausus esset. Quomodo igitur Celestinus eos qui pro hac ipsa re Augustinum temeritatis & erroris damnabant ita reprehendit, ut dicat nefas esse talia audire, & Augustinum pro Magistro optimo semper habitum, nec unquam fuisse saltem rumore sinistra suspitionis aspersum ; nisi hanc ipsam de Prædestinatione doctrinam, secundum Augustini sententiam, veram esse credidisset ?*

Rursus, si profundiorum Quæstionum nomine, quas necesse non erat adstruere, sententiæ nonnullæ ab Augustino pro certissimis contra Pelagianos & Massilienses assertæ, intelligerentur, cur id adversus Augustini doctrinam nusquam obje-

cere Massilienses ? Cur ad ea excipienda, quæ sibi in Sancto Doctore displicebant, hæc Celestini Epistolæ clausulâ nusquam usi inveniuntur ? præcipuè cum omnia molirentur, ut hujusce judicii Pontificii vim effugerent. Monet equidem D. Prosper, objecisse illos, priores duntaxat Augustini libros eo Judicio probatos esse ; at nusquam legimus, venisse illis in mentem, ut dicerent, nonnullas ab summo Pontifice sententias exceptas esse, quas ille quidem uti certas statuisset, & tamen adstruere non esset opus. Quo responso longè facili Pontificiæ approbationis auctoritatem imminuissent, & S. Augustini gloriam non mediocriter decurtassent.

Accedit, summos Pontifices Celestini Successores, S. Augustini Doctrinam de Gratia universim probasse, commendasse, consecrassè, quavis distinctione posthabita. Quod sanè minùs prudenter gestum videri posset, si quas in Augustino sententias reperissent, contra hæreticos de industria propugnatas, uti Catholicæ fidei capita, à quibus dissentire liberum esset.

Ecquæ ergo, inquires, sunt illæ profundiores difficilioresque partes incurrentium Quæstionum, quas uti Celestinus contemnere non est ausus, ita necesse non habuit adstruere ? Sunt illæ dubio procul Quæstiones profundiores difficilioresque obcuritate rerum, & incertitudine veritatis atque sententiæ, quæ de illis ferri certò non possit : quæstiones, inquam, non per sese ac directè ad Gratia defensionem, controversiasque Pelagianorum ac Massiliensium attinentes ; sed ex occasione tantum ab Augustino tractatæ ; quæ idcirco incurrentes à Celestino vocitantur : quæstiones tandem, quas latius, ut loquitur idem Pontifex, pertractat, & multis variisque rationibus agitatur Augustinus ; de illis tamen vix quidquam definiens : quales sunt hæc, Quomodo traducatur peccatum Originale ? Quæ sit concupiscentiæ natura ? Quænam animæ origo ? aliæque id genus.

Has sicut non est auius contemnere summus Pontifex, ita nec necesse habuit adstruere ; uti nec illas adstruxerat Sanctissimus Doctor. At de his plenius lib. 4. c. 4. & 5.

Cæterum dum universam de divinis Auxiliis tractationem, ad Augustini mentem exigere jussit Clemens VIII. non ideo cæteros Ecclesiæ Patres missos voluit, aut summorum Pontificum, ac Synodorum Statuta negligi passus est. Immo & hæc omnia, ad Controversiæ eliquationem, sæpius advocabantur. At Augustini no-

De quibus Augustinus ipse lib. de Doctrina Perseverantia cap. II. inquit Operosissimas quæstiones incidentes enucleatè solvere nolui, ne nimium longum opus esset.

Patres ejus doctrinae vindices & haeredes, Pontifices ejusdem approbatores, Synodos demum, quae illius & verba & sensus in Canones transfuderunt, intellexit eruditissimus Pontifex, fontem unum indigitans, unde sequentium saeculorum Patres, uti minores rivuli derivarunt: cujus aquas salutare Pontifices & sacra Synodi consecrarunt.

CAPUT NONUM.

Argumenta disputationum quinti Examinis, a CLEMENTE VIII. pro nata difficultate, identidem designata.

Primum scriptum Clementis VIII. &c. Pag. 389.

AD CAP. 9. Pag. 402. lin. 40. post haec verba: à Congregatis Patribus; adde.

A Tridentinae quoque Synodi Praesulibus usurpata legitur, apud Galparum Cardillum in Disputationibus adversus protestationem 34. haereticorum Augustanae Confessionis, Disp. 7.

AD CAP. 23. Pag. 474. lin. 3. sic lege.

Ut Concilium de dolore ex motivo fidei intelligendum, Molinam autem de dolore tantum quoad substantiam actus, &c.

AD CAP. 43. Pag. 563. lin. 5. post haec verba: Studio retricari.

Hujus accusationis invidia, potiori jure onerandus esset Joannes Phelippæus, Societatis Theologus, de quo plura diximus libro primo. Is etenim Scientiam mediam confutaturus, in suis ad Oseam Commentariis, sanctissimos Ecclesiae Patres, Augustinum, Prosperum, & Fulgentium, usque adeo ab illo Molinae commento procul abiisse ait, ut omnem Deo notitiam sustulerint futurorum liberorum, quae semotâ conditione, è qua pendere dicuntur, nusquam re ipsa contingent: nihil scilicet veritus, hanc ipsam extremam opinionem tam caris caelo capitibus adscribere; in quam Praedicatores nimio oppugnandae Scientiae mediae ardore prolapsos commenti sunt alii. Tres illi gravissimi Patres, inquit ille, qui praeceteris omnibus doctissime & subtilissime de gratia disputarunt, longissime abfuerunt ab eo gratiae efficacia sensu, qui per Scientiam mediam & conditionatam, rationem reddit efficacitatis, quae est in gratia cum libero arbitrio coherens: cum illam ipsam scientiam, & futura conditionata respuerint. At de his plenius Libro primo, ubi Phelippæi men-

tem intimius expendimus. Sequitur

CAPUT XLIV.

Pag. 564 lin. 14. post haec verba: voluntatis affectu.

Probat quotidiana penè benevolentiae significatio; dum quidquid illi in hujusce causae tractatione praeter jus & aequum concedi sibi precabantur, lubentius indulgebat, malebatque ex abundanti gratificari, quam nimiam Juris tenacitate solutos animos exacerbare. Probat longè feliciter paternam illam verèque Pontificiam sollicitudo, qua Societatem è Gallia pulsam, Henrici IV. benevolentiam restitui, & ad Clementiae sacra admitti providit: nec non zelus ardens, quo se apud Regem eundem sequestrum exhibuit, ne qui ex priori naufragio sospites evaserant, in exilium pel-lerentur. Quantum enim Pontifici optimo enitendum fuerit, quam crebris ac repetitis officiis certandum, ut hanc à Rege Maximo gratiam obtineret, iis manifestum fore arbitror, qui aversum Henrici IV. animum noverint, qualem is suis in Romanam Curiam Oratoribus, non semel aperuit, dum de restituenda Societate rogaretur, Sanctitatis suae nomine. *Sur la demande pour les Jesuites* (scribebat ille Duci de Luxembourg die 17. Augusti 1598.) *j'ai répondu au Legat ingénument, que si j'avois deux vies, j'en donnerois volontiers une au contentement de Sa Sainteté: mais que n'en ayant qu'une, je la devois ménager & conserver pour mes Sujets, & pour faire service à Sa Sainteté & à la Chrétienté. Puis que ces gens se montrent encore si passionnés & entreprenans, où ils étoient demeurés en mon Royaume, qu'ils étoient insupportables, continuant à séduire mes Sujets, à faire leurs menées, non tant pour vaincre & convertir ceux de contraire Religion, que pour prendre pied & autorité dans mon Etat, & s'enrichir & accroître aux dépens d'un chacun; pouvant dire mes affaires n'avoient prospéré, ni ma personne avoir été en sûreté, que depuis que les Jesuites ont été bannis d'ici; il seroit impossible, qu'en France ils fussent vus de bon œil, & soufferts par ceux qui aiment ma vie & mon repos. Quod ita Latine dicas: Quod attinet postulationem pro Jesuitis mihi factam, Legato Pontificio ingenuè respondi, me quidem, si duplex vita suppeteret, alteram in sua Sanctitatis implendo desiderio libenter positurum: at cum unica mihi à Deo O. M. sit concessa, huic tuenda servandaque invigilare opus est, cum ut Subditorum commodis & utilitati in-*

Lege Concilium in Clement. VIII. & Cardin. Offatum Epist. 27. ad D. de Villeroy.

& Christiani nominis bono consulam. Cum enim iis Regni partibus, quibus residui manent, ad qualibet audenda adeò se fervidos & acres exhibeant, ut vix ultra ferri possint, subditosque clandestinis consiliis in partes distrahant; non tam exstirpandi erroris studio, quàm obtinenda intra Regni fines auctoritatis, pecuniaque caterorum damno coacervanda cupiditate: ut mihi affirmare iure liceat, nunquam mihi prosperè cessisse res meas, aut vitam in tuto positam, nisi ex quo tempore in exilium acti sunt: ab iis in Gallia grato animo excipi, omninò non possent, qui me quietum & sospitem optant.

Quibus non absimilia significavit Rex Maximus, anno 1599. cadente Mente Januario, dum Domino de Sillery, Romanam Legationem obituro, hoc in Jesuitarum causâ Mandatum dedit. Le Sieur de Sillery assurera aussi Sa Sainteté, que Sa Majesté a très-bonne volonté de favoriser pour sa consideration, les Colleges des Jesuites, qui sont demeurés en son Roiaume; pourvu qu'ils se comportent à l'avenir envers Elle & ses Sujets, comme ils doivent faire, & que sous prétexte de Religion, ils ne troublent le repos de son Etat, ni ne s'entremettent des affaires publiques, comme aucuns d'eux ont osé faire cy-devant, avec plus d'imprudence que de zèle & de Religion. Ce qui les a rendu si odieux, avec la convulsion qu'ils ont démontré avoir de s'accroître, & de s'enrichir, & les attentats qui ont été faits contre la Personne de Sa Majesté, à leur instigation; que si Sa Majesté eut secondé les volontés de ses Sujets contre eux, & les Arrêts du Parlement, qui s'en sont ensuivis, ils eussent encore été traités plus rigoureusement, qu'ils n'ont été. Et combien qu'en cela Sa Majesté se soit opposée aux desirs & conseils de ses Officiers & Sujets, pour obvier aux inconveniens, qui pouvoient avenir de la temerité d'aucuns particuliers Jesuites, lesquels ont causé cette publique haine contre tout l'Ordre; toutefois il est certain, que Sa Majesté a toujours plutôt modéré qu'aigri les choses contre eux: portée du seul desir de complaire à Sa Sainteté; car elle n'a aucune occasion d'être contente de ceux dudit Ordre; lesquels depuis ledit bannissement, n'ont cessé de faire en secret & en public toutes sortes de menées, & mauvais offices, pour nourrir la discorde entre ses Sujets, décrier les actions de Sa Majesté, dont ils font profession de juger plutôt par passion, & par l'avis d'autrui, que par la vérité d'icelles, & par raison. Quæ verba Latine reddideris: Dominus de Sillery Sanctitati sue significabit, Maje-

statem suam, illius quidem gratiâ, inelinari ad officia Jesuitis in Regno residuis impendenda: modò deinceps erga Majestatem suam ejusque subditos ita se gerant ut debent, nec specioso Religionis obtentu turbas in Regno faciant; neve publicis negotiis sese immisceant; uti illorum aliqui hactenus attentarunt, majori quidem animi cecitate, quàm zelo ac studio Religionis. Quæ res ita illis publicum odium concitavit (attentâ præsertim eorundem immodicâ auctoritatis & opum cupiditate, & attentatâ ipsis instigantibus in Regis vitam molitione) ut cum eis longè acerbius actum esset, si Rex ipse subditorum genio, & supremi Senatus Edictis morem gessisset. Ac licet eo in capite Majestas sua, votis atque consiliis Ministrorum & subditorum semper obstiterit, ut incommodis privatorum quorundam Jesuitarum audaciâ orituris, occurreret, qui publicum illud in Societatem odium concitarent; id insuper certum, Majestatem suam singula temperasse potius quàm irritasse; ut Sanctitatis sue genio responderet. Nulla quippe Regi causa est, cur illius Instituti Professores amet. Quippe qui, ex quo tempore in exilium acti sunt, omnia & palam & secretò tentarunt, ut turbas inter subditos foverent ac cierent, suæque Majestatis agendi rationem improbarent; quàm malo potius animo & ex alienâ sententiâ, quàm ex ipsa rei veritate interpretari malunt. Ita ferunt documenta, ad Historiam Cardinalis de Joyeuse spectantia, à Clarissimo viro Auberio, Senatus Galliarum Advocato publicæ luci data, Anno 1654.

Tantus nihilominus fuit Clementis VIII. in Societatem amor, ut repugnantem Regis animum precibus ac repetitis officiis vicerit. Jesuitis exulibus Sceptra Jovemque conciliavit optimus Pontifex, ac exitu quidem adeò secundo, ut non modò in Henrici gratiam redierint universi, verùm etiam inusitatis Regiæ munificentiae monumentis supra votum aucti fuerint. Nemo ergo Clementem Societati minùs affectum dixerit, nisi qui illustriora paternæ benevolentiae argumenta, aversi animi judicia interpretari voluerit.

Nihilo firmiori titulo nititur exceptio altera, de &c. circumvento ab Hispanis &c. lin. 30.

Pag. 567. lin. 3. à fine, post hæc verba: muneribus illustris.

Quæ ego mente dum recolo, subit animum Pelagianæ quondam Sectæ jactura non levis; cum Sixtus Presbiter, quem causæ suæ præcipuum defensorem jactaverant gratiæ advertarii, alienissimum tandem

dem eis animum declaravit. Quo casu triumphabundus Augustinus lætitiæ sensu expressit, datâ ad ipsum Epistolâ 104. *Quid gratius, inquit, legi vel audiri potest, quam Gratia Dei tam pura defensio, adversus inimicos ejus, ex ore ejus qui eorundem inimicorum, magni momenti Patronus antea jactabatur?* Et Epistola 105. ad eundem: *Tristes eramus nimis, cum fama jactaret, inimicis Christiana gratia te favere. Sed ut hæc tristitia de nostris cordibus tergeretur, primò te priorem anathema eis in populo frequentissimo pronunciasse, eadem fama non tacuit.*

Restat &c.

AD CAP. Pag. 570. lin. 14. à fine, post hæc verba: gratificari voluit.

Nihil itaque dubitandum, ita fuisse affectum animo Clementem VIII. partim ob singularem, qua pollebat, eruditionem, partim ob felicem habitatum Disputationum exitum, partim ob lata virorum eruditorum judicia, ut si majores in luce moras fata dedissent, controversiam omnem secundum Thomisticam Scholam dirimisset, litemque Prædicatoribus adjudicasset.

Sed inquiunt &c.

Pag. 572. lin. 12. post hæc verba: arbitrer interfuerat.

Numquid demum cæteri omnes Purpurati Principes, Archiepiscopi, Præfules, variorum Ordinum Theologi qui contraria Perronio sentiebant, uti homunciones atque umbratici traducendi; aut velut extrema concio, turba inops & obscura, Judiciorum sacris submovendi? Sic certè sentire videntur Molinianæ partis Actores, qui quoties de celebri Auxiliorum Congregatione verba faciunt, unum Perronium ac Bellarminum in ore habent, tamquam penes illos tota res steterit: cæteros uti longâ nocte ignotos, silentio mittunt; cum tamen minores in hujusce Causæ tractatione duo illi partes habuerint, nec nisi tardè admodum ac penè jam serò, in Judicium admissi sint. Bellarminus enim ad Congregationem duntaxat sexagesimam nonam, coram Clemente VIII. habitam, inter Judices admitti cœpit; Perronius ad sexagesimam septimam.

Cæterum &c.

Pag. 574. lin. 4. à fine, post hæc verba: ut iis utamur.

Ubi liberi arbitrii animæque virium

usum à gratia sobolescere proficitur; quo capite potissima Molinianæ controversiæ pars vertebatur.

Pag. 584. in fine Libri.

CAPUT XLVIII.

Bastida commentum, à Germano Becheferio Societatis Theologo nuper Parisiis instauratum, de peccatis obduratorum non imputandis, cumulatissimè confutatur. Peccati Philosophici nuperrimè recusus error exploditur, 1. Ex hoc effato: Ut peccatum imputetur nullam supernaturalem mentis illustrationem, aut excitationem voluntatis esse necessariam.

UT hanc Libro tertio mantissam addamus, facit nova Lutetiæ ab Societatis Professore tentata periclitatio, ut Peccati Philosophici errorem novâ larvâ obductum instauraret. Nihil quippe hoc de argumento in priori Editione nobis exciderat.

Diu est, cum Molinianæ doctrinæ cardinem in peccati Philosophici errore tanquam principio potissimum verti putant Theologi benè multi, colliguntque argumento non longius accessito, sed e re nato, ac sponte fluente. Cum enim gratiam sufficientem actualem, in mentis illustratione, voluntatisque excitatione positam, idcirco maximè universis hominibus indiscriminatim præstò esse doceant, quòd aliàs admissa delicta vitio nobis minimè verterentur; id certè principii loco ponunt, eum peccati culpâ minimè teneri, Deumque re ipsa nequaquam offendere, qui nullâ sibi gratiâ affulgente & adspirante, de Deo actu ejusve lege non cogitaret.

Bastidam eo stetit principio in Congregatione 45. coram Clemente VIII. obiter observavimus lib. 3. cap. 32. dum Lemosio acriter contendente, non omnibus gratiæ sufficientis Auxilium præstò esse, illicò subintulit: *Si omnibus non datur auxilium sufficiens: ergo quando homo peccat, non potest illi imputari ad culpam: quem idcirco Pelagiani erroris postulavit Dominicanus Interlocutor, Hæc illatio, inquiens, est Pelagiana: quo dicto, soluta Congregatio est.*

Eodem deinceps arasse vitulo liberales gratiarum sufficientium largitores, adeò palàm est, ut solem lucere meridie probandum aggrediar, si id congestis illorum testimoniis adstruere velim. Notare hic sa-

tis fuerit, quam nuper Parisiis explicuerit scenam Germanus Becheferius Societatis Professor Theologus, ut hoc scholæ suæ placitum novam in lucem ederet. Theologicas ille Theses habuit die 14. Decembris 1699. in quarum 8. Positione, ad calcem primæ columnæ, hæc legebantur: Unum peccatum sæpè est pœna alterius peccati; quatenus nempe obcæcatione punitur & obduratione, cum Deus prius desertus peccatorem deserit. Tres sunt desertionis gradus: primus gratiam uberiores, secundus minorem aliam, tertius verò omnem omnino excludit. Peccata gravia primo & secundo desertionis gradu in hac vita puniuntur: nulla autem puniri desertione summa, ita ut Deus opem gratiæ omnem peccatori subtrahat, magis videtur Augustini opinioni congruere, & aperte docet Autor libri De vocatione Gentium. Eorum qui aiunt peccatores nonnullos ita deseri à Deo, ut ab interiore illius luce penitus secludantur & priventur omni motu, non una est opinio. Alii enim errant dum asserunt, peccatori planè obcæcato & indurato peccata nihilominus imputari: alii tolerabilius sentiunt, dum negant.

Verùm cum gravis ex ea positione nata offensio esset, eamque Doctores Sorbonici benè multi configendam censuissent, sententiam videlicet rogati ab Illustrissimo Parisiensium Archiepiscopo Ludovico Antonio de Noailles, quem piæ memoriæ Innocentius Papa XII. ob præclara merita Cardinalitiâ purpurâ postea donavit, ut obortæ offensio satisfaceret Becheferius imminensque iudicium declinaret, sequentem declarationem Eminentissimo Præsuli dedit, die 3. Aprilis 1700. Rectore Collegii offerente, Novitiatus quoque Rectore præsentem, in obsequiū atque officii fidem. DELATIS ad Illustrissimum ac Reverendissimum Ecclesiæ Principem Archiepiscopum Parisiensem querelis super quadam positione mea, de excæcatorum & obduratorum peccatis, ex Thesi quam die 14. Decembris anni 1699. propugnaui: hanc mentis meæ explanationem eidem Illustrissimo Præsuli, summa qua par est animi submissione obtuli, paratus deinceps quoties occasio tulerit, quam maxima potero obsequiū mei argumenta, pari cum fiducia reverentiæque exhibere: ut intelligant omnes quantum tribuam iudicio atque auctoritati sapientissimi Antistitis, quem summo Ecclesiæ bono inter sacra doctrinæ custodes atque interpretes divina dispositio constituit.

Primum itaque profiteor, nunquam in ea me sententia fuisse, ut crederem eos qui vocantur obcæcati & indurati, non peccare amplius, vel sua illis peccata minimè imputari

à Deo; immò me semper tenuisse, & nunc etiam tenere, ex Scriptura & Patribus certò constare, quòd peccent, & quòd peccata illis imputentur. Simul agnosco positionem meam ita generalibus verbis conceptam fuisse, ut iustam hujus explanationis postulanda causam præbuerit.

Profiteor insuper, quantumvis mihi persuasum sit obduratos nequaquam omni carere interiori gratia, quæ ad implenda præcepta sufficiat, haud propterea voluisse me ullâ censurâ notare illos, qui nec pauci sunt nec infimi nominis, Theologos & Catholicos, quos contraria in opinione æquè in Ecclesiâ permixta versari certum est: neque, cum in prædicta positione dixi errare illos, aliud à me intellectum esse, quàm quod fallantur.

Cujus sententiæ meæ, pariter & singularis adversus Illustrissimum ac Reverendissimum Ecclesiæ Principem observantiæ ac submissionis, ipso benigne annuente, perpetuum hoc exstare monumentum volui manu mea subscriptum. Parisiis die 3. Aprilis anno 1700. GERMANUS BECHEFER.

Quisquis hanc Becheferii declarationem cum defensata positione contulerit, facile colliget, eum quidem professum ultro, obcæcatorum atque induratorum peccata, iisdem re ipsa crimini verti, quòd illos nusquam omni interiori gratiâ destitui putet; eosdem tamen culpâ vacaturos innuisse, si interioribus Auxiliis privarentur. Quare nec Theses assertionem revocavit; sed quod absolutè ab eo dictum putabatur de peccatis obdurato non imputandis, (unde maximè suborta offensio fuerat) id à se velut incommodum ex aliorum Theologorum sententia derivatum haberi voluit.

Nostrarum itaque partium esse duximus, confectarium istud jam pridem à Bastida deductum, ad crisim exigere; pauloque distinctius explorare, an ii Theologi re ipsa fallantur, qui cum induratos & obcæcatos omni ad certum vitæ tempus interiori auxilio destitutos existiment, iisdem peccata vitio dari nihilominus assentunt? Annon potius ii Philosophici peccati proscriptum errorem obliquè reculant, qui delictis imputandis necessariam gratiam arbitrantur, illosque peccatis absolvunt, qui internis auxiliis iusto Dei iudicio privarentur?

Ac primò quidem, ingentis temeritatis & audaciæ esset, eam celebriorum Theologorum sententiam proscripti à Pontificibus erroris insimulare, quæ homines induratos & obcæcatos, auxiliis interdum sufficientibus ad certum vitæ tempus destitutos ait, in obdu-

obdurationis & cæcitatæ poenam. Gratias Becheferio plurimas, quod id demum sua illa declaratione professus est! Cum enim Jansenius uno eodemque contextu duo hæc promiscuè posuisset, Gratiâ possibilitatis, quam sufficientem recentior schola vocitat, justis interdum deesse & obcæcatis; nonnullaque Dei præcepta, utriusque secundum præsentem quas habent vires, qualitercunque impossibilia contingere; complexam periodum secuerunt Delatores: partem alteram, quæ obcæcatos gratiâ possibilitatis interdum destitutos, ac voluntaria illa implendorum quorundam mandatorum impotentia laborantes statuebat, intactam reliquerunt; alteram, quæ justos eadem forte implicabat, sacro Anathemate feriendam obtulere. Ita quippe Jansenius scripserat lib. 3. de Gratia Salvatoris capite 13. unde primam illam Propositionem excerptam voluerunt Delatores: *Hæc igitur omnia plenissime planissimeque demonstrant, nihil esse in S. Augustini doctrina certius atque fundatius, quam esse præcepta quadam, quæ hominibus non tantum infidelibus, excæcatis, obduratis, sed fidelibus quoque & justis volentibus, conantibus, secundum præsentem quas habent vires sunt impossibilia, deesse quoque Gratiâ qua possibilia fiant.* Ita verò procribendam Sedis Apostolicæ judicio Propositionem, quæ inter quinque famosas ordine prima est, expresserunt: *Aliqua Dei præcepta hominibus justis volentibus & conantibus, secundum præsentem quas habent vires sunt impossibilia; deest quoque illis Gratiâ qua possibilia fiant.* Quorsum autem tam diligens illa, tam cauta, tam studiosa implexæ periodi Jansenianæ partitio, nisi quod sententiam alterâ parte expressam, ab omni errore remotissimam centerent, & ab omni Ecclesiæ censurâ liberam judicarent? Id nonnullos recentiores meminisse velim, ne ultra quam debeant, immò & ultra quam ipsimet Jansenii Delatores voluerint censoriam virgam extendant.

Jam quibus Doctoribus ac Magistris ea se circumsepia Theologorum assertio, qui obcæcatis & induratis ad certum vitæ tempus internis excitationibus aliisve possibilitatis auxiliis justo Dei judicio interdum exutos existimant, novit ultrò Gabriel Vasques, largus ille Gratiarum sufficientium distributor, dum sese ab Augustino, Prospero ac Fulgentio, summis divinæ gratiæ Magistris, legregem fassus est, disp. 97. in 1. Partem D. Thomæ cap. 3. Cum enim adversus liberalem illam & prodigam gratiarum sufficientium distributionem, pro qua totis lacertis de-

pugnat, non pauca Divi Augustini, Prosperi ac Fulgentii testimonia congestisset, hoc uno se responso exsolvit: *Fateor sanè suspecta mihi esse testimonia Prosperi & Fulgentii, quod diligentissimi & exactissimi Augustini discipuli sint, & oppositam videantur sequi sententiam, ut ex testimoniis superiori capite in prima classe relatis liquet. Locis ergo nunc à nobis allegatis, forsân gratiam exteriorum signorum, & beneficiorum medicinas etiam exteriores peccati concesserunt; in aliis verò auxilium interioris inspirationis, de quo nunc est controversia, negarunt. Verum enimverò cum de Dei misericordia multa magna-que jure præsumere debeamus, tamque egregia & præclara Scriptura prædicet, atque ex sola Dei voluntate pendeat tale auxilium alicui denegare; nisi nobis de hac voluntate manifeste constet; id nullo modo affirmare debemus. Ea verò voluntas non aliunde quam Scripturâ, aut revelatione seu traditione potest innotescere. Cum ergo nullo ex his modis Dei propositum nobis notum sit, temere affirmabimus, illud auxilium aliquibus denegari: atque ab Augustino & aliis qui id docuerunt petere possumus, undenam hujus voluntatis Dei certiores fuerint effecti? Ita Vasquesius, à quo potiori jure petere liceat, Undenam voluntatis Dei, internas inspirationes omnibus promiscuè largientis, certior sit effectus; an felicius Augustino Scripturas ac traditiones internoverit, altiorique supernæ lucis revelatione perfusus secretiora arcana perviderit. Miror admodum, in- quiebat quondam aliàs Bernardus Clara-vallensis Epist. 77. ad Hugonem, si novus iste novarum inventor assertionum, & assertor inventionum, invenire potuerit in hoc rationem, quæ sanctum Patrem latuerit Augustinum.*

Neque verò Vasquesium Censuræ in Augustinum ejusque discipulos latæ poenituit unquam; quin eam potius instauravit, in suis ad primam secundæ D. Thomæ Commentariis, disp. 193. cap. 4. ubi postquam sanctissimi Doctoris mentem ita paucis exposuit: *Existimat Augustinus, homines in hac vita propter ingentia peccata, in quæ fuerint prolapsi, aliquando sufficiente etiam auxilio ita destitui, ut deinceps non possint non peccare; quod ex libro de Correctione & Gratia probare satagit, ita demum in clarissimum divinæ Gratiæ Vindicem censoriam virgam exercet: Mihi in hac parte non probatur doctrina B. Augustini, ut dixi 1. parte in illa disputatione 97. cap. 3. sed existimo aliter esse philosophandum de donis, quæ in primo Parente perdidimus.*

Aliter ut libet philosophetur Vasquesius, phi-

philosophentur & alii pro arbitrio Molinianæ scholæ Professores; contemtoque Augustino, cæterisque summis Divinæ Gratiæ Magistris, gratias sufficientes larga manu infidelibus universis, peccatoribus induratis & obcæcatis elargiantur, non est hujus loci & otii ejusmodi philosophemata ad examen vocare. Verum quod in ea gratiæ prodigentiâ adstruenda, iis hodie principiis innitantur, quæ obliquè peccati Philosophici errorem instaurant, potissimaque Moralis Christianæ fundamenta suffodiant, nemo ferreo licet stomacho concoquet. Dicant, si lubet, nusquam à Deo ita deferi scelestissimos homines, qui diuturno peccandi usu penitus obduruerunt, ut sua illis auxilia certo vitæ tempore subtrahat; quod ita nempe Deo placeat misericordiæ thesauros ostentare; quod nusquam miserando delassetur; quod justitiæ vindicis partes omnes in alterum ævum mittat; quod iræ vasa indefelsâ patientiâ sustineat; nullam eis erroris notam inuremus, tametsi illos ea parte, ab Augustino toto ostio aberrare contendamus. Verum quod eò fiducia tandem veniant, ut peccatoribus induratis & obcæcatis nusquam actuales gratias sufficientes subtrahi, sed iis illos indefinenter excitari moverique velint; quod aliàs eorum peccatorum culpa vacarent, quæ in ipso obdurationis ac cæcitatæ statu continuò perpetrant, nemo non succensibit, nemo non indignabitur vehementius.

Eccur enim, amabo, sufficientibus auxiliis destituti, culpâ vacarent, dum in eo miserando obdurationis statu, in omnia scelera præcipites ruunt? Nunquid enim suâ etiam tunc libertate non potiuntur? An voluntatem ad opposita potentem non gerunt? An non norunt, vident, eligunt pro arbitrio? Sublatis enim auxiliis, non sublata libertas est, sed sufficientia liberatis: & si qua demum incumbit peccandi necessitas, non illa absoluta est & à voluntate sejuncta, qualis est necessitas moriendi in homine mortali, quæ necessitas manet etiam si eam velis excutere, sed est necessitas ex pertinaci sui & creaturarum amore procedens, adeoque voluntaria, ut quæ aliunde non provenit quàm ex corrupta & depravata voluntate, immò nihil aliud est quàm corrupta & depravata voluntas, seu constans peccandi libido. Nam, ut scribit S. Bernardus Sermone 81. in Cantica: *Nescio quo pravo & miro modo ipsa sibi voluntas, peccato quidem in deterius mutata, necessitatem facit, ut nec necessitas,*

cum voluntaria sit, excusare valeat voluntatem; nec voluntas, cum sit illecta, excludere necessitatem. Hanc necessitatem, quæ procul abest à necessitate naturalis inclinationis, necessitatem infallibilitatis appellare amabunt Scholastici, quæ quidem obdurati & excæcati, etiam actuali auxilio destituti, nunquam ad certum peccatum adiguntur, licet fieri non possit ut diu se ab omni contineant, & non in aliquod propriæ voluntatis impetu acti præcipites ferantur, juxta vulgatum illud Innocentii PP. I. oraculum: *Necesse est ut quo auxiliante vincimus, eo iterum non adjuvante vincamur.**

Certè si bonis omnibus stomacho fuit lex illa, à Molina iratis superis excogitata, quæ Deus illis omnibus gratiam tuam certissimè collaturus fingitur, qui pro naturalium virium facultate adnisi fuerint, ut novâ ope muniti fructus æternæ vitæ dignos edant; quidni potius movebit stomachum proculum alterum paradoxum, quo statuitur, iis omnibus actualem gratiam adfuturam, qui obfirmatâ mente peccare voluerint, ut ea luce perfusi, æterna damnatione digni censi possint? Quasi jam gratia non implendæ duntaxat legi necessaria censeatur; sed & perpetrando peccato, & æternæ damnationi accersendæ.

Satis sit, duo christianæ Moralis capita ponere, unde hujusce paradoxo vanitatem, & derivati ex Augustini sententiâ consecrarii ineptiam facilè colligas.

Primum istud esto: Peccari re ipsa potest, peccatumque ad poenam æternam imputari, tametsi nulla menti illustratio in antecessum affulgeat, nullâque supernâ excitatione pulsetur humana voluntas. Quare cum Gratiâ sufficientem in mentis illustratione ac voluntatis excitatione positam dicant illi ipsi quibuscum res nobis est; restat ut induratos & obcæcatos, ne culpâ quidem vacaturos fateantur, tametsi sufficientia illis Auxilia præstò non essent.

Ita planè statuisse videntur Palestinæ Ecclesiæ Præsules, in Synodo Diospolitana, dum nefarium illud Pelagianæ sectæ paradoxum anathemate petierunt: *Oblivionem & ignorantiam non subjacere peccato, quoniam non secundum voluntatem eveniunt, sed secundum necessitatem*, uti apud D. Augustinum legere est, libro de Gestis Pelagii cap. 18. Satis enim voluntatis inesse significarunt peccatis illis, quæ mente per oblivionem & ignorantiam coeca à nonnullis admittuntur, ut eis ad culpam imputari re ipsa possint. Et si enim

* Innocentius I. in Epistola ad Carthaginensē Concilium & Celestinus I. in Capitulis de Gratia.

non

non in peccatum facti, at certè in factum peccati voluntate propria & libera feruntur.

Ita pronunciarunt Præsules Gallicani, & Parisiensis Academiae Theologi, dum hanc Propositionem ex Jesuita Baunio petitam, *uti falsam & viam ad excusandas excusationes in peccatis aperientem*, concordi consilio proscribere anno 1641. Nunquam peccatur, nisi praviâ peccati cognitione animus illustretur, ejusque vitandi desiderio excituletur. Cui Censuræ calculum adjecit Academia Lovaniensis anno 1657. die 4. Maii, dum ab Illustrissimo Episcopo Gandavensi sententiam per Epistolas rogata de nonnullis laxioris Moralis paradoxis, hanc assertionem numero 25. confixit, uti communia Christianæ Theologiæ principia concutientem, & innumera etiam immanissima hominum peccata cum pernicio animarum excusantem: *Ut actio quapiam sit peccaminosa, oportet ut procedat ab homine qui nescit & percipit, quid boni malive in ea sit: & antequam id videat, & animum reflectat, actio neque bona est neque mala.*

Ita demum edixit Alexander VIII. Pontifex Maximus anno 1690. die 24. Augusti, dum errorem peccati Philosophici, publica bonorum omnium indignatione prædamnatum, extremo Apostolicæ auctoritatis telo confixit; dirisque devovit quotquot scandalosam hanc, temerariam, piarum aurium offensivam, & erroneam assertionem docerent atque defenderent: *Peccatum Philosophicum seu morale est actus humanus disconveniens naturæ rationali, & rectæ rationi. Theologicum verò & mortale est transgressio libera divini legis. Philosophicum quantumvis grave in illo qui Deum vel ignorat, vel de Deo actu non cogitat est grave peccatum, sed non est offensa Dei neque peccatum mortale dissolvens amicitiam Dei, neque æterna pœna dignum.* Nemo quippe est qui non videat, errorem hunc ab Alexandro proscriptum, eo ut monui principio veluti cardine niti, quo largi illi ac liberales Gratiarum sufficientium distributores fabulantur, nullum re ipsa veri nominis peccatum admitti, nullamque Deo offensam inferri, æternâ pœnâ plectendam, nisi praviâ illustratione animus perfundatur, internaque excitatione pulsetur humana voluntas. Immo non alio illum argumento muniebat, in dictatis scriptis, Professor Theologus Divionensis, à quo in publicam Thesum lucem editus est, nec alio principio nitentur illi ipsi, quos assertionis suæ Magistros ac duces proferebat. Quidni er-

gò malam Arborem eodem cum fructibus telo petitam asseramus?

Secundùm hæc nuperrimè pronunciat Illustrissimus Rothomagensium Archiepiscopus, dum P. Buffierum Jesuitam, à quo idem ille peccati Philosophici insanus error, sparso per Normaniam libello recusatus fuerat, solenni Decreto damnavit; jussitque ut scripto publico hisce duabus Propositionibus inter multas alias subscriberet, in obsequentis ac poenitentis animi fidem: 1. *Quod spectat ad peccatum philosophicum, damno quod summus Pontifex Alexander VIII. Decreto suo damnavit 24. Augusti 1690. Ipse autem privatim agnosco (ut & Jesuitæ jam publicè agnoverunt in sententia sua publico scripto edita super peccato philosophico) non esse necessarium actu attendere animum ad malitiam actionis, ut peccato imputetur.* 2. *Obcecati & indurati peccatores, qui cedes, adulteria & alia scelera, sine ullo conscientia stimulo perpetrant, ne minimè quidem cogitantes hujusmodi sceleribus offendi à se Deum, aut hac contraria esse legi naturali, nihilominus merentur pœnas inferorum: nec quòd actu non attendant ad malitiam actionis, idèd peccati mortalis rei non sunt.* Qua de re legenda venit Eruditissimi Sapientissimique Archipræsulis Epistola Pastoralis, data die 28. Martii 1697. super libello per ejus Diocesim vulgato; ubi hoc ipsum Moralis Christianæ caput, pro exculta eruditione ac singulari sanæ doctrinæ studio interpretatur, gravissimisque momentis exsequitur.

In hoc idem conspirat Cleri Gallicani Censura novissima, adversus 127. Propositiones lata, die 4. Septembris 1700. quas inter hanc numero 112. legere est: *Si Peccatores consummata malitia cum blasphemant & flagitiis se immergunt, non habent conscientia stimulos, nec mali quod agunt notitiam, cum omnibus Theologis propugno, eos hisce actionibus non peccare* *. Cui quidem assertioni notam hanc facer confessus affricuit: *Hæc propositio falsa est, temeraria, perniciofa, bonos mores corrumpit, blasphemias aliæque peccata excusat, & ut talis à Clero Gallicano jam damnata est: in Comitibus scilicet generalibus anno 1641. die 12. Aprilis.*

Sed neque iis Ecclesiæ judiciis opus erat, ut suam ipsi cespitationem agnoscerent, quam tot sacrarum Scripturarum oraculis occupatam novissent facile, si vel obiter animos intendissent. Quorsum enim præviâ illam suam mentis illustrationem, voluntatisque excitationem, necessariam autumant, ut quis admissi delicti reus

* Hæc propositio excerpta est ex Apologia Casuistarum Parisiæ Jesuitæ pag. 38.

haberi possit? Nempe, inquit, ut actionis pravitatem norit, reputet, atque perpendat; sic enim fieri ajunt, ut qui ea præmissâ mentis attentione præceptum transfilit, cupiditati suæ parens, Deum perversâ liberâque voluntate offendisse censeatur. At si sic est, impii Satellites ac Judæi, qui Christum Cruci suffixerunt, peccati rei censendi non erunt: tantum enim abest, ut admissi sceleris ac Deicidii gravitatem attenderent, ut contra potius justitiam se adimplere arbitrarentur, Christumque uti seductorem haberent: quippe qui si cognovissent, nunquam Dominum gloria crucifixissent. 1. Corint. 2. Pari jure Saulus culpâ vacasse censendus erit, dum spirans minarum & cædis in Ecclesiam fureret: utpote qui actionis pravitatem non modò non noverat, sed contra potius se laude dignum arbitrabatur, quòd supra coætaneos avitas Traditiones æmularetur. Audistis, inquit, conversationem meam aliquando in Judaismo, quoniam supra modum persequēbar Ecclesiam Dei, & expugnabam illam, & proficiebam in Judaismo supra multos coætaneos meos in genere meo, abundantius amator existens paternarum mearum Traditionum: ad Galatas 1. Non abfimiliter Apostolorum persecutores nullâ poenâ digni putandi erunt, qui à pensandâ delicti ac tyrannidis gravitate adeò procul erant, ut potius hac ipsâ persecutione obsequium se Deo præstare arbitrarentur, juxta illud Christi Discipulos alloquentis oraculum: *Venit hora ut omnis qui interficit vos arbitretur obsequium se præstare Deo.* Joannis 16. Atheos demùm omnes, Paganos, infideles in desideria cordis traditos integrâ veniâ dignos æstimare par erit, de quibus scribit Apostolus ad Ephesios 4. *Hoc igitur dico & testificor in Domino, ut jam non ambuletis sicut & gentes ambulant, in vanitate sensus sui, tenebris obscuratum habentes intellectum, alienati à vita Dei per ignorantiam, quæ est in illis propter cecitatem cordis ipsorum, qui desperantes semetipsos tradiderunt impudicitia, in operationem immunditiæ omnium, in avaritiam.* Hi quippe non modò ad scelerum pravitatem non attendunt, sed effræni potius impetu ac sacrilegâ quadam ostentatione nefanda scelera perpetrant, nullòque retrahente conscientia morfu, solutis habenis in illicita desideria ruunt. Atque ita felicior eorum conditio censebitur, quàm fidelium, qui cùm Deum norint legem, ejus meditentur, delictorum gravitatem seriò pensitent, illatæ Deo injuriæ rei censentur, quando peccant;

aliàs, ut isti quidem autumant, minime peccaturi, si nec scirent, nec adverterent. Immò, quod stupendum magis, sua ipsa scelestissimis peccatoribus cæcitas & obduratio lucro erit, quæ illos à peccatis absolvet, magnæque divinæ gratiæ pars reputabitur, ignoratio divinitatis. Absit ut violentam consecutionem, ac minùs ex insulso systemate fluentem affingam: hanc ipsam ex jacto principio derivavit Nodi Prædestinationis Dissolutor Parte 1. §. 2. N. 11. pag. 152. cujus verba dum lego atque exscribo, oculorum fidem tento, ac mihi ipsi vix credo. *Demus barbaras gentes ita Deum ignorasse: id quoque magna beneficii & gratiæ pars fuit. Cùm enim peccatum sit essentialiter offensio & injuria Dei, sublata Dei cognitione necessario sequitur, nec injuriam, nec peccatum, nec aternam poenam esse. Ergo cum hac ignorantia impeccabiles reddentur, alioquin certissime peccaturi si agnoscerent, sequitur hoc ipsum beneficium esse, juxta illud Apostoli,* „Melius erat illis non cognoscere viam justitiæ, quàm post agnitionem retrorsum „converti ab eo, quod illis traditum est, „sancto mandato. 2. Petri 2. Ergo sive barbari agnoscant, sicque invocare illum & salutem consequi possint, sive penitus ignorent, & ideo nec possint peccare, semper verum erit, ne illis quidem misericordiam deesse.

Frustra verò recensitis Scripturarum exemplis reponunt aliqui, ut ab eo se laqueo liberent, Peccatores excæcatos licet & obduratos, iis illustrationibus & excitationibus cælitùs immixtis continuò perfundi; sed ad eas minùs attendere. Illud quippe figmentum ex instituto refellit Cardinalis Bellarminus, lib. 2. de Gratia & libero Arbitrio cap. 6. *Dicunt aliqui, Deum quidem perpetuò pulsare ad ostium cordis, & peccatores vocare, sed eos aliis rebus intentos non percipere vocationem. Sed hac responsio cum ipso experimento apertissime pugnat. Nam cùm vocatio, pulsus, tractus, excitatio illa Dei, sit actio nostra, quamvis non libera, nimirum bona cogitatio, bonumque desiderium repente ac divinitus immixtum; quomodo potest fieri, ut non sentiantur à nobis, si sit non solum in nobis, sed etiam à nobis? Quamquàm etsi daremus, pias illas excitationes & illustrationes singulis peccatoribus cælitùs immitti, quas tamen illi minùs adverterent, totum id in idem rediret. Essent illæ prorsus inutiles, nec peccatores excitarent, nec implendî officii admonerent, nec offensæ gravitatem ostenderent. Uti enim somno correptus, voce minùs perceptâ non excitatur,* ita

Card. Spon-
dratus.

ita qui sceleribus obduruit, inspiratione minus perceptâ excitari haud potis est. Atque idcirco peccati reus esset (quod hic demonstrandum aggredimur) tamen si delicti gravitatem infusâ desuper luce minus norit atque percipiat.

En in quantas angustias liberales isti gratiarum sufficientium largitores adiguntur: ut gratiam sufficientem in omnes effusam, positam dicant in excitatione quæ non excitet; in cogitatione, de qua minimè cogitur; in piis denique motibus, qui ab illis ipsis qui moventur nullatenus sentiantur: quasi vel fieri possit, ut quis excitetur non excitatus, cogitet incogitans, immotus denique moveatur.

Vis alia ejusdem systematis consecraria? Audi quâ Apostoli simul & Augustini doctrinam de lege & gratiâ concutiant. Ii quippe millies decernunt, Litteram sine Spiritu occidere; legem sine gratiâ facere magis reos; legem apud eos quos non adjuvat gratia, virtutem esse peccati; legem demum mortem illis contulisse, quos Dei gratia non liberavit. Verum qui neminem peccare contendunt, nisi gratiam interioris illustrationis atque excitationis acceperit, mutant quadrata rotundis: nempe principii loco ponunt, legem sine gratiâ reos facere non posse, sed cum gratiâ sufficiente sæpius facere: legem sine gratiâ occidere neminem; accedente nihilominus gratia, occidendi vim obtinere: legem iis quos gratia non adjuvat, mortem inferre non posse, sed mortis inferendæ virtutem, gratiæ sufficientis opitulatione sortiri. Quid tandem? Christum pro impiis mortuum scribit Apostolus, ut à peccato liberarentur; isti Christum pro impiis mortuum statuunt, ut gratiam illis promeretur sine qua peccare non possent, & qua acceptâ infallibiliter, pro pertinaci sua malitia peccaturi sunt. *Nihil liberum arbitrium, nisi ad peccandum valere, pronunciat Augustinus, si lateat veritatis via; isti nihil ad peccandum valere docent, si veritas lateat.*

Sed ab iis, qui ita de scelestissimis atque obstinatissimis peccatoribus liberaliter statuunt, ut nusquam illos peccare putent, nisi prævia illorum mentibus illustratio affulgeat, & pia voluntatibus excitatio prævolet, ab iis, inquam, scire velim, an ipsi de se ipsis spondere audeant, nullum unquam sibi subrepisse peccatum, per improvisas offensiones, per tacitas libidinis illecebras, per occultas sensuum insidias, per linguæ intemperantiam, per subitos æstus, per ignorantiam, per cri-

rorem; quin præcesserit in animo, per piam cogitationem; admissi peccati cognitio, infirmitatis suæ notitia, excitatio ad orandum, pium denique desiderium à peccato retrahens? Id si velint, quid causæ erit, ut ad Deum assidue justî clament, *Ab occultis meis munda me, Domine?* Quid causæ erit, ut ita Dominum deprecentur, *Ignorantias meas ne memineris*; si nullum unquam peccatum occultè sese in animum insinua- ret, nullaque per ignorantiam aut incogitantiam culpa posset admitti? Cur vigilarent adversus diaboli insidias, si re ipsa peccare non possent, quin prius illâ pervigili cogitatione excitarentur? Rem longè aliter statuit Augustinus, peccatique cognitionem persæpè deesse significat, dum peccatur: *In multis offendimus omnes, dum putamus Deo quem diligimus placere, vel non displicere quod facimus; & postea per Scripturam ejus, sive certâ & perspicuâ ratione commoti, cum didicerimus quod ei non placeat, penitendo precamur, ut ignoscat. Plena humana vita est talibus documentis.* Lib. de Spir. & litt. cap. 36. Quanto minus igitur licentiores homines iis motibus excitari putandi erunt; à quorum mentibus Deus abest, quique omni vitiorum cœno demersi sunt? Ecquis enim credat, homines per illicita desideria diffuentes, sensuum cupiditatibus implicatos, interim tamen castitatis, religionis, humilitatis, cæterarumque virtutum affectibus sæpius tangi? Quis iis excitatos Philosophos dixerit, ut & morbi gravitatem, & medici necessitatem agnoscerent, ac de ejus efflagitanda ope cogitarent; cum contra potius naturæ vires superbius efferrent, certoque statuerent, virtutem Dei munus non esse, nec pro ea quemquam Deo supplicasse? Quis Epicureos, qui mundum negabant providentiâ regi, Deumque injuriâ affici dictitabant, si quis ejus opem imploraret, quasi in ipsum ulla rerum nostrarum sollicitudo & procuratio cadat? Quis tandem cultores idolorum atque atheos, quoties ipsos ad peccandum cupiditas allicit, toties ea experiri dixerit desideria orandi verum quem ignorant Deum, ut ab ipso veras, quas item ignorant, virtutes accipiant?

Nihil itaque tam insulsum, tam absolum, quàm interioris inspirationis gratiam, peccatis admittendis aut certè imputandis necessariam comminisci: quasi hæc minus libera ac voluntaria censerentur, quæ nullâ præfulgente illustratione, nullâ stimulante supernâ excitatione perpetrantur. An non enim libera illa putanda sunt, quæ à volentibus admittuntur, immò etiam

quia

quia volunt? Licentiores porrò homines, impii, athei, indurati, obcæcati, tametsi deserti divinis auxiliis censeantur, volentes utique peccant, ac etiam quia volunt; eligunt pro nutu atque arbitrio quæ Deum offendant.

Totum id luculentissima ratione confirmat D. Augustinus lib. 1. Retract. cap. 15. peccatum admitti asserens, sola voluntate facti, nulla licet accedente voluntate peccati: hoc est, peccati reum illum esse, qui rem jure veritam agit, tametsi veritam nesciat, nullâque perpetrandi peccati intentione feratur. *Nam & quod nesciens peccavit, inquit sanctissimus Doctor, non incongruenter nolens peccasse dici potest; quamvis & ipse quod nesciens fecit, volens tamen fecit, ita nec ipse esse potuit sine voluntate peccatum. Quæ voluntas utique sicut definita est, animi motus fuit, nullo cogente ad aliquid vel non amittendum vel adipiscendum. Quod enim si nolisset non fecisset, non coactus est facere. Quia voluit ergo fecit, etiamsi non quia voluit peccavit, nesciens peccatum esse quod fecit. Ita nec peccatum sine voluntate esse potuit, sed voluntate facti, non voluntate peccati, quod tamen factum peccatum fuit. Hoc enim factum est quod fieri non debuit. Porro si actionis pravitatem nosse, illamque perpendere opus esset, ut quis delicti reus haberi posset, nusquam peccaret ille, qui nescit peccatum id esse quod agit: nusquam sola voluntate facti peccatum voluntarium esset, sed semper voluntate peccati.*

Suffragatur utroque pollice Doctor Angelicus 2. 2. quæst. 46. art. 2. ad 2. hanc ipsam duplicis voluntatis distinctionem ab Augustino statutam, qua vel una Philosophici peccati insulsus error, ejusdemque ruinosum fundamentum suffoditur, suam facit ac probat. Cum enim hoc sibi obviam fecisset argumentum: stultitiam voluntariam non esse, atque ita peccatum esse non posse, ita reponit: *Dicendum quod quamvis stultitiam nullus velit, vult tamen ea ad quæ consequitur esse stultum, scilicet abstrahere sensum suum à spiritualibus, & immergere terrenis. Et idem etiam contingit in aliis peccatis: nam luxuriosus vult delectationem, sine qua non est peccatum, quamvis non simpliciter velit peccatum: vellet enim frui delectatione sine peccato. Quo nihil explicatius, nihil luculentius desiderari à quoquam potest; ut peccati quis reus intelligatur; tametsi nil de peccati gravitate cogitet, nullâque illius admittendi voluntate feratur. Hoc idem confirmat quæst. 1. de Malo art. 3. ubi tantum abest, ut*

illum culpâ vacare dicat, qui rationis regulam, qua peccati gravitas dignosci potest, non attendit; ut ea maximè parte culpæ principium ponat, quod operi manum admoventis rationis regulam non advertat. *Hoc ipsum, inquit, quod est non attendere actum, ad talem regulam in se consideratam, non est malum, nec culpa, nec pœna: quia anima non tenetur nec potest attendere ad hujusmodi regulam semper in actu: sed ex hoc accipit primò rationem culpa, quod sine actuali consideratione regula procedit ad hujusmodi electionem. Sicut artifex non peccat in eo quod non semper tenet mensuram, sed ex hoc quod non tenens mensuram procedit ad incidendum. Quibus verbis statuta Moralis Christianæ regula mirum in modum confirmatur.*

CAPUT XLIX.

Ejusdem insulsi systematis falsitas demonstratur ex altero hoc Christianæ Moralis Theologiæ axiome: A culpa non excusare impotentiam voluntariam seu propria iniquitate contractam.

Alterum Moralis Christianæ caput, unde insulsi systematis falsitatem apertius eruas, istud est. A culpâ non vacat, qui implendi præcepti impotentia laborat, si in eam semetipsum sponte conjecerit, illamve propria iniquitate contraxerit volens ac sciens. Cum igitur obcæcatus & induratus, auxiliis sufficientibus destitutus, in implendi præcepti vitandique peccati voluntaria impotentia remanet, hanc sibi sufficientium auxiliorum sequestrationem prioribus delictis spontè liberèque admittis asceverit, voluntariamque impotentiam sua pridem iniquitate contraxerit; eorum certè delictorum culpâ non vacat, quæ in eo cæcitatæ & obdurationis statu quadam veluti necessitate committit.

Hanc Moralis Christianæ Regulam non modò posuit Augustinus, atque ex illo mutuatus est Doctor Angelicus; verum etiam consecutionem ipsam, ex eo jacto principio derivant: virosque induratos & obcæcatos, divinis illis illustrationibus & excitationibus exutos, delicti nihiloscus reos agunt, quod iis priori culpâ destituti supponantur.

Præstò est celeberrimus Augustini locus lib. de Correptione & Gratia cap. 11. ubi de Auxilio sine quo non, videlicet sufficienti, ut recens schola loquitur, prolixior sermonem instituens, illud Angelo & homini primo ideò maximè collatum docet,

cet, quòd aliàs sublato illo possibilitatis auxilio, sua culpâ non cecidissent, cum nullam in eis culpam reperire esset, cuius merito negaretur: secus tamen in præsentia sentiendum decernit, cum in præcedentis peccati poenam subtrahi possit. Explicatissima verba sunt: *Si autem hoc adiutorium cum primum facti sunt defuisset, quoniam non talis natura facta erat, ut sine divino adiutorio posset manere si vellet, non utique suâ culpâ cecidissent. Adiutorium quippe defuisset sine quo perseverare non possent. Nunc autem quibus deest tale adiutorium, jam pœna peccati est; quibus autem datur, secundum gratiam datur, non secundum debitum.* Suâ itaque culpâ cadunt quotquot in statu naturæ lapsæ possibilitatis Auxilio seu gratia sufficienti destituti, in nova scelera præcipites ruunt; quia nonnisi præcedentium delictorum merito gratia illa subtrahitur.

Accedit alter, libro de Perfectione Iustitiæ capite 6. Augustinum hac argutiâ petierat Celestius, ut ejus responsa nonnulla in invidiam traheret: *Si est aliquod peccatum quod vitari non possit, quomodo iustus Deus dicitur, si imputare cuiquam creditur, quod vitari non possit? Quid ad hæc porro divinæ Gratiæ Vindex? Num fortè reponit, nullum reipsa peccatum esse, quod à quovis homine superari non possit; quòd nimirum, subtrahâ licet actionis gratiâ, unicuique quamvis obcæcato & indurato possibilitatis gratia præsto sit? Erat id dubio procul responsurus, si quod largi auxiliorum sufficientium distributores effutiant, Augustino probatum esset; nihil quippe confutandæ Pelagianorum argutiæ opportunius contigisset. At longè aliam viam init. *Peccatum est, inquit, cum vel non est charitas quæ esse debet, vel minor est quàm debet: sive hoc voluntate vitari possit, sive non possit: quia si potest, præsens voluntas hoc facit; si autem non potest, præterita voluntas hoc fecit.* Satis videlicet perspectum habens, homini possibilitatis gratiâ destituto peccatum nihilofeciùs imputari, quòd illam præcedentibus delictis amiserit. Quare cum importunus cavillator quæstionem alteram movisset: *Si non potest homo sine peccato esse, cuius culpa est? Ipsius-ne hominis, an cuiusvis alterius? Si ipsius hominis, quomodo culpa hominis est, si hoc non est quod esse non potest? Non utique reponit sanctissimus Doctor, idcirco hominis culpam esse, quia ei, tametsi auxiliis efficacibus destituto, præsto sunt sufficientia, queis expedita est vincendi peccati potestas; sed jactis principiis hærens, Respondetur, in-**

quit, ideo esse culpam hominis, quòd non est sine peccato; quia sola hominis voluntate factum est, ut ad istam necessitatem veniret, quam sola hominis voluntas superare non possit. Ut hinc noveris, imputando peccato satis esse, si quis in illam, quævis tandem illa sit, peccandi necessitatem se sponte conjecerit.

Tertius locus occurrit Tractatu 53. in Joannem: ubi hanc ipsam quæstionem versat ex instituto; qua videlicet ratione induratis & obcæcatis, qui nonnullâ credendi impotentiâ laborarunt, suæ nihilominus infidelitatis rei censeri possent. *Quæ sequuntur, inquit, Evangelii verba plus urgent, & profundiorum faciunt quæstionem:*

adjungit enim & dicit: Propterea non poterant credere, quia iterum dixit Isaias: „Excæcavit oculos eorum, & induravit cor eorum, ut non videant oculis & intelligant corde, & convertantur, & sanem illos.” Dicitur enim nobis, Si non potuerunt credere, quod peccatum est hominis non facientis quod non potest facere? Si autem non credendo peccaverunt, potuerunt ergo credere, & non fecerunt. Si ergo potuerunt, quomodo dicit Evangelium, Propterea non poterant credere, quia iterum dixit Isaias: „Excæcavit oculos eorum & induravit cor eorum; ut, quod est gravius, ad Deum referatur causa qua non crediderunt; quandoquidem ipse excæcavit oculos eorum, & induravit cor eorum? Non enim saltem hoc de diabolo dicitur, sed de Deo, quod ipsa Prophetica scriptura testatur. Nam si arbitremur hoc dictum de diabolo, quòd excæcavit oculos eorum & cor induravit; laborandum est quomodo illorum culpam, quia non crediderunt, possimus ostendere de quibus dicitur, Non poterant credere. Deinde quid respondebimus de alio Propheta ipsius testimonio, quod posuit Paulus Apostolus dicens: Quod quærebat Israël, hoc non

Joan. 12.

39.

Isaie 6.10

Rom. 11.7.

Isaie 6.10

agitari, quæ falsâ hypothesi voveretur; cum nusquam usque adeo obdurentur scelestissimi peccatores, ut ipsâ etiam possibilitatis gratiâ destituantur: eaque idcirco de causa peccata in ipso obdurationis statu admissa, meritò illis vitio verti. Quin ita responsurus esset Becheferius, nullus dubito, cui scripto publico declarare libuit, persuasum sibi esse, obduratos nequaquam omni carere interiori gratia, quæ ad implenda præcepta sufficiat. Verùm quæstionis altitudinem sensit humilis Augustinus, aliòque confugit, ut nodum solveret: Perversæ voluntatis merito amissam respondit implendi officii facultatem; justoque Dei judicio, sed occulto, sequestratam illam possibilitatis gratiam. *Sed respondemus, inquit, ut possumus. Non poterant credere, quia hoc Isaias Propheta prædixit: hoc autem Propheta prædixit, quia Deus hoc futurum esse præscripsit. Quare autem non poterant, si à me queratur, citò respondeo, quia nolebant: malam quippe eorum voluntatem prævidit Deus, & per Prophetam pronuntiavit ille, cui abscondi futura non possunt. Sed aliam causam, inquis, dicit Propheta, non voluntatis eorum. Quam causam dicit Propheta?* Quia dedit illis Deus spiritum compunctionis, oculos ut non videant, & aures ut non audiant: & excæcavit oculos eorum & induravit cor eorum. *At etiam hoc eorum voluntatem meruisse respondeo: sic enim excæcat, sic obdurat Deus deserendo & non adjuvando; quod occulto judicio facere potest, iniquo non potest. Hoc omnino pietas religiosorum inconcussum debet, inviolatumque servare, sicut Apostolus dicit, cum eandem ipsam tractaret difficillimam quæstionem: Quid ergo dicemus, inquit, nunquid iniquitas apud Deum? absit. Si ergo absit, ut sit iniquitas apud Deum: sive quando adjuvat, misericorditer facit; sive quando non adjuvat, iuste facit; quia omnia non temeritate, sed judicio facit. Prima igitur peccatorum induratis & obcæcatis imputandorum ratio, eorundem perversa voluntas est, quâ desertionem meruerunt: non illa internarum gratiarum nusquam intermissa largitio, à Molinianis excogitata. Quod non absimiliter adstruit Augustinus sermone 88. de Tempore, quæstionem hanc movens data operâ: Cur iniquitas illa Pharaoni imputetur, cum Dominus cor illius obdurasse referatur?*

*Ad Six-
tum nunc
Epist. 194.
22.* Quartus Augustini locus ex Epistola 105. depromptus est. Sed excusabunt se, inquit, homines qui nolunt rectè & fideliter vivere, dicentes, Quid nos fecimus, qui malè vivimus; quandoquidem gratiam unde bene

viveremus, non accepimus. Quid de nobis sit querela, quòd Deum offendamus malè vivendo, cum illius voluntati nemo possit resistere, qui nos obduravit misericordiam non præstando? Quid ad tritam illam obduratorum obmurmurationem reponit Augustinus? An fortè, neminem à Deo desertione summâ; atque ita peccare illos, quòd gratias actuales, quoties præceptum urget, accipiant? Immo, Si ergo, inquit, illos non pudet hac excusatione, non nobis, sed Apostolo contradicere; cur nos pigeat eis quod dixit Apostolus, hoc idem atque identidem dicere: O homo tu quis es qui respondeas Deo? Explicatiùs verò Quæstione 50. super Deuteronomium: ubi de Pharaonis & Judæorum obduratione sermonem habens, hanc ipsam difficultatem eliquat, quo clariori potest modo. Simul, inquit, ostendit Moyses, & sine adjutorio Dei homines intelligere & obedire non posse oculis cordis, & auribus cordis: & tamen si adjutorium Dei desit, non ideo excusabile esse hominis vitium: quoniam judicia Dei, quamvis occulta, tamen justa sunt. Nempe quia non aliâ de causâ auxilium subtrahit, quàm in præcedentium delictorum poenam.

Atque hinc intelligere facile est, quid sibi velit sanctissimus Doctor in Expositione quarundam Propositionum Epistolæ ad Romanos, Propositione 62. dum ita de Pharaone pronunciat: Non ergo hoc illi imputatur, quòd tunc non obtemperaret, quandoquidem obdurato corde obtemperare non poterat: sed quia dignum se præbuit, cui cor obduraretur priore infidelitate. Non enim Pharaonem jam induratum, peccato liberat. Ecquis enim hanc D. Augustino sententiam affingat, repugnantibus tam disertis tamque dilucidis S. Doctoris testimoniis? Sed imputati peccati primam radicem indigitans, non aliam esse monet, quàm quòd dignum sese prioribus delictis exhibuerit, cui cor obduraretur à Deo. Non itaque secunda propositio est; quasi primò absolutè neget imputari Pharaoni, quòd tunc non obtemperaret; deinde rationem hujus non imputationis assignet, quia obdurato corde obtemperare non poterat: sed continuatâ propositionis serie, negantis particulæ potestas in extremam partem transferenda venit, ut nimirum hunc sensum efficiat: Non ideo hoc illi imputabatur, quia obtemperare non poterat, sed quia dignum se præbuit, cui cor obduraretur priore infidelitate. Imputari ergo certò supponit; sed imputationis causam ex obtemperandi impotentia oriri negat; eamque ex iis duntaxat peccatis repetendam definit, queis obdu-

obdurationem promeritus est. Si tamen Augustini propositionem secare omnino velis, quasi is Pharaonis jam obdurati inobedientiam, eidem non imputatam dixerit; alteram dicti hujus expositionem æquè facilem & accommodam damus. Obdurationem scilicet Pharaonis, peccatâque eo in statu admissâ, dupliciter spectari posse respondemus: vel ut peccata sunt, vel ut poenæ præcedentis peccati. Ut peccata sunt, soli homini obdurato imputantur: ut verò poenæ sunt, non soli homini, sed Deo imputantur, hoc est tribuuntur, priorum delictorum gravitatem istorum permissione castiganti. Priora autem peccata, quibus dignum se præbuit peccator, ut à Deo defereretur, & cor illi obduraretur, ipsi soli imputantur, non Deo; quia sic peccata sunt, ut non sint poenæ peccati. Responsum ex Augustini doctrinâ petitum est lib. 5. contra Julianum capite 3. *Cecitas cordis, quam solus removet illuminator Deus, & peccatum est, quo in Deum non creditur; & poena peccati, quâ cor superbum dignâ animadversione punitur; & causa peccati, cum mali aliquid cæci cordis errore committitur.* Pharaoni itaque non imputari asserit Augustinus, quòd tunc obtemperare non poterat, si spectetur ejus obduratio, ut poena peccati, quia, ut ait hoc ipso in loco, *de supplicio veniebat*: ipsi enim acciderat obduratio, *judicio Dei retribuendis incredulitati ejus debitam poenam.* Ei tamen imputabatur obduratio, & peccata quæcumque ipsam consecuta, quatenus peccata erant; siquidem veri nominis delicta censebantur, & quidem gravissima, poenisque gravissimis punienda.

Toto igitur ostio aberrat obscurus Author Epistolæ manu scriptæ, ad Doctorem quemdam Sorbonicum directæ, occasione Theseos à Jesuitis defensæ die 14. Decembris 1699. dum ea ad Becheferium suum liberandum Augustini verba detorsit. Quin & illi insanum errorem affricuit imprudens, quem & Becheferius ipse publico scripto detestatus est. Quandoquidem Doctorem sanctissimum, non ex hypothesi, sed ex certâ sententiâ loquentem inducit, quasi Pharaonem non modò culpâ vacaturum dixisset, si desertione summâ à Deo mulctatus esset; sed tanquàm illum re ipsa ab iis peccatis liberum pronunciasset, quæ is in hac sua desertione perpetravit: quo nihil insulsum magis.

Quintus demum, ut alios mittam, Augustini locus, ex sermone quodam de Verbis Domini petitur, qui unus causæ quam

agimus conficiendæ satis esset. *Peccator cum vult non potest, quia quando potuit noluit; & ideo per malum velle perdidit bonum posse.* De amisso interdum ab scelestissimis peccatoribus gratiæ sufficientis auxilio, sermonem ab Augustino institui eo loci, nullus ibit inficias, si verba paulò penitiùs observet, ac mutuò conferat. Eâ quippe potentiâ destitutum interdum peccatorem contendit, etiam dum vellet rectè agere, quâ priùs abusus est, quando noluit: porrò quæ illi antea potentia inerat rectè agendi, dum eâ ex voluntatis suæ perversitate abutebatur, non nisi gratiæ sufficientis beneficio sobolescebat: nemo enim eâ abutitur potestate, quæ illi gratiæ efficacis beneficio confertur; ac nusquam contingit nolle eum, cui cumulatissima victricis auxilii potestas præsto est. Ut quid autem peccatorem eo desertionis statu positum culpâ vacare non reputat Augustinus, tametsi voluntaria illâ implendæ legis impotentiâ teneatur? Planè quia per malum velle perdidit bonum posse, hancque sibi qualem qualem impotentiam iteratis criminibus accersivit. Cui consonat illud aliud ex lib. 3. de lib. arb. cap. 18. *Illâ est peccati poena justissima, ut amittat quisque quo bene uti noluit, cum sine ulla posset difficultate, si vellet.* Id est autem, ut si quis sciens rectè non facit, amittat scire quid rectum sit; & qui rectè facere cum posset noluit, amittat posse cum velit. Hinc & illud lib. 1. Retr. cap. 15. *Qui cogenti cupiditati bonâ voluntate resistere non potest, & ideo facit contra præcepta justitiæ, jam hoc ita peccatum est, ut sit etiam poena peccati.* Quo ultimo S. Doctoris effato discimus, idem & peccatum, & poenam peccati esse posse; eaque maxime ratione imputandum, quòd ex accersita prioribus delictis desertione consequatur.

Hanc ipsam Moralis Christianæ Regulam ab Augustino petitam scholis sacravit Doctor Angelicus, ut hoc idem evinceret: delicta scilicet induratis omni interdum possibilitatis auxilio destitutis nihilominus imputari. Palmare est quod legimus lib. 3. contra Gentes cap. 159. & 160. ubi de Gratiae necessitate disputat data operâ. Hoc sibi argumentum priori loco obviam facit, quo velut Achille militant Recentiores, ex Pelagianorum officinâ petito. *Cum, sicut ex præmissis habetur, in finem ultimum aliquis dirigi non possit, nisi auxilio divina Gratia, sine qua etiam nullus potest habere ea, quæ sunt necessaria ad tendendum in ultimum finem, sicut est spes, fides, dilectio, & perseverantia; potest alicui videri, quòd non*

non sit homini imputandum, si prædictis careat; præcipue cum auxilium gratiæ mereri non possit, nec ad Deum converti, nisi Deus eum convertat. Nulli enim imputatur quod ab alio dependet. Cui solvendo nihil accommodatius occurreret, quàm quod obtinent Moliniani Professores; gratiam videlicet efficacem duntaxat subtrahi peccatoribus, at sufficientem singulis præsto esse; atque idcirco peccatis adstringi, quorum vitandorum potentiam elargitur. At longè aliter Angelico Magistro visum est, cui una sapit Augustini Regula, jam à nobis exposita. Ad hujus, inquit, dubitationis solutionem considerandum est, quòd licet aliquis per motum liberi Arbitrii divinam gratiam nec promereri nec acquirere possit, potest tamen se ipsum impedire, ne eam recipiat. Et paucis interjectis: Cum hoc sit in potestate arbitrii impedire gratiæ receptionem, vel non impedire, non immerito imputatur ei, qui impedimentum præstat gratiæ receptioni. Dem enim quantum in se est, paratus est omnibus gratiam dare, vult enim omnes homines salvos fieri, & ad agnitionem veritatis venire, 1. ad Timoth. 2. Sed illi soli gratiâ privantur, qui in seipsis gratiæ impedimentum præstant. Ut ergo peccata hominibus gratiâ etiam sufficienti destitutis imputari merito possint, satis abundè putat esse Doctor Angelicus, si eam gratiæ subtractionem, objecto propriæ iniquitatis impedimento promeriti sint; eamque desertionem præviis delictis sibimetipsis accersiverint. Id luculentius verba subjuncta significant: *Quod autem dictum est, in potentia liberi arbitrii esse, ne impedimentum gratiæ præstent, competit his, quibus naturalis potentia integra fuerit. Si autem per inordinationem antecedentem declinaverit ad malum, non erit in potestate ejus nullum impedimentum gratiæ præstare.* Cæterum difficultatem abolvit omnem, quod sub finem capitis sexagesimi habet; omnesque ab importunis cavillatoribus offusas nebulas abstergit, quod coronidis loco ponit: *Quamvis autem, inquit, illi qui in peccato sunt vitare non possint per propriam potestatem, quin impedimentum gratiæ præstent vel ponant, nisi auxilio gratiæ præveniantur; nihilominus tamen hoc eis imputatur ad culpam, quia hic defectus ex culpa præcedenti in eis relinquitur: sicut ebrius ab homicidio non excusatur, quod per ebrietatem committit, quam sua culpa incurrit.* Dicant enim, amabo, subtiles argutatores, si homo mero recoctus, homicidii, si quod tunc fortassis admittat, reus agitur, modò in ebrietatem culpâ sua inciderit; tamen si vitandi tunc homicidii impotens censeatur;

quantò certius homo sufficientibus auxiliis destitutus, eorum nihilominus scelerum reus erit, quæ in eo desertionis statu perpetrabit; ob id unum quòd in eam miseriam volens inciderit, eamque sibi repetitis sceleribus accersiverit? Majori quippe peccandi necessitate laborat ebrius, quàm desertus. Is quippe impotens sui nullo aut certè debili admodum liberi arbitrii usu pollet, sed pecudum more in scelus ruit: iste libero arbitrio oppositorum semper potenti fruitur, in actus prorumpit volens ac sciens, peccatòque re ipsa consentit. Aliud quippe est libertas agendi, aliud sufficientia libertatis, ut schola loquitur: priorem ad utrumlibet habet obduratus, sufficientibus licet auxiliis destitutus; solâque posteriori in præcedentium delictorum poenam exutus est: cum contra homo mero depositus liberi arbitrii usu captus sit. At de his paulò infra.

Nil minùs præsentì instituto congruit quod habet idem Angelicus Doctor 2. 2. quæst. 2. art. 5. ubi necessitatem fidei probaturus, hanc sibi in oppositum objectionem proponit: *Nullus tenetur ad id quod in ejus potestate non est: sed credere aliquid explicitè non est in hominis potestate, quia ad hoc indiget divino gratiæ auxilio, quod in sua potestate non habet: ergo credere aliquid explicitè homo non tenetur.* Quidni & pannulo huic expeditam recentium istorum responsionem fuit, idcirco teneri omnes, quòd expeditam credendi facultatem, auxiliorum sufficientium ope nemo non habeat? At longè aliter: *Dicendum, inquit, quòd si in potestate hominis esse dicatur aliquid, excluso auxilio gratiæ, sic ad multa tenetur homo, ad quæ non potest sine gratiâ præparante, sicut ad diligendum Deum & proximum, & similiter ad credendum articulis fidei: sed tamen hoc potest cum auxilio gratiæ. Quod quidem auxilium quibuscumque divinitus datur, misericordiâ datur; quibus autem non datur, ex justitiâ non datur, in poenam præcedentis peccati, saltem originalis, ut Augustinus dicit libro De correptione & gratiâ.* Quo responso objectam difficultatem eliquat: unumquemque scilicet ad id teneri inquit, atque idcirco peccare, si minùs credat, tamen si divino auxilio destitutus; quòd illo non nisi in præcedentis peccati poenam destituatur. Hic porro de Gratia sufficientis negatione sermonem esse, nullus ibit inficias, cum de hac ipsa quæstionem habeat Augustinus, quem hujus sui responsi authorem advocat D. Thomas.

Juvat hoc idem, quod statuit ubique passim

passim de infidelitate *negativâ* sermonem instituens. Hanc peccato vacare constantissimè docet. Cur id verò? Num quia Infideles, quos negativos Schola vocat, sufficientibus ad credendum auxiliis destituti censeantur? Sanè cùm iis illos destitui censeat D. Thomas, nullam huiusce infidelitatis excusandæ commodiorem viam arripuisset, si vel unam Gratiarum sufficientium subtractionem excusando delicto satis esse existimasset. At longè aliam viam init. Hanc idcirco peccato vacare ait, quòd non ex antecedenti quopiam delicto liberè admissio derivetur, sed ex uno quod origine necessariò trahitur: cuius merito fit, ut iis Evangelii prædicatione negetur. Id enim infidelitatis negativæ nomine intelligendum ubique monet. Si enim contingat Evangelii prædicationem non unius originalis peccati merito subtrahi, sed & ob alia delicta ab iisdem infidelibus admissa, jam non *pura negationis*, sed *contrarietatis* infidelitas erit, atque ita culpanda, quia jam fidei reluctari censebuntur. In id collimat universa hoc de argumento D. Thomæ doctrina, variis locis expressa: 2. 2. quæst. 10. art. 1. 2. 2. q. 34. art. 2. ad 2. 2. sentent. dist. 39. quæst. 1. art. 2. ad 4. Unde videas, non ideo culpâ vacare aliquos, quòd divinis auxiliis spolientur, sed potius vitio illis jure verti, quòd hæc illis auxilia subtrahantur præcedentium & quidem liberorum delictorum merito. Quapropter infidelis merè negativus vix ullus est, aut certè, *rara avis in terris, nigroque simillima cygno*.

Quid plura? Eo nixus Augustini principio D. Thomas, peccata omissionis iis etiam vitio verti docet, qui implendi præcepti impotentiâ tenentur, si in eam se sponte conjecerint, volentes utique ac scientes: eaque dicti sui exempla ponit, quæ rem nostram planè conficiant; viròque desertos implendorum mandatorum sufficientiâ destitutos, potiori jure reos evincant, quippe qui eum sibi funem sponte colligarunt. Videas id 2. 2. quæst. 79. art. 3. ad 3. ubi data occasione quæstionem agit, quandonam primò peccatum omissionis incipiat? *Ad tertium dicendum, quòd sicut peccatum transgressionis opponitur præceptis negativis, quæ pertinent ad declinandum à malo: ita peccatum omissionis opponitur præceptis affirmativis, quæ pertinent ad faciendum bonum. Præcepta autem affirmativa non obligant ad semper, sed ad tempus determinatum; & pro illo tempore peccatum omissionis incipit esse. Po-*

*test tamen contingere, quòd aliquis tunc sit impotens ad faciendum quod oportet: quòd quidem si sit præter ejus culpam, non omittit quod debet, ut dictum est: si verò sit propter ejus culpam præcedentem, puta si aliquis se serò inebriaverit, & non potest surgere ad matutinas, ut debet, dicunt quidam quòd tunc incipit peccatum omissionis, quando aliquis se applicat ad actum illicitum, & impossibilem cum illo actu ad quem tenetur. Sed hoc non videtur verum, quia dato quòd excitaretur per violentiam, & iret ad matutinas, non omitteret. Unde patet quòd præcedens inebriatio non fuit omissio, sed omissionis causa. Unde dicendum est, quòd omissio incipit ei imputari ad culpam quando fuit tempus operandi; tamen propter causam præcedentem, ex qua omissio sequens redditur voluntaria. Qua loquendi ratione perspectum habes, omissionem ejus, qui implendi præcepti ex prævio peccato factus est impotens, idcirco maximè criminidari, quòd se in eum statum sponte conjecerit: tametsi (quod hic ex instituto versat Doctor Angelicus) peccatum actus, unde secuta omissio est, interna omissionis pars, ac veluti forma dici nequeat: qua de in præsentia disputare, nostra non interest. Non absimiliter 2. 2. quæst. 71. art. 5. has culpandæ omissionis rationes profert: *Si causa vel occasio omittendi subja-ceat voluntati, omissio habet rationem peccati. quandoque autem actus voluntatis directè fertur in aliud per quod homo impeditur ab actu debito: sive illud in quod fertur voluntas, sit conjunctum omissioni, puta cum aliquis vult ludere, quando ad Ecclesiam debet ire: sive etiam sit præcedens, puta cum aliquis vult diu vigilare de sero, ex quo sequitur quòd non valdat horâ matutinâ ad Ecclesiam. Quæ ergò hominibus ad certum tempus à Deo desertis inest implendorum præceptorum impotentia, eosdem culpâ non liberat, cùm & illam anteactis peccatis sibimetipsis accersiverint.**

Eò redeunt statutæ ab D. Thoma certissimæ Regulæ de peccatis ex ignorantia culpata consecutis. Ea nempe non omninò culpâ eximi: quòd etsi secutâ necessitate sobolescant, ab causâ nihilominus liberâ, ac sponte quæsitâ primam originem ducant. Prima secundæ, quæst. 76. art. 3. *Quandoque ipsa ignorantia est voluntaria, vel directè, sicut cum aliquis studiose vult nescire aliqua, ut liberius peccet: vel indirectè, sicut cum aliquis propter laborem vel propter alias occupationes negligit discere id per quod à peccato retraheretur: talis enim negligentia facit ignorantiam ip-*

sam esse voluntariam, & peccatum, dummodo sit eorum, quæ quis scire tenetur & potest. Et ideo talis ignorantia non totaliter excusat à peccato. Quia nimirum & ipsa peccatum est liberè admissum. Immo quod hic obiter de ignorantia studiosè quæsitâ subinnuit, distinctiùs expendens quæst. 3. de Malo art. 8. disertè docet, non modò peccatum non excusare omninò, verum etiam multò magis augere. Cum aliquis, inquit, directè vult ignorare, ut à peccato per scientiam non retrahatur, talis ignorantia non excusat peccatum, nec in toto nec in parte, sed magis auget. Ex magno enim amore peccandi videtur contingere, quòd aliquis detrimentum scientia pati velit, ad hoc quod liberè peccato inhareat. Tales porrò esse excæcatos & obduratos quis neget, de quibus maximè à Regio vate scriptum est Psalmo 35. *Noluit intelligere, ut benè ageret.* Longa etenim peccati nocte demersi suis etiam delectantur tenebris, ac Deo ipsi, qui eas effusâ gratiæ luce depellere potis est, sæpiùs ingeminant quod in libro Job capite 21. scriptum est: *Recede à nobis, scientiam viarum tuarum nolumus.* Ecquis ergo novâ culpâ vacare illos sibi fingat, dum recedente Deo, in nova subinde scelera prolabuntur, qui Deum ipsum ut recederet gratiamque subtraheret impulerunt?

Idem de peccatis ab ebrio admissis pronunciat Doctor Angelicus, ea scilicet vitio verti, dum quis volens ac sciens mero plus iusto indulgens mente everfus est: tametsi homo largiori mero recoctus, nullâ vel certè minùs integrâ vitandi peccati facultate potiatur: ob id videlicet unum, quòd in eum secutæ necessitatis statum liberâ voluntate devolutus sit. 2. 2. quæst. 150. art. 4. *Si in actu illo precedenti subsequuta est ebrietas sine peccato, tunc peccatum sequens totaliter excusatur à culpa, sicut fortè accidit in Loth.* Si autem actus præcedens fuit culpabilis, sic non totaliter aliquis excusatur à peccato sequenti; quod scilicet redditur voluntarium ex voluntate præcedentis actus; in quantum scilicet aliquis dans operam rei illicitæ incidit in sequens peccatum. Et in 2. sent. dist. 22. qu. 2. art. 2. ad 2. *Dicendum quòd ebrius homicida duobus peccatis peccat, scilicet ebrietate & homicidio: propter quod dicitur duplices multationes mereri.*

Hinc nata trita distinctio duplicis voluntarii, secundum se & secundum suam causam; quam & exponit & accommodat instituto D. Thomas 1. 2. quæst. 77. art. 7. Satis esse inquit, si quod peccatum ad-

mittitur, in causâ liberum sit, quamquam per se necessarium censeatur. Aliquid, inquit, potest esse voluntarium, vel secundum se, sicut quando voluntas directè in ipsum fertur: vel secundum suam causam, quando voluntas fertur in causam, & non in effectum, ut patet in eo qui voluntariè inebriatur. Ex hoc enim quasi voluntarium ei imputatur, quod per ebrietatem committit. Quidni ergo potiori iure, peccata ab homine sufficientibus auxiliis destituto perpetrata, eidem crimini vertantur? Quandoquidem liberâ illa, quam sibi sponte ascivit desertione, hanc sibi qualemcumque peccandi necessitatem comparavit. Dixi potiori iure, quòd major sit hominis mero depositi peccandi necessitas, quàm sufficientibus auxiliis destituti. Iste enim servatâ ad utrumlibet libertate, solam amisit sufficientiam libertatis; ille ab utrâque simul largiùs potitando devolutus est, ac mente everius pecudum more ruit in præceps.

Neque verò iis Angelicæ doctrinæ principiis (quod moralis controversiæ caput est) repugnare censendus est D. Bonaventura, in 2. sent. dist. 22. art. 1. quæst. 3. ubi homicidium ex culpabili ebrietate consecutum, non novæ speciei peccatum esse contendit, sed circumstantiam duntaxat ebrietatem admodum aggravantem. Nihil quippe tantillum illud scholasticæ subtilitatis diffidium quæstioni morum, quam hic unam expendimus, officit. Sive enim homicidium novæ speciei peccatum vocites, sive circumstantiam aggravantem dicere malis, illud perinde vitio verti, hominisque ebrii reatum augere fatendum erit, eique propterea meritò imputari: quandoquidem non ipsa duntaxat peccati species vitio datur, iustaque plectitur poena; sed & adjuncta quæque, unde peccato gravitas accedit.

Erit fortasse qui dicat, non omnia secuta peccata homini mente everfo, a largiori potu deposito imputari, tametsi culpâ suâ in ebrietatem incurrerit; sed ea tantum quæ sibi eventura præviderat. Atque ita nec homini obdurato, sufficientibus auxiliis destituto imputatum iri delicta, quæ is eventura sibi nullatenus ominabatur: maximè cum multos invenire liceat obduratos, qui nusquam sibi subtractum iri auxilia sufficientia certò credant.

Verum (ut id obiter dicam) non advertunt qui hæc nobis obtrudunt, peti- tum à nobis ex ebrietate validissimum argumentum, ex illorum numero esse, quæ

à majori ad minus Schola vocat; cum deterior hominis ebrii conditio sit, quam divinis auxiliis destituti: nihilque propterea adversæ parti lucri obventurum, si fortè rueret, tamen multum ex eo præfidii nobis accedat, si suo stet robore. Fieri quippe posset, ut quæ minùs homini vino calenti imputantur peccata, obdurato atque deserto vitio verterentur: quod ille nec sui compos, nec liber omnino sit, iste mente integer ac sui Dominus.

Sed age, demus quod mitior quorundam Theologorum opinio ponit, homini scilicet præ nimia potatione everso, ea tantùm secuta peccata vitio dari, quæ is sibi eventura præviderat; non eò tamen laxitatis veniunt Theologi illi, ut existiment ea distinctè ac secundùm illorum speciem genùsve prævideri debuisse, ut demum vitio verti possint: sed satis esse ajunt, si in commune prævisa sint, immò si vel solùm prævideri debuerint, ob pravæ inclinationis experimentum. *Reputatur*, (inquit Cardinalis Cajetanus illorum unus) *prævisum peccatum, non solùm si sit prævisum in sua specie, puta quia novit quis, se ebrium proximis detrahare; aut in suo genere, puta quia novit quis se ebrium vitio lingua irretiri; quamvis modò detractiōe, modò contumeliâ, modò blasphemîâ, modò irrisiōe, modò turpiloquio: sed etiam si sit prævisum in communi, puta quia scit se ebrium in aliquo peccare, licet nesciat in quo genere tunc peccabit. Reputatur rursus prævisum, non solùm si sit præcognitum, sed si debuit esse prævisum præcogitando, puta quia expertus est inclinationes suas pronas, quanto magis bibit, ad peccata, quia aliàs in alienatione mentis vel propè incidit in peccatum. Æstimatur autem non prævisum peccatum ex ebrietate, quando nullo modo prævisum est, præviderique rationabiliter non potuit humano more.* Jam verò quis putet, peccatorem toto illo temporis tractu, quo longum illum scelerum funem ducit, quo demum obduratio ac cæcitas consummatur, nusquam vel in commune prævidisse, in quod quantave peccata lapsurus esset, ubi tandem in profundum abyssi venisset? Aut certè quis neget, hæc ab eo prævideri debuisse, ac quàm facillimè potuisse, dum toties relapsus, totiesque peccato victus proclivem in omne scelus animum experiretur?

Insulsum porrò est, quod subjungitur, obduratorum multos esse, qui nusquam sibi subtractum iri auxilia sufficientia certò credant: satisque mirari nequeo, Vaquefium tam futili argutiâ Augustinum

tanquam admoto ariete pulsasse 1. parte disp. 97. cap. 4. Quasi verò tremenda iudicia vanis hominum opinionibus metiatur Deus, iisque auxilia etiam sufficientia subtrahere nequeat, qui ea nusquam sibi sublatum iri, seu verè seu falsò crediderint! Certè hac nostra ætate inventus est *Nodi Prædestinationis Dissolutor*, qui ne obstinatissimis quidem peccatoribus, *gratias copiosissimas, abundantissimas, efficacissimasque* subtrahi docuit. Da itaque hominem obstinatissimum, qui ea se opinione inficiat: ergo-ne divinæ justitiæ metas ponet, ut nusquam ab eo copiosissimis efficacissimisque gratiis exui possit, quod nusquam se iis exutum iri commentus erit?

Addiderim ad causæ cumulum, longè veriùs sentire Theologos illos, qui misera quavis peccatorum ex ebrietate secutorum distinctione, universa vitio verti putant, si prævisa illa sint, si non sint; modò culpâ sua homo in ebrietatem inciderit. Enim verò nec D. Augustinus nec D. Thomas ea distinctione usi inveniuntur, sed universa indiscriminatim eadem sorte involvunt, ubi semel ebrietas peccato contracta est. Quin etiam peccatorum ebriis imputandorum rationem indigitat Doctor Angelicus, universis planè communem; quia scilicet *peccatum sequens redditur voluntarium ex voluntate præcedentis actus: in quantum scilicet aliquis dans operam rei illicitæ, incidit in sequens peccatum.* Nec aliam Augustinus de obdurato sermonem habens assignavit, libro de Perfectione Justitiæ cap. 6. *Sola, inquit, hominis voluntate factum est, ut ad istam necessitatem veniret.* Seu enim secuta delicta prævisa sint, seu non sint, ex libera prævi peccati voluntate sobolescent. Quare minùs Augustini mentem perspectam habent, qui ut eam distinctionem illius suffragio muniant, vulgatum effatum de Lotho ebrietate sopito iuperbè efferunt: *Culpandus est, non quantum ille incestus, sed quantum merebatur ebrietas: quasi secutum incestum culpâ omnino vacasse censuisset Augustinus, quod eum Lothus largiùs potitando minùs prævidisset.* Id enim ab Augustino dictum contendit Doctor Angelicus, non ut incestum ex ebrietate conlectum omni culpâ vacare significaret, sed ut culpam ex parte duntaxat diminutam innueret: *Diminuitur tamen peccatum sequens, sicut & diminuitur ratio voluntarii: unde Augustinus dicit contra Faustum &c. 2. 2. quæst. 150. art. 4.*

Card.
Sfond. par.
1. §. 2.

22. q. 150.
art. 4.

Lib. 22.
cont. Faust.
cap. 44.

Futi-

Futile est, quod nonnulli incommodum regerunt, ut invictam Augustini & Doctoris Angelici rationem elidant, qua secundam Moralis Christianæ Regulam confirmavimus. Nempe, inquiunt, si imputando peccato satis esset, ut ex peccato præcedenti sobolesceret, consequens fore, ut & motus primò primi, ignorantia invincibilis, amentia nascendo contracta, atque etiam infidelitas negativa, crimini verterentur; utpote quæ ex originali peccato fruticarint. Enimverò non quodcumque peccatum prævium secuto peccato imputando satis esse diximus, sed illud duntaxat, quod libera voluntate à nobis admissum est: id enim quæcumque hætenus in medium attulimus, certò probant. Porro peccatum originis ineluctabili necessitate nascendo trahitur; tamen si primo parenti, cui non originale sed actuale fuit, liberrimum esset. Quare uti nobis minùs liberum est, ita & quæ inde sequuntur, minùs libera censeri debent, ut nobis culpæ vertantur. Oportet enim, ut egregiè notat Doctor Angelicus in 2. sent. dist. 50. quæst. 1. art. 2. *quod secundum hoc quod aliquid rationem culpæ habet, secundum hoc ratio voluntarii in ipso reperiatur. Sicut autem est quoddam bonum, quod respicit naturam, & quoddam quod respicit personam: ita etiam est quoddam culpa natura, & quoddam persona. Unde ad culpam personalem requiritur voluntas personæ, sicut patet in culpa actuali, quæ per actum personæ committitur: ad culpam verò naturæ, hoc est originale peccatum, non requiritur nisi voluntas in natura illa.* Quapropter motus primò primi, amentia nascendo contracta, ignorantia invicta, infidelitas negativa, non peccata sed pœnæ censentur, quòd ex peccato minùs libero sobolescant. Sicubi verò D. Augustinus desertorum hominum peccata idcirco vitio dari docuit, quòd ex originis labe pullularint, primam duntaxat imputandorum delictorum radicem indigitavit, unde primum carenti divinis auxiliis meritum traximus, non omnem, atque illam maximè, unde desertorum hominum delicta obtinent ut libera sint, verique nominis peccata censentur. Quare locis aliis integram desertionis atque imputationis rationem insinuans duo ponit, & *quod origine traxerunt, & quod propria voluntate insuper addiderunt.*

Plura adscribere parcam, ad alia momenta confutanda, quæis Gratias sufficientes nulli hominum subtrahi putant aliqui: quia instituti consiliique nostri non fuit

eam quorundam opinionem de industriâ confutare, sed illorum duntaxat stupendam aberrationem refellere fuit animus, qui nulla obduratis delicta imputatum iri fabulantur, si iis auxiliis iusto Dei iudicio privarentur: satique officio nostro consultum arbitrati sumus, si Lemosio Bastidam (quòd id obtenderet) durius exagitant, nostram advocationem commodaremus, & Becheferium hoc idem commentum novâ pompâ explicantem, datâ occasione retunderemus.

Monere hîc satis fuerit, Autorem Librorum Devocatione Gentium, quem doctrinæ suæ ducem advocat Becheferius in Thesisibus, multum quidem laboristoto libro 2. posuisse, ut Dei gratiam communem omnibus faceret, at de externâ gratiâ intelligendum omninò esse, uti illum Vasquesius exposuit. Nec immeritò, quippe qui communem illam gratiam posuit capite 3. partim in *cali & terra testimoniis*, partim in *doctrinâ legis & Prophetarum oraculis*, partim in *Miraculorum signis*. Quamquam & interiorem quamdam gratiam fuisse à Scriptore isto admittam non est diffitendum, gratiam, inquam, omnibus communem, etsi non ejusdem in omnibus excellentiæ ac potestatis. Sic lib. 1. cap. 4. naturale rationis humanæ lumen illuminantis gratia Deo nomine cohonestare non dedignatur. Sed hæc dona naturalia, sive ipsam totam perfectamque naturam, qualis in prima conditione donata est, sive vitiata natura qualescunque reliquias, etsi gratiæ nomine non indigna censeat Augustinus (Sit, inquit, gratia natura adtributa quâ sumus animalia rationabilia, discernimurque à pecoribus &c.) constanter tamen negat esse propriè gratiam Dei, quæ bonos discernit à malis, non quæ communis est bonis & malis. Nec ab isto Augustini sensu vel latum unguem discedit aurei illius libelli Autor, nec Prosper eidem familiaris & suppar. Si quod enim inter utrumque discrimen, non in dogmatibus, sed in nonnullis loquendi modis versatur. Quàm longè autem abfuerit Prosper ab asserenda obduratis omnibus gratia sufficiente, vel ex his ejus versibus patet ex Carmine de ingratis cap. 11. depromptis.

— Dic unde probes, quòd gratia Christi
Nullum omninò hominem de cunctis qui
generantur
Prætereant, cui non regnum vitamque beatam
Impertire velit.

Et capite 32.

Non autem rectè, nec verè dicitur, illos

Qui

Aug. de
Pred.
Sanct. c. 5.

Ibid.

Qui sunt extorres divini muneris, & quos

*Gratia neglexit, degentes mortis in umbrâ,
Peccati non esse reos; quia recta gerendi
Non data sit virtus, &c.*

De parvulis autem qui sacro baptismatis fonte non abluti decedunt, quid sentierit, docent sequentes cap. 31. versus.

Et tamen ex istis miseratrix gratia quosdam

Eligit: & rursus genitos Baptismate transfere

In regnum aeternum, multis in morte relictis,

*Quorum causa fuit similis de vulnere eodem.
Nec meritis istud poteris aptare parentum,
Ceu pia profuerit redimendis cura bonorum,*

*Abstuleritque aliis aliena ignavia vitam:
Cum videas multos Sanctis genitoribus ortos*

Nulla salvari studio potuisse Suorum.

Ceterum num fortè de schola Thomistica atque Sorbonicâ aliqui fuerint, qui internas sufficientes gratias ipsis etiam obduratis præstò esse dixerint, ne si iis destituti supponerentur, culpâ vacarent; expendere non vacat. De S. Augustini ac D. Thomæ mente, una hic mihi cura fuit, quòd alios interdum suos pati manes, certò sciam. Dicam tamen, Thomistica Scholæ Theologos, si qui fortè ita statuissè inveniantur, longè adhuc à Moliniano Systemate, & à peccati Philosophici errore distare: & quidem duplici de causâ. Primò, cùm gratiam sufficientem duplicem statuatur Angelica schola, habitualement unam, actualem alteram; priorem in quadam qualitate sitam, quæ facultatem instar prioris dispositionis eleve, bonisque actibus exercendis remotè potentem efficiat; alteram in actualibus illustrationibus, excitationibus, desideriiis, ac motibus positam; quæ mentem ac voluntatem identidem pulsent: Thomistis aliquibus laxioribus visum est, priorem peccatis imputandis necessariam esse, atque adeò induratis ipsis & infidelibus affulgere, ne aliàs peccato vacarent, si præceptorum implendorum impotentiam laborarent; nec satis attenderunt, ex S. Augustini ac D. Thomæ principiis, nihil peccatis imputandis impotentiam illam obesse, quæ propriâ ac li-

berâ iniquitate contracta est. Attamen ut ut est, de gratia sufficienti actuali longè aliter statuerunt, ut errorem effugerent. Verùm Molinianæ Scholæ dictatores, quos exagitandos aggressi sumus, utramque gratiam imputando peccato necessariam obtendunt. Hinc illa Baunii Propositio, à Clero Gallicano & Academiâ Parisiensi proscripta: *Nunquam peccatur nisi præviâ peccati cognitione animus illustretur, ejusque vitandi desiderio excituletur.* Hinc illa Francisci Annati, in libello quem postremum adversus Arnaldum elaboravit pag. 34. *Qui nullam de Deo, vel peccatis cognitionem habet, & nullo modo apprehendit amoris Dei & contritionis actus sibi ex præcepto exercendos, nullam hic habet gratiam actualem: sed illud non minus verum est, horum actuum omissione nullum ab ipso peccatum admitti; nec si damnetur, propterea damnari posse.....* Quod idem de culpabili commissione dici potest. Hinc ille Professoris Theologi Divionensis ab Alexandro VIII. confixus error: *Peccatum Philosophicum quantumvis grave, in eo qui Deum vel ignorat, vel actus non cogitat, est grave peccatum, sed non est offensa Dei, neque peccatum mortale solvens amicitiam Dei, neque aeternâ pœnâ dignum.* Hinc illa Buffierii assertio, ab Archiepiscopo Rothomagensi damnata: *Attentionis animi ad actionis pravitatem necessaria est, ut peccatum imputetur.* Ut alias si leam longè multas, in libello ante annos decem à nobis edito, De vera Jesuitarum sententiâ circa peccatum philosophicum, recensitas. En primum discriminis caput.

Secundò, cùm eam sufficientem gratiam ponat Schola Thomistica, quæ ex parte potentiæ duntaxat sufficiat, sic ut novam insuper efficacem gratiam, re ac naturâ à sufficiente distinctam, necessariam contendat, ut in actum re ipsa prorumpatur; contra verò Moliniani sufficientis gratiæ genus statuunt, quod undequaque sufficiat, nihilque novi à Deo postulandum putent, ut integra conversio perficiatur, modò peccator sufficientem gratiam, addito consensu reddiderit efficacem: profectò longè minoris laxitatis est, gratiam Thomistico sensu sufficientem, communem obduratis & infidelibus facere, quàm Moliniano.

ADDENDA

IN LIBRO QUARTO

HISTORIÆ CONGREGATIONUM

DE AUXILIIS.

AD CAP. I. Pag. 593. lin. 3. à fine, post hac verba :
ejurabant.

Hac arte Zozimum circumvenit Celestius, porrecto fidei suæ libello : ab ipsa Trinitate unius Deitatis exordium sumens, usque ad mortuorum Resurrectionem, quibus in capitibus eum accusaverat nemo, fidem suam minutatim explicabat : cætera verò, quibus intentatæ litis summa vertebatur, perfunctoriè resumebat. Augustinus libro de Peccato Originali cap. 23. *In libello quem Romæ dedit, cum fidem suam à Trinitate unius Deitatis, usque ad resurrectionem, qualis futura est, mortuorum, de quibus eum nullus interrogaverat, & unde illi nulla quæstio movebatur, quantum dicere libuit explicasset, ubi ad id quod agebatur sermo pervenit, &c. Quamquam &c.*

Pag. 598. post Caput secundum hac insere.

CAPUT TERTIUM.

Nova arte Pontificem à resumenda lite dehortantur : quòd quæstiones in controversiam vocata nihil ad fidem attineant ; earumque numero sint habenda, quas nec contemnendas nec adstruendas censuit Celestinus.

Quis Societatis Actores eam tandem morandi Judicii viam inituros existimasset ; qui toties violatam fidem, libertatem excisam, purum putumque Calvinismum inductum, de Dominicanis expostulaverant ? Sed sunt hæ malorum litigatorum vices, ut causæ meritis diffidentes atque adversi judicii metu perculsi, multa demum de præsumto jure concedant, quæ summo antea supercilio contendebant : ipsamque partem adversam lubentes absolvant, modò & ipsi è mota lite emergant latere tecto. Hac arte Pelagianos usos videas, qui cum Augustinum vagis ac raucis illis accusationibus circumvenissent, violatamque ab eo fidem, ac suscitatum Manichæismum non semel expostulassent, eam tandem fiduciâ dejecti, statuta ab eo dogmata, quæstiones præ-

ter fidem motas dicere maluerunt, ne supremo Ecclesiæ judicio finirentur. Nec dissimiliter Massilienses, post easdem in illum calumnias instauratas, eò tandem se retulere, ut plerique contenderent, *Christianam fidem hac dissensione minimè violari : uti testis est D. Prosper, in sua ad Augustinum Epistola.*

Molinianorum itaque animis infedit hoc consilium, ut Paulum V. Clemente VIII. ad superos vocato, à resumendâ finiendâque controversiâ dehortarentur. Controversias quæ fidei summam stare toties falsi fuerant, opinione liberas dictitarunt, dato libello supplici, cujus fragmentum superiori capite dedimus ; missaque jam tandem importunâ illa Calvinismi accusatione, quâ Dominicanos sæpius oneraverant, quæstiones in jus vocatas, earum loco haberi voluerunt, quas Ecclesiasticorum Tractatorum arbitrio dederat Celestinus ; ut hac arte Molinismi damnationem eluderent. *De substantia, inquiebant suo illo libello Pontifici dato, primæ quæstionis, quæ est de viribus Liberi Arbitrii, convenire inter utramque partem ex eo constat, quòd aequè omnes gratia necessitatem contra Pelagium, & libertatem Arbitrii contra Calvinum & Lutherum defendunt : quæ judicantur hujus quæstionis substantia, quam definiunt Innocentius & Celestinus, & Concilia Carthaginense, Milevitanum, Arausicanum, Valentinum, Senonense, & Tridentinum : ex quibus Celestinus suam ad Episcopos Gallia Epistolam hac fere clausula concludit : Profundiores verò difficultioresque partes incurrentium quæstionum, quas latius pertractarunt qui hæreticis, restiterunt, sicut non audeamus contemnere, ita non necesse habemus adstruere : quia ad confitendam Dei gratiam, cujus operi ac dignationi nihil penitus subtrahendum est, satis sufficere credimus, quidquid secundum prædictas regulas, Apostolicæ Sedis nos scripta docuerunt.*

Tum subinde multis interjectis : *Edenda est, inquiebant, Constitutio Apostolica quæ*

Apud Aug. lib. 2. de pecca. Orig. c. 23.

quæ tria potissimum capita complectatur: in quorum primo quæstio de viribus liberi Arbitrii & gratiæ necessitate eatenus definitur, ut ea duntaxat proponantur, quæ citra fidei jacturam in dubium revocari non possunt. Cetera (quod olim fecit Celestinus, in Epistola ad Episcopos Galliarum) ita disputationibus Theologorum permittantur, ut inter Calvinismum & Pelagianismum iter medium teneatur. In altero verò quæstio de efficacia gratiæ, gravissimis verbis ex Augustino præsertim petitis breviter explicetur, omissis vocum novitatibus, & spinosis atque abstractis difficultatibus, ut Apostolicam gravitatem decet, & sacrorum Canonum præfata consuetudo docet. In tertio ac postremo severe prohibeatur, adhibitis etiam, si videbitur, Censuris Ecclesiasticis, ne qua pars alteram erroris atque hæresis insimulet; necve probra aut contumelias jactet; sed qua Religiosos decet modestia ac pietate, singuli suam sententiam ita explicent, ut à Catholica & Romana Ecclesia placitis & Conciliorum Decretis, præcipue verò Tridentina Synodi definitionibus, ne latum quidem unguem recedant. Quibus addi poterunt aliæ admonitiones & adhortationes, aut etiam præcepta, quæ ad pacem conciliandam & retinendam valere videbuntur. Videretur etiam fortasse opportuna, modesta utriusque Religionis commendatio, & præterita contentions excusatio, quæ à pietatis veritatisque studio, & bono religionis zelo profecta, Apostolicæ Sedis autoritate sedanda & penitus extinguenda creditur.

Sic illi Celestini verbis astutè abusi, quæstiones hætenus agitatae involvi silentio, suumque idcirco Molinam absolvi, speciosâ circulatione precabantur. Verum quominus suo illo libello, novo Pontifici fucum facerent, obstitit Thomas de Lemos, qui brevibus ad marginem observationibus lucubrationem malè natam dispunxit, illiusque editores multo sale defricuit; quod & terga verterent, & à fidei controversiis alienum id dicerent, quo fidei summam stare non ita pridem facti fuerant. Ita priorem lasciniam diffuebat vir maximus: Se ipsum & alios fallit, asserens, Utramque partem controversiæ de ipsa rei substantiâ convenire, & solum differre in modo dicendi. Immo de fidei substantia controversia est, de qua Sanctus Augustinus cum Pelagianis, & S. Prosper cum Semipelagianis, ad literam. In eodem enim indivisibili casu sumus: nec iste Author ut se occultet, aliter poterit suadere. Magis fallit incautos, dum ait Equè omnes gratiæ necessitatem contra Pelagium defendere. Nam altera pars verbis tantum necessitatem gratiæ Christi, quàm aperte ne-

gare non audet, affirmat; sicut antiquitus Pelagiani fecerunt: quod sapissimè apertissimum dedimus in conspectu felicitis recordationis Clementis VIII. Unde Celestinus inductus contra Semipelagianos definiens, equè Molinam & ejus fautores, sicut loquentes contraria damnat. Aliæ autem valde diversa quæstiones sunt illæ profundiores, quas Celestinus nec contemnebat, nec adstruere volebat, quàm sint istæ de quibus modò controversitur: quia, ut diximus, altera controversiæ pars contra fidem procedit, & in Epistola Celestini invenitur expressè damnata, & fundamentum ipsius eversum, ut alibi manifestabimus.

Alteram in hunc modum dispungebat: Primum quod dicit definiri debere, est necessitas gratiæ & libertas arbitrii, in his duntaxat quæ ad fidem pertinent, aliis quæstionibus omissis. Benè est: sed intelligit omittebam quæstionem de congruitate gratiæ per illam Scientiam mediam, seu per illam physicam prædeterminationem, ut ex præmissis sit manifestum. Sed quomodo in hoc Ecclesiam ipsam, quod implicat, procuret fallere, quis non videat. Petit enim definitionem quæ nihil definiat; immò definitionem expostulat, quæ quodammodo permittat errores per Ecclesiam grassari, illos quodammodo approbando. Jam enim sæpè diximus, quod & modo confirmamus, sententiam illam de congruitate gratiæ per illam Scientiam-mediam, damnatam esse Pelagianorum Doctrinam, quam iste Author damnari non vult, sed quodammodo approbari. Per oppositum ergo sentimus definendam esse, clarèque Ecclesia proponendam, unam ex illis partibus, etiam terminos & voces quibus controversiam hanc Authores ventilant, vel indirectè saltem approbando, vel reprobandando, ut omnes simul equivocationes præcludantur. Dicit præterea, Non oportere definire in particulari aliquam controversiæ partem, ut sic inter Calvinum & Pelagium, medium retineatur. Immo si neutra pars in specie definiatur, illud, quod in confuso postulat, medium iter inter Calvinum & Pelagium relinqueretur: & error Pelagianorum & Calvinistarum quasi approbaretur, relinquendo sicut probabilem illam congruam seu moralem vocationem; ut sæpè fuit declaratum. Dicit etiam, Quod Celestinus sic in confuso definivit, & non aliquam in specie controversiæ partem: in quo se nimis occultat, & Celestino facit injuriam: cum apertissimè constet ipsum definivisse, bonum usum Arbitrii ex efficacia gratiæ esse; quod totaliter negat sententia illa, quæ introduxit illam mediam Scientiam, & vocationem illam moralem seu congruam. Unde oportet jam nunc

definitionem Celestini explicare, & quid re ipsa condemnet, aperire.

Idem illud Molinianorum effugium occupavit Archiepiscopus Armachanus eruditâ lucubratione, novo Pontifici datâ, de qua nobis capite 6. sermo erit. Illos à vero procul abire demonstravit, qui controversias agitas nihil ad fidem attinere dicerent; eosque Celestini suffragio deludi, qui nova Molinæ commenta incurrentium quæstionum loco haberi vellent. Et quidem tardum ac penè jam serum effugium istud erat, ut ejus obtentu judicium ora sublinirent. Cùm enim Moliniana paradoxa Pelagiano luto hæerere censuissent Hispanicæ ac Belgicæ Academiæ, Episcopi ac Theologi primæ notæ, quorum sententiam rogaverat Clemens VIII. ac ipsi tandem Romani pendentes controversiæ Cognitores; nihil novis illis inventis Catholicam fidem lædi, perperam obtendebant desperatæ causæ procuratores. Rursum cùm incurrentium quæstionum nomine eas nec intellexerit nec intelligere verè potuerit Celestinus, quas de industria ac datâ operâ adversus Pelagianos agitaverat Augustinus, uti lib. 3. capite 8. planum fecimus; non erat cur eo titulo procusa nuper paradoxa Moliniani censerent vellent, quæ à Sanctissimo Gratiae Vindice ex instituto confutata demonstraverant adversæ partis Oratores: aut certè erat hoc illis magno argumentorum apparatu demonstrandum, quod tantâ fiduciâ contendebant, ut latis jam pridem Censuris fidem adimerent, causæque Cognitores naso suspenderent. At nihil illi, ut dictis robur assererent, proferebant; quasi satis illis autoritatis esset & gratiæ, ut integram verbo fidem facerent. Quare & ea Supplicatio elisa est.

Erat hic animus gradum sistere, nec longiorem de celebri illa Celestinica clausulâ funem ducere, satis officio nostro consultum rati, si ejus Molinianos interpretes datâ identidem occasione retunderemus: præsertim cùm libro superiori, duo hæc haud levibus argumentis probaverimus: primum, non universa fidei capita adversus Pelagianos & Massilienses asserenda, decem illis Capitulis Celestini Epistolæ adnexis explicari; sed ex iis veluti primigeniis fontibus alia fluere, ad fidem pariter attinentia: alterum, celebrem illam clausulam, seu Decimum Capitulum, ad eas Augustini sententias detorqueri non posse, quas ille datâ operâ atque ex instituto adversus gratiæ hostes, uti Catholicæ fidei tesseram, propu-

gnavit. Hinc quippe consequens erat, Gratiam seipsa victricem & efficacem, Prædestinationemque nullis hominum meritis, conatibus, aut dispositionibus nixam, inter fidei capita recenseri haud dubiè posse, tametsi laudatis Celestini Capitulis distinctè & explicatè non interantur; modò ex iis sponte fluere, & ab Augustino adversus gratiæ hostes de industria defendi constiterit. Quod prudenter Lemosius suis illis observationibus adnotaverat, nihil aliud pro finienda Auxiliorum Controversia opus esse inquires, *quàm definitionem Celestini explicare, & quid re ipsa condemnet aperire.*

Verùm ut hanc partem paulo plenius exsequeremur, fecit Recentiorum quorundam importuna dicacitas, qui hæc ipsa Molinianorum interpretamenta ante dies aliquot recuderunt; ut hæc duo Thomistica doctrinæ capita incurrentibus Celestini quæstionibus adnumerarent: eoque fiduciæ devenere, ut Innocentii XII. Breve Apostolicum, anno 1694 Theologis Lovaniensibus datum, ad suum illud figmentum obtrudendum detorcerint. *Etiam illud, inquit illorum unus, in Præfatione brevis Historiæ Jansenismi, quod concernit silentium in materia de Auxiliis, & cui rursus inhaesit sua Sanctitas, in Brevi ad Facultatem Theologicam Lovaniensem dato 6. Februarii 1694. Tunc enim profecto non tot orta forent, & orirentur dissidia; dum alii doctrinam de Gratia per se efficaci, & de Prædestinatione ante prævisa merita, fidei esse contendunt: quamvis eadem sua Sanctitas ibidem doctrinam istam non obscure collocet in earum numero, de quibus S. Celestinus ad Episcopos Gallicanos rescripsit: Profundiores difficilioreque &c.*

Ne ergo ultimam Auxiliorum Controversiæ definitionem, sinistris illis interpretamentis morentur feri isti ac succedanei Molinianæ causæ procuratores, manum secundò tabulæ admovemus, novoque argumentorum apparatu, dictis superiori libro fidem addimus. Quò duo illa Angelicæ scholæ capita, ita Celestini regulis indivulsè cohærere, atque ex iisdem spontè ac liberè fluere demonstramus, ut in fidei capita transire faciliè possint; ubi semel (quod maximè cavendum est) Ecclesiæ supremoque ejus Hierarchæ ita pronunciare, & pendente ab annis amplius centum Auxiliorum Controversiam, extremo judicio finire libuerit. Quare nec turbas movemus, nec dissidia concitamus, nec contrarium in præsentia sentientes à fide segrege dicimus, aut eo titulo præcipites illis

*In his
Additionibus.*

Lib. 3. c. 8.

illis Censuras inurimus, Ecclesiae prærepto iudicio, nobisque ambitiosius arrogato: uti nec turbas ciebant Hilarius ac Prosper, nec illos à fide segreges arbitrabantur, qui alia bene multa Augustinianæ doctrinæ capita, à Celestini Regulis pendentia, sugillabant; donec post secularem concertationem, ex Ecclesiae iudicio in Synodis Arausicanâ & Valentinâ pronuntiato, fidei Dogmatibus accenderentur. Sed Thomisticæ causæ momenta modestè exsequimur, ut iudicio maturam ostendamus, ipsamque partem adversam finu complectimur, Augustini sententiæ obsecuti, lib. 1. de vera Religione cap. 1. *Mementote qui scholas dissentientes habetis, templa vos habere communia.*

CAPUT QUARTUM.

Superior Molinianorum expostulatio, à nonnullis nuper instaurata confutatur: Quæstiones in ius vocatas, Celestini Capitulis arctissime coherere, multis ostenditur.

Gratuitam Prædestinationem, Gratiæque seipsa efficacem, de quibus mota lis erat, Capitulis illis ab Celestino, aliòve Augustinianæ doctrinæ studioso, digestis arctissime coherere, nec posse incurrentibus quæstionibus, quæ privatorum opinioni in subjecta Clausulâ permittuntur, adnumerari; ex ipso in primis sine institutoque quo Capitula ipsa digesta sunt, adeò apertè colligitur, ut mirari omninò subeat, rem meridiana in luce positam, à refractariolis ingeniis in controversiam adduci. Ita quippe res habuit.

Alter ab Augustini obitu annus agebatur, cum gravis illi ab æmulis invidia conflata est. A Massiliensibus potissime traduci cœpit sanctissimus Doctor, quasi qui in Pelagianis exagitandis debitos modos prætergressus esset: quique in eum paulò ante quàm fatis concederet, hincere ac mussitare ausi fuerant, erecto jam supercilio compositi manes sollicitabant, eique petulantius insultabant. Ad hæc, Prosper & Hilarius, qui viventem Augustinum de Massiliensium querelis per Epistolas certiolem fecerant, ut eas ipse de scripto confutaret, Romam contendunt, Apostolicæ Sedis auctoritatem adversus novas æmulorum oblocutiones advocaturi. Fecit pro votis Celestinus, Ecclesiae gubernaculis non ita pridem admotus, tulitque suppetias adversus importunos obrectatores. Elegantem is ad Gallos Episcopos Epi-

stolam dedit, qua Augustini memoriam sacrauit, doctrinam miris laudibus extulit, obrectatoribus silentium indixit. Tum ut omnibus compertum fieret, quàm temerè Massilienses Augustini manibus insultarent, quòd in eo adversus Pelagianos commissio prælio, modum certosque fines excessisset, digessit Celestinus (seu ut alii veriùs sentiunt Prosper ipse, aut Leo Magnus) certa illa Capitula, celebri Epistolæ subiecta; eoque potissimum ex superiorum Pontificum Decretis & Synodorum Africanarum statutis delibavit: ut intelligerent universi, ea ipsa jam pridem ab Ecclesia fuisse definita, quæ ab æmulis obrectatoribus in invidiam trahebantur. Liquet id ex ista Capitulorum prolusione: Quia nonnulli, qui catholico nomine gloriantur, in damnato hæreticorum sensibus seu pravitate seu imperitiâ demorantes, piissimis Disputatoribus obviare præsumunt: & cum Pelagium atque Celestinum anathematizare non dubitent, Magistris tamen nostræ, tanquàm necessarium modum excesserint obloquuntur; eaque tantummodo sequi & probare prostentur, quæ sacratissima Beati Apostoli Petri Sedes contra Inimicos Gratiæ Dei per ministerium Prasulum suorum sanxit & docuit: necessarium fuit diligenter inquirere, quid Rectores Romana Ecclesie, de hæresi quæ eorum temporibus exorta fuerat, iudicaverint, & contra nocentissimos liberi arbitrii Defensores, quid de gratia Dei sentiendum esse censuerint; ita ut etiam Africanorum Conciliorum quasdam sententias jungeremus, quas utique suas fecerunt Apostolici Antistites, cum probarent. Ut ergo plenius qui in aliquo dubitant instruantur, Constitutiones Sanctorum Patrum compendioso manifestemus indiculo, quod, si quis non nimium est contentiosus, agnoscat omnium disputationum connexionem, ex hac subditarum auctoritatum brevitate pendere, nullamque sibi contradictionis superesse rationem, si cum Catholicis credat & dicat: &c.

Tum subinde positus IX. fidei Capitibus, brevis hæc de reliquis quæstionibus opinione liberis, clausula necitur: Profundiores verò difficiliorefque partes incurrentium quæstionum, quas latius pertractarunt qui hæreticis restiterunt, sicut non audemus contemnere, ita non necesse habemus adstruere: quia ad confitendum gratiam Dei, cuius operi ac dignationi nihil penitus subrahendum est, satis sufficere credimus quidquid secundum prædictas Regulas, Apostolica Sedis nos scripta docuerunt: ut prorsus non opinemur catholicum quod apparuerit præfixis sententiis esse contrarium.

Neceſſe igitur eſt, iis fidei Capitibus, à Celeſtino aliove Auguſtiniſtæ doctrinæ ſtudioſo digeſtis illa ipta maximè contineri, quæ in Auguſtino Semipelagiani fugillabant, & in quibus neceſſarium modum ab eo violatum querebantur: aut certè neceſſe eſt, ea ſtatutis illis fidei Regulis proximè eſſe connexa, iisdemque arctiſſimè cohærere. Aliàs ſi nihil hæc cum deliberatis capitulis commune haberent, ſed ad incurrentes quæſtiones opinione liberæ perſtiterent, eâ certè Capitulorum recenſione Auguſtini doctrina à Maſſilienſium oblocutionibus vindicata non eſſet, ſed potiùs integra liſ Maſſilienſibus adjudicata. Quandoquidem neceſſarium modum exceſſiſſe, merito dici debet, qui quæſtiones à fidei Regulis longè diſſitas, quæſque adſtruere neceſſe non erat, uti fidem Eccleſiæ venditavit, ac veluti Catholici nominis teſſeram poſuit.

Im quis neget, Maſſilienſes duorum illorum dogmatum occasione, negotium maximè Auguſtino faceſſiviſſe, quaſi in afferendâ gratiâ electorum ad gloriam prædeſtinatione, gratiâque per ſemetipſam efficaci ſtatuendâ, neceſſarium modum exceſſiſſet, novamque in veteri ſpatio ſemitam excogitaſſet? Id ex Proſperi & Hilarii ad Auguſtinum Epistoſis, quibus eæ Maſſilienſium ſtrophæ minutatim reſeruntur, aperte colligas.

Ac primum, quid illos de gratuita Prædeſtinatione, in D. Auguſtini ſcriptis malè haberet, notat S. Proſper in hæc verba: *Multi ergo ſervorum Chriſti, qui in Maſſilienſi urbe conſiſtunt, in Sanctitatis tuæ ſcriptis quæ adverſus Pelagianos hæreticos condidiſti, contrarium putant Patrum opinioni & Eccleſiaſtico ſenſui, quidquid in eis de vocatione electorum ſecundum Dei propoſitum diſputaſti.* Nempe id eis ſtomacho erat, quod Prædeſtinationem ad gloriam defendiſſet, quæ omne naturæ meritum, diſpoſitionem, conatum, conditionem, bonum denique gratiarum uſum, ſcientiâ exploratrice præviſum penitus anteverteret: quo in capite nova Auguſtinum veſtigia impreſſiſſe, fabulabantur. Cum contra, aliter ipſi philoſophandum arbitrarentur, Electorumque prædeſtinationem ad gloriam ex media illa ſcientiâ humani contentus exploratrice ſuſpenderent; quâ nimirum prænoſceret Deus, liberi arbitrii verſatili gratiâ perſuſi futurum aſſentum, ipſiusque etiam gratiæ uſum. Hic etenim hic cardo erat, quo tota illa Maſſilienſium in Auguſtinum machina volvebatur, nihil à Moliniano ſyſtemate diverſus, de quo in hiſce Auxiliorum Con-

greſſibus agebatur. *Hæc enim, ſubjungit Proſper, ipſorum deſinitio ac profeſſio eſt: Omnem quidem hominem Adam peccante, peccaſſe, & neminem per opera ſua, ſed per Dei gratiam regeneratione ſalvari. Univerſis tamen hominibus propitiationem, quæ eſt in Sacramento Sanguinis Chriſti, ſine exceptione eſſe propoſitam; ut quicumque ad fidem & ad Baptiſmum accedere voluerint, ſalvi eſſe poſſint. Qui autem credituri ſunt, quive in ea fide, quæ deinceps per Dei gratiam ſit juvanda, manſuri ſint, præſciſſe ante mundi conſtitutionem Deum; & eos prædeſtinari in Regnum ſuum, quos gratis vocatos, dignos futuros electione, & de hac vita bono fine exceſſuros eſſe præviderit.* Explicatiùs veid præſcientiam boni uſus liberi arbitrii, non nudi quidem, ne quis cavilletur, ſed gratiâ ſaltem verſatili adjuti, ab iisdem Maſſilienſibus poſitam ſcribit, dum addit: *Penè omnium par invenitur & una ſententia, quæ propoſitum & prædeſtinationem Dei ſecundum præſcientiam receperunt: ut ob hoc Deus alios vaſa honoris, alios contumeliæ fecerit, quia finem uniſcujuſque præviderit, & ſub ipſo gratiæ adjutorio, in qua futurus eſet voluntate & actione præſcivit.* In quæ D. Proſperi verba dubio procul intendens Doctor Angelicus 1. p. q. 23. a. 5. cum Pelagianorum errorem in eo ſitum aſſeruiſſet, quod præſentis vitæ merita veluti cauſam rationemque effectûs Prædeſtinationis eſſe futirent; Semipelagianorum ſyſtema in eo poſitum docet, ut Prædeſtinationem ex contentûs humanæ voluntatis præſcientiâ ſuſpenderent; voluntatis, inquam, non nudæ nulloque gratiæ auxilio ſultæ, ſed gratiâ ipſâ, qua homo benè ſit uſurus, adjutæ. *Fuerunt alii, inquit, qui dixerunt quod merita ſequentia prædeſtinationis effectum, ſunt ratio prædeſtinationis: ut intelligatur, quod ideo Deus dat gratiam alicui, & prædeſtinavit ſe ei daturum, quia præſcivit eum benè uſurum gratiâ. Sicut ſi Rex det alicui militi equum, quem ſcit eo benè uſurum.*

Quare & eo ſyſtemate poſito, illuc progreſſus Maſſilienſes obſervat D. Proſper, ut Auguſtini ſententiam ob id præſertim fugillarent, quod præſcientiam illam, uti merum exerrantis ingenii commentum exploderet, nullumque bonum liberi Arbitrii & gratiæ utum vellet, niſi qui ex ipſamet gratia germinaret; ſed integrum prædeſtinationis Myſterium, ex immoto Dei propoſito conſiliove ſuſpenderet. *Hoc autem propoſitum vocationis Dei, quo vel ante mundi initium, vel in ipſa conditione generis humani, eligendorum & rejiciendorum dicitur facta diſcretio, ut ſecundum quod placuit*

placuit Creatori, alii vasa honoris, alii vasa contumeliae sint creati, & lapsis curam resurgendi adimere, & sanctis occasionem teporis asserre: eo quod in utramque partem superfluus labor sit, si neque rejectus ulla industria possit intrare, neque electus ulla negligentia possit excidere. Quoquo enim modo se egerint, non posse aliud erga eos, quam Deus definivit accidere; & sub incerta spe cursum non posse esse constantem; cum si aliud habeat praedestinationis electio, cassa sit adnitentis intentio. Removeri itaque omnem industriam, tollique virtutes, si Dei constitutio humanas praeveniat voluntates; & sub hoc Praedestinationis nomine, fatalem quamdam induci necessitatem, aut diversarum naturarum dici Dominum conditorem, si nemo aliud possit esse quam factus est. Quas quidem argutias Ludovicus Molina contorsit in Augustinum 1. p. q. 23. art. 4. disp. 1. mem. 6. ubi ei maxime vitio vertit, quod sub quadam caligine positus, eam praedestinationis duritiem amovendam non attendisset: quam si S. Doctor, ut ipse quidem autumat, observasset, vocationem ex praescientia uis liberi arbitrii factam esse, sine dubio pronuntiasset.

Rursus, cum Augustinus suam illam, seu verius totius Ecclesiae sententiam, variis Scripturarum Oraculis communiret; & hoc illi vitio dabant Massilienses, quod earum sensum minus feliciter, ac longe aliter quam ceteri superiorum temporum Tractatores exposuerant, attigisset. Cum contra eos, monebat D. Prosper, scripta Beatitudinis tuae validissimis & innumeris testimonis instructa proferimus, ac secundum formam disputationum tuarum, aliquid etiam ipsi quo concludantur adstruimus, obstinationem suam vetustate defendunt: & ea quae de Epistola Apostoli Pauli ad Romanos scribentis, ad manifestationem divinae gratiae praevenientis electorum merita proferuntur, a nullo unquam Ecclesiasticorum ita esse intellecta, ut nunc sentiuntur, affirmant.

Quibus omnibus Massiliensium querelis ac strophis tantum abest ut cesserit sanctissimus Gratiae Vindex, ut potius hanc ipsam gratuitam praedestinationem, cujus occasione lis illi movebatur, uti certam ac perennem Ecclesiae fidem acrius propugnaret iis ipsis in libris, quibus importunos obrectatores exagitavit. Scio, inquit Libro de dono Perseverantiae cap. 19. neminem contra istam praedestinationem, quam secundum Scripturas sanctas defendimus, nisi errando disputare potuisse. Et cap. 23. Praedestinationis huius fidem, quae contra novos haereticos nova sollicitudine nunc defenditur, nusquam Ecclesia Christi non habuit.

Quis ergo non videat, Augustinum causam casuram, litemque Massiliensibus ab Celestino adjudicatum iri, si Praedestinatio gratuita a digestis fidei capitibus indivulsa non esset, sed incurrentibus quaestionibus opinione liberis accenseretur: meritoque sanctissimo Gratiae Vindici succensendum, quod eam uti nostrae fidei caput tenendam venditasset, quam tamen adstruere non erat opus?

Idem de Gratia seipsam efficaci dicendum venit. Massilienses hoc etiam in capite sancto Doctori litem intentasse, quasi qui necessarium modum excessisset, ex altera Hilarii ad Augustinum Epistolam notum est. Cum enim toto passim libro de Corruptione & gratia, internam divinae gratiae energiam atque omnipotentissimam potestatem statuisset Augustinus, quam Deus indeclinabiliter & intuperabiliter in hominum cordibus operatur, non solum veras revelationes, sed etiam bonas voluntates: eoque fine celebrem illam duplicis status distinctionem posuisset, quorum in altero daret Deus bonum posse quod vellent, in altero bonum velle quod possent, atque ut illud delerere invictissime nollent: hoc ipsum pro more rodebant Massilienses, qui gratiam merè versatilem, liberamque arbitrio subditam, quovis in statu fabulabantur. *Molestè ferunt ita dividi gratiam, quae vel tunc primo homini data est, vel nunc omnibus datur, ut ille acceperit perseverantiam, non quàm fieret ut perseveraret, sed sine qua per liberum arbitrium perseverare non posset:* *Nunc verò sanctis in Regnum per gratiam praedestatis, non tale adiutorium perseverantiae detur, sed tale ut eis perseverantia ipsa donetur; non solum ut sine isto dono perseverantes esse non possint, verum etiam ut per hoc donum non nisi perseverantes sint.* His verbis Sanctitatis tuae ita moventur, ut dicant quamdam desperationem hominibus exhiberi. Si enim, aiunt, ita Adam adjutus est, ut stare posset in iustitia, & à iustitia declinare; & nunc ita sancti juvantur, ut declinare non possint, siquidem eam acceperunt volendi perseverantiam, ut aliud velle non possint: vel sic quidam deferuntur, ut aut nec accedant, aut si accesserint & recedant, ad illam voluntatem pertinuisse dicunt exhortationis, vel comminationis utilitatem, quae & persistendi & desistendi obtinebat liberam potestatem; non ad hanc, cui nolle iustitiam inevitabili necessitate conjunctum est: prater illos qui sic concreati sunt his, qui cum universa massa damnati sunt, ut exciperentur per gratiam liberandi. Unde in hoc solo volunt à primo parente omnium distare naturam, ut illum

Lib. de
Corr. &
grat. cap.
11. & 12

illum integris viribus voluntatis juvaret gratia volentem, sine qua perseverare non poterat: hos autem, amissis & perditis viribus, credentes tantum, non solum erigat prostratos, verum etiam suffulciat ambulantes. Caterum quidquidlibet donatum sit predestinatis, id posse & amitti & retineri propria voluntate contendunt. Quod tunc falsum esset, si verum putarent eam quosdam perseverantiam percepisse, ut nisi perseverantes esse non possint.

Hinc Prosper de Massiliensibus exposulabat, quod eorum quidem iudicio, voluntas hominis divina gratia sibi pariat opem, non gratia sibi humanam subiciat voluntatem. Ac inter alia Augustinum precabatur, ut illos eo præsertim in capite eventilaret, ostenderetque, Quomodo per istam præoperantem & cooperantem gratiam, liberum non impediatur arbitrium. Quo certè perspicuum fit, non de quavis internâ gratiâ, sed de victrici ac seipsa efficaci, rem illis cum Augustino fuisse. Ecquis enim credat, Massilienses viros aliâs eruditos ac pios, eò usque potuisse desipere, ut gratiâ versatili liberoque arbitrio subditâ liberum arbitrium lædi crederent, cuius assensu vel dissensu vis ejus omnis ac energia suspensa est? Quocirca plura addere, facile esset, ut gratiam interioris inspirationis, qualem Molina comminiscitur, nedum à Massiliensibus, verum etiam à Pelagianis ultimò tandem agnitam probaremus; nisi eo nos levasset onere Dominicanus Interlocutor, qui Molinianos eo sæpius in Congressibus telo petiit.

Macedo.
Gonetius.
Contento-
nius.
Piccinar-
dus.

Notare hic satis fuerit, non deesse etiamnum Theologos primæ notæ, eosque non paucos, qui Semipelagianos hanc ipsam interioris inspirationis gratiam prævenientem, ad initium bonorum operum, ac ipsius etiam fidei propugnasse, dicant; adstruantque haud levibus argumentis, partim ex Cassiani, Fausti, Gennadii professione, partim ex datis ad Augustinum Epistolis. Ac re ipsa quidem de Massiliensibus ita pronunciat doctissimus Aquitanus: *Nec considerant se gratiam Dei, quam comitem non præviâ volunt esse meritorum, etiam illis voluntatibus subdere, quas ab ea secundum suam phantasiâ non negant esse præventos.* Hilarius verò id ab eis summo consensu positum monet, *Ad nullum opus vel incipiendum, nedum perficiendum, quemquam sibi sufficere posse.* Si quis etiam, seposito partium affectu, Augustinum perpendat iis in libris queis illos exagitavit, compertum habebit, solam illam gratiam ab iis explosam esse, quæ nocere libertati, necessitatem inducere, inutilem denique

correctionem efficere videretur: quæ sanè incommoda nec per umbram patitur interioris inspirationis gratia cujus vis ac potestas ex voluntatis nutu suspensa est. Immò eandem gratiam ad initium fidei à Massiliensibus positam observat cap. 17. de dono Perseverantiæ, qualem ad finalem perseverantiam necessariam fatebantur. *Hi initium fidei, & usque in finem perseverantiam sic in nostra constituunt potestate, ut Dei dona esse non putent, neque ad hæc habenda atque retinenda Deum operari nostras cogitationes & voluntates.* Porro Massilienses interioris inspirationis gratiam ad perseverantiam agnoscebant; nec eam alio sensu in nostra potestate sitam effutiebant, quàm quòd invincibili, insuperabili atque indeclinabili gratiâ nobis à Deo dari pernegarent. Quare D. Augustinus cap. 7. libri hujus, veram Massiliensium hypothesein fore ait, si primævæ integritatis privilegio homines potirentur: quæ certè minùs adhuc vera foret, si interioris inspirationis gratiam respuissent, quam Augustinus statui Innocentiæ necessariam agnovit lib. de Correp. & gratia. *Non est hoc, inquit, omnino in viribus Liberi Arbitrii, quales nunc sunt, fuerat in homine antequam caderet. Post casum autem hominis, non nisi ad gratiam suam voluit pertinere, ut homo accedat ad Deum; neque nisi ad gratiam suam voluit pertinere, ut homo non recedat ab eo.*

Neque movere quemquam potest, quod passim apud Augustinum, Prosperum & Hilarium legere est, contendisse scilicet Massilienses initium fidei à nobis, non ex Dei dono esse; ex Libero Arbitrio sobolescere; nec illud Deum in cordibus nostris operari, sed ex bono naturæ usu proficisci. Quasi verò in hypothese gratiæ interioris, modò versatilis illa sit liberoque Arbitrio subdita, supponi hæc ipsa non possint, ac etiam debeant? Certè Augustinus gratiam anteriorem Adamo atque Angelis datam contendit, auxilium videlicet sine quo bonum velle non possent: & tamen has ipsas loquendi rationes usurpat, de Adamo & Angelis sermonem instituens, ob id unum quòd illos efficaci gratia destitutos contenderet, auxilio nimirum quo Deus in eis operaretur ut vellent. Lib. de Correctione & gratia Cap. 11. *Angeli sancti... per Liberum Arbitrium, per cadentibus aliis idem Liberum Arbitrium steterunt... quòd tunc ita liberum erat, ut bene velle posset & male.* Capite 10. *Per ipsum Liberum Arbitrium in veritate steterunt.* Capite 12. *Per-*
severare

severare & non perseverare in hominis relinquatur arbitrio. Quid ergo vetat Augustinum ejusve discipulos ita de initio fidei, juxta Semipelagianorum hypothese-
sim, pronunciaſſe, tametsi ii internam ad illud gratiam ponerent, ob id videlicet unum, quod eam libero arbitrio subdi-
tam effutirent? Ratio etiam in promptu est. Cum enim interna inspiratio, Dei dono licet immiſſa, non nisi versatilis ſup-
ponatur, nec ipsa ſui tribuat uſum, ſed e contrario eum, quantus quantus eſt, à li-
bero arbitrio emendicet, à quo indiffe-
rentiæ determinationem applicationemque ſortitur, reliquum eſt ut fidei initium arbitrio, ceu primo fonti atque radici, ad-
judicetur.

Quæ cum ita ſint, horum alterum fa-
teri neceſſum eſt: vel gratiam ſeipsa effi-
cacem fidei capitibus à Cœleſtino digeſtis indivulſè cohærere, atque ex illis ſpontè ac liberè fluere, nec quæſtionibus incur-
rentibus opinione liberis adnumerari poſſe: vel certè D. Augustinum neceſſarium diſ-
putationis modum exceſſiſſe, ſiniſtrâ vio-
latae fidei opinione laboraſſe, juſtoque ti-
tulo Maſſilienſium invidiam ſubiſſe. Cum tamen longè aliter Cœleſtinus in datâ ad Gallos Epistolâ ac in ipſâ Capitulorum prolutione definierit.

Sed quid tandem, ſi hæc ipſa Capitula ad criſim vocemus? Res patebit ipſa per ſeſe, gratuitamque Prædeſtinationem ac ipſam efficacem gratiam ingeniâ virtute victricem ex iisdem nullo negotio deri-
vabimus: modò id in antecellum princi-
pii loco poſuerimus, quod fuſius à nobis lib. 3. cap. 8. demonſtratum eſt: Cœleſti-
num non ea duntaxat, quæ iis Capitulis diſtinctè atque expreſſè definiuntur, inter fidei dogmata repoſuiſſe, ſed ea etiam teneri voluiſſe, quæ iis intimè connexa eſſent. *Quod ſi quis*, inquit ille in prolu-
ſione, *non nimium eſt contentioſus, agnoſcat omnium diſputationum connexionem ex hac ſubditarum autoritatum brevitate pendere.*

Ac primo quidem in limine, hanc fi-
dei Regulam ſtatuit Cœleſtinus, ex Inno-
centii ad Synodum Carthaginenſem Epi-
ſtolâ delibata: *In prævaricatione Adæ, omnes homines naturalem poſſibilitatem & innocentiam perdidit; & neminem de pro-
fundo illius ruina per liberum arbitrium poſſe conſurgere, niſi eum gratia miſerentis erexe-
rit.* Non igitur innocentia duntaxat pri-
migeniâ, ſed & naturali poſſibilitate exu-
tus eſt homo; minoresque idcirco vires obtinet in ſtatu naturæ lapſæ, quàm ha-
beret in naturalibus conſtitutus. Quo vel

uno eliſam vides totam illam Molinianæ doctrinæ machinam, de lapſi hominis vi-
ribus, ſeptem propoſitionibus expreſſam, de quibus in decem primis Congreſſibus coram Clemente VIII. habitis quæſtio fuit: ſimulque firmatum vides victri-
cis gratiæ fundamentum, ab Auguſtino millies poſitum, ac tum maximè libro de Corrept. & Gratia capitibus 10. 11. & 12. ubi ex vulnere naturalibus viribus inſlicto, indeclinabilis atque inſuperabilis gratiæ neceſſitatem derivavit.

Illos ſubinde altero Capitulo petit Cœ-
leſtinus, ejusdemque Innocentii authorita-
te configit, *qui putant ſibi deberi quod boni ſint.* En tibi alterum efficaciſ gratiæ fun-
damentum, ab Auguſtino non ſemel uſur-
patum. Da enim, ut & Molina re ipſa dedit, duos homines, eâdem verſatili at-
que indifferenti gratiâ pulſatos, quorum alter, libero benè uſus arbitrio, gratiæ in-
differentiam addito conſenſu determinet, nullo uberiori auxilio percepto, quod bonum illum libertatis uſum atque con-
ſenſum efficaciter operetur, alter verò pro-
tervo reſiſſu caſſam gratiam atque inuti-
lem faciat: prior certè ſibi debet quod bonus eſt, arbitrio, inquam, ſuo, quo gra-
tiæ indifferentiam fixit, ſequè ab altero diſcrevit, ut bonus eſſet; nulloque pacto ſuſceptæ indifferenti atque æquali gratiæ iſtud adſcribet. *Gratia enim*, ut læpiùs inculcat Auguſtinus, *quæ eſt communis bo-
nis & malis non ſecernit bonos à malis.* Pone etiam Molinianam illam legem, de Gra-
tiâ iis omnibus certiffimo pacto conferen-
dâ, qui ex ipſo naturæ penu adniſi fue-
rint, ſuaſque partes ex liberi arbitrii fa-
cultate præſtiterint; ſibi certè debet ho-
mo quod bonus ſit; utpote qui naturæ liberique arbitrii conatibus, gratiam quo bonus fieret, primùm obtinuit.

Tertio Capitulo decernitur, *Neminem etiam Baptiſmatis gratiâ renovatum idoneum eſſe ad ſuperandas diaboli inſidias, & ad evincendas carnis concupiſcentias, niſi per quotidianum adjutorium Dei, perſeverantiam bona converſationis acceperit.* Quod eo In-
nocentii I. oraculo munit: *Neceſſe eſt ut quo auxiliante vincimus, eo iterum non ad-
juvante vincamur.* Qua brevi explicataque definitione, tota illa laſcivientis ingeni-
i ſcœtura, de tentationibus ab homine rena-
to quoad ſubſtantiam ſuperandis, ex ſolis naturæ viribus (qua de re non à deci-
mâ Congregatione coram Clemente diſ-
putabatur) eliſa eſt. Is enim ne quoad ſub-
ſtantiam quidem tentationem ſuperare poteſt, qui tentatione neceſſariò, hoc eſt

infallibiliter vincitur. Et ecce tibi alteram victricis potentiorisque Gratiae basim ab Augustino positam, libro de Correptione & Gratia cap. 12. *Ut cum omnibus amoribus, terroribus, erroribus vincatur hic mundus.*

Quarto aurea hæc sententia ponitur: *Quod nemo nisi per gratiam libero benè utatur arbitrio*; Moliniano systemati è diametro repugnans, primaque Scientiæ-Mediæ, Prædestinationisque meritis nixæ fundamenta suffodiens. Qua etenim sorte, ex præscientia boni usus liberi arbitrii facta vocatio fingitur, si nullus nisi per gratiam esse potest liberi arbitrii bonus usus? Ita planè ex hoc ipso principio colligit Doctor Angelicus 1. p. q. 23. a. 5. & Lectione 3. in caput 9. ad Romanos. De his videsis extremas sub Clemente Congregationes capitibus 41. 42. 43. libri 3.

Quinto ac sexto, ex Epistolis Zozimi & Afrorum Episcoporum Rescriptis variae istæ sententiæ exprimuntur: *Omnia studia & omnia opera ac merita Sanctorum ad Dei gloriam laudesque referenda sunt; quia nemo aliunde ei placet, nisi ex eo quod ipse donaverit. Ita in cordibus hominum, atque in ipso libero operatur arbitrio, ut sancta cogitatio, pium consilium, omnisque motus bonæ voluntatis ex Deo sit. In omnibus actibus, causis, cogitationibus, motibus adjutor & protector exorandus est.* Jam si omnem motum voluntatis humanæ divina gratia operatur; sui igitur usum motumque, quo divinæ inspirationi consentit homo, operetur necesse est. Non igitur homo gratiæ indifferentiam figit, uti victricis gratiæ oppugnatores ariolantur; sed hæc, vice versa, indifferentis versatilisque arbitrii potentiam inflectit, determinatque in partem alteram. Quo gravi efficacissimoque momento, victricis gratiæ necessitatem adstruit Augustinus libro de Gratia & lib. arbit. capite 21. *Agit omnipotens in cordibus hominum etiam motum voluntatis eorum, ut per eos agat quod agere ipse voluerit, qui omnino injustè aliquid velle non novit.* Accedit alterum hoc ipso quinto Capitulo insinuatum, quo Molinæ systema attonsum est: Dei scilicet filios ita Spiritu Dei agi, ut nec nostrum deesse sentiamus arbitrium, & in bonis quibusque voluntatis humana motibus magis illius valere non dubitemus auxilium. Qua parte peccasse Molinam, Congregatione 57. sub Clemente VIII. probatum fuit, ubi potiores partes arbitrio tribuisse convictus est.

Septimo, ex Decretis Concilii Cartha-

ginensis regula ista præfigitur, *Gratiam Dei per Jesum Christum, non propter hoc tantum nos adjuvare ad non peccandum, quia per ipsam nobis revelatur & aperitur intelligentia Mandatorum, ut sciamus quid appetere, quid vitare debeamus: verum etiam per illam nobis præstari, ut quod faciendum cognovimus etiam facere diligamus.* Quo principio nixus D. Augustinus lib. de Gratia Christi cap. 14. ultra gratiam illustrationis nudæque excitationis, quam unam Moliniani profitentur, efficacissimæ ac potentissimæ operationis gratiam derivavit. *Legant ergo & intelligant, intueantur atque fateantur, non lege atque doctrina sonante forinsecus, sed interna atque occulta, mirabili atque ineffabili potestate operari Deum in cordibus hominum, non solum veras revelationes, sed etiam bonas voluntates.*

Octavo, ex publicis Ecclesiæ supplicationibus, queis bona omnia à Deo precatur, decernit, *Totum divini muneris esse.* Atque hoc ipsum est, quod statuerat Augustinus, ut & gratiam efficacem adstrueret, & prædestinationem omnia humanæ voluntatis merita, dispositiones, conatus, conditiones antevertentem tueretur. Lib. 4. ad Bonifacium cap. 9. *Oramus non solum pro nolentibus, verum etiam pro repugnantibus & oppugnantibus. Quid ergo petimus, nisi ut fiant ex nolentibus volentes, ex repugnantibus consentientes, ex oppugnantibus amantes? A quo, nisi ab illo, de quo scriptum est, Preparatur voluntas à Domino? Et alibi: Melius facimus si totum Deo damus, & non illi ex parte & nobis ex parte committamus.* Ruit ergo, non Augustino tantum, sed & Cœlestino iudice, ruinofum illud Molinianæ Concordiæ fundamentum, de Deo & libero arbitrio, causarum, ut loquitur, partialium rationem obtinentibus, in opere justificationis.

Nono, de iis qui ad Baptismum accedunt, hæc regula ponitur: *Sive parvuli, sive juvenes ad regenerationis veniant Sacramentum non prius fontem vitæ adeunt, quam exorcismis & exsufflationibus Clericorum spiritus ab eis abigatur immundus: ut tunc verè appareat quomodo Princeps mundi hujus mittatur foras, & quomodo prius alligetur fortis, & deinde vasa ejus diripiantur, in possessionem translata Victoris, qui captivam ducit captivitatem, & dat dona hominibus.* Unde probatam vides invictam Augustini argumentationem, qua commentitiam puerorum non ablutorum felicitatem à Pelagianis excogitatam exsufflavit: quaque nos etiam lib. 4. cap. 21. idem illud figmentum à Molina secundò procusum, de

de quo in Congregatione 9. sub Clemente verbum exciderat, eventilabimus.

Decimo tandem & ultimo Capitulo, hanc ex statutis regulis summam colligit. *His ergo Ecclesiasticis Regulis, & ex divina sumtis autoritate documentis, ita adjuvante Deo conformati sumus, ut omnium bonorum affectuum atque operum, & omnium studiorum, omniumque virtutum, quibus ab initio fidei ad Deum tenditur, Deum fateamur Autorem: & non dubitemus ab ipsius gratia omnia hominis merita proveniri, per quam sit ut aliquid boni & velle incipiamus & facere. Quo utique auxilio & munere Dei non auferitur liberum arbitrium, sed liberatur, ut de tenebroso lucidum, de pravo rectum, de languido sanum, de imprudente sit providum. Tanta enim erga omnes homines est bonitas Dei, ut nostra velit esse merita, quæ sunt ipsius dona; & pro his quæ largitus est æterna premia sit daturus. Agit quippe in nobis, ut quod vult & velimus & agamus. Nec otiosa in nobis esse patitur, quæ exercenda non negligenda donavit: ut & nos cooperatores simus gratiæ Dei, ac si quid in nobis ex nostra viderimus remissione languescere, ad illum sollicitè recurramus, qui sanat omnes languores nostros, & eripit de interitu vitam nostram, & cui quotidie dicimus, Ne nos inducas in tentationem, sed libera nos à malo. Quo vel uno Capitulo, si vacuo à præjudiciis & partium affectibus animo perpendatur, universam Augustini doctrinam, de gratuitâ prædestinatione, & gratiâ per semetipsam efficaci, accurato compendio contentam, simulque attonsum Molinismum, nemo non dicet. En etenim tibi gratiam affectuum omnium, studiorum & operum operatricem, omniaque merita conatus ac studia antevertentem. En gratiam in animabus nostris agentem ut velimus, non quia volumus, aut consensuri prævidemur. En demum gratiam voluntatis humanæ ducem, non pedissequam: gratiam, inquam, quam pro nutu non flectimus, sed quæ nos pro Dei nutu flectat, ut id omne velimus & agamus, quod ipse voluerit.*

Sed quid hæc scrupulosius moror? Illa ipsa toties decantata Capitulorum clausula, unde Augustinum redactum in ordinem, eaque illius dogmata à positis Regulis omninò dissita putant æmuli obtrectatores, utrumque non leviter adstruit. *Profundiores verò difficilioreque partes incurrentium questionum, quas laus pertractarunt qui hæreticis restiterunt, sicut non audeamus contemnere, ita non necesse habemus adstruere. Quia ad confitendam Dei gratiam,*

cujus operi ac dignationi nihil penitus subtrahendum est, satis sufficere credimus, quidquid secundum prædictas Regulas, Apostolica Sedis nos scripta docuerunt: ut prorsus non opinemur Catholicum quod apparuerit præfixis sententiis esse contrarium. Profectò si divinæ gratiæ operi ac dignationi nihil penitus subtrahendum est, nihil itaque virtutem ejus ac liberalitatem fugit; non meritum, non dispositio, non conditio, non conatus, non ipse tandem liberi arbitrii consensus & usus. Id porro concilia, si potis es, cum hac Molinæ assertionem, quæ totius penè Concordiæ summa est. 1. p. q. 23. disp. 1. Mem. 10. Quod item è duobus qui equali motu gratiæ præveniuntur ac moventur, unus consentiat, concurrat cum Gratia, eliciat actum & convertatur, alter verò non, certè solum provenit ab innata ac propria & intrinseca libertate, iurisque bonis & malis, reprobis & prædestinatis communi. Et paulò infra: Ex eodem capite affirmamus, quod auxilia prævenientis gratiæ efficacia sint, aut inefficacia ad conversionem, pendere ab eodem influxu arbitrio proprio. Quod item unus cum equali auxilio gratiæ prævenientis, aut cum equalibus aliis donis, postquam est justificatus, intensius aut remissius operetur, ferventius aut tepidius; eaque de causa is qui intense ac fervide operatur, dignus efficiatur, cui plura peccata quoad penam dimittantur, & cui tribuantur dona quæ à segnibus auferuntur, utique ab influxu ipsi arbitrio proprio emanat: rationeque illius dicuntur magis aut minus strenuè uti gratia, itemque ea nobis oblata velle uti, aut non uti, adhibendo aut suspendendo talem influxum nobis proprium. En quo pacto, repugnante Cœlestino, hac ipsa in clausula, unde præsidium Moliniani petunt, quod potissimum est, gratiæ operi ac dignationi subtrahunt; quemque adversus Augustinum patronum advocant, turpiter deserunt.

CAPUT QUINTUM.

Petita ex Brevis Pontificio Innocentii XII. Theologis Lovaniensibus inscripto, difficultas eliditur.

AGedum quid adversus lucidissimam veritatem, tot momentis statutam, tot rationibus confirmatam objiciant, perpendamus. Uno se argumento exsolvunt nuperi Moliniani, ac plurimam segetem una falce metunt. Breve Pontificium Innocentii XII. Theologis Lovaniensibus inscriptum die 6. Februarii 1694. de quo

plura diximus lib. 1. cap. 11. aliùs effe-
runt, quo uno rem sibi integram restitu-
tam gloriantur. Hæc illius verba potissi-
mum regerunt initio posita, ut quæstio-
nes in jus vocatas à Coelestini Capitulis
diffitas probent.

*Tradidit nobis mensibus elapsis dilectus fi-
lius JOANNES LIBERTUS HENNEBEL
Epistolam vestram, datam die 7. Maii anni
præteriti, in qua humiliter postulatis, ut hu-
jus S. Sedis auctoritate licitum vobis esset ac
liberum, continuare in tradenda doctrina Ma-
jorum vestrorum, quæ continetur in libro
Censurarum Lovaniensis & Duacensis Uni-
versitatum, unâ cum Apologia Universitatis
Lovaniensis: Et ab eadem destitui doctri-
nam de Gratia per se efficaci, & de Præde-
stinatione ante prævisa merita, nullis hæte-
nus emanatis Apostolicis decretis damnatam
& enervatam esse, eamque proinde posse te-
neri, quousque sancta Sedes ipsa aliter statue-
rit. Quæ in re vestram erga S. Petri Cathedram
observantiam & reverentiam summo-
perè collaudamus. Verum quia, ut S. Celesti-
nus ad Episcopos Gallie rescripsit, profun-
diores difficilioresque partes incurrentium in
materia Divinæ Gratiæ quæstionum, quas la-
tius pertractarunt, qui hæreticis restiterunt,
sicut non audemus contemnere, ita non ne-
cesse habemus adstruere: nec arbitramur op-
portunum ut in præsens habeatur exactior illa
de divinis Auxiliis tractatio, quæ à Præde-
cessoribus nostris Clemente VIII. & Paulo V.
instituta fuit, cum ad confitendum gratiam
Dei, cuius operi ac dignationi nihil penitus
subtrahendum est, satis sufficere credamus
quidquid Apostolica Sedes scripta docuerunt:
Idcirco felicitis recordationis Pauli V. & Ur-
bani VIII. Decretis inherentes, &c.*

Hinc duplex damnum nobis illatum
existimant: Primum, quod videatur In-
nocentius quæstiones de Gratia per se ef-
ficaci & gratuita Prædestinatione, de qui-
bus Doctores Lovanienses quæsierant,
incurrentium quæstionum loco ponere,
quas uti contemnere non est ausus Coele-
stinus, ita nec necesse habuit adstruere.
Secundum, quod videatur exactiorem
Auxiliorum tractationem, sub Clemente
VIII. & Paulo V. institutam parvipen-
dere; simulque innuere, satis abundè di-
vinæ Gratiæ vim adstrui, defendi, expli-
cari, atque à fidelibus credi posse, iis
omissis atque neglectis quæstionibus, quæ
in iis Auxiliorum Congregationibus fue-
rant tanta animorum contentione ventila-
tæ, modò ea firmiter teneantur, quæ nos
Apostolicæ Sedis scripta docuerunt: qua-
si isthæc ab iis longè secernerentur, quæ

sub illis Pontificibus disputata fuerant.

Damnum equidem maximum secutu-
rum fateor, si duo hæc ex Brevis Ponti-
ficio colligerentur: gloriari quippe pos-
sent Molinæ vindices, se nunc, cum nec
etiam id peterent obtinuisse, quod olim
cum id maximè exoptarent, obtinere non
potuerant: scilicet à sancta Sede decerni,
tuam sententiam minimè ad fidem attingere,
aut ipsi adversari; sed eodem veluti gradu
cum adversâ sententiâ reponi, utramque
probabilem pronunciari; atque inter illas
quæstiones ab Innocentio recenteri, quas
nec contemnere nec adstruere opus esset:
cum tamen olim instituta de divinis Auxi-
liis Congregatio Molinæ sententiam non
contempsisset modò, verum etiam gravem
illi Censuræ notam affricuisset. Verum si
res penitus perpendantur, ac singula
Pontificii Rescripti verba ad crism vocen-
tur, nihil huiusmodi quidquam exundi
potest.

Quod etenim primum attinet: id unum
ad difficultatem omnem amovendam, ob-
servare est. Nempe duo distinctè datis
ad Innocentium Epistolis postulaverant
Theologi Lovanienses, uti suo ipso Re-
scripto testatur Pontifex: primum de Cen-
suris Belgicis earumque Apologiâ; alte-
rum de duobus, Gratiæ scilicet per se ef-
ficaci & gratuita Prædestinationis, dog-
matibus. Duplici quæsito duplici Respon-
so satisfacit summus Pontifex, & utrique
quidem separatim atque distinctè, & or-
dine suo. Priori quæsito respondet iis Coe-
lestini verbis: *Profundiores difficilioresque
partes incurrentium quæstionum, quas latius
pertractarunt qui hæreticis restiterunt, sicut
non audemus contemnere, ita non necesse ha-
bemus adstruere.* Quo responso Gratiâ
per se efficacem, & gratuitam Prædesti-
nationem non indigit, nomine incur-
rentium quæstionum; sed alias longè di-
versas, quæ magno numero, ex occasio-
ne & accessione quadam, in eo Belgica-
rum Censurarum Libro, præter illa duo
dogmata ex instituto vindicata, reperiun-
tur: videlicet de pœna puerorum sine
Baptismo decedentium, de Gratiæ suffi-
cientis distributione, de voluntate Dei
antecedente, de ignorantia invincibi-
li, de malis pœnæ à Deo præordi-
natis: ut nihil dicam de inspiratione sen-
tentiarum & verborum Sacræ Scripturæ.
Quæ certè incurrentes quæstiones summo
Pontifici causæ fuerunt, ne totum pro-
miscuè Censurarum Belgicarum librum
expresse probaret, uti Lovanienses Theo-
logi Apostolicæ Sedi supplicabant: satis-
que

que esse ratus est Innocentius, si nec eas adstrueret nec contemneret; uti de incurrentibus veterum Gratiae Propugnatorum quaestionibus dixerat Coelestinus. Quare imis summa miscent, qui eam Pontificii Rescripti partem, de nonnullis quaestionibus in Belgicis Censuris occasione duntaxat delibatis intelligendam, ad eas quaestiones malo animo referunt, quae de industriâ atque ex instituto pertractantur. Haec de primo.

Tum alteri quaesito, de duobus Gratiae per se efficaci & gratuita Praedestinationis quaestionibus teorsim ac distinctè respondet, dum addit: *Nec arbiuramur opportunum, ut in praesens habeatur exactior illa, de divinis Auxiliis tractatio, quae à Praedecessoribus nostris Clemente VIII. & Paulo V. instituta fuit: quia ad confitendam Dei gratiam, cuius operi & dignationi nihil penitus subtrahendum est, satis sufficere credimus, quidquid Apostolica Sedes scripta docuerunt.* Quâ loquendi ratione tantum abest, ut vel parvipendat tractationem illam sub duobus Pontificibus habitam, vel quaestiones ad examen in ea vocatas ab iis dogmatibus secernere velit, quae secundum Sedis Apostolicae scripta (ne quid gratiae operi & dignationi detrahatur) asserenda tenendaque sunt: ut potius ab ea tractatione in praesenti supersedendum arbitretur, quia ad eas, quae inibi tractabantur, quaestiones eliquandas, satis superque sufficiunt, quae nos ea de re Apostolicae Sedis scripta docuere. Quod sanè id ipsum est, quod Thomas de Lemos Scholae Thomisticae publicus Actor, non semel in iis Congressibus contestatus est; satis nempe atque abundè sufficere, quae ab Innocentio I. Zozimo, Coelestino, Leone, Gelasio I. Felice IV. Conciliisque adversus Pelagianos illorumque reliquias celebratis definita fuerant, ut quaestiones in controversiam adductae resolverentur.

Idem ergò Lovaniensi Academiae respondet Innocentius XII. quod quis quaerenti, exempli causâ, de doctrinâ à S. Augustino adversus Pelagianos defensâ, responderet, si vel per otium, vel per injuriam temporum, in tot Librorum à sancto Doctore editorum examen ingredi nollet, aut fortè non posset, *ad internoscendam doctrinam ab Augustino adversus Pelagianos defensam, id sufficere arbitror, quod Conciliorum Africanorum, & Arausicanae ac Valentinae Synodi Canones docuerunt.* Quo dicto, non modo Augustini lucubrationes adversus Pelagianos ador-

natas flocci non faceret, nec earum synodorum canones aliud spirare innueret, quàm quod S. Augustini libris expressum est: immò verius compendiarium Augustinianae doctrinae Synopsim, earum Synodorum Canonibus contineri significaret: quibus scilicet introspectis, universa Augustini doctrina tot libris diffusa, uno intuitu tota conspicitur. Sic Innocentius XII. cum in ea quâ premebatur negotiorum mole, exactiorem illam Auxiliorum tractationem habere non posset, quae tantâ Sedis Apostolicae gloriâ sub Clemente VIII. & Paulo V. fuerat instituta, id unum compendio reposuit: *Ad confitendam Dei gratiam, cuius operi ac dignationi nihil penitus subtrahendum est* (qua de re in Auxiliorum Congregationibus potissimè tractabatur) *satis sufficere credimus quidquid Apostolica Sedes scripta docuerunt.* Id unum videlicet significans, dogmata in iis congressibus controversa, in Innocentii I. Zozimi, Coelestini, Leonis, Gelasii, Felicis Rescriptis compendio contineri: ac de quaestionibus ibidem agitat, satis interim ex iis Apostolicae Sedis definitionibus judicari posse, quid tenere, quid credere debeamus, donec superatâ praesentium injuriâ temporum, plenius ac distinctius de iisdem iudicium promulgetur. Quidni enim id aliquando futurum sperare liceat? Aut cur eam spem bonam nobis adimeret Innocentius XII. Rescriptum Lovaniensibus datum? Quandoquidem vocato ad superos Coelestino, qui ad confitendam Dei gratiam satis sufficere dixerat, quae nos Apostolicae Sedis scripta docuerant (id enim ab illo mutuatus est Innocentius) explicatiores alias de Divina gratiâ definitiones edidit Apostolica Sedes, quae plenius distinctiusque sancita sunt, quae primis illis fidei capitibus à Coelestino digestis summatim continerentur.

Vide lib. 3. cap. 8.

Cæterum hanc nostram interpretationem Brevi Pontificio planè congruere, non id duntaxat evincit, quod ex illius verbis sponte fluat, non longius accersita atque extorta, sed è re nata; verum & alia longè multa fidem illi locupletissimam faciunt.

Primum: quotquot Romanae Curiae formulas norunt, satis exploratum habent, non eos esse summos Pontifices, qui Praedecessorum suorum diligentiam ac zelum, in dogmatibus praesertim eventilandis ac discutiendis, parvipendere soleant; cum contra potissimam gloriæ partem in illorum premendis vestigiis ponendam existi-

ment. At si Innocentius XII. ita de exactiori illa tractatione sub Clemente & Paulo habitâ pronunciaffet, uti pronunciaffe sibi fingunt, qui nobis eo ex capite negotium faceffunt, eorum certè Pontificum zelum ac diligentiam contemiffet: cum eas illi quæftiones integro decennio examinaffent, quod eis ad fidem Catholicam pertinere viderentur.

Alterum: si ideò superfederet Innocentius ab exactiori illa tractatione, quod quæftiones inibi agitatae nihil ad ea dogmata pertinere crederet, quæ fecundum Sedis Apostolicæ scripta tenenda sunt; profectò non ad præfens & ad tempus duntaxat, ut ait, omittenda effiet illa tractatio; fed nusquam in posterum de illa iterum fufcipiendâ cogitandum effiet. Si quidem ftatuto femel fidei Canone, Theologis licitum femper erit, de incurrentibus minoris momenti quæftionibus, pro arbitrio sentire ac difputare.

Tertium: Qui abfonum illum fenfum Brevis Pontificii tribuunt, Innocentio XII. imprudentis animi ac violati juris labem irrogant. Quid enim tam imprudens ac juris legibus pugnans, quàm nullâ præmiſſâ de Divinis Auxiliis tractatione, (uti nullam tunc habitam norunt omnes) ea dogmata opinione libera pronuciare, quæ tanquam fidei capita decennali examine non ita pridem iudicata fuerant. Neque tamen id obiter noto, quafi Molinianæ ſcholæ ſententiam liberæ utcunque diſputationi obnoxiam non agnoſcam, agnoſco planè: at longè alia opinandi libertas eſt ex pronuciato iudicio nata; alia diſputandi ex iudicii dilatione permiſſa interim ac tolerata.

Quartum: Tractationem ſub Clemente & Paulo habitam, non exactam modò, ſed & exactiorem appellat Innocentius: quò ſuam de illa exiſtimationem prodat. illudque pervulgatum effatum, ex quo cauſæ ſuæ præſidium potiſſimum accerſebant victricis Gratiæ defenſores, ſuo calculo munit atque confirmat: *Gratiæ operi ac dignationi nihil penitus ſubtrahendum eſt*: Unde Molinæ cauſa attonſa eſt; gratiæ operi ac dignationi, gratiæ uſum, liberique Arbitrii determinationem ſubtrahentis.

Quintum addere liceat, quod omnem difficultatem abſolvat. Eminentiffimus Cardinalis Hieronimus Caſanate, Romani nominis titulus, ingens latii decus, Senatui populoque Literatorum caput venerandum, ex cujus recenti interitu tantum ſacris Muſis diſpendium accidit, is, inquam Brevis Pontificii præ cæteris dignus inter-

pres audiendus venit, qui in eo adornando Pontifici à ſecretis ac manu fuit. Hunc porrò non ſemel illis indignatum ſenſi, qui tam abſonum ei ſenſum affingerent, ac longè quàm vellet aliter interpretarentur, ut ſcholæ Thomiſticæ, cui Patronus aderat munificentiffimus, importatam injuriam, damnumque illatum effutirent.

Jam verò neminem movere debet Lovanienfium Theologorum ſupplicatio Pontifici facta, quâ ab illo declarari poſtularunt, Gratiæ per ſe efficaciſ & gratuitæ Prædeſtinationis doctrinam, nullis hætenus emanatis Apoſtolicis decretis damnatam aut enervatam eſſe. Non enim id eo conſilio declarari poſtularunt, quaſi ea de re apud ipſos eruditoſque cæteros dubitatio ſubefſet aliqua; ſed ut audax quorundam petulantia Pontificiâ authoritate coaceretur, qui ea dogmata in Janſenii damnatione obliquè petita fabulantur, ſuiſque paſſim alphabetariis inſurrant, ut apud imperitoſ ſcholæ Thomiſticæ invidiam concitent, & Auguſtinum ipſum per Janſenii latus petant. Quin immò, ſi Lovanienfium ſupplicationem cum Pontificio Reſcripto conferamus, erit profectò ubi myſterium demiremur. Quid enim amabo eſt, quòd petentibus illis ut declaretur, duo hæc Thomiſticæ ſcholæ dogmata nullo Eccleſiæ iudicio damnata vel enervata eſſe, nihil eo de iudicio reſpondet Pontifex; nihil de iudicio contra Janſenium, in quo æmuli obtrectatores enervata Thomiſtica dogmata paſſim obtendunt: ſed è contra, de ſolis Auxiliorum Congregationibus ſermonem habet, non eſſe inquiens opportunum ut exactior illa tractatio habeatur? Itane ut in Babelica molitione petenti trullam, cæmentum offertur? Minimè gentium. Sed eo Reſponſo ſignificavit Pontifex, tantum abeſſe, ut eorum dogmatum indemnitati conſulere neceſſe ſit, ut potiùs Auxiliorum Congregationem, ubi tam diligenter diſcuſſa probataque ſunt, ſuſpicere oporteat; cujus eſſet dubio procul ſententia pronucianda, ſi id præſentium temporum opportunitas pateretur.

Hæc pro exponendo Pontificio Reſcripto Lovanienfibus dato abundè ſufficiant. Quæ ſi minùs refractariolis ingeniis ſapiunt, alio nos multòque faciliori reſponſo exſolvemus. Duo nempe eo Reſcripto contineri dicimus; primum, quod ex inſtituto contendit Pontifex, non expedire ſcilicet pendentem de divinis Auxiliis

liis Controversiam definiri ac declarari; quod Lovanienses Theologi precabantur: alterum, quod ex occasione adfertur, uti suscepti ab summo Pontifice consilii ratio, clausula scilicet Cœlestini huic suo argumento accommodata. Certè tametsi quod ex instituto rescribit Pontifex, ad fidei quæstiones attineret, ut in decretalibus & Conciliorum sanctionibus evenit; nulla tamen ratio postularèt, ut rationes atque momenta, ad muniendam fidei definitionem insinuata, religiosum à nobis assensum extorquerent. Audi Melchiorum Canum, Episcopum Canariensem, id eruditè edisserentem lib. 6. de locis cap. 8. ubi Alexandri III. definitionem exponit, capite *Cum esset*, de Testamentis, qua decernit alienum esse à generali Ecclesiæ consuetudine, & à divina Lege, & à Sanctorum Patrum statutis, ut Testamenta nisi quinque vel septem testium fuerint subscriptione munita, penitus rescindantur. *In Decretis Pontificiis duo cum primis distinguenda sunt. Unum est tanquam intentio conclusioque Decreti, alterum quasi ratio & causa à Pontifice reddita ejus rei, quam constituerit. Atqui in Conclusionem Pontifices summi errare nequeunt, si fidei quæstionem è tribunali Apostolico decernant. Sin verò Pontificum rationes necessariae non sunt, ne dicam aptæ, probabiles, idoneæ, in his nihil est videlicet immorandum. Non enim pro causis nos à Pontificibus redditus tanquam pro aris & focis depugnamus. Alexander igitur non definit, consuetudinem illiusmodi esse divinæ legi contrariam, sed quod jurisperitis ferè placere video, jubet ut in legatis piis duo vel tres solum testes à Judicibus exigantur. Hæc Decreti hujus conclusio est, hic finis: nec dubium est quin rem eam Pontifex jure quodam suo potuerit præscribere. Sed si in ejus præscripti confirmationem, Deuteronomii Legge utitur, (hanc quippe divinam nuncupat) si ad Canonum statuta revocat, si Ecclesiæ morem affert, non est opera pretium rationes illas ad vivum resicare. Quemadmodum si Concilia quadam definiant duas esse in Deitate personas, Patrem & Filium, afferantque in hoc illud quoque Geneseos testimonium, Pluit dominus à domino, non protinus in fidei judicio errant, quamvis ex illo loco parum aptè Trinitas comprobetur. Exstat item Synodus, ubi de perpetuâ Maria Virginitate pronunciatum est: eâ re suadendâ referunt Patres portam apud Ezechielem clausam. Irrideat si quis vult, sed ridebit tamen frustra. Non enim semper Patres in fidei quæstione causas afferunt necessarias, sed*

interdum verosimiles. Quod si etiam Pontifices hujusmodi ponendis causis quandoque falluntur, ne calumniandi sunt quidem, tantum abest ut inde loci hujus auctoritas infirmetur. Ita planè eximii & accuratissimi criterii Theologus, idemque Pontificiæ autoritatis vindex strenuus, quem ut splendidum Angelicæ Scholæ jubar suspicio, vixque ulli conferendum. Jam si in ipsis Constitutionibus Decretalibus, Consiliorumque statutis, ubi fidei summa decernitur, rationes ac momenta definitionum, ab ipsis definitionibus ita secernere opus est, ut prioribus facti error subrepere possit, seu falsorum instrumentorum allegatione, seu sinistra sensuum acceptione: quanto magis in Brevis Epistolari, ubi ab edenda definitione consultò temperat, levis aberratio subrepere potuit, Cœlestini clausula perperam accipi, & peregrino argumento accommodari?

Ita respondeant necesse est, qui Baronii, Norisii, Surii, Vossii, Quenellii, Suaresii, Sirmondi, Labbæi sententiam secuti, Cœlestini ad Gallos Epistolam, in hæc verba desinere putant: *Dominus incolumes vos custodiat, fratres charissimi*: Reliqua verò adnexa Capitula Divo Prospero, aut S. Leoni adjudicant. Criticæ lapsus Brevis Epistolaris Editori dubio procul adscribent. Adscribent & ii, qui cum ea Capitula summæ autoritatis esse velint, subjectam tamen de quæstionibus incurrentibus clausulam addititiam existimant, nec nisi longo post tempore Capitulis assutam. Et quidem Codices Manuscripti non pauci, ac nonnulli etiam cusi, missâ clausulâ Capitula referunt. Quin etiam Hincmarus Remensis Archiepiscopus, adversus Remigium Lugdunensem, & Prudentium Tricassinum scribens, recensitis decem Capitulis, clausulam filet; tametsi hæc illius instituto plus fortè conducere, quàm ipsa recensita Capitula: unde non levis suspiciosus bit, hanc à Remensis Bibliothecæ Codicibus abfuisse.

Vide Sirmondi Editionem.

Hæc fusiùs prosequi libuit, ut omnes intelligant, quàm levi quàm futili niterentur argumento, qui objectâ Paulo V. hujusce clausulæ evanidâ specie, judicium de divinæ gratiæ controversiis morari conabantur: utque seri ac succedanei Molinianæ causæ patroni, quibus hoc idem nuper in Belgio recudere libuit, fiduciam deponant, nec se eo deinceps scuto protegant. Jam Historicam narrationem resumimus, ac textrinum ingressi, telam denuò capeffimus, novoque

voque labore redordimur.

CAPUT VI.

Paulus V. meliora Consilia &c.

AD CAP. Pag. 609. lin. 30. post hac verba : Veritas inerit.

At ut ut se res habeat, nihil sales illos, nihil facetias, scommata, dicteria, divinæ gratiæ vindices morantur : sua quoque ab Pelagianis imposita per contumeliam cognomina passum Augustinum satis norunt; *Traducianum* scilicet, ob assertum Originale Peccatum, ex Adamo tractum in posteros, vulgò dictum, seu *Traduciana gentis Primatem*. Libro 1. Operis imperfecti contra Julianum cap. 66. & 76. Quod illi primùm impositum nomen, ab Anniano petulantis ingenii viro, cujus operas Pelagius & Orontius, ad sectam promovendam locarunt; ut ex ejus Epistolâ Nuncupatoria versionis Latinæ Homiliarum D. Joannis Chrysostomi, de laudibus D. Pauli, colligi potest : tum deinceps frequentius ab Juliano per ludibrium decantatum. Cui & familiare præ cæteris erat, S. Augustinum inter disputandum dicteriis prolcindere : *Numidam cetratum, tractatorem pænum, Philosophastrum, pistillo obtusorem, patronum asinorum* vocitare. Ut hinc noveris, quonam ex fonte, insulsa illa dicteriis ludendi & illudendi licentia fluxerit.

Subjunxit &c.

AD CAP. Pag. 668. lin. 24. post hac verba : dignitas postulare.

Scriptorum à Jesuitis ea occasione exhibitorum, de quibus clarissimus Bossutius pronunciavit, primum erat, *Collatio doctrinæ Thomisticae & Calvinianæ*, à Ferdinando de Bastida elaborata, & in publica disputatione coram Paulo V. recitata die 10. Januarii. Hanc extemporaneâ Responsione jam pridem refellerat Thomas de Lemos, hoc ipso solenni congressu, quo primùm à Molinianis producta est; ac tum demum, triplici scripto Pontifici dato, majori otio confutaverat : atque ut par pari referret, Collationem addiderat doctrinæ Molinianæ ac Pelagianæ circa divinam Prædestinationem & Gratiā : qua Propositiones Molinæ triginta tres cum Pelagianis erroribus eadem staterâ appendebantur; additâ singulis, instar antidoti, S. Augustini sententiā, Ecclesiæ judicio consecrata.

Exstat in Lemosii Advers. vol. sig. T. p. 245.

De omnibus fusè dixit doctissimus Bossutius in Judicio Censorio. Lemosii Responsa per omnia probavit, ut solvendis

Bastidæ cavillationibus opportuna. Productis in medium Lutheri & Calvinii assertionibus, Thomistas etiam severiores, ac ipsum quoque Bannesium, in quem potissimum turbo detonuerat, procul ab iis stare ait, tum ex ipsa loquendi ratione, tum in ipsa Doctrinæ, summâ, tum fine ac scopo, quo Gratiā se ipsâ efficacem tuebantur. Bastidam etiam eo maxime nomine fraudis reum habuit, quòd minus sincerâ & integrâ fide utriusque partis sententias retulisset.

Scriptum alterum à Molinæ Actoribus Paulo datum, illud ipsum est, de quo nobis lib. 2. cap. 11. sermo fuit, ad suffraganda quorundam Doctorum Bononiensium suffragia anno 1600. consarcinatum, & à Thoma de Lemos prolixa jam tunc scriptione confutatum, cui titulum fecerant, *Status Controversiæ de efficacia Gratiæ*. Septem veluti partes complectebatur. Prima quatuor statuebat Doctrinæ Capita, de quibus Thomistas inter & Molinianos conveniret. Altera, Thomistarum sententiam exponebat. Tertia, momenta decem, quæ ea refelleretur, exsequiebatur. Quarta, Molinianæ scholæ opinionem repræsentabat. Quinta, quid Theologi de utraque sententiâ pronunciarent, referebat. Sexta, nonnulla derivabat consuetaria. Septima, quorundam Theologorum Bononiensium emendicata suffragia continebat.

In singulas scripti partes Censuram acuit Jacobus Bossutius; totamque lucubrationem ad sublinienda imprudentum Theologorum ora fucatam, multaque cerussâ compositam dixit. Quatuor doctrinæ capita in quibus Molinistæ ac Thomistæ mutuò convenire dicebantur, ambiguo ac versatili sensui obnoxia esse; quin etiam ex illis postrema duo à Molinæ mente longè distare censuit. Scripti consarcinatores in exponenda Thomistica scholæ sententiâ ingentis fallaciæ reos egit; quòd multa illi peregrina supposuissent, iisque pigmentis doctrinam ejus obduxissent; quasi non aliam gratiam, nisi se ipsâ prorsus efficacem agnosceret; dissentienti facultatem Libero Arbitrio efficaci gratiâ moto diffiteretur; idemque auxilii genus ad mala perinde ac bona peragenda desideraret. Decem Momenta quæ Angelica sententia sugillantur, minutatim dispunxit, objectâ non semel importunis accusatoribus fraudis & fallaciæ criminatione. Molinianæ sententiæ expositionem nihilo sinceriores habuit : seu quòd multa verbis ambigu

ac

ac versatilibus involveret, ne virus palam prodiret; seu quod multa complecteretur à Molinæ mente remotissima: quod is novem præsertim Capitibus demonstravit. Confectaria ex statutis assertionibus derivata, eodem hæere luto multis ostendit, totamque rei summam in duodecim Capita digestam in aperto posuit, semota undique larvâ qua fucum facere nitebantur: ac tandem Theologos in Molinianæ sententiæ præsidium, quinto ordine advocatos, nonnullosque Bononiæ Magistros, qui fucatâ utriusque sententiæ expositione decepti, incircumspectè subscripserant, eodem quo cæteros (de quibus mox alterius scripti occasione sermo erit) sale defricuit.

Tertium Scriptum obtulere Moliniani, Thesium farraginem, jam dudum anno 1600. Clementi exhibitam, ac duplici Prædicatorum scripto ex ejusdem jussu confutatam, de quo Libro 2. Capite 10. multa diximus. Has Thesium lascinias, quibus Molinæ assertiones numero quatuor à privatis viris soloque capite censis, defensatæ ferebantur, immiti virgâ excepit Censor æquissimus. Has D. Augustino ac D. Thomæ repugnantes demonstravit: eaque singulari Tractatu in pauca contulit, quæ fusiùs Prædicatores exsecuti fuerant, ad elevandam defensorum Auctoritatem; quos projectis artibus & indecorâ prehensione Jesuitæ redemerant, ut hanc qualemcumque Molinianæ causæ advocacy accommerarent.

Quartum Scriptum à Societatis Oratoribus Paulo V. exhibitum, non aliud ab eo est, quod aliâ ex Clementis VIII. jussu eruditâ Censurâ confixerat Cardinalis Ludovicus Madrucius anno 1599. eo maximè nomine, quod Scholæ Thomisticæ doctrinam, tacitis defensorum nominibus, adulterassent decem Societatis Professores, alienisque coloribus obduxissent; ut nonnullas Academias, Ingolstadiensem scilicet, Græcensem Dilinganam, Wirceburgensem, Moguntinam, Mussipontanam, Trevirensis ac Viennensem occuparent, illarumque suffragia dolo extorquerent. Qua de re legendus venit Liber 2. Cap. 4. ut hinc videas, Molinianos extremo isto conatu nonnisi detritas atque interpolatas merces, Apostolicæ Sedi obtulisse; in quas jam diu Vir meritissimus, primusque hujusce causæ Cognitor ab Apostolica Sede datus, pronunciaverat.

In hanc itaque Scriptionem, (cui titulus erat, *Confutatio cujusdam Sententiæ*

falsæ de efficacia divina gratiæ) severiorem Censuram exercet Jacobus Bossutius. Thomisticæ Sententiæ expositionem dissimulatis Authorum nominibus initio positam, uti spuriam fugillat, & ab Thomistarum mente remotissimam. Quocirca post multa eruditè observata, ita colligit: *Quod si concedamus rejiciendam esse Sententiæ, quam tot fallaciis hi Patres implicarunt potius quam explicarunt; non continuo concederemus rejiciendam esse Sententiæ de Gratia movente activè, propriè, & per consequens determinante.* Tum momenta decem, quibus exposita Sententia confutabatur, minutatim dispungit. Primum, quo Gratia se ipsâ efficax & prædeterminans, atris coloribus expressa, cum Calvinianorum errore conferebatur, duriùs præ cæteris excipit; hancque Censuræ suæ partem, hac brevi observatione concludit. *Constat satis ex superioribus, tantis fallaciis & ambiguitatibus, ne nomen falsitates, implicatam potius quam explicatam, omnino alienam esse à Sententiâ Patrum Dominicanorum. Tantum abest ut ex eis sequatur conclusio, quæ hic ponitur, (nempe cum hæreticorum Doctrina convenire) ut potius sequatur ex animadversionibus & responsis, magnam illis injuriam per hanc Conclusionem irrogari, saltem quantum ad susceptam contra eos Disputationem. Nam in re, nihil contra eos concluditur, propter illa sic aut proposita aut exposita à Patribus Societatis. Cum illorum Sententiæ & libertatem arbitrii perficiat per gratiam, & cum decisionibus Sacri Concilii bene cohereat.*

Cætera quæque momenta ad crisim exigit vir eruditus; absterfo ubique fucò, quo scholæ Angelicæ doctrinam obduxerant, ut incautorum Theologorum nares verberarent. Ac tandem gressum ad ultimum faciens, criminatores malæ fidei postulat, quod hanc extremo tandem loco Thomisticæ sententiæ expositionem dedissent, dignum patellâ operculum, totiusque larvati operis colophonem. *Authores illi (verba sunt criminantium adversæ partis sententiæ exponentium) propterea contendunt, Deum antecedenter omnino prædeterminare illo modo voluntatem ad actum conversionis, quia sibi persuaserunt, Deum ut causam universalem, non aliter cum qualibet causa secundâ contingenti seu libera concurrere ad suum effectum prædeterminando, & prius aliquid imprimendo & efficiendo in illa; quo posito non possit non agere.* A quo quidem errore Angelicæ scholæ Theologos procul abire, multis ostendit.

Ea officii parte exsolutus Bossutius, sermonem ad Theologorum suffragia convertit, qui sententiam tum hoc tum altero superiori scripto atris coloribus expressam, adjecto Chirographo, erroneam dixerant, & in Societatis partes abierant. Quocirca non pauca habet observatione dignissima. Primum nil mirum fore ait, si plures Societatis doctrinæ (quam Semipelagianam pronunciat) albos calculos adjecissent, quod ea sit erroris indoles, ut serpat veluti cancer; quod Arianorum exemplo perspicuum facit. Secundò non succensendum viris fortasse piis & eruditis, si falsa imagine delusi, erroris luto hæreant, quo necdum tempore Ecclesiæ judicio eliquata veritas est; uti planè in hæresi Semipelagiana videre fuit. Quare, nil mirum, addit, sed dolendum, quod Molina, Suares, & alii Patres Societatis omnes egregiè docti, hujus opinionis ab Ecclesiâ profligatæ patrociniū sumserint, aliosque viros doctos habuerint sibi consentientes. Tertiò, nihili faciendum eorum Theologorum suffragium, qui ex præjudicatâ eruditionis ac probitatis opinione, in Societatis studia venerant; & adversæ partis sententiam, uti illis exponebatur, incautâ subscriptione damnaverant, quia eas Academiæ magnâ ex parte Jesuitæ moderabantur, eosque ipsos Theologos Molinianæ sententiæ suffragatores instituerant. Cum ergo, inquit, certum sit, Patres Societatis illarum Academiarum, quarum suffragia proferunt habenas moderari, ibique residere eos Theologos, aut qui sunt de eadem Societate, aut qui à Patribus Societatis hanc Doctrinam hauserant; à quibus etiam Thæseon defensores, quas secundum illorum opiniones defensarunt, didicerunt; non mirum videri debet, si ad illorum sententiam venerunt; quos etiam nomine pietatis & literarum ubique celebres esse perspiciebant. Quare & iis Jesuiticæ Doctrinæ Approbatoribus, dictum illud accommodat D. Prosperi, quo imprudentes Semipelagianæ hæreseos suffragatores ludebat, qui una Magistrorum suorum existimatione concitati, ex sententiâ pronuntiabant: *Simpliciores quique, apud quos magna est horum de contemplatione probitatis reverentia, hoc tutissimum sibi existimant, quod audiunt eos, quorum auctoritatem sine judicio sequuntur, asserere.* Quartò, tantum abesse ait Censor meritiſſimus, ut pauculi illi, & qualescumque Molinianæ causæ suffragatores, præſidio illi esse possint, ut contra potius luculentius ostendant, partem adversam

Approbatorum numero vincere. Quia cum sint penè innumeri Doctores seu Magistri in Theologia in omnibus locis Catholicis, cumque illi qui stant à partibus Patrum Societatis, sint in numero magnum est præjudiciū, eos qui non stant vincere longè majore multitudine. Et secundò apud me mirum est, quod cum hi Patres tot annis conati fuerint emendicare suffragia tot Theologorum, qui sunt in omnibus Academiis Catholicis, tam pauci fuerint reperti sententia illorum assertores. Quintò expungendos omnino censet ex eo Theologorum subscribentium calculo quotquot erant è Societate Professores, qui sub honesto Academiarum nomine aliis Doctoribus permixti, de controversa doctrinâ pronuntiaverant: quod eorum suspecta sint testimonia quæ de se ipsis perhibebant in actione contra illos intentatâ. Sextò, Germanicas illas Academiæ, quarum suffragatione gloriabantur, nihil aliud magna ex parte fuisse monet, quàm ipsorum Jesuitarum Collegia, quæ superbo Academiarum nomine cohonestaverant. Hoc solum dico, inquit, me accepisse, Patres Societatis, in illis partibus, aliquorum Collegiorum derelictorum suscepisse patrociniū, & illa cohonestasse nomine Universitatis, constitutis paucis Professoribus, sive ex sua Societate, sive ex suis discipulis. Septimò, nihil contra germanam Prædicatorum doctrinam extundi posse, quod iis scriptis adversus illos elaboratis suos calculos adjecissent aliqui: Quia per hac testimonia, non improbat absolute sententia Patrum Dominicanorum, sed prout (ait Universitas Ingolstadiensis) vel uti hic (ait Dilingana) refertur: cetera verò Universitates dicunt se improbare sententiam hoc scripto propositam & confutatam. Constat verò ex his, quæ diximus ad res ipsas contentas, tam in primo quàm in tertio, illam sententiam malè fuisse propositam, & pejus refutatam.

Tum demum, breviter eventitatis, nonnullis commendatitiis Epistolis, jam olim ad Clementem VIII. datis, quarum transumpta, hac etiam occasione Paulo V. obtulerant, ut illum quoque eodem ariete pulsarent, censuram omnem his verbis absolvit: *Hæc sunt, Beatissime Pater, quæ mihi visa sunt observanda in scripturis PP. Societatis, quas vestra Sanctitas voluit à nobis examinari. In quibus si vestra Sanctitas reprehendendam judicet, vel obscuritatem in sententiis, vel rigiditatem in his verbis, fraudes, fallaciæ, falsitates, & similibus; primò veniam precabor talium & similium errorum, qui mihi obrepserint: dein-*

Epist. ad
S. Aug.

de respondebo, materialium quæ tractantur difficultates, & studium brevitatis, peperisse talem obscuritatem; rigiditatem vero verborum adhibitam fuisse pro indignatione qua afficior, dum video, tenui meo iudicio, non agi apud vestram Sanctitatem ea fide & candore animi, quem res tam seria, & Sanctitatis vestrae veneratio postularent. Feret etiam patienter vestra Sanctitas lituras & maculas hujus codicilli; quia ætas mea ingravescent, & continua qua torqueor stomachi infirmitas non siverunt, me rursus illum transcribere; ut tersiorem exhiberem vestrae Sanctitati, Quam Deus ad Ecclesiam suam sanctam profectum diu servet incolumem. Vestrae sanctitatis servulus humillimus, F. Jacobus le Bossu Benedictinus ex Cœnobio S. Dionisi in Francia, & Doctor Theologus ex Sorbona Parisiensi. Exstat Autographum in Tabulario Bibliothecæ Angelicæ, Ord. S. Augustini, inter cætera documenta ad causam de Auxiliis spectantia.

Libuit de eo Clarissimi Bossutii iudicio Censorio dicere paulò fusiùs; & quæ ad elevanda Germanicarum Academia- rum suffragia observavit, distinctius adnotare; ut hinc Viri Literarii norint, quàm temerè ea nobis suffragia venditent scriptores Moliniani: quàm fidenter suas illas Academias jactitarit novissimus Actor Rotomagensis, in Thesis die 10. Januarii 1698. Molina Librum Academia- rum undecim iudicio comprobatum effutens, ut incautos superbo Academia- rum nomine terrefaceret. Scholæ siquidem, quas hic tacitis nominibus appellat, Ingolstadiensis, Græcensis, Dilingana, Wirceburgensis, Moguntina, Mussipontana, & Trevirensis, non tam Academia- rum titulo censendæ veniunt, quàm mera Societatis Gymnasia nuncupandæ. Aut certè, si eas honesto Academia- rum nomine insignire lubet, has saltem Academias Jesuitæ moderantur, Theologicas Cathedras occupant, gradus literarios dispensant, omnia pro nutu & arbitrio regunt; ut non tam Theologi affectu liberi, quàm Jesuitæ ipsi, in quos intentata lis erat, pro sua ipsorum sententiâ suffragia tulisse, atque in partem adversam pronunciasse, putandi sint. Ac re quidem ipsa sic factum comperitur: quandoquidem Theologos inter quadraginta & octo, qui iis qualiumcumque Academia- rum iudiciis subscripserunt, triginta & eo amplius è Societate numerare licet, qui arrogato sibi suffragii jure, domesticæ causæ iudicium affectabant: atque etiam, quod festivum magis ac lepidum, dissimulato in Chiro-

graphis tacitoque Jesuiticæ Professionis nomine, ut Romanis oculis faciliùs illuderent. Rem totam ob oculos ponam, & occultæ machinationis vela reducam: ne quis fortè putet, id à me pro arbitrio dictum, ut Academia- rum suffragia licentiùs exsufflarem. Ita quippe te habent publica earum instrumenta, quæ quartum illud scriptum à Jesuitis elaboratum, de quo mox dicebam, sua subscriptione comprobarant.

INSTRUMENTUM ACADEMIÆ INGOLSTADIENSIS.

Exstat in
Tab. Au-
gustin. Ro-
ma.

Nos infra scripti, alma Universitatis Ingolstadiensis Professores Theologi, ad hujus quæstionis discussionem Collegialitèr & specialitèr congregati, matura adhibita consideratione, unanimiter censuimus sententiam istam, de promotione & prædeterminatione voluntatis humana in opere justificationis, prout hic refertur & refutatur, erroneam, & à scholis & Templis procul arcendam.

Petrus Stevartius Academia Ingolstadiensis Professor Theologus, & pro tempore Rector.

Albertus Hungerus ejusdem Academia Professor Theologus, & Procancellarius.

Michael Eiselin Theologia Professor, & hoc tempore Decanus.

Joannes Ripelius Sacra Theologia Doctor, ejusdemque in dicta Universitate Professor.

Jacobus Gretserus Sacra Theologia Professor.

Duos hinc Societatis Theologos habes, Michaellem Eiselinum & Jacobum Gretserum, qui tacita in Chirographis Professione, in causa domestica iudicium exercent, eaque studiosa dissimulatione incautis illudunt.

INSTRUMENTUM ACADEMIÆ GRÆCENSIS.

Nos quoque infra scripti, Sacra Theologia Doctores & Professores Alma Universitatis Græcensis, eandem sententiam hoc scripto propositam & refutatam, Catholica doctrina adversari, atque ab Ecclesia & scholis exterminandam esse, censuimus.

Paulus Henkirchius S. Theologia Doctor & Academia Rector.

Joannes Klein S. Theologia Doctor & Professor & hoc tempore Decanus.

Michael Pollet Doctor S. Theologia.

Joannes Gerottus S. Theologia Professor.

Academia Græcensem, nil nisi Societatis Collegium esse, à Carolo Archidu-

ce Ferdinandi II. Imperatoris Patre erectum, & Academiae titulis ornatum, nota res est. Paulum Heukirchium, Joannem Kleinum, & Joannem Gerottum, Societatis Jesu viros esse, æque constat; tametsi ad fucum faciendum, religiosam Professionem subscribendo reticuerint. De solo Michaele Polleto dubium mihi.

INSTRUMENTUM ACADEMIÆ DILINGANÆ.

Nos quoque Doctores ac Professores Theologiae in Academia Dilingana, Collegialiter congregati, sententiam illam de Gratia prædeterminante, scripti hujus initio propositam, omnino falsam & erroneam, atque ab Ecclesia rejiciendam, & cum nostri temporis heresibus conjunctam, beneque ac solide hoc scripto confutatam existimamus. In quorum fidem nos hic subscripsimus 26. Maii 1599.

Matthias Mairhofer Rector Academiae.

Julius Priscianensis Cancellarius.

Joannes Pelicyus Professor.

Petrus Bacherus Theologiae Professor.

Georgius Thederus Theologiae Professor.

Joannes Saller Theologiae Professor.

Et hi omnes ad unum Jesuitici instituti Viri sunt: quod inter subscribendum de industria silent; ne cæteris stomachum moveant, dum de lite in Societatem suam intentata sententiam ferunt.

INSTRUMENTUM ACADEMIÆ WIRCEBURGENSIS.

Et nos Theologi & Professores Academiae Wirceburgensis, judicamus, sententiam illam de Gratia prædeterminante, uti in hoc scripto refertur, falsam esse; & hoc potissimum tempore à scholis (quod hæreticis non parum faveat) eliminandam.

Eucharis S. Theologiae Doctor & ordinarius Professor; ac ejusdem Facultatis pro tempore Decanus.

Petrus Thyraus S. Theologiae Doctor & ordinarius Professor.

Martinus Becanus S. Theologiae Doctor & Professor ordinarius.

Joannes Pernotus.

Hermannus Sandorpius Studiorum Praefectus.

Nulla omnino demto, latent hic sub larvâ Jesuitæ Senatores, & de gravi supercilio in partem adversam, virgam exerunt, novo atque in hanc diem inaudito jure. Et verò Wirceburgensem sive Herbipolensem Academiam bellorum in-

juriâ collapsam, Societatis tandem Patribus anno 1564. datam esse, illorumque curæ commissam, testatur Andreas Mendo Societatis Jesu Professor, libro de jure Academico quæst. 4. & Jacobi Middelendorpii suffragio confirmat. Herbipolensis Episcopus, ait ille, & Princeps Fridericus Urbem & Provinciam instauraturus, à religione & litteris, quæ una ferè interierant, exordium duxit; & anno 1564. dum adhuc fluctuabat, Societatis Jesu Patres evocavit, illisque juventutem tam in bonis litteris quam pietate & moribus erudiendam instituendamque commisit.

INSTRUMENTUM ACADEMIÆ MOGUNTINÆ.

Et nos inclita Academia Moguntina, Theologi Professores, à Facultatis Theologica Decano convocati, cum privatim singuli scriptum hoc legissemus ac perperdissemus, unanimi consensu judicavimus, Opinionem illam, de divina prædeterminatione voluntatis nostræ, initio propositam & confutatam, inter periculosas, erroneas & temerarias numerandam, meritoque sedis Apostolicæ calculo, videri condemnandam.

Stephanus UMBERUS Episcopus Misiensis Suffraganeus Moguntinus, S. Theologiae Doctor, & Facultatis ejusdem pro tempore Decanus.

Joannes BUSEUS, S. Theologiae Doctor & Professor ordinarius.

Christianus Agricola D. Petri & Pauli Collegiatarum Ecclesiæ Moguntinæ Praepositus & Decanus, Sigillifer Reverendissimi.

Joannes MUSULINIUS S. Theologiae Professor ordinarius.

Albertus de Puteo S. Theologiae Doctor, Aedis D. Albani extra muros Moguntinus Vicarius.

Franciscus Rapedius S. Theologiae Doctor.

Georgius Bademus S. Theologiae Doctor & Studiorum Praefectus.

Thomas Masonius S. Theologiae Doctor, & Professor ordinarius.

Petrus Windus S. Theologiae Professor ordinarius.

Nicolaus Serrarius S. Theologiae Doctor & Professor ordinarius.

Septem hic Societatis Actores in scenam veniunt, qui sepositâ Sodalitii veste, Thomisticae scholæ doctrinam ludunt. Nimirum Joannes Buseus, Joannes Musulinus, Franciscus Rapedius, Georgius Bademus, Thomas Masonius, Petrus Windus, & Nicolaus Serrarius. Academiam Moguntinam nihilisi Societatis suæ scholam esse, monet idem ille: jam à me appellatus Andreas Mendo. Moguntina Academia

Academia instituta anno 1482. à Diethero Isenburgio Archiepiscopo Moguntino, Patribus nostra Societatis Jesu diu tradita est, in eaque Philosophiam, linguarum notitiam & Theologiam edocent.

INSTRUMENTUM ACADEMIÆ TREVIRENSIS.

Nos Decanus & Facultas Universitatis Trevirensis, re proposita diligenterque discussa, tandem conclusimus, hanc sententiam, quæ sequitur Gratiam Dei efficacem contineri propriè divina quadam Prædeterminatione voluntatis humanæ; quæ prædeterminatio sit impressio divina hujusmodi naturæ, ut illa impressione posita & stante in hominis voluntate, non possit homo non converti, sed necessario ex illius impressionis hypothesi, suapte naturâ voluntas hominis convertatur, esse non modo temerariam & periculosam, verum etiam à sacrosancta synodo Tridentina non obscure improbari; ac proinde nunimè in scholis tradendam, aut evulgandam: salvo meliori judicio.

Ego Joannes Macherentinus S. Theologia Doctor, & pro tempore Facultatis Theologica Decanus, subscripsi.

Similiter & ego Ambrosius Carolus, S. Theologia Doctor, & Professor ordinarius, & Præfectus studiorum.

Idem & ego sentio Adrianus vanden Bruele, S. Theologia Doctor ad sanctum Simeonem Canonicus Cathedralis Ecclesiæ Trevirensis, Rector.

Idem & ego Jacobus Fischerus S. Theologia Doctor Canonicus & Cantor S. Mariæ Rolatiolensis.

Similiter & ego Petrus Rossembam Collegii Rector.

Similiter & ego Conradus Hungerus S. Theologia Professor.

Huic Trevirensium judicio, confedere viri è Societate, numero quatuor; Joannes Macherentinus, Ambrosius Carolus, Petrus Rossembam, Conradus Hungerus; tametsi de industria nullam, inter subscribendum, instituti sui mentionem faciant.

Quid plura? hæc ipsa Trevirensis Academia, eâ præsertim ætate temporum, quâ se in istam de divinis auxiliis litem intulit, sub Patrum Societatis curâ degebat. Id ex Jacobo Middendorpio facile colligas, Oputculo de Academiis Christiani Orbis, quod anno 1572. Pio V. Pont. Max. nuncupavit ubi hæc habet Lib. 2. Trevirensis hæc Academia, antiquissima quidem omnium Academicarum Germaniæ esse creditur, sed propter varias ejus

mutationes, temporisque injuriam, ferè collapsam, nuper prudentissimi Archipraefulis Joannis voluntate & munificentia, Domini de Societate Jesu instaurarunt.

Porro quamvis Trevirenses illi Theologi scholæ Thomistica doctrinam de gratia per se efficaci, convertendis peccatoribus necessaria, alienâ larvâ fraudulenter tectam damnarint, iidem tamen veram Thomistarum sententiam fortan ambabus ulnis amplexi fuissent, si sincerè illis esset exhibita. Quin enim eorum saltem nonnulli eandem atque Thomistæ profiterentur sententiam dubitare nos non finit Joannes ille Theodoricus Facultatis Decanus, è vico Macheren in ditione Luxemburgensi Macherentinus dictus. Is enim in Explanatione Catechismi Catholici, autoritate Joannis S. R. I. Electoris & Archiepiscopi Trevirensis edita A. 1599. dum ferverent Romanæ de Auxiliis Congregationes, & A. 1612. eâdem autoritate denuò recognita & aucta; is, inquam, explanans gratiam obtemperandi divinis præceptis, ut loquitur, sic illam exponit ut SS. Augustini & Thomæ discipulum audire te putaveris. Primum enim quid possit natura sine gratia sic explicat: Post peccatum corruptâ naturâ, in vetitum nititur homo, ut sine peculiari Dei auxilio cujusvis potius quàm Dei voluntatem sequatur. Captivus enim tenetur ad voluntatem demonis, conversatur in desideriis & voluntate carnis & cogitationum, quaritque invenire & perficere voluntatem suam. Postmodum agens de Contritione prima pœnitentiæ parte, quærit, quod est verâ ac salutaris pœnitentiæ principium atque origo, sicque respondet: „Divinæ gratiæ operatio cor nostrum ad se convertentis. Unde Apostolus, stolus eos qui veritati contradicunt, modestè corripiendos monet, ne quando (inquit) det illis Deus pœnitentiam ad cognoscendam veritatem, & risipiscant à laqueis diaboli, à quo captivi tenentur ad ipsius voluntatem. Est igitur liberale donum Dei pœnitentiæ, nullis nostris meritis redditum, sed infinitâ Dei misericordiâ, propter nomen suum donatum nobis, juxta Scripturæ Sacræ & Ecclesiæ definitiones. Quæ doctrina ut veræ humilitatis & solidæ pietatis solidum fundamentum retinenda est. Tum explicat varios affectus actusque quibus utitur Deus ut peccatorem ad veram pœnitentiam adducat, illosque appellat divinæ gratiæ adminanda opera, quibus eosdem suavitè Deus disponit, prout scilicet illi placet, qui habet corda nostra in manu sua.

Explic. Orat. Dominice ad Fidei voluntas tua.

2. Tim. 2

Postea sciscitatur, *Quinam communiter inveniuntur gradus ad poenitentiam veram?* Respondet, post primam illam divina gratiae operationem, communiter quinque actibus quasi quinque gradibus ad veram poenitentiam pervenitur. Postque fidem, timorem servilem & spem, Quartus, inquit, vera charitatis, quo propter Deum ipsa peccata displicent. Quintus denique Timoris filialis, quo Deo ultro ob reverentiam ejus, emendationem vitae & satisfactionem prout possumus, offerimus.

Quærit insuper quanta debeat esse contritio, seu dolor ut ad peccati remissionem sufficiat? scilicet in Sacramento & per Sacramentum Poenitentiae, de quo agit. En ut satisfacit quæstioni: Requiritur & sufficit, ut ex vera Dei charitate super omnia emanet, ipsamque habeat conjunctam. Si enim ille animi motus ex aliis, quam Dei amore, procedit, non ad Deum, sed ad illud bonum ducit. Si procedit ex Dei amore, sed non perfecto, non conjungit perfectè.

Dolor iste (inquit) (qui voluntatis est non sensus) & qui odium peccati, detestatio & nolitio dici potest, in poenitente summus esse debet, ut scilicet peccatum præ ceteris omnibus malis detestemur, odio habeamus & nolumus. Quoniam hic dolor respondet amoris charitatis, qui principatum & dominium ita habere debet in corde, ut alia omnia que amantur, minus amentur quam Deus.

Quamobrem hic dolor esse debet integer & verus, sicut verus Dei amor, ut excedat in Dei oculis omnem alium affectum voluntatis &c.

Non otiosè & extra propositum hæc de dolore charitatis referimus: arctissimo enim sibi invicem vinculo connectuntur duo ista veræ conversionis principia, gratiae divinae operatio, & amor charitatis, quibus, isto autore, concipitur, mirabile veræ conversionis opus. Quamobrem æquis plerumque passibus progrediuntur in scholis, gratiae ad conversionem necessariae operandi modus, & dispositio ex parte poenitentis requisita. Molinianæ gratiae modulus iis sufficit qui ex solo gehennæ timore conceptum dolorem unice requirunt; Augustinianæ gratiae validam & efficacem operationem necessariam prædicant, qui dolorem ex amore Dei offensi ortum remissioni peccatorum viam necessariò sternere contendunt: ex istis unum esse Joannem Macherentinum satis superque manifestum faciunt quæ ex eo hæctenus descripsimus.

Idem confirmat quæ apud illum sequuntur de modo ac via rectè agendi Poenitentiam,

Primum, inquit, volentem agere integrè, ante omnia divina bonitati ejusque gratiae inniti oportet, & per humilem instantemque orationem ante omnia gratiam poenitendi sibi à Deo postulare necesse est. Proponenda sunt igitur Sanctorum & Prophetarum orationes, quibus tam instanter illi hoc à Deo postulant, & confitentur se id à seipsis habere non posse. Unde illud Jeremia: *Converte me Domine, & convertar, quia tu Deus meus.* Et quod sequitur est valde considerandum: Postquam enim convertisti me, egi poenitentiam; & postquam ostendisti mihi, percussi foemur meum: confusus sum & erubui, quoniam sustinui opprobrium adolescentiæ meæ. Itaque opus est ut Deus ostendat nobis, quales in peccato simus & qualia sint ipsa peccata: ostendat, inquam, NON TANTUM PROPONENS ANTE OCULOS (en Molinianæ gratiæ agendi modum) Sed etiam AGENS UT consideremus, & ita consideremus ut consideratio penetret voluntatis ipsius intimæ (Ecce efficacem gratiæ Augustiniano-Thomisticæ vim, omnipotentissimamque operationem) Cum ergo (pergit Autor) dicitur per Prophetam peccatrici animæ: *Leva oculos tuos in directum, & vide ubi non prostrata sis; Statim id convertamus in orationem, ut videlicet ipse qui præcipit DET levare oculos & perspicere atque perpendere, quàm longè à Deo per peccatum recedamus.*

Denique quàm potenter in poenitentis corde operetur Deus Justificationis donum, non satis dignè, inquit, commendandum, pluribus expendit. Beatus Augustinus, inquit tanti hoc opus justificationis facit, ut verba illa Christi: *Qui credit in me, opera quæ ego facio ipse faciet, & majora horum faciet, de hoc justificationis opere exponens quod cooperante Deo nos etiam, am facimus.* PRORSUS inquit, majus hoc esse dixerim quàm est coelum & terra, &c. & denique Angelorum creationi, hoc opus ibi conferens: Non, inquit, hic audeo præcipitare sententiam, intelligat, qui potest, judicet qui potest, utrum majus sit justos creare, quàm impios justificare. Certè enim si equalis est utrumque potentia, hoc majoris est misericordiæ.

Quantum verò hoc, ut cum post hoc beneficium inimicos nos constituerimus, rursus nos invitet ad amicitiam & recipiat. & ita trahit, ut nisi traheret nequaquam redire possemus: Nemo venit ad me nisi Pater meus traxerit illum. Merito itaque gloriatur Deus: *Ego sum qui deleo iniquitates tuas propter me.* Itaque qui peccavit se quasi in profundissimam voraginem

Jerem. 31.

Jeremia 3

Tractatus
72. in Jo-
ann. c. 14.

Joann. 6.

Isaia 43.

nem dejectum atque à se ipso precipitatum cogitet & absorptum à vi atque tempestate profundissimi maris, non aliter certè quàm Jonas fuit in ventre ceti. Et ita opus est ut oret & clamet ad Deum pro gratia pœnitentia, sciens quod non possit se magis à peccato excutere, quàm demersus ille ex tanta profunditate potuit emergere... Quibus omnibus (relatis Scripturæ verbis) exhortandi sunt Peccatores & stimulandi ad orandum pro dono pœnitentiæ, & admonendi ut cum ita oraverint etiam agnoscant sibi orandum esse, ut eis hoc gratis à Deo donetur.

Talia qui scripsit veram Thomistarum sententiam proscriptisse, & pro Moliniana suffragium tulisse, credat qui volet; ego certè non credam: nec quisquam puto cordatus homo adduci poterit, ut tam absonæ opinationi consensum præbeat.

INSTRUMENTUM ACADEMIÆ VIENNENSIS.

Nos infra scripti alma Universitatis & Archigymnasi Viennensis Theologi censemus, sententiam initio hujus scripti propositam, & eodem scripto confutatam erroneam esse, nec in Ecclesia Dei tolerandam.

Joannes Pollinger S. Theologiæ Doctor, & pro tempore Academia Viennensis Rector.

Melchior Chelst Episcopatus novæ Civitatis Administrator, nec non Academia Viennensis Cancellarius.

Joannes Montanus Mollensis S. Theologiæ Doctor, ac ejusdem in Academia Professor, & pro tempore Facultatis Theologicæ Decanus.

Joannes Pampelius S. Theologiæ Doctor & Professor primarius, Canonicus Viennensis.

Balthasar Scultetus S. Theologiæ Doctor, Canonicus Custos Cathedralis Ecclesiæ, nec non Curie Episcopalis Viennensis Officialis, & Vicarius generalis.

Laurentius Bruyckeius Bonfamus, S. Theologiæ Doctor & ejusdem Professor in eadem Academia.

Joannem Montanum Mollensem, & Balthasarum Scultetum, Theologicas Societatis Cathedras ea ætate rexisse comperi, factâ per amicos inquisitione. Et hi porro ut vides, institutum ac professionem de industriâ in syngraphis silent.

INSTRUMENTUM ACADEMIÆ MUSSIPONTANÆ IN LOTHARINGIA

Nos infra scripti Academia Mussipontana Theologi & Professores existimamus, Sententiam in hoc scripto propositam & re-

futatam, periculosam & erroneam esse, neque in Ecclesia tolerandam.

Joannes Michaldus, Rector Academia.

Christophorus Brossardus, Cancellarius.

Joannes Vuelefius, Doctor.

Balthasar Chavassius Theologia Professor.

Joannes Castellarius Theologia Professor.

Joannes Bonettus Theologia Professor.

Leonardus Perinus Theologia Professor.

Philippus Moncaus Theologia Professor.

Uno demto Joanne Vuelefio, cujus mihi ignota professio est, cæteros omnes Societatis viros esse, certò liquet. Quin & ipsam Mussipontanam Academiam ab Cardinali à Lotharingia erectam, nil nisi Societatis Collegium esse, Academiae juribus auctum, & graduum conferendorum autoritate donatum, nemo nescit.

E Theologis ergo quadraginta & octo, quorum nomina, iis Academiæ Instrumentis inscribuntur, 35. Societatis Professores habes. Horum quindecim nobis exhibet Societatis Bibliotheca, Principibus permixtos Achivis, occasione scilicet Librorum ab eis editorum; nimirum, Michaellem Eifelin, Jacobum Gretserum, Matthiam Mairhoferum, Julium Priscianensem, Joannem Pelecium, Joannem Sallerum, Balthasarem Chavassium, Leonardum Perinum, Philippum Moncœum, Joannem Macherentinum, Petrum Thyreum, Martinum Becanum, Joannem Buseum, Joannem Mulusinium, Nicolaum Serrarium. Quinque nobis exhibet Sherlogus Societatis scriptor, qui sub Pauli Leonardi nomine, scientiæ mediæ Apologiam elucubravit, uti Societatis viros: videlicet Joannem Pernotum, Hermannum Sandorpium, Franciscum Rapedium, Thomam Masonium & Petrum Uvindum. Cæteros, factâ per amicos inquisitione, Societatem professos esse deprehendimus.

Cæterum quis id legat, nec statim fiduciam demeretur, qua Moliniana scholæ senatores domesticæ causæ judicium sibi arrogabant, & quidem tacitâ ubique in syngraphis Professione Jesuitica, ut pudori consulerent; & ostentato Academiae titulo, ut imprudentibus ora sublinirent, & Romanos magni nominis umbrâ terrefacerent? Erramen de eo juniorum Academiæ suffragio sibi plaudunt boni homines, è quo si Jesuitas præcipuos totius scenæ actores expunxeris, vix intra tredecim

torum subscriptionibus munito, prout exhibemus in Appendice.

Finitis Consultorum &c.

Eadem pag. 670. lin. 4 à fine, sic lege.

Tertia propositiones quinquaginta erroris notabat, quatenus statutis capitibus adversæ erant. Quatuor scilicet priores propositiones configebat, uti capiti primo repugnantes: atque ita ex ordine, octo proximè sequentes, uti secundo capiti adversas proscribebat: tum subinde quinque tertio contrarias: rursus quinque alias quarto oppositas, duodecim quinto, tres sexto, tres iterum septimo, sex octavo, quatuor nono capiti repugnantes erroris notabat.

Lucubrationis eruditionem. &c.

Pag. 671. lin. 26. post hæc verba.

Per omnia Consultores.

Intacto meditatæ Bullæ Proludio, ita de reliquis partibus ab Archiepiscopo Armachano digestis pronunciarunt, datis Sanctitati suæ brevibus observationibus, die 24 Junii, quas in Congregationis Commentarios retulit Coronellus.

A D C A P I T A

doctrina exhibita RR. DD. Consultoribus, cum propositionibus illis contrariis, ex Molina desumptis, Observationes.

1. Censuerunt omnes, doctrinam contentam in dictis Capitibus esse sanam & Catholicam, sed obscure traditam, & præter Mandatum SS. D. N. atque adeò inconsultâ Sanctitate suâ de illa agendum non esse. Quod si S. D. judicabit e re presenti fore, ut doctrina aliqua præponatur Propositionibus condemnandis, illam reducendam esse ad strictiorem & clariorem formam.

2. Observarunt, ex prædictis Propositionibus, aliquas quidem esse Molina, & manifestè erroneas; sed neque in Disputationibus anni 1601. neque in Concertationibus habitis primùm coram felicis recordationis Clemente VIII. postea verò coram S. D. N. Papa Paulo V. fuisse agitata: alias verò esse aliorum Doctorum, quorum opera expurganda commissa non sunt Congregationi. Et idcirco ne ulla justa offensionis occasio detur, utraque omittendas, quousque sua Sanctitas hac de re consulatur.

Videlicet ex Capite primo, priores tres Propositiones: ex Capite secundo, octavam; ex Capite quinto, sextam & octavam: In quarum loco sufficiuntur due ex Dubio proposito à SS. D. N. Papa Paulo V. sub eisdem verbis. Ex Capite sexto omnes: similiter ex Capite septimo.

3. Censuerunt præterea, Propositiones noni Capitis non satisfacere Disputationibus habitis coram S. D. N. in quibus resolutum fuit, Donum Perseverantiae esse singulare & proprium donum Electorum: per illud non solum fieri ut possint perseverare, sed etiam ut non nisi perseverantes sint: & cum ejusmodi dono optimè consistere humani Arbitrii libertatem: doctrinam verò Molina continere tres errores Semipelagianorum iis veritatibus contrarios; atque adeò condemnandam esse sub iisdem terminis, quibus de ea disputatum fuit prout in Actis.

4. Denique censuerunt, nonnullas ex prædictis Propositionibus in scripto traditis, reducendas esse ad meliorem & clariorem formam, videlicet ex secundo Capite primam, secundam, quintam, sextam, & octavam; ex Capite tertio, quintam.

Desiderarent etiam, ut in prioribus quatuor Propositionibus, adderetur verbum, Naturalem. Sed R. D. Rada, putavit per quintam Propositionem satis explicari de quo actu agatur in prioribus. In quarta Capituli quarti addendum, & ut victoria meritum vitæ æternæ contineat. Item ex prima & secunda quinti Capitis, formandam esse unam Propositionem: quartam verò reformandam, & ex ea amovendam omnem equivocationem. Addendam etiam unam propositionem, de duobus equali auxilio vocatis ad fidem & pœnitentiam: hæc enim fuit origo totius Controversiæ. In septima addendum (post verbum, conditioni naturali hominis) aliisque exterioribus circumstantiis. Ex Capite 8. in prima ponendam esse definitionem scientiæ mediæ sub iisdem verbis Molina. In quinta addendum (post vocabulum, beneficiorum) quibus prout veniunt à Domino certissimè liberantur: postea verò addendam illam Propositionem Molina: Deus voluntate absoluta nulli adultorum voluit Beatitudinem, & merita ad eam consequendam necessaria.

Ita sentio ego Archiepiscopus Tranensis, F. Joannes de Rada Episcopus Paëtensis.

Ego F. Julius Sanctucci Episcopus.

Ita sentio ego Lelius Landus Episcopus Neritonensis.

Ita sentio F. Hieronymus Pallantierus Episcopus Bitontinus.

Ita sentio Domnus Anastasius Abbas S. Pauli de Urbe, Secretarius.

Ita sentio F. Joannes Baptista de Plum-bino Ordinis Eremitarum S. Augustini Procurator Generalis.

Ita sentio F. Gregorius Nunnus Coronel, Secretarius.

L

Ita

Ita sentio F. Jacobus le Bossu Doctor Sorbonicus.

Descendit in vota Consultorum Paulus V. Archiepiscopo Armachano data est &c.

Pag. 673. lin. 20. post hæc verba in Appendice, sic lege.

Univerſa hæc ſciſſiſſe Franciſcum Annatum, ſed de indiſtriâ diſſimulaſſe, certum eſt; dum in Informatione de quinque propoſitionibus, quas Epſcopi Galliæ Romano Pontifici ad cenſuram obtulerant, ſuos his verbis Janſeniſtas convenit, pag. 66. N. 59. *Sexto monendi ſunt Janſeniani, non unicam circumferri Bullam ad terminandam controverſiam de Auxiliis compoſitam. Eſt & alia quam alii forte non viderunt, à præcedenti diſſentiſſima. Poſſem uno illis verbo indicare ubinam ſit; ſed exercenda eſt eorum diligentiâ. Inquirant ubi aſſerventur ſcripta Antonii Bovii Epſcopi Melſeteniſis, & Petri Lombardi Archiepſcopi Armachani, qui in huius Controverſiâ diſcuſſione inter Conſultores fuere eruditione & pietate non infimi. Videant num inter illa reperiatur ſcriptum, cui titulus: Tenor Bullæ talis vel ſimilis eſſe poterit. Exordium autem ſubjicitur in hunc modum: Inter alia multa & graviffima &c. Hæc eſt Bulla ſub finem diſputationum compoſita, in qua nullius Propoſitionis damnatio exprimitur; duodecim tantum Articuli divina Gratia definiuntur, excluſo ſemper illo capitali Controverſiæ puncto, de Gratia phyſicè prædeterminante, quod ſcriptor diſerte ſignificat indeciſum eſſe debere, donec Eccleſiæ ſuæ lumen abundantius Dei providentiâ communicaſſet.*

Duplex quidem Pontificii diplomatis ſpecimen, editum ſciſmus: at unicum à ſummo Pontifice ultimò recognitum probatumque: illud nempe quod à venerando Cenſorum Ordine digeſtum fuerat, quodque lati iudicii loco haberi poſteſt, etſi non rati aut legitime promulgati. Alterum ab unico Bovio, cæteris omnibus Cenſoribus diſſentientibus, delineatum oſtendimus; cui nulla idcirco Authoritas ineſt. Tam ergo ridendus venit, qui hoc ultimum oſtentare velit; ac ſi privati cujuſpiam Senatoris ſuffragium, cui ſingularis de agitata lite opinio fuit, ſuperbiùs efferret; & cum adverſo ſupremæ Curiæ iudicio componeret. Turpiùs autem hallucinatur Annatus, dum Petrum Lombardum Archiepſcopum Armachanum, Cenſorum caput,

Antonio Bovio, in eo ſingulari diplomatis ſpecimine elaborando ſocium adiunxit, quem aliis perpetuò ventis enavigaſſe, nemo neſcit. Ac ſua ille pro more figmenta liberaliter vendit.

CAPUT DECIMUM SEXTUM

Illata &c.

Pag. 678. lin. 10. à fine, poſt hæc verba: damnationem meruiſſe.

AD CAPUT 16.

Sic fanè Theologi è Societate primi ſubſellii pronunciarunt: Suaſtom. 1. de gratia, prolegomeno 6. Cap. 2. Vaſques in 1. 2. diſt. 190. Cap. 18. quorum ultimus ſuum illud interpretamentum ab ipſo Franciſco Toletò, Pontificii Diplomatis denuntiatore, ſcripto probatum proſitetur: Senſum huius damnationis, prout à me explicatus eſt, contuli cum Illuſtriſſimo D. Card. Franciſco Toletò, cum adhuc ſacri Palatii Concionator & Theologus eſſet anno Domini 1586. qui ut dixi, pro hac Bulla & damnatione recipienda, Lovanium miſſus fuit: eumque probavit, & germanum eſſe dixit, propriæque manu ſubſcripſit: cujuſ ſubſcriptionis exemplar apud me adhuc eſt.

Hoc idem ultimis. &c.

Pag. 683. lin. 21. à fine, poſt hæc verba: conditi fuiſſent.

AD CAPUT 17.

Ex tabulis etiam Congregationum anno 1606. habitarum ad Pontificium damnationis diploma delineandum, diſcimus, Cenſores omnes ad eas vocatos, communi calculo Canonem hunc edidiſſe: *Dicere quod parvuli, cum poſt iudicii diem reſumpſerint ſua corpora, liberabuntur ſupernaturaliter ab omnibus moleſtiis & ærumnis, quibus in hac mortali vitâ ſubjacemus, melioremque in naturalibus vitam, vitio omni mentis & corporis immunem, in perpetuas æternitates ducent, quàm ullus umquam mortalium duxerit, temerarium eſt, nimiumque accedens ad illum, ab Eccleſiâ Dei errorem ſemper habitum, adeoque in Pelagiano & Celeftiano dogmate condemnatum, quo dicebantur parvuli, etiamſi non baptizentur, adeoque excluſi maneat à Regno Cælorum, æternam ac beatam quamdam vitam, ſed extra cælum habere.*

Quod &c.

Pag. 688. lin. 25. poſt hæc verba:

Lumen clariffimum ſic lege.

Cui illud jure conveniat, quod de Titinio Capitone minor Plinius prædicat: *Vir optimus, & inter præcipua ſeculi ornamenta numerandus. Colit ſtudia, ſtudioſos*

studiosos amat, fovet, provehit, multorumque qui aliqua componunt, portus, sinus, premium, omnium exemplum. Ipsarum denique literarum iam senescentium reductor ac reformator.

Quam &c.

Pag. 699. lin. 18. post hac verba :
latis possint, sic lege.

Octo illa novæ solutionis paradoxa ; de quibus parcam plura dicere, ne cum larvis luctasse, & compositi manes sollicitasse, videri possim.

1. Parvuli Sacro Baptismate non abluti, ad alium providentiæ ordinem attinent. Colligitur ex pag. 48. 14. 29.

2. Peccatum originale non est nisi spoliatio juris ad vitam æternam. Colligitur ex pag. 48.

3. Parvulus solo peccato originali detentus, & ita ex hoc mundo sublatus, nec Deum deseruisse dici potest, nec à Deo desertus ; nec demum perit, nec damnatur. Colligitur ex pag. 98. 114. 118.

4. Parvuli non abluti propriam culpam non habent, immò illibatam habent innocentiam personalem. Colligitur ex pag. 114. 119. 120. 164.

5. Parvulis sine peccato sublati reservatur in alterâ vitâ bona aliqua compensatio pœnarum, quas in præsentī patiuntur : quare nec excluduntur à felicitate naturali. Colligitur ex pag. 48. 118.

6. Parvuli salutari lavacro non abluti eo beneficio donantur, in altera vita ; quod & gratiæ & cœlesti felicitati anteponendum est : nemoque prudens fuerit, qui statum illorum, si daretur optio, non anteponeret suo, cœloque præferret. Colligitur ex pag. 48. 120. 164.

7. S. Augustinus aliter quidem de puerorum sorte pronuntiasset : at nequaquam nobis sublata libertas est, nova systemata procudendi ; cum novis jam armis utendum sit ad Calvinistas & Jansenianos debellandos. Colligitur ex pag. 164.

8. Theologi omnes, uno agmine, parvulos non ablutos, à pœnis sensibilibus eximunt. Colligitur ex pag. 56. 114. 115. 119.

Jam à diverticulo, in quod novus nos accusator deduxerat, ad historiam redeundum.

CAPUT XXII.

Paulus V.

Pag. 704. lin. 2. post hac verba :

fidem monuit.

Susceptum ab Paulo V. consilium,

suos monuit Generalis Societatis Præpositus, die 5. Septembris, missis per Provincias univerlas Encyclicis Epistolis. In negotio de Auxiliis facta est potestas à summo Pontifice, cum disputatoribus, tum Consultoribus, redeundi in Patriam aut domos suas : additumque, fore ut sua Sanctitas declarationem aut determinationem qua expectabatur opportunè promulgaret. Verum ab eodem SS. Domino serió admodum vetitum est, in questione hac pertractanda, ne quis partem suæ oppositam aut qualificaret, aut censurâ quapiam notaret. Ad hac, tam nostris quàm Patribus Dominicanis injunctum, ut severa castigatione plecteretur, quicumque adversus hanc legem deliquisset, quam vult modis omnibus observari. Datum Romæ die 5. Septembris 1607. Claudius Aquaviva.

Hoc idem Prædicatorum Generalem suis denunciaffe, nullus dubito, quamquàm transmissam Epistolam videre non contigit. Non absimiliter Hispanos fidei Quæsitores, Pontificis voluntatem, intra ditionis suæ fines, ac iis maxime locis, ubi fuerat excitatus turbo, significasse certum est ; tametsi significationis Instrumenta frustra quæsierim. Horum unum exhibet Paulus Leonardus in suis Scientiæ mediæ Vindiciis, pag. 15. (Unde injudicatam litem, atque in suspensoduntaxat positam colligas) Illud nempe, quod in Archiepiscopatu Hispalensi promulgatum est.

Nos Inquisitores Apostolici, contra hæreticam pravitatem & apostasiam, in Urbe & Archiepiscopatu Hispalensi, cum Episcopatu Gaditano &c. Scire facimus Provinciales & Prælatos Religionum, & Professores, atque Universitates hujus nostri circuli, SS. Dominum nostrum, circa materiam de Auxiliis divini gratiæ ordinasse, tam Disputatoribus quàm Consultoribus, qui Roma hujus negotii causâ assistebant, ut domum possint reverti ; asserens se opportuno tempore suam evulgaturum determinationem. Interim præcipit cum rigore, ut in tractanda hac Controversiâ nemo audeat alteram censurare partem. Qui secus fecerit graviter punietur. Et sua Beatitude optat hoc ipsius mandatum inviolabiliter observari : & ut omnes abstineant à verbis mordacibus, & quæ malam redolere intentionem valeant. Quamobrem tenore præsentium tollimus quamcumque prohibitionem factam per hoc sanctum Officium, & facultatem præstamus interim, quoad sua Sanctitas resolvat de Controversiâ, ut possint disputare & tractare de præfata materiâ. Et mandamus sub pœnâ Ex-

communicationis majoris, ut nullus audeat censurare contrariam sententiam; nec utatur verbis mordacibus, quæ malam intentionem animo latentem indicare videantur: admonentes, puniendos cum rigore qui aliter fecerint, ut inobedientes Mandato sua Sanctitatis, & hujus sancti Officii. Datum in Castello Triana, die 9. Septembris, anno 1608.

Licentiatuſ Petrus de Camino.

Licentiatuſ D. Antoniuſ de Hozes.

Licentiatuſ Petrus de Villagomez.

Secretariuſ Ferdinanduſ Servicial de Villagomez.

Interea Sodalitii &c.

AD CA-
PUT 10.

Pag. 706. lin. 26. post hæc verba:
censurare partem.

Et paucis interjectis: Facultatem præstamus interim quoad sua Sanctitas resolvat de Controversia, ut possint disputare & tractare de præfata materia.

Pag. 708. lin. 40. post hæc verba:
non sponte fateatur ac probet.

Neque verò id exemplo vacat, ut oratâ inter clarissimos Ordines Controversiâ, instituto causæ examine, fancitoque Judicio, sententiæ promulgatio in aliam tempestatem, certis de causis, missa sit; interim tamen, servandæ pacis studio, caveatur, ne ulla parti ipsi, quæ judicio cecidit, Censura inuratur, donec Apostolicæ Sedis judicium promulgetur, ex formâ juris. Hoc nobis Spondanus subministrat, in Continuatione Annalium Baronii, ad annum 1462. Hoc eodem anno magna Quæstio mota est, inter Fratres Minores & Predicatores de Sanguine Christi in triduo passionis à corpore separato, utrum divinitati unitus perseveraverit? Cum enim apud Brixiam Jacobus Marchianus Ordinis Minorum, die Paschæ sermonem ad populum habens, inter cætera asseruisset, pretiosum Christi Sanguinem, dum triduo illo jacuit in terra sparsus, indignum fuisse latria cultu, quoniam fusus, & à Corpore dominico separatus, hypostaticam verbi unionem protinus amisisset: hoc audiens Inquisitor hæreticæ pravitatis Ordinis Predicatorum, illicò Jacobo præcepit revocare tanquam erronea quæ dixerat, & interim contrariam sententiam per unum è suis predicari fecit. Crescente contentione, & schismate in populo facto, nec valente Episcopo loci tumultum sedare, res ad Apostolicam Sedem remissa est. Quæ de re Pius II. eo tempore summus Pontifex, Præfatis Ordinum mandavit, doctissimos eorum Theologos ad Cu-

riam mittere, quos in festo Natalis Domini audivit disputantes, tribus diebus in Palatio Apostolico, præsentibus Cardinalibus, Episcopis, ac divini & humani juris Doctoribus, qui in Curia erant. Denique post triduum, cum partes quacumque voluissent in medium produxissent, dissoluto auditorio, Pium cum Cardinalibus, plerisque diebus rem tractasse: majorem partem sententiam Predicatorum approbasse, paucos cum Minoribus sensisse: Pium quoque cum majori parte fuisse, sed non esse visum eo tempore decretum fieri declarationis, ne multitudo Minorum, cujus erat contra Turcos prædicatio necessaria, offenderetur; ac propterea in aliud tempus decisionem differri placuit. Quam tamen numquam placuit decidere: sed biennio post Ancona, dum esset navigaturus in Turcos Calendis Augusti 1464. die ante obitum decima quinta, Constitutionem edidit, quæ ad pacem inter illos Ordines, & in universa Ecclesia super hac quæstione conservandam, statuit nulli licere, opinionem negantem Sanguinem Christi, in triduo passionis à Corpore separatum, divinitati unitum permansisse, ut hæreticam proscribere, donec per Sedem Apostolicam, quid in hujusmodi Quæstione sentiendum esset, definiretur. Ita Spondanus.

Exitum haud multò ab similem habuit excitata de divinis Auxiliis Controversia; nisi quòd vulgandæ apostolicæ definitionis fidem, conceptissimis Rescripti sui verbis oppignoravit Paulus quintus; ut eam litem minimè finitam, extremoque Judicio necdum hætenus eliquatam, certissimè colligamus. Is ergo, si lubet, Rescripti verbis se muniant Molinæ vindices, ut Magistri sui sensa à privatorum Censuris tueantur interim: modò tacitè atque in sinu, & surdo gaudio, Pontificis indulgentiâ pertruantur; nec finitam &c.

AD CA-
PUT 20.

Pag. 714. lin. 2. post hæc verba;
meritis adscriberent.

Quis non videat quemadmodum hic error de judicio ubi convictus atque damnatus est, tamquam de victoria gloriatur? Verba sunt Augustini lib. de Gestis Pelagii cap. 29.

Eadem pag. 714. lin. 11. sic lege.

Ex qua cæteras discere, & impotentem exundantis lætitiæ sensum nosse liceat.

Pag. 723. lin. 25. post hæc verba;
favete superi.

AD CA-
PUT 21.

Nobis satis abundè fuerit, ne auctores quidem Societatis Professores Bastidæ palinodiam inficiari. Nam quod duo isti, Abulæ fortasse factum scripserunt, factum

*Apud Pic-
cin. Tom.
3. de Ap-
prob. Doc.
S. Tho.
pag. 137.*

factum omnino profitentur alii ejusdem
Instituti Magistri : quamquam in hoc
conspirent universi , ut quod ægrè de-
derint , sinistris interpretationibus depri-
mant. *Bastida*, inquit Franciscus Oviedo
Controv. 10. Physicorum puncto 3. *Phy-
sicam Prædeterminationem Abula defendit,*
inter Claustra Dominicanorum, in prælectio-
nibus habitis pro laurea doctorali. Scilicet
dolent oculi , dum suum illum Athle-
tam, transfugam tandem ac desertorem,
& in alienis castris merentem vident :
hancque unam refarciendæ jacturæ viam
ineunt, si illum uti projectum doctrinæ
negotiatorem traducant, qui sensus suos
pro varia conditione temporum foenera-
ret. At longè aliter de *Bastida* pronun-
ciabunt, quotquot libero à præjudiciis a-
nimo fuerint. Hunc sanioribus consiliis avo-
catum, & Cardinalis Perronii, quem Parisiis
domuitionem faciens viderat, exemplo per-
motum dicent, ut unà cum illo castra muta-
ret. Nemoque Oviedi diverticulum non ri-
debit qui ne sui Athletæ desertionem, solen-
norem faceret, intra Dominicanorum Clau-
stra conclusit ; quasi prælectiones pro lau-
reâ doctorali capeßenda, in angulis ac
semitâ turbâ, haberi soleant ; ac non po-
tius in totius Academiæ luce, iis testi-
bus & arbitris, qui eruditionis & suffi-
cientiæ judicium ferant.

CAPUT XXVI.

*Objecta Thomæ de Lemos, aliisque non-
nullis Thomistis palinodia confutatur.*

Pandite nunc heliconæ Deæ, dum ani-
lem fabellam remetimur, de decantatâ
post solutas Congregationes ab Lemosio
nostro palinodiâ: fabellam, inquam, tot
ineptiis, mendaciis & anachronismis sca-
tentem, ut mirari omnino subeat, virum
ante paucos dies inventum esse, qui eam
novis etiam ornatam phaleris, otiosis lecto-
ribus recantavit.

Fabulatoribus vexillum pridem erexe-
rat. &c.

*Pag. 726. lin. 18. post hæc verba:
vel invitam pertrahat.*

Pari invidiâ oneratum secutis tempori-
bus vidimus Thomam Turcum, Ordinis
Prædicatorum Præpositum Generalem,
cujus verbum in publicis Thesibus ca-
su emissum, tamquam Oraculum de
sanctiori Cortinâ futum excepere Moli-
niani Professores, ut Thomistis Physica-
rum Prædeterminationum assertoribus

cornua affingerent. Ludis omnibus ac ca-
chinnis digna res est. Theles publicas
anno 1647. Valentia in Generalibus Or-
dinis Comitibus habebat P. Antoninus Regi-
naldus, ingentis tunc spei juvenis, quam
magnis postea virtutibus ac meritis cumu-
lavit. Theologicas assertiones, de reali,
ut vocant, rerum omnium præsentia in
æternitate, deque divinâ futurorum in
decretis cognitione, Thesibus inscripsit,
communem scholæ Thomisticæ senten-
tiam defensurus. Objectis pari ingenii
elegantia & eruditione satisfecit vir reli-
giolus. Finitâ externorum disputantium
collatione, brevem velitationem habuit
Præpositus Generalis, ut Religiosi res-
pondentis vires intimius exploraret ; &
erudito Confessui aliquid ex ipso audire
cupienti, morem gereret. Objecit ergo
Reverendissimus Pater, mutuò secum
pugnare ambas illas assertiones ; aut certè
alterutram abundare : frustra scilicet Dei
decretum desiderari, quo futura videat,
si hæc in æternitatis præsentia cognoscan-
tur : aut contra, frustra hæc in æternita-
tis præsentia cognosci, si in ipso Dei de-
creto videantur.

Respondit eruditus defensor, neutrum
abundare, quin potius alterum ex altero
sequi ; ex decreto scilicet, quo Deus fu-
tura prædefinit, consequens esse, ut hæc
æternitati præsentia fiant. Institit Re-
verendissimus Pater, nunquam inquam
Doctorem Angelicum ad ea decreta con-
fugisse, ut certam futurorum notitiam
Deo vindicaret, sed eam ex una eorum-
dem præsentia in æternitate perpetuò de-
rivasse. Quin & addidit (honoris ambi-
tum, non secus ac eruditionem in defen-
sore probaturus) eum se Magistrum ex-
templò renunciaturum, si vel unum Do-
ctoris Angelici locum daret, ubi divinam
futurorum scientiam ostensurus, ad ea de-
creta confugisset.

Verbum, velut injectam avidis faucibus
offam, vorarunt Moliniani Professores.
Præpositum Generalem, à suis segregem,
ad Moliniana castra transisse conclama-
runt, secutis inde temporibus : utpote
qui in clarissimo Confessu, ac spectante
delibato totius Ordinis flore, D. Tho-
mam procul ab Thomistarum sententiâ ste-
tisse, contestatus esset : quodque ille, obji-
ciendi occasione, ac præter mentem (ut in-
ter disputantes usu venit) opposuerat, uti
certam ejus ac deliberatæ mentis assertio-
nem, libellis ac scriptiunculis evulgarunt.
Neque verò id satis : sed quod is de divi-
no decreto futuris prænotendis inutili
dictita-

dictitarat, ad phycas prædeterminationes præposterè detorsere; quasi eas ille à D. Thoma peregrinas asseruisset, de quibus tota illa disputatione ne verbum quidem exciderat. Eruditissimum Generalem in hæc verba loquentem passim ubique prodidere: *Fateor Prædeterminationes phycas esse doctrinam plurium Thomistarum, sed à S. Thoma longè aberrantium: quibus si mihi ostenderis S. Thomam alicubi favere, promitto tibi Magisterium.*

Verùm incallidè prorsus atque intempestivè in eam fabulam ingressi sunt: ac sicut aliàs nescio quis cunctando restituit rem, ita & isti præcipitando perdiderunt. Necdum enim rebus humanis exemptus erat Reginaldus, qui Theses in eo generali Ordinis confessu defenderat, dum has illi nœnias canerent, & ex Thomæ Turci suffragio sibi plauderent, dissimulato totius disputationis argumento. Idcirco ab Reginaldi Præpositis æstimatum est, è re suâ esse, ut totius rei gestæ seriem secundum juris formulas, & interposito Sacramento testaretur, antequam è vivis excederet; erat enim tunc Reginaldus effata ætate, atque exigua spe vitam trahens. Instrumentum Notarii publicis tabulis inscriptum subjicio; ne viri in omnem vellicandæ scholæ Thomisticæ occasionem intenti, pro more in posterum fabulentur.

NOTUM sit omnibus præsentibus & futuris, quod cum à pluribus annis ex variis Regionibus, Provinciis & Regnis delatum ad nos fuerit, quoddam parum sincerè vulgasse, quod Reverendissimus Pater Thomas Turcus, olim Generalis Ordinis Prædicatorum, in Capitulo generali Valentiae in Hispania anno 1647. in Thesibus propugnatis nomine Provinciae Tholosanæ, die lunæ, post festum Pentecostes, adversus illum qui eas tuebatur arguendo, indicasset S. Thomam in nullo suorum Operum loco favisse sententiæ Prædeterminationem phycam asserenti: Idcirco Nos Prior Conventus Tholosani, Ordinis Prædicatorum, & scire & promulgare omnibus veritatem cupientes, vocavimus R. P. F. Antoninum Reginaldum, tunc temporis in Academia Tholosanâ Professore, quem vocant Conventualem, & nunc in eadem Professore publicum & Regium, qui in præfato Capitulo Valentino pro Provincia Tholosana tuebatur Theses, & inquisivimus ab eo rei gestæ veritatem. Ille verò jam fere septuagenarius, paratum se esse ad dicendam ve-

ritatem, camque Juramento firmandam respondit. Illum ergo adduximus, coram amplissimo & perillustri Domino du Four, Archidiacono Ecclesiæ Cathedralis, & Vicario generali ejusdem Ecclesiæ Tholosanæ, Sede vacante, & coram Notario, & Testibus infra scriptis, ut ibi juratus circa hæc diceret veritatem.

Dixit ergo præfatus P. Reginaldus; anno illo 1647. in Capitulo generali Valentiae in Hispania celebrato, in Thesibus, quas pro Provincia Tholosana tuebatur, ita rem gestam esse. Postquam plures disputassent, Reverendissimus P. Thomas Turcus Generalis assumpsit duas ex Thesibus agitatis, videlicet eam, quam ego P. Reginaldus proposueram, de præsentia reali omnium rerum nobis futurarum in æternitate; alteram de cognitione divinâ futurorum in decretis: & argumentatus est præfatus Reverendissimus contra me, dicens: Quod alterum ex his duobus mediis cognoscendi futura, esset superfluum: si enim Deus cognoscit omnia nobis futura, in reali eorum præsentia in æternitate, superfluit decretum efficax, in quo Deus illa eadem cognoscat: si Deus illa cognoscit in decreto, superfluit illa præsentia realis in æternitate. Respondi, neutrum esse superfluum immò unum sequi ex alio: ex decretis enim sequitur præsentia realis in æternitate. Replicavit Reverendissimus Generalis: Numquam S. Thomas recurrit ad decreta, sed ad præsentiam in æternitate: & si mihi ostendas vel unum locum D. Thomæ, in quo recurrat ad decreta, ex nunc pro tunc creo te Magistrum Theologiæ, contra jura & consuetudinem tuæ Provinciae. Tunc ego Pater Reginaldus, qui ex aliis capitibus noveram, quod P. Reverendissimus Turcus vellet tentare, utrum ambirem Magisterium, respondi: De Magisterio quod offert mihi vestra Reverendissima Paternitas gratias ago: novit vestra Reverendissima Paternitas, nos in nostra Provinciâ non acceptare Magisteria. De locis autem D. Thomæ, vestra Reverendissima Paternitas, alter Thomas, novit illa, nec opus est illa citare. Insurrebant ferè omnes: Cita locum, cita locum, & fies Magister. Ego tamen perstiti in mea sententia. Urgebat Reverendissimus Generalis: Noli mihi adulari; sed ostende mihi locum D. Thomæ, in quo ipse dicat, Deum cognoscere futura in decretis suis, ostende. Perstiti nihilominus in mea Res-

ponse

„ponfione, ne viderer ambire Magiste-
 „rium. Post multa hinc & inde, semper
 „de illa & eadem quaestione, sub finem
 „disputationis dixit mihi Reverendissimus
 „P. Generalis Turcus, explica tuam sen-
 „tentiam.

„Explicavi hoc pacto, dicens: quod
 „cum res non possint de possibilibus fieri
 „futuræ in tempore, nec præsentia reali-
 „ter æternitati, nisi per aliquam causam;
 „& illa causa nulla possit esse alia, quam
 „Deus liberè agens, & has potius quam
 „alias volens esse futuras in tempore, &
 „sibi realiter præsentia, idem prorsus est
 „dicere, quod Deus cognoscat res ut rea-
 „liter præsentia æternitati, & dicere quod
 „illas cognoscat in decretis; quia per de-
 „creta fiunt præsentia æternitati. Quare
 „autem D. Thomas ferè semper recurrat,
 „ad præsentiam rerum in æternitate,
 „quando agit de cognitione, qua Deus
 „cognoscit res nobis futuras, ratio est, quia
 „vult reddere rationem, cur Deus eas
 „cognoscat scientiâ visionis; visio enim
 „corporea debet terminari, ad res præ-
 „sentes; & ideo D. Thomas recurrit ad
 „præsentiam rerum realem in æternitate,
 „quando agit de scientia visionis: quam-
 „vis aliquando, cum non agit de scientia
 „visionis, dicat Deum cognoscere omnia
 „nobis futura, in sua voluntate, ut causâ,
 „nimirum determinatâ per decretum, ut
 „constat ex eodem, in primo contra gen-
 „tes Cap. 67. & 68. & alibi sæpius
 „ubi expressè Divus Thomas dicit, *Deum*
 „*cognoscere ab æterno actus nostros liberos,*
 „*in sua voluntate, ut causâ.*

„His à me dictis, acclamarunt quidam:
 „Citavit locum, fiat Magister. Sed Re-
 „verendissimus Generalis, annuentibus
 „Archiepiscopo & Prorege Aragoniæ,
 „qui aderant, finem disputationi imponi
 „præcepit. Hanc esse veram illius rei
 „narrationem, tactis Sacrosanctis Evange-
 „liis juro, & protestor coram Deo &
 „Sanctis Angelis ejus, in manibus vestris,
 „Amplissime & Perillustis Archidiacone,
 „& Vicari-Generalis, jubente & præsen-
 „te R. P. Joanne Francisco du Four,
 „Ordinis Prædicatorum, Conventus Tho-
 „losani Priore, & Sacræ Theologiæ
 „Professore, præsentibus etiam Notario,
 „& Testibus infra scriptis.

„Unde juro & protestor, ac declaro sub
 „eodem Juramento, falsum esse, quod
 „Reverendissimus P. Generalis dixerit:
 „*Fateor Prædeterminationes Physicas, esse*
 „*doctrinam plurium Thomistarum, sed à*
 „*Sancto Thoma longè aberrantium; quibus*

„*si mihi ostenderis S. Thomam alicubi fave-*
 „*re, promitto tibi Magisterium.* Falsum
 „etiam declaro sub eodem Juramento,
 „eundem dixisse mihi: *Ostende mihi lo-*
 „*cum S. Thomæ, in quo Physicam Præde-*
 „*terminationem defenderit, & ego te crea-*
 „*bo Magistrum in Religione, contra Con-*
 „*stitutiones tuæ Provinciæ.* Falsum sub
 „eodem Juramento declaro, quod alii sic
 „narrant: Reverendissimus P. M. Thomas
 „Turcus, Generalis Ordinis S. Dominici,
 „cum in Capitulo generali Valentie Mense
 „Maio, anno 1647. interesset Disputationi,
 „in qua Hispanus Thomista ex Provincia
 „Tholosana tuebatur physicas Prædetermina-
 „tiones, tanquam à S. Thomæ edoctas, as-
 „sumto argumento Excellentissimi D. Ludo-
 „vici Crespi de Boria Episcopi Placentini,
 „tunc Præpositi Muri-veteris, oppugnantis
 „Prædeterminationes physicas, contendentisque
 „non esse sententiam S. Thomæ: idem cum
 „esset versatissimus in S. Thomæ, semel &
 „iterum dixit: *Ostende mihi locum in quo*
 „*S. Thomas physicam Prædeterminationem*
 „*doceat, & creabo te Magistrum in tua*
 „*Religione, contra Constitutiones tuæ Pro-*
 „*vinciæ: repetendo multoties, Ostende, osten-*
 „*de.* Quatuor Doctores Theologi Universi-
 „tatis Valentie testantur sub Juramento, co-
 „ram Notario, se illa verba audivisse. De-
 „claro itaque hanc narrationem, quantum
 „ad id quod dicit, de Prædeterminatio-
 „ne physicâ, falsam omninò esse. Nullo
 „enim modo agebatur de Prædetermi-
 „natione physica. Sic me Deus adjuvet,
 „& hæc Sancta Dei Evangelia.

Et signatum erat.

F. ANTONINUS REGINALDUS.

„Nos Joannes du Four Presbyter, Ju-
 „rium Doctor, Canonicus, Archidiaconus
 „Ecclesiæ Tholosanæ, nec non Vicarius
 „Generalis dictæ diocesis, Sede vacante,
 „testamur præfatum R. P. Antoninum
 „Reginaldum qui supra, hoc Juramen-
 „tum præstitisse in manibus nostris, præ-
 „sente R. P. Joanne Francisco du Four,
 „Priore Conventus Prædicatorum hujus
 „Civitatis, præsentibus etiam Notario,
 „& Testibus infra scriptis. In cujus rei
 „fidem, his sigillo nostro munitis sub-
 „scripsimus, die 10. Septembris 1674.

Et signatum erat.

Du Four, Vicarius Generalis.

F. Joannes Franciscus du Four, Prior
 Tholosanus.

„Ego Raymundus Dangla Presbyter, &
 „Ecclesiæ Tholosanæ Habitatus, præsens.
 „Ego Jacobus Brousse Presbyter & in Ec-
 „clesia

clesia Tholosana Habitatus, præsens.

Sauvestre Notarius Apostolicus.

Et impressum erat sigillum in cera viridi.

Longè ergo à physicis Prædeterminationibus quæstio aberat. Quamquam etsi quid durius de iis inter arguendum pronuntiasset Præpositus Generalis, quod minùs Thomistæ concoquerent, nemo prudens arguentis ac disputantis verbum, veluti certam ejus atque constantem sententiam accepturus esset. Cæterum quid de iis senserit Thomas Turcus, quid docuerit, meliùs fortè cæteris dixerim, qui Cremonæ in publico Ordinis Musæo legerim dictata ab eo scripta Theologica, hoc ipso de argumento, dum Bononiæ Professore ageret. Sed hanc spartam executus est ante me Eruditissimus ac piissimus Pater Antoninus Massoulié, in *D. Thoma sui interprete*, tom. 2. Dissert. 4. quæst. 3. Art. ult. ubi non pauca ex Apographo, publici scribæ manu recognito defloravit ac publici juris fecit.

Unus forsan &c.

AD CA-
PUT 22.

Pag. 728. lin. 24. post hac verba:
eximiis Commentariis adornasse.

Mirandum immò, tanto nunc pretio apud Molinianos haberi Campanellam, quem non ita pridem curto vix assè licitabantur; jamque uti virum celeberrimum, ab iis ipsis in cœlum efferri, à quibus ante Annos aliquot, tantùm non in culinam detrusus est. *Tametsi visus sit*, inquit *Theophilus Raynaudus*, per aliquod tempus *Cymbalum mundi*, tamen re vera est ignorantissimus; ita ut ne ipsos quidem terminos sive Philosophicos sive Theologicos intelligeret. Sententias autem invexit, non modò à S. Thoma, sed etiam à sensu cujusvis sani hominis adeò abhorrentes, ut desipere potiùs videatur quàm differere. Hæreses crasse in ejus libris tam multa & tam inexcusabiles occurrunt, ut mirum sit adeò pinguem Scriptorem Superioribus annis invenire potuisse laudatores.

Verum nihil &c.

AD CA-
PUT 24.

Pag. 747. lin. 8. post hac verba:
Autorem peccati.

Quis hanc agendi rationem probet? Prudentum enim fuerat, & amicorum (uti non absimili occasione notaverat Hieronymus) post reconciliatam similitudinem, etiam leves suspiciones tegerent: ne quod fortuito fecissent, consultò faceretur reputarentur. Neque enim illos fugisse putandum est, celebratum illud Tullii Cice-

Lib. I. Con-
Rufin.

ronis, in Commentariis caularum, pro T. Gabinio: Ego cum omnes amicitias tuendas semper putavi summâ religione & fide, tum eas maximè quæ essent ex inimicitis revocata in gratiam: propterea quod integris amicitis officium prætermisum imprudentia, vel, ut gravius interpretemur, negligentia excusatione defenditur: post reditum in gratiam, si quid est commissum, id non neglectum, sed violatum putatur; nec imprudentia, sed perfidia assignari solet.

Rei nuncius &c.

Pag. 763. lin. 35. post hac verba:
Claudius Aquaviva.

AD CA-
PUT 26.

Præpositi Generalis Edicto, quo Suaresii systema, eliminato Moliniano, in scholas inducebatur, obtemperarunt Hispani Societatis Theologi, commodique publici rationes, privatis affectibus prætulerunt. Quamquam enim proniori in Molinam animo essent, & in ejus recens inducta paradoxa suoque ingenio propenderent, Suaresium tamen, uti communem doctrinæ Magistrum sequebantur: ita nempe injuriâ temporum postulante, ut si alteri animum, linguam saltem alteri devoverent. Res miraculi loco prope est, quæ vix apud nos fidem inveniat, nisi testem oculatum haberemus, Franciscum Macedo, qui hoc ipso anno 1613. & 1614 in ipso Societatis Instituto Conimbricæ degens, totam illam scenam oculis bibit, testatamque reliquit, tom. 1. Collat. 12. differ. 1. sect. ult. Erat tum in vivis P. Franciscus Suares, summus in omni sacra doctrina vir, recens à Cathedrali primaria Theologia illius clarissima Academia, post annos viginti emeritus Professor: cuius sententiam omnes ferè illi Magistri (Societatis) amplectebantur: nisi quòd ad Fonseca & Molinam, quorum recens erat memoria, magis inclinabant.

Cæterum &c.

Pag. 766. lin. 25. post hac verba:
resistere possent.

AD CA-
PUT 27.

An is excitandæ hujusce controversiæ zelus, & creandæ ob id Prædicatoribus invidiæ studium ardens, S. Ignatii jussis & exemplo respondeant, nil dicam hîc: dicant qui Joannem Petrum Massæum legerint lib. 3. de vita S. Ignatii Cap. 9. Cum Martinus Olavius, inquit ille, qui Collegio Romano annos aliquot magna cum laude præfuit, excellenti vir ingenio doctrinaque, Theses aliquot proposuisset, in quibus caput erat, de Immaculato quod appellant Virginis conceptu, licet ea de re Ignatius

Ignatius pro sua egregia in Deum & Virginem pietate, minime dubitaret: adde, licet in Universitate Parisiensi, juxta aliquorum sententiam, se illum semper propugnaturum jurasset; tamen ne Fratres Dominicani, qui ad disputationem invitabamur, agre ferrent, seque nominatim provocari putarent (contrariam enim sententiam Authore divo Thomâ tuerentur plerique) eam Thesim, quamquam ingemiscite Olavio, expungi tollique omnino imperavit. Ita sanè Societatis Institutor. At uti ad vias Molinismo sternendas, leges ejus de tenenda S. Thomæ doctrinâ concutere necesse fuit; ita in tuendo Molinismo, ejusdem exempla minus æmulari, fuit opus.

In hoc igitur &c.

Pag. 775. lin. 6. à fine post hac verba: palmam obtinuit.

Quæ etiam in dictatis nova pompa exsequitur Theologus Professor, Molinam suum novis phaleris & corollis ornans; fictitiosque triumphos in Belgio, Lusitania, Hispania ac demum Romæ reportatos superbe congerens. De quibus consule Appendicem.

Pag. 776. in fine.

CAPUT ULTIMUM.

Quadragesima in gratiam Scholæ Augustino-Thomistica, adversus Molinianam Præjudicia, ex superiori Auxiliorum Historiâ derivata.

Celeberrimæ Congregationis Historiæ supremâ tandem manu impositâ, brevem in gratiam scholæ Augustino-Thomisticæ, coronidem addimus: iis ex integro opere compendio delibatis, quæ illam juris prærogativâ superiorem certò probent; quæque totidem veritatis à Thomistis assertæ præjudicia, adversus Molinianos cæterosque obrectatores, haberi debeant. Quamquam enim singula seorsum accepta minus fortè causam conficiant; universa tamen simul spectata absolutissimæ demonstrationis instar erunt.

Primum illudque potissimum, in gratiam Angelicæ scholæ, adversus æmulam præjudicium, istud esto, in quod tota hæc collimat Historia. Molinæ causa integro decennio Romæ cognita, septies ad examen vocata, toties suffragiis cadit: Schola Thomistica toties judicio vincit.

2. Academiæ Lovaniensis & Duacensis Lessium & Hamelium Molinismi præ-

formatores Censuris notant; Thomistarum sententiam probant; suffragantibus Belgii Præsulibus, Synodumque parantibus, ut Societatis doctrinam ex Juris formâ configerent.

3. Academia Parisiensis Belgicarum Academiarum judicio annuit, eidemque præluit suis in Joannem de Mercuria districtis Censuris.

4. Lessius gravem à Sixto V. animadversionem subit, quòd summo Lovaniensis Academiæ scandalo, prædestinationem meritis nixam Lovanii docuisset, & Catharini sententiam suscitasset.

5. Prudentium de Monte-major, alterum Molinismi velitem, configit Vallisoleana Inquisitio, probante Academiâ Salmanticensi, unaque sententiam pronunciantem.

6. Gaspar Cardinalis Quiroga, Archiepiscopus Toletanus, ac supremus in Hispania Fidei Quæstor, non pauca doctrinæ capita configit, quæis Molina Concordiam suam respererat: hincque illam extra ejus Jurisdictionis fines cogitur typis edere.

7. Molina Systema suum, quo gratiam cum Libero Arbitrio conciliandam sibi sumit, novum prorsus agnoscit, nulli hactenus notum, alienum ab Augustino, cæterisque Pelagianæ Sectæ debellatoribus impervium.

8. Idem ille Systema suum, quo Gratiam seipsâ efficacem, & prædestinationem decreto per sese infallibili nixam oppugnandam sibi sumit, proscripto jam dudum à Sixto IV. Petri de Rivo Axiomate superstruit: *Quidquid per necessariam consequentiam sequitur ex inimpedibili, illud est inimpedibile & necessarium.* Eo quippe principio nixus Molina, ex gratiis ac decretis seipsis efficacibus Liberrum Arbitrium læsum iri colligit.

9. Molinam ejusque defensores carpit Cardinalis Baronius. Societatis Præpositos monet, ne famam suam in illius defensione periclitari sinant.

10. Molinæ causam Ecclesiæ judicio dimittendam sensent Viri è Societate primæ notæ: quòd excogitatum ab eo novæ Concordiæ Systema, ex unius privati Viri ingenio nata esset.

11. Prædicatorum doctrinæ calculum adjiciunt Theologi è Societate primi subfellii: Molinam suam uti novatorem non pauci exagitant datâ operâ: Cardinalis Bellarminus, purus quidem, non Germanorum additamentis adulteratus; Cardinalis Toletus, Alfonsus Salmero, Benedictus

dictus Perrerus, Henricus Henriques, Joannes Mariana, varii Romani Theologiæ Professores, Joannes Phelippæus, Claudius Typhanius, Dionysius Petavius, Gervartius. &c.

12. Gratuitam Prædestinationem, cui nulla ex nobis conditio aut ratio sit, cui asserendæ potissimum incumbit Thomistica schola, quamque novo impetu infectatur novæ Concordiæ Architectus, adstruunt Deputati omnium Nationum Theologi, ab Generali Præposito Romanam adsciti, ut studiorum Canones præfigant; ac veluti SS. Patrum Hæreseos Pelagianæ debellatorum, summorumque Pontificum dogma, à suis tradendum decernunt.

13. Divi Thomæ Sententiam fatentur esse iidem illi Nationum Deputati, quam modò ejus esse communiter negant Societatis Professores: nempe, *secundas causas esse propriè & univocè instrumenta Dei, & cum operantur, Deum in illas influere primum aut eas movere*. Quod idem fassii sunt etiam Robertus Cardinalis Bellardinus Lib. 4. de Gratia Cap. 16. Franciscus Suares Lib. 1. Concurs. Cap. 11. & in Opere posthumo, de vera intelligentia Auxilii efficacis Cap. 40. Collegium Conimbricense Societatis Jesu Lib. 2. Physic. Cap. 7. Quæst. 13.

14. Sixto V. & Clementi VIII. usque adeò perspectum est, Societatis Professores, nova ista Systemata procudentes, à Doctore Angelico procùl abire, ut ob id maximè Societatis Præpositos moneant, ne Paterna instituta insuper habeant, quin & injunctum illis est, ut D. Thomam uti proprium Doctorem habeant.

15. Jesuitæ Vallisoletani, post susceptam Molinianæ causæ defensionem, in fausto institutæ disputationis exitu commoti, Molinæ Librum tanquam de hæresi suspectum, sacro Inquisitionis Tribunali denunciant; ut hæc saltem speciosa in illum actione, publicam indignationem avertant.

16. Jesuitæ Salmanticenses clarigationis duntaxat jure, Calvinismi Prædicatores incusant, utque Pelagianismi accusationem declinent, quâ primùm ab illis appetiti fuerant: teste Joanne Martinez de Ripalda Societatis Scriptore.

17. E Censuris undeviginti, seu jubente Clemente VIII. seu rogante Generali Hispaniæ fidei Quæsitore, datis in hujusce causæ prologo, unica Prædicatoribus æquè ac Jesuitis incommodat: cæteræ omnes in Molinæ caput pronunciant,

Quatuor quidem, tametsi illum ab hæresi vindicent, novitatis tamen, audaciæ ac temeritatis passim incusant: ejusque doctrinam probabilem dicunt, suâ tamen Prædicatoribus probabilitate servatâ, potiorique jure asserto. Quatuordecim, Prædicatorum doctrinam necessariò certoque tenendam definiunt; Societatis verò Dogmata, uti falsâ, temeraria, scandalosa, erronea, ac etiam hæretica *respectivè* proscribunt.

18. Interdictum de divinis Auxiliis disputandi initio latum, à Clemente VIII. demùm temperatur, daturque disputandi venia; ita tamen ut Prædicatoribus plena concedatur, de gratia scilicet disputandi juxta D. Thomæ mentem; uti hætenus egerant: cùm contra Jesuitis circumscriptione temperetur; ut nimirum eodem de argumento disputent, non ut hætenus egerant, sed modò sanam doctrinam tueantur.

19. Ludovicus Cardinalis Madrutius, primus ab Apostolica Sede Molinianæ causæ Cognitor datus, litem Prædicatoribus adjudicat, Jesuitas suscitati Pelagianismi incusat in privatis documentis, quæ moriens Clementi VIII. tradi jubet.

20. Gregorius de Valentia Molinianæ causæ publicus Actor in Congregationibus Auxiliorum, coram Clemente VIII. profitetur sæpenumero, nolle se Molinæ doctrinam uti probabiliorem tueri, sed solum ut ab hæresi liberam.

21. Multa sibi in Molina non probari, tandem aliquando fatetur Societatis Præpositus, Clementem VIII. alloquens. Quin etiam Indicem expurgatorium à suis paratum ait, quo multa in eo notantur Censurâ digna.

22. Concedunt Societatis Oratores in solenni congressu, modum quo Prædicatores physicam Prædeterminationem exponunt, probabilem videri posse.

23. Prædicatorum doctrinam, quam antea hæreseos incusaverant, admitti tandem, atque uti probabilem dari postulant quàm sæpissimè, tum libellis supplicibus Summo Pontifici datis, tum oblati pacis conditionibus; modò suæ quoque sententiæ probabilitatis jus concedatur.

24. Litem bonâ gratiâ componi sæpiùs rogant, varias compositionis rationes offerunt: adeò scilicet iniquis titulis litigant! Contrà verò, Prædicatores oblatas conditiones constanter repudiant, optimi juris fiduciâ tuti.

25. Commendatitias Epistolas undecumque emendicant, Potentum gratiam &

& præsidium aucupantur; ut quod in suæ doctrinæ eventilatione obtinere ex jure nequeunt, favore extorqueant.

26. Achilles Gagliardi à Societate delegatus, suos excessu peccasse, bonâ fide profitetur, dato Pontifici Libello supplicii, illosque paratos ait, novum à se inventum systema excipere, proscripto Moliniano.

27. Scriptum in quindecim Articulos digestum adornat Clemens VIII. quo suam de controversis quæstionibus mentem obsignat, & Thomisticæ Scholæ partes innumeris S. Augustini testimoniis adstruit; nihil quidem supremâ autoritate sanciens, sed privati Doctoris judicium ferens.

28. Missa in aliud tempus lati judicii promulgatione, quasi extremo subducti periculo triumphant Jesuitæ; publicas lætitiæ significationes edunt, ludos & choreas agunt; Prædicatores ex opposito, audito rei nuncio consternuntur. Quid ita? Nisi quod illi pendentem sententiam sibi adversam præsentiant, isti sibi propitiam certò norint: illi improbo, isti optimo jure litigent?

29. Prædicatores ut mediatum Judicium publicè prodeat, instant sæpè numero, ac repetitis supplicationibus: Jesuitæ, ne prodeat modis omnibus adnuntuntur. Quid ita porro, nisi quid sibi dorso penderet, certò scirent?

30. Cardinalis Perronius, præcipuus Romæ Molinianæ causæ patronus, patriæ tandem redditus contestatur, non ea se periclitanti Societati officia contulisse, quod ejus sententiam probaret magis, cum contrà Thomistis assentiretur; sed quod ita in mandatis haberet ab Henrico IV. Galliarum Rege, cujus nomine Legationem obibat Romæ.

31. Ferdinandus de Bastida eruditissimus Societatis Actor, solutis demum Congregationibus castra mutat, & in Prædicatorum sententiam venit Vallisoleti, in Exercitationibus Academicis, pro gradu litterario obtinendo.

32. Claudius Aquaviva Præpositus Generalis, qui universum penè Ordinem in Molinæ defensionem armaverat, Molinianum tandem Systema à Domesticis scholis solenni decreto proscribit, ut Suarezii temperamentum inducat.

33. Moliniani systematis, de gratia versatili & Libero Arbitrio subditâ, interpretatio, à nonnullis hujus scholæ Professoribus data non ita pridem ac vindicata, ab Innocentio XI. de consilio supremæ Inquisitionis Romanæ proscribitur, Edicto publico.

34. Decretum Capituli generalis Instituti cujuspiam Religiosi, quo statuerant ut Moliniana dogmata de Gratiâ, scientiâ mediâ, & Prædestinatione meritis nixâ, in Provinciâ Belgicâ, ad evitandos nescio quos errores, à suis Professoribus traderentur, ab eadem Romanâ Inquisitione generali rescinditur, & à domesticis Ordinis tabulis expungitur.

35. Augustiniensium Ordo doctrinam de gratuita Prædestinatione, & Gratia se ipsa efficaci, decretis sancit; Molinianam explodit, ac ne à suis doceatur, statuto vetat.

36. Hanc ipsam doctrinam, erroris à nonnullis notatam ac fugillatam, non modò ab injuriâ vindicant Romani Censores sub Innocentio XII. verum etiam communem Patrum sententiam vocant, datâ Censurâ, quam sacer ipse tuendæ fidei Senatus suam facit; atque ut illi subscribat præceps calumniator, Rescripto jubet.

37. Excitatos Ludovico Molinæ triumphos disjicit Remensis Archiepiscopus, latâ Censurâ.

38. Ejusdem de gratia iis conferenda qui solis naturæ viribus adnuntuntur, Sententiam Censorio stigmate inurit Clerus Gallicanus die 4. Septembris 1700.

39. Postrema editio Concordiæ Molinianæ Antverpiæ adornata est anno 1595. multis expunctis quæ in prioribus editionibus ipsi auctori visa sunt magis à probatis Theologorum placitis aliena. At deinceps ab illo anno ad nostra usque tempora nullam ausi sunt Jesuitæ infauftæ Concordiæ editionem procurare, nimirum ex quo tot illius capita nigro lapillo notata sunt à Censoribus Romanis: nec impunè illam hodiernis typis subicere sinerentur Societatis Proceres ipsæque Generalis Præpositus.

40. Ultimi in gratiam doctrinæ Augustino-Thomisticæ Præjudicii loco sit suprema Eminentissimi, doctissimi, piissimi Cardinalis Hieronimi Casanate dispositio, qua, non Patres Jesuitas, sed Patres Dominicanos, bonorum suorum, magnam partem, scripsit hæredes, ut S. Thomæ doctrina ab Augustino hausta ab illis quotidie traderetur, gaudente Roma, approbante Pontifice, plaudente Orbe Catholico.

Si respondere cogitas, noli causam relinquere & in supervacaneis evagari. Eaque dicta sunt intueri: ad ea quæ dicta sunt, non fallaciter eludendo, sed rationabiliter disputando responde. August. Lib. 29. Cont. Gaud. Cap. ultimo.

FINIS HISTORIÆ.

M 2

AD-

ADDENDA

IN APPENDICE

HISTORIÆ CONGREGATIONUM DE AUXILIIS.

Pag. 214. ante numerum XIV.

EPISTOLA JOANNIS ANTONII BOVII

AD PAULUM V.

Quâ suam, de finiendâ Auxiliorum Controversiâ sententiam dicit, à cæteris Censoribus dissentientem.

BEATISSIME PATER.

ET si per alia Scripta Sanctitati vestræ oblata, jam explicavi, quâ facillimâ & optimâ ratione videretur mihi, pro tenui meo iudicio, posse terminari longa hæc & difficilis Controversia; nunc tamen, quia Sanctitas vestra jubet ut sententiam nostram dicamus, eam reducentes ad hæc Capita, videlicet Quænam propositiones videantur definiendæ de fide, quæ condemnandæ; Quid intersit inter horum Catholicorum sententias, & damnatos hæreticorum errores; & An in Bulla Definitionis facienda sit mentio librorum, in quibus propositiones reperiuntur, & Religiosorum Ordinum inter quos fuit hæc Controversia; ut respondeam in terminis, ad quatuor proposita puncta, eodem ordine, non verebor repetere ex his quæ jam dixi in prioribus meis Scripturis, ea quæ ad rem facient, & alia interseram & addam, prout opus esse judicavero; & hæc omnia quàm maximè potero & breviter & dilucidè. Sed antequam propius rem aggrediar, aliqua adnotabo.

Et primò debere omnes Consultores in hoc convenire, circa punctum principale Controversiæ, de prædeterminatione Physica, vel gratiâ congruâ; quòd sicut non potest utraque pars definiri tamquam certa de fide, ita neque utraque pars potest damnari & rejici. Quòd si alicui neutra opinio plenè satisfacit, debet ipse suspendere iudicium, tamquam in re

maximè dubia. Non enim potest unam damnare, donec de altera sit certus, quòd sit vera, & in fide tuta: quia dum unam damnamus, alteram saltem implicite approbamus. Et ratio hujus est, quia in explicando hoc mysterio de Auxiliis efficacibus, quibus à Deo certissime liberantur quicumque liberantur, & de certitudine prædestinationis, an Deus certò cognoverit, quam partem liberè electurus esset homo, ex eo quia sciret, se posse, & velle in eam partem illum physicè prædeterminare; an verò quia viderit in quam partem voluntas à nullo prædeterminata, ipsa seipsam esset, cum iis vel illis Auxiliis, si darentur, determinatura; in hoc, inquam, mysterio explicando, duæ sententiæ sunt, ita & directè & immediate oppositæ, ut neque utraque vera, neque utraque falsa esse possit: sed si una vera est, altera necessario sit falsa. Et e contra, si hæc falsa, illa vera; neque possit dari medium: & hoc fusiùs probavi longiori scripto, quod Sanctitati vestræ jam exhibui. Sed modò non erit opus gravari Sanctitatem vestram, ut ipsum legat; facilè enim id omnes concedent. Certè in disputationibus & consultationibus, audivimus semper id sibi invicem partes concessisse, convenisseque in eo Consultores omnes.

Adnoto secundò, in hoc negotio, sicut in aliis plerisque, aliud esse speculativam disputationem, quid veritatis vel falsitatis, certitudinis vel dubitationis sit in hac vel illa sententia; aliud esse practicam consultationem, quid agendum sit, & qua optimâ ratione liceat, deceat, & expediat controversiam hanc terminari. Neque enim hæc duo coinciderent: sed sæpè contingit admodum diversa esse. Nam, exempli gratiâ, de multis contractibus speculativa quæstio an liceant nec ne, est maximè dubia inter Doctores; practica tamen resolutio, scilicet quod stante speculativo dubio, possit quis in praxi coherere opinioni probabili; & secundum illam ejusmodi contractus sine pec-

peccato celebrare, certissima est; immò verò illemet, qui speculativè non potest capere, quomodo contractus non sit illicitus, potest tamen suam conscientiam conformare sententiæ probabili aliorum tenentium esse licitum, & secundum eam existimare sibi licere, & ejusmodi contractum licitè sine ullo peccato celebrare. In speculativa dispositione debet unusquisque dicere, quod suo ingenio potest capere, & quod sibi videtur verum esse: quidquid sentiant & reclamant alii; in practica verò resolutione, multò plura sunt nobis attendenda. Si enim sint diversa consilia atque sententiæ, cum ad opus deveniendum est, una tamen ex multis potest executioni demandari: & proinde, non solum nostræ, sed aliorum sententiæ rationem habere debemus; reque totâ diligenter examinatâ cum suis circumstantiis, eligere quod hic & nunc omnibus pensatis, factu optimum videatur.

Hoc adnotavi propter meipsum, qui quamvis (ut ingenuè fatear) argumentis quæ contra prædeterminationem fiunt ita convincar, ut capere non valeam, quomodo prædeterminatio possit sustineri, & distingui ab errore Calvinii, in Concilio Tridentino damnato, non audeam tamen omnibus pensatis, & stantibus rebus ut modò stant, practicè consulere Sanctitati vestræ ut eam condemnaret, propter rationes quas infra adducam. Et quia quamvis ego non videam modum & viam quibus defendi possit, hoc tamen scio, posse alios videre quod ego non video. Pari modo (meo quidem iudicio) debent & alii de se humiliter sentire, si videant doctos & multos contrarium tenere, ut non statim condemnent quod ipsi non capiunt, sed sibi persuadeant, posse facile alios capere quod non capiunt ipsi. Hâc modestiâ usus est Sanctus Thomas præ aliis omnibus, qui quam sententiam vidit defendi à catholicis Doctoribus, vix unquam in tam multis suis operibus condemnavit hæresis, aut aliâ gravi censurâ. Licet ipse, inquam, plurimis & gravissimis dogmatibus, ab aliis Doctoribus dissenserit, eosque validissimis rationibus impugnaverit. Ut certè & miranda & dolenda sit nostrorum temporum, præcipuè in Hispaniis, licentia quâ sibi quisquis præsumit aliorum Catholicorum sententiis temeritatis aut hæresis notam inurere. Et iis præmissis.

Ad primum & secundum punctum,

Quæ propositiones definiendæ tamquam de fide, & quæ damnandæ, dico meam sententiam esse (quam tamen saniori iudicio & correctioni Sanctitatis vestræ humiliter subjicio) quod neque opus sit, neque deceat, neque expediat, stantibus rebus ut stant, hanc sanctam Sedem determinare principalem quæstionem de efficacia gratiæ & certitudine prædestinationis, An sit per physicam prædeterminationem, an verò per auxilia congrua, alteramque partem tamquam de fide certam definire, alteram verò damnare. Porro rationes quæ me ad hoc sentiendum adducunt, hæ sunt.

Quia sicut pro certo habeo expetere omnes bonos quod Sanctitas vestra summo studio desiderat, summâque diligentia procurat, ut scilicet quamprimum controversiæ istæ terminentur, tollanturque omnes contentionum occasiones, non enim potest non afferre maximum damnum Reipublicæ Christianæ, quod duo in Ecclesia Dei, & doctrinâ & pietate præcipui Religiosorum Ordines (qui mutuis auxiliis, & conjunctis viribus debent contra communes hostes, hæreticos depugnare) civilibus inter se armis decertent, & alter alterum minus sanæ in fide doctrinæ reprehendat; ita etiam mihi persuadeo, Sanctitatem vestram pro sua singulari prudentia videre, quanto pere sit pro communi Ecclesiæ bono optandum omnibus & curandum, ut (si fieri possit) servato utriusque partis honore & existimatione res componantur. Est enim magna in Ecclesia Dei auctoritas scholæ Theologicæ, quæ cum in hac controversia in duas partes sit divisa: vix etenim est mediocris ullus Theologus, nulla certè est Academia, quæ in unam harum sententiarum non descenderit; non potest sententia seu hujus, seu illius partis damnari, quin dimidia scholastica schola errasse dicatur, quæ ideo magnum auctoritatis detrimentum pateretur, cum tamen eam & deceat & expediat à Romano Pontifice pro viribus sustineri; quoniam habet magnam vim, & plurimum prodest Ecclesiæ Dei ad res fidei probandas, declarandas & confirmandas, Hæreticosque convincendos.

Addo alteram harum Religionum, eam esse quæ pleraque negotia fidei nostræ & sanctæ Inquisitionis contra hæreticam pravitatem pertractat. Alteram verò esse quæ in plerisque Regionibus, Angliâ, Belgio, Germaniâ, Galliâ, Bohemiâ, Poloniâ, Hungariâ, totoque ferè

Septentrione contra hostes fidei decertat, & hæreticorum impetum sustinet: cujusque disputationibus, concionibus, doctrinâ, operâ, continentur in Fide Catholica earum Provinciarum incolæ. Ideoque nemo est qui non videat curandum modis omnibus, ne demus hæreticis triumphandi locum, & gloriandi cum maximo parvulorum scandalo, damnatos esse de errore in fide eos, qui in Romana Ecclesia sunt fidei vel judices, vel propugnatores.

Quis enim non vereatur (& jure merito) ne si in Anglia, ejusmodique aliis Regnis audierint simpliciores illi Catholici, damnatos esse Patres Societatis Jesu in ea ipsa doctrina, quam adversus præcipuum Calvinii errorem de arbitrii libertate hætenus docuerunt, & sustinuerunt, facile contingere possit, ut quamplurimi animo consternati, dum hæsitant quid, aut cui credunt, non magno negotio ab hæreticis seducantur, qui illis periuadebunt, quando & hinc & inde erratur, satius esse errare cum suis Principe & civibus, vitamque tandem & bona in tuto constituere, quam cum bonorum jacturâ, miserâ servitute, assidueque vitæ periculo, errare cum alienis.

Demum sententia, de physica prædeterminatione (quidquid sit, an sit eadem cum errore Calvinii) certè est ei admodum similis. Confundent ergo hæretici has duas sententias; nec difficile erit populis persuadere, esse unam & eandem; quando doctissimi Theologi, vix vel ne vix quidem inter eas sciunt ullum discrimen assignare. Unde si definiatur tanquam de fide certa physica prædeterminatio, & dicatur in sensu composito, scilicet positâ prædeterminatione verum esse, quod Liberum Arbitrium à Deo motum non potest dissentire, canent Calvinistæ victoriam; jactabuntque Romanum Pontificem Concilii Tridentini errorem retractasse; nec potuisse jam amplius ejus deliriâ defendere, sed ipsâ tandem veritate coactum, suam sententiam approbasse: hunc errorem, de quo damnati sunt Jesuitæ, esse eundem illum Pelagianismum, in quem Patres Tridentinæ Synodi, dum cum Calvino sentire refugiunt, & volunt contra gratiam Christi humani arbitrii statuere libertatem, impeerunt: de quo Pelagianismo ipsi statim & Tridentinum accusarunt, & deinde contra Jesuitas Tridentini Concilii defensores (hoc enim titulo eos impugnant Kemnitius, & alii) assidue damnare non destiterunt.

Quod si quis dicat, propter hæc inconvenientia, aliave quæcumque, non esse tolerandos in Ecclesia errores; & pluris quàm hæc omnia faciendam fidei puritatem; libens ego concedo: sit hoc verissimum, si tamen de errore constet. At verò in hac causâ (quidquid dicant Theologi Consultores) non latet arbitrari Sanctitatem vestram gravissimos viros, doctos Episcopos, integrasque Academias dissentire, & ut ex longa partium disputatione constitit, afferri hinc inde multas & satis apparentes rationes: quorum Doctorum & Academiæ autoritate & rationibus, quis negabit rem saltem reddi dubiam, & opinionem probabilem? Jam verò si communis est Theologorum & Jesuitarum sententia, licere sequi opinionem probabilem, certè poterit Sanctitas vestra jure optimo, donec altera sententia in scholis prævaleat, & altera ab omnibus vel ferè omnibus rejiciatur, interim existimare utramque probabilem. Neque stante hoc dubio, secundum rectam prudentiæ & conscientiæ regulam, tenetur Sanctitas vestra devenire ad illius damnationem: præsertim cum res agatur inter pios & religiosos Viros, Ecclesiæ Catholicæ obsequentissimos filios, qui ejus censuræ subjiciunt quidquid docent, parati quotiescunque aliquid declaratum fuerit, mutare sententiam.

Immo verò, quamvis posset Sanctitas vestra definire hanc controversiam, & quidquid definisset certissimâ fide tenendum esset, si tamen servandus sit antiquissimus mos Ecclesiæ in rebus fidei definiendis, non video quomodo adsint prærequisita necessaria, ut possit deveniri ad definitionem puncti principalis hujus controversiæ, de gratia congrua, citra prædeterminationem physicam, aut è contra, de necessitate physicâ prædeterminationis. Hæc enim duo semper servata sunt in Ecclesia: primum est, ut quod definitur de fide certitudinem habeat ex sacris litteris, Apostolicis traditionibus aut Sanctorum Patrum concordî doctrinâ; non enim debent dogmata fidei in humana solum ratiocinatione & paucorum Doctorum autoritate fundari: secundum est, ut definitionem fidei præcedat magnus Doctorum Catholicorum consensus in hoc convenientium, quod veritas definienda habeatur ex Scriptura sacra, Ecclesiasticis traditionibus, sanctis Patribus, vel certè ex illis per apertam consequentiam deducatur. Illorum neutrum habemus in præsentî controversia.

Si enim, exempli gratia, contendat quis, definiendam esse de fide physicam prædeterminationem, cum qua non possit conjungi dissensus, ex quoniam Sacrae Scripturae textu, ex quibusdam sanctis Patribus hujusmodi terminos mutuabimur? Quod si infert, per apertam consequentiam ex Scriptura & Patribus rem deduci, licet non sub iisdem terminis; nullâ veritate aut verisimilitudine id dicetur, cum tota hæc doctrina innitatur, non tam Scripturae & Patribus, quam principio cuidam metaphysico: quod scilicet motio vel concursus causæ primæ cum secundis ponat aliquid prævium in causa, & non concomitans in effectu: quod principium inter Theologos & Philosophos est maximè dubium; neque ullus unquam asseruit esse certum de fide, aut habere certitudinem ex Scriptura vel Patribus; imò ferè omnes Doctores, & ex Thomistis etiam præcipuis aliqui, citra ullum scrupulum oppositum tenuerunt. Adde, quod si principium hoc universale supponeretur, plus probaret quam veritas patiatur: probaret enim Deum præmovere & prædeterminare ad actum peccati, cujus oppositum videtur quamplurimis definitum fuisse in Concilio Tridentino. Et certè dicere, quod dum Judas consultaret, animi dubius, quid faceret, hinc turpi lucro allectus, inde facinoris turpitudine deteritus, cumque esset voluntas ejus indifferens ad utrumque actum, ad prodendum Christum, vel ad perseverandum fideliter in ejus disciplina, dicere, inquam, quod Deus sua præviâ motione applicaverit, & physicè determinaverit voluntatem Judæ, ut potius eligeret actum proditoris, quam oppositum, est facere Deum per se causam proditoris, & Deum non permisisse solum, sed propriè & per se operari opera mala. Nam Deum operari in nobis propriè, & per se opera bona, secundum istos Doctores, non est movere per illustrationes, & inclinare per inspirationes; sed ipsos & physicè præmovere, & prædeterminare ad actum bonum: ergo si ad actum malum efficienter Deus præmovet, & physicè prædeterminat voluntatem, æquè propriè & per se dicetur operari actum malum, etiamsi ad hunc Deus non moveat illuminando, & inspirando, imò potius ab eo retrahat.

Hoc autem, scilicet Deum operari in nobis actus malos sicut bonos, damnatur in Concilio, & est de se ita horrendum, ut id non potuerit diffiteri Calvi-

nus ipse; & in causa nostra videamus jam aliquos ipsâ rei horribilitate deterritos, non audere amplius sustinere hanc prædeterminationem ad actus malos; quam tamen non possunt non admittere, si eam ex illo generali principio admittunt ad actus bonos.

Sed quidquid sit de illo metaphysico principio, quod si semel admittitur, valet in omnibus tam malis quam bonis operationibus; & si semel negatur, in omnibus corrumpit; de ipsa physicâ prædeterminatione ad unum, non est concors sententia Doctorum, quod ex Scriptura & Patribus habeatur aut deducatur, cum eorum multi, imò plerique eam censeant cum Scripturae & Patrum doctrinâ de arbitrii libertate pugnare.

Ex iis ergo concludo, Beatissime Pater, quod cum speculativa veritas sit admodum dubia, & inter Doctores Catholicos æquis ferè partibus divisos controversâ; & è contra in consultatione practicâ certum sit, quod si fiat in hanc vel illam partem determinatio, multa & gravia afferet incommoda & damna: & cum etiam non minus certum sit, stante hoc dubio, antequam aperte constet de errore & convenient, de eo plerique Doctores & Academici, non teneri Sanctitatem vestram, imò verò vix rationabiliter posse definire aliquid tanquam de fide; concludo, inquam, neque expedire, neque opus esse Sanctitati vestræ descendere ad definiendum punctum ipsum hujus controversiæ, quod est de modo efficacitatis gratiæ, an sit per auxilia congrua, an verò per physicam prædeterminationem.

Quia tamen aliquando una pars obicit alteri, quod quædam neget quæ sunt de fide certa: verbi gratiâ, Patres Societatis obijciunt Patribus Dominicanis, quod negent, hominem, positâ gratiâ, posse dissentire, seu resistere; & Patres Dominicani Patribus Societatis, quod negent gratiam, quæ faciat facere, quæ immutet voluntatem; quæ tamen neutra pars negat, ut audivimus: poterunt hæc omnia, & quæcumque certa habemus, ex Conciliis Milevitano, Arausicano, & Tridentino, Patribus & præcipuè Augustino & Prospero, in quasdam propositiones reduci, ex ipsismet Conciliis, & Patribus desumptas, quibus tota hæc nostra de gratia & de Libero Arbitrio fides contineatur. Et ista poterunt definiri (si tamen judicabitur expedire, ut hoc tempore ad ulla propositiones definiendas

niendas procedatur, in quo me remitto saniori & prudentiori Judicio) præcipiendo partibus, ut in iis, quæ istis aut aliis veritatibus definitis expressè non contradicant, altera alteram non censureret, sed cum omni modestia loquatur.

Quod si quis objiciat, hanc viâ non tolli & sedari hanc controversiam, fatebor ingenuè non tolli Theologicam disputationem, sed addam, neque esse opus, immò neque posse tolli scholasticas ejusmodi disputationes, nisi tollatur ipsa scholastica Theologia, quæ in hoc à Theologia merè positivâ distinguitur, quòd plerumque principis fidei immisceat naturalia, & ex utrisque naturæ lumine discurret & disputer. Sufficere nobis debet, quòd in hac controversia firma stet fidei veritas, & servetur inter disputantes modestia, sicut in innumeris aliis quæ in Ecclesia Dei Theologorum disputationi relinquuntur.

Et adnoto, in mysteriis fidei aliud esse substantiam ipsam mysterii & Catholicæ veritatis, aliud esse modum, quo à Theologis declaratur. In ipsa substantia mysterii debent omnes Catholici convenire, & si qui dissentiant debent hujus sanctæ Sedis autoritate coerceri; in modo autem declarandi & probandi Theologis dissentire semper licuit, & disputare, etiam circa ipsa potissima & fundamentalia fidei nostræ mysteria, Trinitatem & Incarnationem.

Catholica veritas de Trinitate est, esse unum Deum, & tres esse divinas personas, Patrem, Filium, & Spiritum Sanctum, unam, inquam, essentiam in tribus suppositis Divinis. In hac tamen veritate declaranda multum discrepant Theologi, dum alii volunt principia per quæ procedunt Divinæ Personæ, intellectum scilicet & voluntatem, à parte rei inter se distingui, personasque ipsas constitui & inter se distingui proprietatibus absolutis: alii è contra contendunt intellectum à voluntate in Deo sola intellectus nostri operatione distingui ab invicem. Incarnationis mysterium in eo est, quòd unum Christum Deum & Hominem fateamur, unam, inquam, Personam in duabus naturis subsistentem. Attamen declarando quid sit hæc subsistentia, seu personalitas, an sola negatio, an positivus terminus & complementum naturæ substantialis: similiter, an in una persona Christi sit unum esse existentiae, an plura, scholasticorum Principes dissentiant.

Quòd si rursus instetur, in nostra con-

troversia modos declarandi mysterium destruere ipsam substantiam mysterii; scilicet prædeterminationem physicam tollere arbitrii libertatem, vel gratiam congruam destruere veram gratiam Christi: respondeo, ita partes invicem sibi objicere, & prætere, neutrum tamen hætenus semper aperte constare. Etiam in mysterio de Trinitate D. Thomas objicit: Si distinguantur voluntas & intellectus à parte rei proprietatibus absolutis, tolli divinam simplicitatem simplicissimamque divinæ Essentiæ Unitatem: Si divinæ Personæ distinguantur proprietatibus absolutis, sequi nullam de personis divinis esse perfectissimam; ac proinde nullum esse Deum, si unaquæque careat absolutâ perfectione quæ est in alia. E contra objicit Scotus: Si intellectus & voluntas in Deo à parte rei non distinguuntur, neque posse personas distinctas produci, & sic tolli Divinarum Personarum Trinitatem. Similiter, in materia de Incarnatione, D. Thomas cum suis objicit: Si in Christo est duplex esse, non est una persona, sed duæ. Alii verò in contrarium instant: Si non est duplex esse, non potest esse duplex natura realis, cum nulla natura seu essentia sit realis extrâ nihil, nisi per suum esse, ab ipsa sola ratione distinctum. Hæc licet sibi invicem objiciant, quibus videtur tolli veritas Trinitatis & Incarnationis, quia tamen istæ sunt tantum prætentiones partium, & non apertæ atque indubitatæ veritates, licuit jam tot sæculis de iis dissentire: neque enim Ecclesia judicavit necessarium, suam definitionem interponere.

Nulli ergò pariter videri debet novum aut mirum, si hinc inde collectis omnibus, quæ in Ecclesia Dei usque ad hanc diem definita habentur de efficacia gratiæ & arbitrii libertate (vix autem credibile est, aliquid essentiale huic mysterio prætermisum definiri, in antiqua tam diuturna controversia contra Pelagium, & nova contra Lutherum, Calvinum, & suos) si, inquam, modus explicandi gratiæ efficaciam, Theologorum disputationi relinquatur; modò præscribatur modestia, & scandalorum occasiones præseindantur; deservescet spero contentionis fervor, cum primùm desinet in judicio actorem, & reum agere, sublatisque passionum nebulis suo se lumine veritas prodet. Et si verum est, quod prætenditur, alteram istarum sententiarum esse de fide, ipsa se veritas paulatim hominum animis

animis insinuabit, fietque ea sententia communis in scholis: & tunc commodius poterit definiri, & opposita damnari, quando existente jam re clarâ & indubitâ, ad nullius partis instantiam, in nullius condemnationem, sine detrimento auctoritatis scholæ Theologicæ, aut existimationis ullius Religiosi Ordinis, emanabit hæc definitio, tamquam simplex fidei declaratio ex officio edita, non autem tamquam sententiæ alicujus condemnatoria.

Et quod dixi de principali controversia, idem sentio de aliis quæstionibus, quæ disputatæ fuerunt, circa vires liberi arbitrii ad credendum fidei humanâ, diligendum, &c. nec non de faciente quod in se est, & aliis; nulla enim ibi propositio accusata fuit in Molina, pro qua non sint adducti multi & graves Doctores, qui eam ante Molinam tenuerunt; neque tamen ante hanc ortam contentionem alii Doctores notarunt eos minùs tutæ in fide doctrinæ. Immò Medina in parte secunda, quæstione centesimâ nonâ, Articulo sexto, ex professo eos excusat, & affert differentias aliquas, inter has Catholicorum doctrinas, & Pelagianorum errores: quod puto viderunt etiam accusatores Molinæ in Hispaniis, qui nihil tale adnotarunt, sed in sua censura ex Hispaniis transmissâ notarunt tantum novem propositiones, omnes attinentes ad principalem controversiam, de efficacia gratiæ. Hæc alia deinde adnotata sunt & revocata in dubium à Theologis Consultoribus, & initio quidem longè plura, deinde reducta sunt ad multò pauciora. De iis, inquam, quæstionibus idem sentio, non esse opus, neque decere aut expedire devenire ad aliquam novam definitionem aut condemnationem, propter easdem rationes; sed sufficere in aliquot propositiones resumere quicquid ex Conciliis & Patribus certum, & ab omnibus Catholicis concessum habemus, easque definire: quas propositiones cum aliis de efficacia gratiæ ego collegi, & simul cum tenore Bullæ (qui posset præmitti, vel similis) humiliter offero Sanctitati vestræ.

Ad tertium punctum: Quid intersit inter horum Catholicorum sententias, & damnatos hæreticorum errores.

Circa distinctionem erroris Calvinii ab opinione ponentium physicam prædeterminationem, dico Calvinum non solum abstulisse liberum arbitrium, sed & in eo

errasse, quòd talem posuerit Dei motionem quæ liberum arbitrium destruat.

In priori illo agnosco discrimen, Patres enim Dominicani, ut sunt Catholici, & pii, per suam prædeterminationem negant arbitrii libertatem destrui: in hoc verò posteriori, quod contra Calvinum damnatum est in Concilio, talem sentiunt esse motionem Dei, cui non possit homo dissentire si velit. Et ille & isti admittunt ex motione sequi quamdam necessitatem, & in aliquo sensu verum esse, quòd liberum arbitrium motum non dissentire potest: sed Calvinum admittere necessitatem antecedentem, quæ libertatem tollit, Patres verò Dominicanos non nisi necessitatem consequentiæ, & secundum quid: & solum in sensu composito verum esse, quòd homo non potest dissentire. Sed quid, quod has ipsas distinctiones, de sensu composito & diviso, necessitate antecedente & consequente, simpliciter & ex suppositione, hæc, inquam, ipsa sæpè Calvinus, ut in Congregationibus legi audivimus, iteraverat in suis Institutionibus, dicens se loqui in sensu composito, & de necessitate, non simpliciter, & antecedente: & tamen damnatus est, & à Doctoribus Catholicis impugnatus eo nomine, quòd cum ponat necessitatem deductam ex Dei motionem, quæ est quid prius, & causa, sequitur ex ea, velit, nolit, necessitas simpliciter, & antecedens, quæ libertatem tollit. Quòd si quis dicat, Calvinum posuisse voluntatem à Deo moveri & determinari per modum naturæ, & idèò damnatum esse; istos autem ponere, quòd determinetur secundum modum proprium agenti libero, ac proinde non tolli libertatem: contra est, quòd inter agens naturale quod movetur à Deo, & agens per modum naturæ, puta lapidem, & voluntatem divinâ motionem prædeterminatam ad unum, non possunt concipi, nisi hæ tres convenientiæ: prima est, quòd agens naturale non fertur in objectum cognitum per rationem, neque rationis iudicium sequitur; secunda, quòd in eo non est voluntas potentiæ rationalis; tertia, quòd antequam agat, est prædeterminatum ad unum per ipsam suam naturam, vel aliquam in eo permanentem qualitatem, sicut lapis per gravitatem ad motum deorsum. Calvinus certè non dixit primum, hominem scilicet velle quòd nullo modo per intellectum ei repræsentatur ut bonum; immò apertissimè admisit divinas illustrationes: neque dixit secundum, destrui scilicet per Dei motionem

tionem ipsam naturalem potentiam voluntatis, ut patet: neque dixit tertium, quia necessitatem voluit imponi, non per qualitatem ullam, sed per actualem Dei motionem, ut patet ex ejus verbis, ab illustrissimo Bellarmino & aliis relatis, *Movet Deus voluntatem, non quemadmodum multis seculis creditum est; &c.* & ut patet ex ipsâ definitione Concilii Tridentini contra ipsum facta. Ergo ex nullo capite posuit Calvinus voluntatem moveri per modum naturæ, plusquam ponant Patres Dominicani.

Videtur ergo ex eo solo damnatus, quod per divinam ipsam actualem motionem voluerit talem necessitatem imponi, ut ex eâ, à solo Deo in nobis posita, non possit voluntas dissentire, seu cum ea conjungere dissensum. In quo ingenuè fateor, ut jam superius dixi, & professus sum sæpè alias, me non posse scire, aut assignare ullum discrimen inter has duas sententias. Assignabunt fortasse alii, qui prædeterminationem defendunt, & percipient ipsi quod ego percipere non possum; non enim auderent eam defendere, nisi saltem sibi persuaderent videre discrimen aliquod inter hanc sententiam & damnatum Calvini errorem.

Quid verò intersit inter sententiam de gratiâ congruâ & errorem Pelagii & Semipelagianorum, facilius meo judicio est assignare: multa enim & lata intercedunt discrimina.

Primò Pelagius nullam agnovit supernaturalem gratiam, internamve illustrationem aut inspirationem, si credimus divo Augustino ipsi, qui Libro primo de gratia Christi hoc sibi proponit ostendendum, discurrendo per omnia dicta Pelagii, & ostendendo eum, etsi aliquando videtur errorem suum, ne damnaretur, damnasse, magnificisque verbis commendasse adjutorium Dei, nunquam tamen agnovisse aliud quam naturam, legem, atque doctrinam *exterius auribus insonantem* (sunt verba Augustini) Unde capite nono ait divus Augustinus: *Quid enim juvat Pelagium, quia diversis verbis eandem rem dicit &c.? Et tamen latere se putat cum aliis atque aliis locutionibus versat significationem legis atque doctrinæ.* Et capite decimo concludit: *Omnia quæ Pelagius concedebat, doctrinæ generalitate concludit, quæ quibuscunque sermonibus, aut literis continetur.* Et capite decimo tertio gratiam Pelagii à vera gratia Christi distinguit, quod illa sit doctrina, quam *alius & exterius Deus ipse infundit, qui*

incrementum ministrat occultis. Et Epistola ad Innocentium apertissimè dicit, gratiam Pelagii esse *doctrinam auribus sonantem, sicut plantatur quodam modo, & irrigatur extrinsecus.* Et divus Thomas Libro primo, articulo septimo, errorem Pelagii describit his verbis: *Cavendus est error Pelagii, qui posuit quod per liberum arbitrium homo poterat adimplere legem, & vitam æternam mereri, nec indigebat auxilio divino, nisi quantum ad hoc quod sciret, quid facere deberet, secundum illud Psalmi: Doce me facere voluntatem tuam.* Et quicumque hæreses retulerunt usque ad præsentem diem, ita hæresim Pelagii explicarunt. In sententia verò de gratiâ congruâ, admittuntur illustrationes & inspirationes internæ supernaturales, necessariae ad omnem actum, qui quoquo modo faciat ad salutem, vel ut meritum, vel ut dispositio, quantumvis remota.

Secundò Pelagius consequenter ad suam positionem de gratia, non cognovit veram prædestinationem aliquorum præ aliis, id est præparationem divinorum beneficiorum, quibus aliqui certissimè salvantur, & gratiæ efficaciam, quæ det vires, & infallibiliter faciat facere; sed existimavit ex æquo omnibus Deum præparasse naturam per quam habeant posse, legemque atque doctrinam, quâ ostendatur eis quid faciendum sit, ut colligitur ex divo Augustino, eodem libro primo de gratia Christi: & cum hoc, Deum scientiâ visionis vidisse, quinam ex viribus arbitrii erant de facto benè operaturi, & illis parasse gloriam. Ita ut secundum Pelagium, Deus non faciat benè operari, sed videat solum quinam operaturi sint; Deus non sit autor virtutis & boni operis, sed tantum justus Retributor præmii; non Deus singulari beneficio suæ prædestinationis & gratiæ discernat electum à reprobo, sed homo ipse discernat se merito suæ bonæ operationis, propter quam prævisam Deus elegerit eum præ alio ad gloriam. At nihil horum dicit neque Molina, neque ullus ex Patribus Societatis: admittunt enim gratuitam prædestinationem, quâ præparatur homini, nihil tale merenti, vera gratia interna, quæ dat vires intellectui & voluntati; & facit prædestinatum certissimè facere quæcumque bona vult Deus ut faciat: conceduntque divinæ prædestinationi, non solum certitudinem præscientiæ, quâ Deus scientiâ visionis videat quid homo jam facturus sit, sed etiam certitudinem ordinis, quâ Deus sciat certò ordinare,

nare, & certissime ordinet media, quibus faciat hominem bene operari quaecunque ipse voluerit ut operetur. Demum fatentur Deum suam gratiam praedestinatione, & gratiam discernere inter electum & reprobum, quam gratiam si Deus Petro non decrevisset dare congruam, sed aliam quam praevidebat futuram incongruam, licet in se sufficientissimam, Petrus jam non esset electus, sed reprobus: & è contra, neque Judas, neque ullus alius reprobus, cujus non cognovit Deus gratiam aliquam futuram fuisse congruam, cum quam si daretur, certo salvaretur; sed noluit dare, & ita est relictus in massa perditionis.

Tertio Semipelagiani, ut notat Divus Thomas loco supracitato, posuerunt non quidem quod homo per liberum arbitrium haberet Charitatem, impleret legem, & compleret totum negotium salutis, ut dixerat Pelagius, sed quod initium boni operis est homini à se ipso, dum consentit fidei per liberum arbitrium; consummatio verò à Deo: ideoque dicti sunt Semipelagiani, quia etiam si cum Catholicis sentiebant, quod gratia supernaturalis esset necessaria ad legem servandam & meritum vitae aeternae; cum Pelagio sentiebant, quia quod Pelagius universim dixit de omnibus operibus ad salutem necessariis, sufficere ad ea liberum arbitrium, isti dicebant de initio justificationis. Volebant enim ante omnem gratiam praecedere in homine assensum verae fidei Christianae, quam Medicum cognosceret; & bonam voluntatem, quam Medicum quæreretur. Contra quos Divus Augustinus ostendit fidem quam Christiani sumus, esse donum Dei per gratiam: de praedestinatione Sanctorum capite secundo, & de gratia & libero arbitrio capite septimo, & alibi. Immo propter hanc fidem & bonam voluntatem, ex solis viribus naturae elicitam ab uno, & non ab alio, dicebant Semipelagiani Deum conferre gratiam uni, & non alteri: ita ut haec opera non essent effectus ullius gratiae, sed causa primae gratiae; ac proinde non essent effectus praedestinationis; sed praevisa ab aeterno à Deo, essent causa quare Deus hunc potius quam illum praedestinaret. Et ita sensisse Semipelagianos, videre est ex Epistola Hilarii atque Prosperi ad Augustinum, & Libris ejusdem Prosperi contra Collatorem, ex Concilio Arausicano, & ex libro de praedestinatione Sanctorum.

Cum verò Divus Augustinus objiceret ipsis argumentum de parvulis, qui bap-

tisati exeunt ex hac vita & salvantur, cum tamen Dei praedestinationem & gratiam nulla eorum merita praecedant; respondebant, Deum cognovisse quid si supervixissent, facturi fuissent boni vel mali; & quod Deus hoc cognoverit, numquam eis negavit divus Augustinus, neque unquam ex hoc capite eos reprehendit, sed ex eo quod adderent propter ista opera mala, quae Deus praevidit eos facturos fuisse, sub conditione, si supervixissent, Deum aliquos ante baptismum abstulisse ex hac vita & damnassee; & è contra, propter bona praevisa sub conditione futura, alios praedestinasse ut post baptismum salvarentur, ut videre est in ipso divo Augustino. De praedestinatione Sanctorum Capite duodecimo & sequentibus.

Ab hac verò doctrina meo judicio longissime absunt Patres Societatis & Ludovicus Molina. Etsi enim doceant, quod plurimi Scholastici ante ipsos docuerunt, posse hominem, & viribus naturae praebere assensum fidei humanae articulis fidei, & facere alios actus quoad substantiam actus, id est quoad objectum materiale, similes actibus spei, charitatis, poenitentiaeque, hanc tamen negant ipsi esse fidem, quam Christiani sumus, virtutem scilicet Theologicam, de qua Scriptura & Patres, tanquam de primo salutis nostrae exordio loquuti sunt. Alios item actus dicunt entitate, essentia, nedum specificam, sed genericam, dignitate, valore à veris actibus spei, charitatis, &c. piis & talibus, quales sunt ad salutem necessarii, toto coelo distare: convenire, inquam eos in objecto materiali, differre in formali, ratione objecti, unde desumitur actuum essentia, specificatio & dignitas.

Quod si in explicando praedestinationis mysterio utuntur scientia media, sive futurorum, sub conditione, non tamen eam assignant pro causa, quare Deus hunc praeter alio praedestinaverit, sicut assignabant Semipelagiani.

Numquam enim hoc dixerunt, immo oppositum semper, & Molina ipse quaestione vigesima tertia, articulo quarto & quinto, disputatione prima, membro undecimo, conclusione quarta, quinta & sexta, docet hujus rei non posse ex parte liberi arbitrii dari ullam causam, rationem aut conditionem sine qua non: & membro secundo jam ex professo impugnaverit errorem Pelagii, & supra descriptum errorem Semipelagianorum. Immo neque posset scientia media ad talem finem deservire etiam si ipsi vellent,

quoniam est certum, Christum Dominum prævidisse de Tiriis & Sidoniis, quod credidissent & poenitentiam egissent, si inter eos voluisset facere signa; neque tamen ob eorum fidem & poenitentiam prævisam sub conditione futuram, motus est Deus ad prædestinandum eos, scilicet ad præparanda eis signa illa & auxilia cum quibus certissimè credidissent. Et è contra, de justo qui raptus est, ne malitia mutaret cor ejus, prævidit, quod si vixisset, peccasset; neque tamen ob peccatum sub ea conditione prævisum, voluit eum reprobare, & permittere ut laberetur, sed rapuit eum &c. Scientiam hanc adhibent isti Doctores ad optimum finem, ut scilicet gratiæ divinæ prædestinationis non quidem assignent causam, sed explicent certitudinem, citrà physicam determinationem. Eligat Deus quem vult ex solo suæ voluntatis beneplacito, debet per aliqua media certissimè & infallibiliter facere, ut iste suâ salvâ libertate consentiat, credat, operetur. Hanc certitudinem habere non potest Deus, nisi altero horum modorum: vel quia Deus scit, se posse uti quadam sua una ejusdem rationis in omnibus motione, quæ non contingentem, sed necessariam habeat connexionem cum hominis consensu, & cum eâ non possit stare dissensus (& hoc nolunt Patres Societatis concedere, quia existimant esse contrarium communi sententiæ Doctorum, & præcipuè divi Thomæ, quæstione sexta de veritate articulo tertio & alibi, & tollere arbitrii libertatem) vel quia licet omnia auxilia divina, si in se spectentur sint talia, ut possit homo cum eis consentire & dissentire conjungere consensum & dissensum, quia scilicet relinquunt voluntatem indeterminatam, & expeditam in utramque partem; Deus tamen altitudine suæ scientiæ cognoscit in quam partem cum iis vel illis auxiliis, si dentur, humana voluntas à nullo prædeterminata, ipsa seipsam sit liberè sub divinis auxiliis determinatura. Et hæc est scientia media, seu conditionalium, & ad hunc finem & non ad alium in mysterio prædestinationis explicando adhibetur. Et necesse est, hanc scientiam ponere, ut ponunt omnes quicumque prædeterminationem physicam non acceptant, quia si salvanda est & explicanda in divinâ prædestinatione certitudo, ut est procul dubio, non potest alio modo salvari: neque inter has duas sententias est dare medium, ut in particulari Scripto super hoc Sanctitati vestræ exhibi-

to pluribus ostendi. Et hæc de tertio puncto. *Ad quartum punctum, An in Bulla faciendâ sit mentio librorum in quibus sunt propositiones, & Religiosorum Ordinum inter quos est controversia.*

In tenore Bullæ, quem superioribus diebus Sanctitati vestræ obtuli, in præ-narratione facti mentionem faciebam Theologorum hinc Ordinis Prædicatorum, inde Societatis Jesu, inter quos hæc esset exorta controversia. Nunc verò re meliùs consideratâ, satiùs existimo utrorumque nomen reticere, & dicere tantum, inter quosdam Catholicos Theologos hanc controversiam ortam esse. Et id ipsum censeo de libris, scilicet generali clausulâ statuendum, ut si qui libri veritatibus definitis quid contrarium contineant, aut continere videantur, corrigantur, vel declarentur. Tum quia is videtur esse mos Ecclesiæ, nedum Catholicorum horum quorum famæ est consulendum, sed ipsorum etiam hæreticorum, in fidei definitionibus anathematibusque dicendis, nomina reticere. Ita Celestinus Papa in sua Epistola, decimo tertio capite, & Concilium Arausicanum, & nuper Concilium Tridentinum; ut pleraque alia taceam, à neohæreticorum hæreticorum nominibus recensendis abstinuerunt. Tum quia non video quomodo aut deceat, aut expediat in Pontificia Constitutione, ad perpetuam rei memoriam edenda, hujus tam parum faustæ altercationis mentionem facere, eamque posteris in omnem futurorum seculorum ætatem testatam facere, perennem ipsis quidem partibus dissidii, aliis verò omnibus scandali occasionem. Sinamus ergo hujus contentions memoriam interire, quam omnes boni cuperent, ut nunquam exorta esset. Sed ex quo id fieri nequit, ne exorta sit, optent certè votis omnibus, ut pro singulari Sanctitatis vestræ charitate atque prudentiâ, quam optimâ & saluberrimâ ratione componatur, salvo, si fieri possit, utriusque partis honore & existimatione. Sic enim res in integrum restitueretur, ac si nulla lis, aut contentio exorta esset.

Hæc sunt, Pater Beatissime, quæ pro veritate atque communi Ecclesiæ utilitate, ad ea quæ Sanctitas vestra interrogare dignata est, respondenda esse judicavi. Quæ omnia humiliter subjicio saniori judicio & correctioni Sanctitatis vestræ, quam Deus Optimus Maximus Ecclesiæ suæ Sanctæ incolumem servet.

F. Joannes Antonius Bovius, Ordinis Carmelitarum. Te-

Tenor Bullæ talis vel similis esse poterit.

Idea Bullæ
ab Anto-
nio Borio
meditata,
ceteris om-
nibus Con-
fultoribus
dissentien-
tibus.

Inter ea multa & gravissima, in quæ debet ex injuncto sibi munere studium suum, & sollicitudinem omnem impendere Romanus Pontifex, quippe cui totius Dominici Gregis pascendi cura demandata sit, duo hæc sunt præcipua, ut in Christiano Populo veræ & catholicæ fidei unitatem, & concordem animorum in Dei obsequio charitatem, totis viribus studeat conservare. Quapropter cum aliquot abhinc annis inter nonnullos Hispaniarum Theologos, hinc Ordinis Prædicatorum, inde Societatis Jesu, exortæ fuerint quædam disputationes & controversiæ circa materias de divinæ gratiæ donis, & humani arbitrii libertate, dum adversus hæreticorum calumnias, inter hæc duo concordiam statuere quærentes, & eundem finem intendentes (ita enim de piis & doctis viris libet existimare) doctrinæ sanæ catholicæ defensionem & declarationem, in rei tamen explicatione non eadem incedunt viâ, sed diversis inter se modis utuntur: Nos, cum primum Dei Optimi Maximi benignitate ad supremum Apostolatus apicem assumpti fuimus, huc statim animum appulimus, ut ejusmodi contentiones ab Ecclesia Dei tolleremus, & præscriptâ veritatis regulâ, omnem erroris aut scandali occasionem submoveremus. Revocatis igitur, quas felicis recordationis prædecessor noster Clemens Octavus instituerat disputationibus, reque totâ diligentissimè examinatâ, atque discussâ, ne cuiquam in posterum liceat de Catholicorum dogmatum veritate dubitare, & re vel ex ignorantia, vel ex contentione ardore error aliquis subrepat, antiquorum Ecclesiæ Patrum, præcipue Sanctorum Augustini, & Prosperi, Sacrorum Conciliorum Arauscani, Milevitani, & Tridentini, nec non sanctæ memoriæ prædecessorum nostrorum summorum Pontificum vestigiis inhærentes, propositiones infrascriptas collegimus, quibus quid ab omnibus fide tenendum sit, de divinæ gratiæ necessitate, & de humani arbitrii libertate præscribimus, videlicet.

D. Aug. de her. C. 38. & Epi. 106. Innoc. ad Con. Mi. lev. & Celest. Epist. ad Gallos.
1. Ita humana natura per peccatum vulnerata est, ut sine Dei gratiâ naturam salvantem, non possit homo ipsam naturalem legem totam implere, neque omnia, quæ contra ipsam sunt, mortalia peccata vitare.
2. Eadem Dei per Jesum Christum gratia, ad singulos actus credendi, sperandi, di-

ligendi, poenitendi, aliosque quoscunque, quantumvis faciles, ut fiant secundum Deum, & quales ad salutem oportet, simpliciter necessaria est, non verò solum ut facilius fiant.

3. Agnoscenda est & confitenda ab omnibus necessitas gratiæ & excitantis & adjuvantis, & cooperantis, & prævenientis, & consequentis.

4. Primum nostræ justificationis exordium à præveniente Dei per Jesum Christum gratiâ sumendum est, quæ à Deo nobis merè gratis datur, & non ex ullis operibus non quia volumus, sed ut velimus: quæcumque verò eam præcedunt, nullius sunt valoris aut meriti ad Dei gratiam promerendam salutemque consequendam.

5. Prævenientem* suam gratiam aliquibus dat Deus tantum sufficientem, cum qua tamen verè & propriè possunt benè operari: ita ut si non operentur, perditione eorum ipsis tribuenda sit, nullatenus autem Deo.

6. Aliquibus verò* Deus dat non solum posse bonum velle & facere, sed adiutorio suæ gratiæ quam efficacem appellamus facit, ut quod bonum est, certissimè & infallibiliter & velint & faciant.

7. Similiter* Justis omnibus dat adiutorium quo possint non peccare, ipsum bonum non deferere, usque in finem perseverare, si velint. Sanctis autem in regnum per gratiam Dei prædestinatis, datur tale adiutorium, ut per illud non nisi perseverantes sint, ut invictissimè quod bonum est velint; & hoc deferere invictissimè nolint.

8. Efficacem* gratiam sine ulla injustitia aut personarum acceptione dat Deus, cui vult ex solo suæ voluntatis beneplacito: ita ut quare alteri detur, alteri non detur, occultioris sit & inscrutabilis divini judicii, nullaque à nobis causa ex parte hominis assignari possit.

9. Per hanc gratiam (a) Deus non solum ducit homines, sed trahit, facit de (b) nolentibus volentes, de repugnantibus consentientes, de oppugnantibus amantes, (c) operatur in illis & velle & operari, (d) eorumque voluntates immutat, & quo voluerit, quando voluerit inclinat.

10. Hæc gratia est (e) divinum illud Beneficium quo certissimè liberantur quicumque liberantur: (f) est vocatio secundum (g) propositum, quam nullus vocatus resistit: (h) vocatio alta atque secreta, quæ sic agitur, ut legi, & doctrinæ accommodetur assensus: est (i) doctrina interna atque occulta,

quâ non suadetur solum quod bonum est, verum & persuadetur : quâ Deus non
 (a) *Ibid.* (a) ostendit tantummodò Veritatem, ve-
 Cap. 13. rum etiam impertit Charitatem, donans
 electis suis, & quid agant scire, & quod
 (b) *de Spi.* sciunt agere : est (b) illuminatio atque
 & *Littera* inspiratio quâ fit ut non modò appareat
 Cap. 35. quod latebat, sed & suave fiat quod
 Lib. 2. ad non delectabat : (c) per quam Deus non
 Simp. q. 2. solum illustrat intellectum, ostendens quid
 (c) *Epist.* agendum sit, sed etiam bonum inspirat
 105. *de gr.* (d) affectum : dans vires efficacissimas
 christ. Cap. 45. voluntati.

(d) *de gra.* 11. Quod gratia (e) sola operando incipit,
 & *lib. arb.* eadem non sola, sed simul cum voluntate
 Cap. 16. cooperando perficit : ad hoc enim præ-
 (e) *de gra.* paratur voluntas à Deo, ut excitanti at-
 & *lib. arb.* que adjuvanti gratiæ assentiendo & coo-
 Cap. 5. & perando liberè producat actus, quibus ad
 17. *Conc.* Justitiam coram Deo liberâ suâ voluntate
Trid. Sess. 6. Cap. 5. se moveat atque disponat.

(f) *D.* 12. Per Dei (f) efficacem gratiam non tol-
 Aug. Ep. litur liberum voluntatis (g) arbitrium : ejus-
 107. modi enim est, ut sine ea habeat homo
 (g) *D.* auxilium sufficiens, cui si velit, possit
 Prosp. loco (h) consentire ; & eâ positâ relinquatur
 cit. (h) *Concil.* assentiendi & dissentendi facultas, possit-
Trid. Sess. que dissentire, resistere, eamque abjice-
 6. Cap. 5. re, si velit.

(i) *Can. 4.* Hæc esto de gratia & libero arbitrio
 Fidei Regula : hæc sunt Catholica dog-
 mata : ita fidelis quisque credat : ita fidem
 suam profiteatur. Si quis verò contrarium
 quicquam dixerit, docuerit, scripserit,
 anathema esto. Profundiores autem, dif-
 ficilioresque partes incurrentium quæstio-
 num, quas fusiùs pertractant, qui hære-
 ticus resistunt, & Scholastici plerique,
 dum, pro suo more, de fidei mysteriis
 rationes quas possunt, inquirunt, & mo-
 dos explicant, dummodò firma & inte-
 gra maneat prædescriptarum veritatum
 substantia, ut beatissimi Prædecessoris
 nostri Celestini verbis utamur, *Sicut non
 audemus contemnere, ita non necesse habemus
 astruere.* Ut tamen omnis conten-
 tionis & scandali occasiones tollantur, &
 servetur ea quæ decet inter pios & doctos
 viros modestia & charitas, sub poena,
 &c. prohibemus ne unius partis Do-
 ctiores aliive quicumque legendo, scri-
 bendo, docendo, concionando, aliove
 quocumque modo loquendo, sive tractan-
 do, alterius partis in materia de gratia
 & libero arbitrio opiniones quæcumque
 sint, modò supra descriptis nostris aut
 aliis Ecclesiæ definitionibus expressè non
 contradicant, hæreticas, erroneas, teme-
 rariasve appellare, aut alia quacumque

majori censurâ quàm falsitatis, improba-
 bilitatis, aut simili, censurare audeant.
 Immò, ne quod modò inter hos Docto-
 res supradictis materiis de gratia & libe-
 ro arbitrio contigit, id inter eosdem vel
 alios quoscumque super aliis, aliquando
 contingat, & ne sibi quisque cum ma-
 gno Christianæ pacis & Charitatis detri-
 mento arroget, de aliorum opinionibus
 censuram ferre, easque pro libito dam-
 nare, quæ res ad hanc sanctam Sedem,
 aliosque Ecclesiasticos Judices pertinet,
 quibus judicandi de rebus fidei, atque
 adeò etiam de ejus opposito auctoritas
 competit, id ipsum sub eadem poenâ
 prohibemus, de omnibus quorumcum-
 que Catholicorum Authorum doctrinis,
 ne scilicet eas nisi jam per Ecclesiam,
 aut saltem generalem aliquam Inquisitio-
 nem damnatæ fuerint, quisque majori
 censura, quàm falsitatis, improbabilitatis,
 aut simili damnare præsumat. Si qui
 verò libri editi sunt, in quibus aliquid
 contineatur, quod supra per nos defini-
 tis veritatibus repugnet, aut quoquo modo
 repugnare videatur, illos in hac alma Urbe
 per doctos Viros, per nos aut Sacram
 Indicis Congregationem deputandos, cor-
 rigi, aut prout opus fuerit declarari
 mandamus, non obstantibus. &c.

Hujus tenoris, vel similis, editâ bullâ,
 meo quidem judicio, posset causa ista
 decentissimè terminari, sine ullius ex
 partibus condemnatione, immò servatâ
 utriusque existimatione : & sufficienter
 provideretur præsentì necessitati, deter-
 minando quæcumque certa sunt, & in
 posterum contentiones præcavendo ; ut
 scilicet altera de altera censuram non
 ferat, modestiamque debitam servet, ab-
 stinendo à verbis omnibus contumeliosis,
 aliove modo offensivis. Neque tamen
 interim (licet partibus præcipiatur, ne
 censurent) altera sententiarum, aut utra-
 que approbatur, ut si Deo placuerit,
 majorem lucem Ecclesiæ suæ dare, &
 majorem consensum Doctoribus, ita ut
 aliquando una earum ab omnibus appro-
 betur tamquam vera, & principiis fidei
 consona, non sit præclusus aditus huic
 sanctæ Sedi, quo minùs opportuniori tem-
 pore, quàm voluerit, tamquam de fide
 certam definire possit.

Interim firmantur per propositiones
 positas, & stabiliuntur quæcumque hæte-
 nus certa sunt in materiis inter has duas
 partes disputatis.

Primâ propositione definitur, quid hu-
 mana natura possit, circa naturale seu mo-
 rale

rale bonum, vincendas tentationes. &c.

Secundâ continentur omnia, quæ disputata sunt de actibus credendi sperandique, aliisque quibuscunque quoquo modo facientibus ad justificationem & salutem.

In tertiâ asseritur gratia secundum omnes sui divisiones & partes.

In quartâ statuitur Catholica veritas, de gratiâ præveniente, quod ab ea justificationis exordium sumendum sit, & continentur quæcumque disputata sunt de faciente quod in se est.

In quintâ, sextâ & septimâ ponitur divisio gratiæ in sufficientem & efficacem; five ea detur ad justificationem aliumve quemlibet actum, five ad perseverandum usque in finem.

In octavâ asseritur causa, cur uni, & non alteri detur gratia efficax, sola divi-

na voluntas.

In nonâ, ejusdem effectus præcipue per verba, & phrasas divi Augustini asseruntur.

In decimâ, ejus natura explicatur, per descriptiones ex eodem divo Augustino desumptas.

In undecimâ, asseritur humanæ voluntatis cooperatio,

In duodecimâ, statuitur, non obstante efficaci gratiâ, libertas arbitrii nostri.

Demum quidquid potuit definiri, non tangendo ipsum punctum gratiæ congruæ & prædeterminationis physiciæ, hic definitum est, ut arbitror. Si quis aliud aliquid requirit, exponatur: & quæcumque definita sunt, certissima sunt ex Conciliis & Patribus in margine adductis.

DE JURAMENTO

Q U O

ACADEMIA SALMANTICENSIS

S. Augustini Doctrinæ & S. Thomæ Conclusionibus docendis se addixit.

NEC NON DE EJUSDEM JURAMENTI

APOLOGIA

E X C E R P T U M

Ex quibusdam MSS. Doctrinæ Augustiniane Vindiciis.

HÆc erant exterorum, hæc domesticorum adversus Molinæ novitates consilia; nec illi tamen à proposito dimoveri potuerunt, qui illud tenaciùs assumperant. Sed cum viderent, se in validissimam Turrim Doctrinæ Augustinianæ, tot Pontificum, Conciliorum & SS. Patrum testimoniis munitam, sicut Turris David, quæ ædificata est cum propugnaculis, ex qua mille clypei pendent, omnis armatura fortium, in cassum arietare; astum militarem imitati, statuerunt suffossis cuniculis fundamenta illius evertere & auctoritatem convellere. Hinc tentarunt approbationes & testimonia, quibus illa vallatur, infringere & detererre: nævos erroresque doctrinæ affingere, va-

riis in personam & ejus dogmatum capita congestis calumniis, nomen & existimationem in contemptum adducere: ut sic pestumdatâ auctoritate & reverentiâ, detestationem quoque ejus quem impetebant, obtinerent, & doctrinam orthodoxam atque utilissimam ob personæ invisiæ vilifacere prævalerent, curamque exterriti lectoris ab his quæ infamassent, averterent.

Conspirationem istam, in Ecclesiæ & fidei Catholicæ exitium vergentem, inter primas detexit celeberrima totius Monarchiæ Hispaniæ Academia Salmantica, doctrinæ Augustinianæ plurimum studiosa. Si quidem persentiscerebat, S. Augustinum indies magis magisque vilescere

S. Prosper in pref. ad Cap. Gall. Item Hincm. Archiep. Rhe-men. tomo 2. opusc. ad Hinc. Laud. Cap. 28.

A. 1627.

&

Bulla Ur-
bani V.

& non tantum Augustinum, sed unam quoque individuum ipsius sectatorem D. Thomam Aquinatem, qui *B. Augustini vestigia insequens Ecclesiam doctrinis & scientiis quam plurimis adornavit*, audiebat in scholis suis tyrunculos, Præceptorum suorum exemplo, ad allegatam Doctorum istorum auctoritatem, contentum reponere, *Transseat Augustinus, Transseat D. Thomas*, & vilipendium illud paulatim ita crebrescere, ut brevi præclara ista Ecclesiæ Lumina modernorum lychnis accenserentur.

Itaque pro innato sibi zelo in tuenda fidei & doctrinæ, præsertim Augustinianæ puritate, gliscenti sensim veneno antidotum efficax adferre statuit.

Negotium primò discutiendum committitur congregationi octodecim virorum è primoribus Academiae, scientiæ & rerum usu præstantissimis, tam Theologis quam Jurisperitis. Proponitur imminens malum, & erumpens in SS. Patres insolentia. Agitur de remedio opportuno, idque, ut rei momentum exigebat, per plures dies. Atque interea, ne quid levius in re tantâ statuatur aut humani aliquid irrepât, adhibentur à Religiosis Familiis ad Deum preces, sacrificia, jejunia & carnis macerationes: ac tandem illud unicum & præsentissimum remedium occurrit, ut Professores omnes & Cathedrarum moderatores Juramento astringantur doctrinæ S. Augustini & S. Thomæ.

Propositum defertur ad Concilium Academicum, ventilatur, perpenditur pressiusque discutitur; ac demum depositâ omni humanâ formidine, quâ nonnulli adhuc tenebantur, ob injectas ab adversariis graves minas, unanimi consensu conclamatum est, Juramentum illud omninò esse præstandum, & religiosè observandum, auctoritatemque & doctrinam Sanctorum Augustini & Thomæ tanquam pro aris & focis esse defendendam.

Quodque notatu dignum, & ante illud in ista Universitate numquam visum fuerat, quando publicè suffragia proferebantur, inter sexaginta ut minus, vix unum aut alterum à communi sententia discrepavit: & dum pro majori suffragantium libertate secreto scrutinio collecta fuere, nullum prorsus dissensit. Ut non immeritò sapientissima illa Universitas, unanimem istum consensum in tanta suffragantium pluralitate, opinionum diversitate, & partium ac Ordinum varietate,

speciali Divini Numinis inspirationi & directioni adscribat.

Juramentum autem his verbis exprimebatur: *Juro in quotidianis lectionibus quas in Academia vel Cathedra moderator, vel voluntarius Professor legero, me docturum atque lecturum in Theologia Scholastica Doctrinam Sancti Augustini, & Conclusiones D. Thomæ, quas in Summa Theologia docet, ubi horum Sanctorum mens aperta fuerit; ubi verò anceps & dubia, nihil docturum neque lecturum quod eorum doctrina adversari senserim; sed quod vel juxta meum sensum, vel eorum qui discipuli Sanctorum Augustini, & Thomæ communiter censentur, tantorum Patrum doctrinam magis conforme judicaverim. Excipio opinionem de Immaculata Virginis Conceptione; & ea quæ jure Ecclesiastico immutata sunt, vel postea immutabuntur, & quæ cum olim controversa essent, jam Constitutionibus Apostolicis definita sunt. Et si quando Cathedram Scoti vel Durandi moderabor, quamvis ad id teneri nolo, licere tamen mihi volo, pro eo tantum tempore probabiles eorum Doctorum opiniones sequi absque perjurii crimine.*

Sed cum adversarii ferre non possent hoc decreto se suasque novitias opiniones Augustino & Thomæ contrarias ab Academia ista proscribi; omnem lapidem moverunt, ut illud enervarent & odiosum redderent, pulsatis etiam Regis auribus, & suscitatis Aulæ primoribus, ut aboleretur omninò, vel saltem auctoritate regia minimè confirmaretur.

Ut idcirco Universitas coacta fuerit Statuti sui præfatique Juramenti æquitatem probare doctissimâ Apologiâ; quâ & adversariorum argumenta calumniasque solidè refellit, & Sanctorum Patrum Augustini, ac Thomæ, totiusque antiquitatis auctoritatem strenuè propugnat.

Huic causæ nomen suum quoque adscripserunt Religiosæ familiæ Augustiniana & Dominicana, pro Magistrorum suorum defensione; & communi manu dictam Apologiam supremo Senatui Castellæ porrexerunt ad obtinendam istius Juramenti confirmationem.

Hoc usi prologo.

UNIVERSITAS SALMANTINA, comitata sacris Ordinibus Dominicano & Augustiniano advoluta genibus supremi Senatus, Statuticausâ quo ab eadem Universitate decretum est, ut omnes Professores Juramento astringantur, quòd in prælectionibus suis ordinariis Theologiæ Scholasticæ tradent

tradent doctrinam Sanctorum Ecclesiae Doctorum Augustini & Thomae: rogat humillimè, dignetur proposito tam pio, æquo & ad Dei servitium, Ecclesiae bonum, Sanctorum Patrum existimationem, utilitatem fidelium, rectam juventutis eruditionem, horum denique Regnorum pacem & tranquillitatem usque adeò necessario, benignè favere, illud autoritate suâ approbando & confirmando: quo illi saltem qui succedent iis qui istiusmodi Juramentum ex nunc præstiterunt, muniantur adversus omnia quæ tam publicè quàm occultè adeò laudabili & sancto Juramento opponi possent &c.

Verùm cum in subsequentiis exactè deducant rationes condendi istiusmodi decreti, aliaque referant in rem nostram facientia; tantisper adhuc pace tuâ hîc digrediar, Philo-Augustine, & præcipua excerpam, ne videar vel cuiquam imponere, vel apologum agere.

Postquam articuli primi § 1^o. speciem facti fideliter retulissent, ipsiusque Juramenti tenorem, eo modo quo à nobis superius expressum est, & § 2. multis argumentis probassent ad perfectam eruditionem, plurimùm conferre ut in qualibet scientia, maximè autem Theologica probus & determinatus aliquis Autor & Magister discipulis proponatur, subnectunt:

EXCER- Quæ cum ita sint, quis prudens & TUM EX æquus Judex alios statuet in Theologi- APOLO- ca Scholastica principes Authores, præ- GIA JU- ter Sanctum Augustinum & D. Thomam? RAMEN- Et si quisque probe Philosophis Aristotelem, Medicis Hyppocratem & Galenum; TI. Mathematicis Ptolemeum & Eucliden Magistros præfigi; quis ægrè feret Universitatem è Theologis Scholasticis sibi in Magistros elegisse D. Augustinum & D. Thomam? vel quis adeò obtusæ mentis est, ut in Theologia Scholastica denegat D. Augustino & D. Thomæ eam autoritatem, quam in Philosophia Aristoteli, & in medicina Hyppocrati aut Galeno tribuere non veretur.

Quis enim dubitat, quin si infelici hoc seculo in Theologia Scholastica determinati aliqui authores, cujusmodi sunt SS. Augustinus & Thomas, præscripti, & medio etiam Juramento religiosè servati fuissent, Ecclesia non foret tantis tamque gravibus contentionibus, per ipsosmet quoque Catholicos exagitata? Ea Theologiæ pars quæ Scholastica dicitur, est veluti quoddam stratagemma bellicum, à Sanctis Patribus & vetustis Scriptoribus excogitatum, scriptisque suis ad posteros

transmissum, quo adversus infideles uterentur: & quamquam regulis dialecticis, quæ tunc temporis suspectæ erant, non omninò se adstrinxerint; non idcirco est quòd earum utilitatem ignorarent, sed quia Philosophis argutiæ sophisticæ nimium essent familiares: quibus nihilominus Catholici eos postmodum etiam exarmarunt, subsidio dialectices, quæ consequentias ipsorum malè fundatas, infringebant, & comprobabant errores ipsos solo vento inniti.

Præclarorum horum facinorum Princeps fuit & antesignanus, magnus ille Augustinus, Theologorum Scholasticorum præcipuus; quippe qui in refutandis strenuissimè erroribus parcm non habuit. Mysteriorum omnium sublimissimum declaravit in Operibus de Trinitate, de gratia & libero arbitrio, ex quibus Concilia suos quoque Canones adversus Hæreticos depromserunt; uti patet ex Arausicano, Milevitano, & deinde Tridentino. De Creatione mundi & de Opere sex dierum tractat contra Manicheos; contra errores gentilium, in libris de Civitate Dei: de visione Dei & de Incarnatione, in Tractatibus super Joannem. Modum interpretandi, S. Scripturas, tradit in libris de doctrinâ Christianâ. Artes verò liberales, in libris de Logicâ & Musicâ. Et prout communiter sentiunt Theologi: Illud deest Legi, quod ignoravit Augustinus. Denique non est ulla materia in tota Theologia Scholastica, cui non respondeat aliquid in Operibus S. Augustini; & in illa nullus ipsi est par. Quod si verò quis majorem inveniat, justè poterit accusare electionem quam fecit Universitas.

Assertioni nostræ favet testimonium Ecclesiae Romanæ, quæ in Officio ejusdem S. Doctoris lectione 6. hæc affirmat.

Tam multa piè, subtiliter, & copiosè scripsit, ut Christianam doctrinam maximè illustrarit; quem in primis secuti sunt, qui postea Theologicam disciplinam viâ & ratione tradiderunt. Immerito igitur improbari poterit Decretum Universitatis, quo in Magistrum Theologiæ Scholasticæ assumpsit illum ipsum, quem illius Principem Ecclesia appellat.

Securitatem & soliditatem doctrinæ ipsius testantur passim Pontifices; paucos solummodò hîc proferemus, ut prolixitati parcamus.

Cælestinus Papa in Epistola Decretali, quæ scripsit ad Episcopos Galliae, qui doctrinæ S. Augustini obloquebantur, hæc asserit:

„ Augustinum Sanctæ recordationis Vi-
 „ rum, pro vitâ suâ & meritis, in nostrâ
 „ Communione semper habuimus; neque un-
 „ quam hunc sinistrae suspicionis saltem ru-
 „ mor asperfit; quem tantæ scientiæ olim fui-
 „ sse meminimus, ut inter Magistros opti-
 „ mos etiam à meis Prædecessoribus habe-
 „ retur. Benè ergò de eo omnes in com-
 „ mune senserunt utpote qui ubique cun-
 „ ctis & amoris fuerit & honori. Unde re-
 „ sistendum talibus quos malè crescere
 „ videmus. Elogium hoc mirè extollit
 „ Sanctus Prosper, ut infra dicemus. Joan-
 „ nes Papa II. in Epistolâ ad quosdam
 „ Senatores Romanos, sic scribit. Sanctus
 „ Augustinus, cujus doctrinam secundum
 „ Prædecessorum meorum statuta Romana
 „ sequitur & servat Ecclesia. Hujusmodi
 „ plures alii Pontifices & Sancti Patres in
 „ medium produci possent, qui eodem mo-
 „ do, pari veneratione & laude doctrinam
 „ Sancti Augustini deprædicant, ejusdem-
 „ que firmitati subscribunt. Ex quibus ma-
 „ nifestè colligitur, Universitatem hanc,
 „ dùm Sanctissimum istum Doctorem ele-
 „ git, & Theologiæ Scholasticæ Magi-
 „ strum Jurejurando statuit, à Judicio San-
 „ ctorum Patrum, Pontificum, immò uni-
 „ versalis Ecclesiæ neutiquam recessisse:
 „ atque idcirco factum ipsius criminari non
 „ posse, nisi ab iis qui tantæ autoritatis
 „ robur contemnunt.

Quod ad Angelicum Doctorem S.
 Thomam attinet, nemo quoque est qui
 dubitet, quin jure meritoque in Magi-
 strum assumptus sit. In hujus autem as-
 sertæ probationem hoc unum sufficiet,
 quòd tantus fuerit & tam fidelis discipu-
 lus S. Augustini, ut meritò alter Au-
 gustinus nuncupari possit, juxta testi-
 monium Urbani V. in Bullâ suâ ad Aca-
 demiam Tolosanâ, ubi ait: „ Attenden-
 „ tes quantâ à Deo scientiâ dotatus Ordi-
 „ nem FF. Prædicatorum & universalem
 „ Ecclesiam illustraverit, ac B. Augustini
 „ vestigia insequens, Ecclesiam eandem
 „ doctrinis & scientiis quàm plurimis ador-
 „ naverit. *Hucusque Apologia.*

Multis deindè ac præclaris testimoniis
 Pontificum, Conciliorum, aliorumque
 Scriptorum copiosè adductis, comprobant
 doctrinæ Angelici Doctoris authorita-
 tem. Et tandem § 4. causas allegant, quæ
 Universitatem moverunt ad hujusmodi
 Juramentum decernendum his verbis.

APOLO-
GIA.

Homines in fide suspecti, qualis Eras-
 mus, immò & jam hæretici, ut Joannes
 Drusius, dùm ipsis objiceretur, quòd
 SS. Patres atque inter eos Sanctum Au-

gustinum, vilipenderent, quasi verò hu-
 manâ fragilitate in errorem lapsus esset,
 maximoperè conati sunt notam il-
 lam à se repellere; adeò probrosam cen-
 sebant. Quòd si ita sit, cui unquam
 Catholico in mentem venirent ea quæ
 hodie experimur; Divos Augustinum &
 Thomam flocci fieri, eorumque dog-
 mata novitiis opinionibus postponi, quis
 crederet? Nitebantur quidem earum Au-
 tores primùm specioso aliquo colore
 illas adumbrare, afferentes in sensu ab ip-
 sis excogitato intelligendos esse sanctos
 Patres, & nominatim Sanctum Thomam,
 in quem tot calami acuebantur; sed cùm
 nihilominus mens D. Thomæ in illis non
 eluceret, statuerunt aperto Marte ipsum
 aggredi; usque adeò ut etiam in scholis
 & confessibus publicis, autoritas ipsius
 (quam tamen Concilia plurimi semper
 fecerunt) non sine gravi scandalo, ludi-
 brius quasi haberetur. Quilibet tyruncu-
 lus non erubescere palam reponere ad
 allegatam autoritatem istorum Patrum:
*Transseat Augustinus, Transseat D. Tho-
 mas;* quia illud ipsum audiebant Magi-
 stros suos dictitantes.

Et in tantum excrevit insolens ista
 dissensio, ut editus quoque fuerit libellus
 (cujus Autor etiam suppressio nomine,
 satis innotuit) inscriptus: *Judicibus verita-
 tis* (contemptum videlicet Sanctorum
 Patrum veritatem indigitabat) qui si be-
 nè inspiciatur, non nisi farraginem conti-
 net convitiis & injuriarum in Ange-
 licum Doctorem; cujus excellentias &
 miracula non veretur rejicere & negare.
 Unicus verò ipsius scopus est doctri-
 nam Sanctorum Patrum sugillando, eo-
 rundem quoque autoritatem deterere:
 atque ut unicuique sit major opinandi
 libertas. Vult citra discrimen Scriptores
 quoslibet eodem ordine & loco esse cen-
 sendos: quod profectò ita periculosum
 est, ut illo dato, vix quidquam certum
 aut stabile in fide nostra esse possit.

E suggestis ac cathedris audaci te-
 meritate in Angelicum istum Doctorem
 insurgebatur. In ipsis proseniis, doctri-
 na ejus exhibebatur sub personâ lucifugæ
 ac deficientis; adeò ut illi ipsi qui eam
 sanam & veram esse judicabant, eandem
 nihilominus detrectarent sustinere.

Stante itaque, vel crescente potius
 procaci istâ audaciâ, pio zelo succensa
 hæc Academia, arma arripuit, signaque
 explicuit in Sanctorum Patrum istorum
 defensionem; parata quælibet etiam, ip-
 sorum causâ pati, solâ spe præmii quod
 apud

apud æternum Judicem illos manet, qui Doctorum Ecclesiæ existimationem & doctrinam fideliter sectantur ac strenuè propugnant.

Ponderabat deinde attentius, quanti referret horum Sanctorum Patrum auctoritatem, factam tectam tueri, ac tunc vel maximè, dum tantâ licentiâ & despectu Sanctos Ecclesiæ Doctores, recen-ter editis libris, & vivâ voce, nonnulli insultant, & persuadere nituntur, sublimia hujus ævi ingenia non esse placitis veterum Patrum adstringenda, sed cuique liberum esse debere, pro sententiâ suâ opinari.

Quo circa cupiens hæc Universitas tantis malis occurrere, certa se reliquis Ecclesiæ Doctoribus consentire, quamdiu Sanctorum Augustini & Thomæ, qui aliorum compendia quodammodo sunt & organa, sententiis adhæreret: agnovit nomini & debito suo minimè fieri satis, si tantummodo, ut vulgus solet, Catholica dogmata tueretur; sed potius muneris sui esse, ea pro viribus ita stabilire, ut ne vel minima defectionis aut levitatis suspicio in doctrinam suam cadere posset: quod se obtenturum minimè dubitabat, ubi veterum vestigiis, quæ hætenus tutissima habita sunt, insisteret & non solum Evangelica præscripta, verum etiam Sanctorum Patrum dogmata, ab Apostolis accepta, & per ipsos ad nos transmissa, studiosè lætaretur & traderet. Consideravit insuper Christum Dominum, qui præ ceteris virtutibus humilitatem assidue inculcavit, Ecclesiæ suæ gubernacula, non tumidis ac licentiosis, sed humilibus & candidis geniis commisisse.

Solertes quoque belli Duces, dum arcem aliquam à potenti hostium insultu defendendam suscipiunt, in id præcipuè incumbunt, ut inimicus ab ea procul arceatur: in quem finem munitionibus & propugnaculis locum ipsum & vicina fortiter cingunt, utpote non ignari, se brevè superandos esse, ubi semel hostile robur ad ipsa moenia fuerit admotum.

Arx cujus defensionem invigilant & al- laborant Universitates, est fides ortho- doxa: hujus propugnacula, valla & mu- nitiones, sunt SS. Patres; quibus everfis ac superatis, arx ipsa profectò periclitatur; adeoque studendum summopere est ut illis debitè prospiciatur.

Quo magis itaque hæretici moliuntur doctrinam & auctoritatem Sanctorum Patrum labefactare, sub prætextu, quod

ut homines potuerint errare, eò gene- rosius & majori sollicitudine tenentur Universitates illas propugnare. Primus enim fundamentalis lapis cujusvis erroris, est, ipsos Veritatis Patronos, Sanctos Patres nimirum, impugnare & contem- nere. Concilia Oecumenica respuere; manifesta est hæresis; doctrinam autem Sanctorum Patrum vilipendere, vel eo- rum auctoritatem convellere, propriis in- genii viribus innitendo, perniciofa est arrogantia, è quâ graviora dein mala na- ta sunt pullulare. Hunc vel illum errorem alicujus Sancti Patris perperam in exem- plum adducere, non confirmandæ veri- tati, sed prætexendæ potiùs impudenti opinandi libertati, in contemptum San- ctorum Patrum; quorum dogmata quam- vis sint ab hominibus prolata, summâ ta- men cum veneratione accipienda sunt & spectanda.

Hinc coepit Calvinus venenum suum spargere, teste Magistro Cano de locis Theol. Lib. 7. Cap. 3., Dum ut apud Regem Galliæ Franciscum, impuden- tiam Lutheranorum excusaret, Catholi- corum innocentiam traduxit, & Sancto- rum Patrum doctrinam contempsit, sub prætextu quod Sancti illi Viri multa ignorarint: quod hodie Divis Augustino & Thomæ etiam objici audimus.

Sed pressius hæc discutiamus; & con- stabit incredibile esse, quod Supremus Se- natus jure dubitare possit de concedenda petita confirmatione. Exploratum nam- que est, necessariam omnino esse in Ec- clesiâ Catholicâ doctrinæ uniformitatem; prout infra patebit. Nec est qui dubitet, quin doctrinæ S. Augustini & S. Thomæ in Theologiâ Scholasticâ, sit omnium maximè comprobata & tuta; istique SS. Patres eâ in parte, inter cæteros Do- ctiores sint faciliè Principes, quod in su- periori §. demonstratum est. Insuper compertum est, quod Senatus hoc unum pro munere suo in votis habeat, ut Ju- ventus probis & securis institutis erudia- tur; nec tanta sit opinionum diversitas & licentia, unde tot nascuntur conten- tiones; utque Autoritas & existimatio Sanctorum Augustini & Thomæ illæsa intactaque serveretur, immò verò crescat & firmetur apud fideles doctrinæ ipso- rum cultus & amor. Nefas quippe esset ambigere, quin illud semper Senatus sum- mis studiis optabit, ut istorum Patrum dogmata animis fidelium imprimantur; validiusque patrocinetur, honori & nomini istorum Doctorum, quam novi-

tiis modernorum sectis, quæ quot habent capita, tot sententias. Illud denique certum est, existimationem istorum Patrum hîc in terris magnâ ex parte modo pendere à determinatione Concilii: eo ipso enim quo petitam confirmationem negabit, vires addet libertati, hoc ævo primum exsurgenti, quâ doctrina ipsorum adeò vilipenditur; & robur modernis novitatibus, quæ potius toto nisu compesci deberent.

Plurimum haud dubiè valet exemplum Principis; facileque in sententias suas populum trahit. Quo circa, si Senatus stet à parte Sanctorum Augustini & Thomæ, illico in eandem universa hæc Regna accurrent. Immo illimet qui hodie ipsis contradicunt, depositâ omni animositate, manus dabunt, primique volent doctrinam ipsorum sectari & illustrare: solet enim magno applausu eò ferri populus, quò Regis animus inclinatur. Patuit illud imperante Assuero; siquidem vix favit Religioni Judaicæ, & amoto Aman, Mardochæum assumit ad ministerium Regni, cum statim plurimi Gentilium ad eandem Religionem & ceremonias transferunt: tanti refert Autoritas Regia confirmandæ Religioni: *In tantum, ut ait sacer textus, ut plures alterius gentis & sectæ eorum Religioni & Ceremoniis jungerentur: grandis enim cunctos Judaici nominis terror invaserat.*

Quod si in hoc rerum statu, Concilium Regium per sententiam declarat iniquum esse, & revocandum Statutum & Juramentum quod Universitas tam insignis & celebris decrevit præstandum in defensionem Sanctorum Augustini & Thomæ; quis dubitet quin multò audacior fieret hodierna licentia contemnendi istos Sanctos Patres, plurimumque Autoritati ipsorum in his Regnis decideret; & è contrario effrenatæ recentiorum Theologorum opinandi libertati multum ponderis adderetur? Quid enim sibi persuaderent indocti & plerique rudiores, si reprobo Statuto sequendi absque oppositione Sanctos Augustinum & Thomam, approbaretur libertas pro cujusque cerebri captu sentiendi in Theologia Scholastica, nisi potiora esse Neothericorum commenta, doctrinâ istorum Patrum, quæ originem suam ducit ab ipso Evangelio?

Quæ res profectò magni momenti esset in Rep. Christiana, multumque deploranda, cum in Sancto Paciano Ep. 1. ad Sempronium: *Et nostram potius autoritatem Patres sequentur? & emendanda Sanctorum cedit antiquitas? & jam putrescentia*

vitiis tempora, canos Apostolica antiquitatis eradent? ut proinde jure merito pro Sanctis Augustino & Thoma credendum sit quod simile quid neutiquam in animum tam catholici & sacri Senatus cadet, vel aliàs quis non defleret horum temporum infelicitatem, ubi videret venerandam antiquitatis canitiem evelli, & duo hæc præclarissima Ecclesiæ lumina extinguui, injuriam autem & contemptum ipsorum confirmari.

Siquidem non erubuit recentior aliquis doctrinam S. Augustini de peccato originali, cui maximopere insudavit, à se malè intellectam, his verbis sugillare.

Verum opinio Augustini hoc modo intellecta Vasques 1. Theologis Scholasticis non probatur; & merito, ex eâ enim cogimur incidere in sententiam Pelagii, cum tamen sententia Augustini, quoad rationem formalem peccati originalis, certa sit & verissima. Immo ille ipse Auctor, postquam plures alios retulit, qui doctrinam istius Sancti Patris rectè & cum magno in scriptis ipsius fundamento intellexerunt; illos nihilominus respuit; studetque, quod aliàs frequenter in suis operibus, errores falsò imputare. Ille nimirum, qui multos paragraphos & numeros interdum impendit, ut placita quorundam Scholasticorum parvi nominis astruat, & de illis quodammodo fidejubeat, immò etiam quorundam hæreticorum errores defendat; prout manifestè constat ex ipsius operibus, ubi Amoneos Hæreticos excusat: dum interim rigidum Censorem agit Sanctorum Patrum, & quidem in materia quam Angelicus Doctor, & cum ipso quotquot Catholici Scriptores eam tractarunt, in vero & proprio sensu veterum Patrum explicarunt.

Similiter in materia de prædestinatione, Gratia & lib. arb. cui elucidandæ, Sanctus Augustinus omnes ingenii sui nervos intendit, calamumque suum quàm potuit subtilissimè acuit: & in quâ Ecclesia Catholica tanti illum facit & veneratur, ut Sacrosancta Concilia decreta sua verbis ipsius formaverint, uti ex illis ipsis dilucidè constat; & ex Epistola Hormisdæ Papæ ad Possessorem: quidam Neothericus ausus fuit asserere, quòd dum Sanctus Augustinus tenebris obvolutus in prædicta materia non percepit, quæ ipse postmodum penetravit, multi fideles disputationibus ipsius & sententiis fuerint turbati, à fide defecerint, atque ad partes Pelagianorum transferint.

Molina.

Sed operæ pretium est ipsiusmet verba

ba referre. Interim verò, inquit, dum sub ea quasi caligine D. Augustinus ad hoc non attendit. &c. Quia si semper data explanataque fuissent, forte neque Pelagiana hæresis fuisset exorta, neque ex Augustini opinione concertationibusque cum Pelagianis tot Fideles fuissent turbati, atque ad Pelagianos defecissent. Parcimus hic istorum Scriptorum nominibus; quæ dum Concilio libuerit, proferri poterunt. Omittuntur etiam, brevitatis causâ, plures aliæ hujusmodi Centuræ, quibus recentiores aliqui cum parvâ admodum veneratione de Sanctis Patribus loquuntur.

Quid autem in his temporum circumstantiis, quibus præstantissimi illi Ecclesiæ Doctores, Sancti Augustinus & Thomas, tam vili habentur, de jure & debito agendum sit, præscripsit olim Sanctus Prosper fidelissimus D. Augustini discipulus, in principio libri contra Collatorem. Indignabatur enim justo zelo in quosdam Galliæ Episcopos, qui tunc temporis doctrinam ipsius de prædestinatione & Gratiâ impugnabant, illumque his verbis expressit. *Gratiam Dei, quâ Christiani sumus, quidam dicere audent à sancta memoria Augustino Episcopo non rectè esse defensam, librosque ejus contra errorem Pelagianum conditos, immoderatis calumniis impetere non quiescunt. Quorum intus interstrepens domestica malignitas, non minus spernenda esset, quàm foris latrans hæretica loquacitas, nisi ejectis extra ovile dominicum lupis, sub nomine ovium suffragarentur; essentque hujusmodi, ut nec Ordo eorum in Ecclesia, nec ingenia despicienda videantur: si quidem habentes speciem pietatis in studio, cujus virtutem diffitentur in sensu, trahunt ad se multos ineruditos, & non habentia Spiritum discretionis corda conturbant atque in eum statum deducere causam Ecclesiæ moluntur, ut dum nostros affirmant non veraciter pro Gratiâ locutos, inimicos Gratiæ persuadeant injustè damnatos esse. Non ergo negligendum est hoc malum, quòd ab occultis pravisque seminibus augeatur quotidie, & ab ortu suo latius longiusque distenditur: sed studendum est, in quantum Dominus adjuvat, ut fallacium Calumniatorum hypocrisis detegatur; qui ex ipsa injuria magnitudine, quàm in uno (Sancto Augustino) cunctis ac præcipue Sedis Apostolicæ Pontificibus intulerunt, ab indoctis & parum cautis excellentioris scientiæ judicantur; & misero perversoque successu facilem mendacio consensum eliciunt, quia Reverentiam sibi præsumptione pepererunt.*

Verba ista merito sunt ponderanda,

conferendo casum de quo loquitur Sanctus Prosper, cum præsentis; servatâ proportionem & rerum circumstantiis: & attendendo quòd non agatur hic de proventibus aut opibus temporalibus, sed de honore & observantiâ debitâ Sanctis Augustino & Thomæ, eorumque doctrinæ. Expendamus itaque consequentiam quam deducit Sanctus Prosper, qui ex ipsâ injuria magnitudine, inquit, quàm in uno (id est Augustino) cunctis ac præcipue Apostolicæ Sedis Pontificibus intulerunt, ab indoctis & parum cautis, excellentioris scientiæ judicantur. Quis enim dubitat, quin si modò rejiceretur & improbaretur Statutum illud Universitatis, unusquisque judicaret victoriam tribui adversariis istorum SS. Patrum; eorumque dogmata posthac potius essent despectui quàm venerationi.

Considerandum quoque est, quòd illi de quibus agebat tum temporis Sanctus Prosper non essent hæretici, sed Catholici, & hujusmodi quidem qui scientiâ suâ & eruditione magnam sibi reverentiam & auctoritatem pepererant, uti loquitur idem Sanctus; & nihilominus censebat ipsos non posse contraire doctrinæ Sancti Augustini, sine manifestâ injuriâ & detrimento totius Ecclesiæ Catholicæ.

Facti sui exemplum habuit Academia ex Epistola decretali Cœlestini Pontificis, ad quem uno anno circiter post obitum S. Augustini, qui juxta Baronium contigit anno 431. recurrerunt sanctus Prosper & Hilarius, ut ipse auctoritate sua Apostolica compesceret multorum Catholicorum audaciam, qui ex tunc incipiebant adversus doctrinam S. Augustini insolenter insurgere, statimque Pontifex litteras desuper expedivit, in quibus præter alia hæc habentur, quæ Statutum Universitatis, & zelum quem pro debito suo hâc in re ostendit, multum confirmant. *Quid illic spei est, ubi Magistris tacentibus hi loquuntur, qui, si ita est, discipuli non fuerunt? Timeo ne connivere sit hoc tacere: timeo ne magis ipsi loquantur, qui permittunt illis taliter loqui. In talibus causis non caret suspitione taciturnitas; quia occurreret veritas, si falsitas displiceret. Merito namque causa nos respicit, si cum silentio faveamus errori. Quinam potius & rectius, post Sedem Apostolicam, nisi Universitatibus competit hujusmodi insolentias in studiis suis & Scholis reprimere, designando discipulis probatos Magistros quos sectentur? Et si in eo deficeret, patereturque quotidie in*

confessibus suis publicis, ut licentiosa nimis Juventus debitam Sanctis Patribus venerationem exueret; quisque sanus meritò judicaret, Universitatem tam enormis delicti & audaciæ esse complicem, quandoquidem & videret illa & dissimularet.

Prosequitur Coelestinus: *Ergo corripiantur huiusmodi, non sit his liberum habere pro voluntate sermonem.* Quæ verba profectò sunt notatu digna, ut non tam facilè permittatur doctrinarum & opinionum libertas, contra istos Sanctos Patres. Et mox subjungit: *Desinat Ecclesiarum quietem inquietudo turbare. Conantur sæpe naufragio mergere, quos intra portum stantes statio facit fida securos. Fida quippe est omnium statio, quorum perfectis gressibus vestigia non moventur.* Hic unicus scopus est quo collimavit Universitas, dum istud Juramentum decrevit, comprimere scilicet, quantum in ipsa erat, istam Reip: inquietudinem & illibatam servare auctoritatem, reverentiamque debitam doctrinæ Sanctorum Augustini & Thomæ.

Sententiam istam Coelestini Papæ multum exaggerat Sanctus Prosper loco supra citato his verbis: *Sancto manifestavit eloquio (Coelestinus nempe) quantum sibi istius præsumptionis novitas displiceret, qua auderent quidam adversus antiquos Magistros insolenter insurgere & indisciplina calumniâ prædicationi veritatis obstrepere.* Quæ si ita sint, eo ipso quoque comprobatur factum Universitatis, in his saltem rerum circumstantiis; colligiturque illud fuisse omninò necessarium, præsertim dum jam recentiores & novelli audebant in venerandam Sanctorum Augustini & Thomæ canitiem insurgere: & insistens vestigiis decretisque Pontificum, voluit securitati suæ consulere, adstringendo se doctrinis istorum Patrum; ipsosque agnoscendo inter præcipuos Ecclesiæ Magistros. Illud ipsum quod hisce temporibus experimur, expressit Coelestinus; & mandat ut coerceantur ac corripiantur illi qui doctrinam Sancti Augustini nolunt admittere. Dispiciatur itaque utrum magis expediet Statutum illud, quo Academia se subjecit & alligavit doctrinæ istorum Patrum; an verò licentia illos respuendi & impugnandi. Et si hoc posterius improbetur, juxta mentem prædicti Pontificis, nulli dubium esse potest quin Senatus in eandem quoque sententiam veniet, & decernet ut resistatur talibus quos male crescere videmus.

Docilitas est virtus æquè necessaria

discipulo ac Magistro; vix enim instrui quis poterit, nisi velit se doctrinæ subicere. Quòd si animadvertat discipulus Magistrum suum parvipendere Doctores Ecclesiæ, nec ipse doceri poterit, neque Magister docere. Ita censuit D. Thomas 22. q. 49. art. 3. ad 2. & 3. dum ait, *Quod ad ejus consummationem plurimum valet humanum studium, dum scilicet homo sollicitè, frequenter & reverenter applicat animum suum documentis Majorum; non negligens ea propter ignaviam, nec contemnens propter superbiam.* Quæ autem major superbia exurgere potest, quàm non solum nolle se subicere Sanctis Augustino & Thomæ, sed ipsis etiam contradicere. Hoc in Magistris suis & Professoribus requirit hæc Academia, ut veram æstimationem & auctoritatem sibi comparent. Idem quoque intendere dicenda est sacra Religio Societatis Jesu, dum non sine speciali instinctu Spiritus Sancti, in Constitutionibus suis sancivit 4. p. 1. c. 5. § 4. *Sequantur in quavis Facultate securiorem & magis approbatam doctrinam, & eos Auctores qui eam docent.* Quibus verbis sufficienter declararunt istarum Constitutionum Autores, quanti referat esse docilem, & se subicere doctrinæ antiquæ, certiori & probatori. Atque ad particularia magis descendendo, addunt c. 14. § 1. *Generatim (ut dictum est cum de Collegiis ageretur) illi prælegentur libri, qui in quavis Facultate solidioris ac securioris doctrinæ habebuntur.* Ut autem ejus rei exemplum exprimerent, in Theologiâ § 2. ubi præscribunt & determinant quinam sint illi Autores qui solidiorem & securiorem doctrinam continent, non invenerunt alium inter Doctores Theologos præstantiorem D. Thomæ: ita enim statuunt: *In Theologiâ legetur vetus & novum Testamentum, & doctrina Scholastica D. Thomæ.* Sicque Societas Jesu doctrinam S. Thomæ, ut securiorem verioreque, gravi auctoritate suâ comprobavit: quâ prærogativâ D. Thomas donatus est, ob summam venerationem quâ veteres Doctores semper est prosecutus: & per hoc non solum acquisivit tantam scientiarum plenitudinem, verum etiam omnium Sanctorum Patrum ingenia in ipsum quasi confluxisse videntur. Notavit hoc eleganter Cajet. 2.2. q. 148. art. 4. *Quia summè veneratus est Divus Thomas, Sacros Doctores; ideo intellectum omnium quodammodo sortitus est.* Pronam hanc venerationem religiosè colere statuit hæc Universitas: an verò

Jura-

Juramentum istud æquum sit & pium, iudicio prudentiorum relinquitur. Quod si Professores ipsi & Magistri parvipendant antiquos Doctores, vix fieri poterit, ut ipsi à discipulis suis honorentur. Argumentum est D. Athanasii in Epist. ad Episcopos Africanos: *Quisque enim eorum sibi persuadebat, si solverit aliquid ex decretis Majorum, occasionem se daturum posteris, ut quod ipsi egissent, rescinderent.* Et mox addit: *Quomodo eos quibus succedere, patres suos appellabunt, quorum sententias ipsi culpant? Aut quomodo ipsi veraces apud suos discipulos habebuntur, quibus persuadent Præceptoribus credendum non esse?* Quisquis Majorum suorum vestigiis non insistit, frustra credit se posteros habiturum sui sectatores. Quomodo denique, discipuli Magistros appellabunt Sanctum Augustinum & Thomam, si Præceptorem suum videant ipsorum dogmata explodere? & quid ex-inde nisi merum chaos & perniciofa confusio oriri potest? Ac per consequens ex allegatis apparet, nimiam istam horum temporum licentiam & insolentiam Universitatem coegisse, ut hujusmodi Juramentum præstandum decerneret. *Hucusque Apologia.*

Idem argumentum prosequitur doctissimus ille Coetus, subsequentibus paragraphis ex quibus paucula adhuc desumam. §. 5. n. 39. hæc habet.

APOL-
GIA.

Perpendebat Universitas, quod amplam licentiam permittere suis Professoribus pro libitu opinandi in Materiis Theologicis, absque ulla submissione aut dependentia à præcipuis Ecclesiæ luminaribus, nil aliud esset quam ipsos nimiae curiositati exponere, & habenas solvere Theologiæ, ut per insolita, peregrina & hactenus incognita vagetur: quæ tamen principaliter instituta est, ut veritates revelatas perfectè discutiat, mores instituat, & conscientias dirigat. Et licet Universitas nec velit, nec possit recentes doctrinas passim condemnare, nihilominus cum non immerito audeat se inter primas Orbis Christiani Academias numerare, hoc unum studet, ut tam Professores sui, quam discipuli sectentur quod in Ecclesiâ Catholicâ maximè tutum, antiquum, & comprobatum habetur, & idcirco tanquam Duces & Magistros ipsis proponit Sanctos Augustinum & Thomam, de quorum doctrinæ securitate ac soliditate abundè superius §. 3. dictum est.

Hac ratione, Universitas suæ existimationi consulit, & auctoritati quoque

Facultatis Theologiæ, ejusque Professorum, dum scilicet horum temporum novitates nullo modo admittit, sed potius pro virili sua illas cohibet. Quotidiana enim experienciâ didicit, Theologiam Scholasticam hoc tempore eidem fermè mutationi & varietati subjacere, cui mores & indumenta, & sub hac inconstantia, veritatem periclitari, & ipsius Theologiæ auctoritatem imminui; ut olim dicebat Sophronius, teste Socrate lib. 2. hist. Tripart. cap. 34. dùm in Concilio Seleucirano referebantur sententiæ Acacii: *Si per singulos dies propriam edere fidem licuerit, veritatis integritas non diu manebit.* Similiter de quodam Frenide, qui se magnum musicum jactabat, refert Plutarchus, quod citharæ suæ novem fides apposuisset, accessit autem Ephorus, & duas ex illis detraxit, inquiens: *Noli depravare Musicam, prisca Cantores non noverunt nisi septem chordas, quibus aliquid addere, ac Musicam pro simplici reddere operosiores, erit artis corruptela.*

Per plures annos dogmata Ecclesiæ pro majori parte conservata fuere in doctrina S. Thomæ, sic ut nullæ aliæ illi prævaluerint: & quamvis hæc aut illa Schola ex antiquioribus, ut puta Scotistica, magnam sibi quoque Auctoritatem acquisierit, & tutè frequentaretur, non idcirco tamen cruento bello inter se pugnabant, sed ad eruendam dumtaxat veritatem quandoque inter se velitabantur. Hoc autem moderamen turbaverunt recen-ter introductæ opiniones, ab antiquis omnino dissentientes, idque sine alio fructu, quam comparandæ sibi vanæ gloriæ ob excogitatas novitates. Nam si novitia illa commenta, quæ hodie adinveniuntur vel eruuntur, è profundo illo silentio, sub quo jam olim ab Ecclesia sepulta sunt, coinciderent cum sententiis S. Augustini & Thomæ vel Scoti, haud dubiè prorsus aliter & è converso vellent eas authores proponere, ut saltem istam laudem & gloriam reportarent, quod aliquid novi & à SS. Patribus illis diversi produxissent. Substitit aliquando Agesilaus Rex Lacedæmoniorum, referente Erasmo in Apophtegmatibus, ut ædificium quoddam spectaret, cujus trabes quadratæ erant: cumque ab ædium Domino percunctaretur, utrum in regione ista arbores quadratæ nascerentur, respondit, rotundas crescere, sed ex rotundis arte quadrari: cui Rex, quid? Ergone si nascerentur quadratæ, faceretis rotundas? Doctrina Ecclesiæ ab origine & Apostolorum

lorum tempore tradita est, ut ita dicam, rotunda, spherica & in forma perfecta; eo modo & formâ eam quoque conservarunt SS. Patres, quorum omnium compendia fuere SS. Augustinus & Thomas. Sed non defuit qui conatus est illam quadratam reddere, & si nata fuisset quadrata, vellet eam rotundare. Illud est cui Universitas intendit obviare, ut quandoquidem doctrina Ecclesiæ ab Apostolis formam sphericam acceperit, & SS. Patres sub eadem illam custodierint, illibata quoque servetur à Professoribus Universitatis, Decretum illud autoritate Senatus confirmari postulat, ut hoc modo ingenia novitatum cupida penitus secludantur: quæ graphicè descripsit Hormidas Papa in Epistola ad Possessorem, qua D. Augustini nomen & doctrinam mirificè etiam extollit: „Una pertinacis cura propositi, inquit, rationi velle imperare, non credere: contemptores auctoritatum veterum, novarum cupidi questionum, solam putantes scientiæ rectam viam qualibet concepta facilitate sententiam; eousque tumoris elati, ut ad arbitrium suum utriusque orbis putent inclinandum esse iudicium.

Ista tamen opinionum varietas & inconstantia, quæ quotidie magis magisque invalescit sine modo, quid nisi confusionem & tenebras inducere possunt; dum ad praxim reductæ damna irreparabilia in remp. invehunt, regimen animarum, conscientiarum, Magistratuum, & ipsius justitiæ ordinem omninò invertunt? Vix enim est aliqua propositio quæ facilimo negotio non reddatur probabilis. Necessè itaque est huic malo in ipso fonte & scaturigine mederi, reducendo, quantum fieri potest, licentiam opinandi ad terminos unius ejusdemque doctrinæ.

Quænam verò magis una est & conformis, quàm doctrina S. Augustini & S. Thomæ, qui tanquam splendida & purissima sidera, Ecclesiam Dei per tot seculorum decursum, absque ullo nævo aut periculo felicissimè illustrarunt?

Et num. 56.

Ex hac quoque opinionum diversitate ortum est illud malum, quòd plurimi viri pii & cordati hac ætate deplorant; ut nec Confessarius suos poenitentes, nec Jurisconsultus clientes suos ad id quòd tutius æquiusque est reducere, aut persuadere possint, eo quòd inveniantur alii Directores & Magistri qui laxiores & longè differentes sententias sequuntur, seque facillè accommodant inclinationi poe-

nitentis aut consultoris: & interea destruunt quod illi ædificant, neque conscientis medentur, neque tot illiciti contractus & commercia damnantur, in gravissimum & manifestum Reip. detrimentum.

Appositum huic rei exemplum refert S. Lucas in Actis Apostolorum. Accusabatur S. Paulus coram Concilio Judæorum, inimicorum Christi Domini, & qui adeò inter se discrepabant ob sectas Phariseorum & Saducæorum, ut discerni non posset, an majus esset odium quo simul in Christum ferebantur, an quò se invicem insectabantur. Apostolus autem ut manus ipsorum evaderet, reclamavit se Phariseum, quodque de spe & resurrectione mortuorum judicaretur. Vix hæc protulerat, cum ecce relictâ causâ principali, tanta inter ipsos excitata est contentio, ut nullo negotio S. Paulus liber evaserit. *Et cum hac dixisset, facta est dissensio inter Phariseos & Saducæos, & soluta est multitudo. Act. 23.* Potuit autem hoc artificio uti Apostolus, in illo casu ubi ipsi adversus fidem conspirabant, ut notat & asserit D. Greg. lib. 34. mor. c. 4. Chrysost. in istum locum Actorum; S. Thomas 22. q. 37. art. 1. ad 2. Sed supponamus casum in oppositis circumstantiis, quodque non S. Paulus coram isto tribunali accusetur, sed quidam scelestus & impius, qui ut se ab illis eximeret, assereret se Saducæum esse, & ob negatam carnis resurrectionem damnari: procul dubio Saducæi quoque Concilium commoverent ac turbarent; & ipse facinorosus interea, & vincula & supplicium evaderet. Illi nempe sunt effectus quos producit diversitas illa opinionum & sententiarum, quæ quamvis non semper fidem tangant, mores saltem concernunt, in quibus multum periculi versatur. Inde enim fit ut Confessarius non valeat poenitentem ab occasionibus peccatorum avocare, & in viam regiam salutis suæ, reducere, quia statim opponet factum suum esse probabile, & se habere Theologos qui secum sentiant; immò si nolit ipsum absolvere, non defuturos à quibus illud obtineat; sicque peccatis suis, usuris & lucris iniquis aliisque vitiis inhæret ac immoritur. In tantum enim probabilitates modò invaluerunt, ut vix detur contractus aliquis, quantumvis injustus, qui non habeat suos fautores ac vindices.

Nonnulli viri pii & docti attentius perpendentes generosum hoc Universitatis Salmanticæ Statutum, considerarunt Divi-

Divinam providentiam hac fortassis via decrevisse grave aliquod malum, quod in materia doctrinae hisce regnis imminerebat, avertere. Quamvis enim, opitulante Divina misericordia, tot jam seculis fidei integritas & puritas in hac Monarchia illibata servetur, non idcirco tamen illi est omnino debita & astricta. Eò enim peccata nostra excrecere possent, ut tam à superioribus quàm à subditis donum fidei in poenam auferatur; qua vicinas regiones ac provincias castigatas videmus. Quod si itaque illud contingeret (nam licet per Dei Gratiam procul adhuc absit, contingere tamen potest, juxta illud Philosophi, *Possibili posito in esse, nullum sequitur inconveniens*) quaeritur, quænam essent propugnacula &munitiones è quibus fides orthodoxa defendi posset & conservari in hac Monarchia, nisi Universitates? Vult itaque Deus ut

omnium prima ac celeberrima, jurisjurandi religione se adstringat doctrinis maximè sanis ac tutis, quales sunt eas quas à D. Augustino & S. Thoma excipimus: ut nempe dogmata istorum Patrum in Academiis radices firment; & in discipulorum animis, altè plantata, etiam à teneris amorem & reverentiam erga istos sanctos Doctores illis imprimant, pariterque succrescant, & hac ratione per innumeros illos discipulos, quos Universitates scientiis instituunt, & Reipublicæ subministrant, ab ea quoque præmemoratum illud malum & perniciēs avertatur. *Hucusque Apologia.*

Hæc succintè ex doctissima Apologia Salmanticensi, quibus tanquam clypeis & castrorum loricis Academiam suam à novitatum invasione generosi illi Sanctorum Patrum discipuli tutati sunt.

MONITUM TYPOGRAPHI DE SUBSEQUENTI OPUSCULO.

Cum ad finem Addendorum properarent opera, missa est ad me Narratio lata olim ab Hispanicis Inquisitoribus Censura adversus XXII. Propositiones Augustino injuriosas. Hanc ut illis subjungerem persuasit, & affinitas materiae & viri eruditi consilium, qui res Augustini lucis inde nonnihil accepturas putavit, nec ingratam fore doctissimo Historia Congregationum de Auxilliis Auctori novissimam hanc illius Appendicem.

NARRATIO

Rerum gestarum in negotio Censura ab Hispanicis Inquisitionibus lata adversus XXII Propositiones à Jesuitis eorumque affectis assertas contra S. AUGUSTINUM.

Quanta passus sit à Molinistis S. Augustinus post annum superioris seculi quadragesimum, quantopere periclitata sit sancti gratiæ Doctoris autoritas ac doctrina tot SS. Patrum, Conciliorum ac Romanorum Pontificum laudibus consecrata, pauci sunt qui nesciant. Eodem ferè tempore, eodemque æstu & impetu in illum insurrexerunt Molinisticæ Societatis succenturiati milites duo, alter in Academia Lovanienfi, alter verò in Parisienfi, uterque Theologiæ Professor.

In Parisienfi quidem Jacobus Pereyret doctrinam de Gratia in sua Navarrici Collegii Schola traditurus, præmisit *Apparatum ad Tractatum de Gratia*: in quo sanctissimi Doctoris auctoritatem nunc furtim aggreditur, nunc apertè oppugnat (verbalunt anonymi qui Apparatum confutavit) nunc aut ultra limites extendit aut attollit supra modum, ut postea coer-

cendo ac dejiciendo elidat: nunc aliorum Patrum, quorum patrocinio in variis de fidei doctrina controversiis Ecclesia causam suam contra hæreticos credidisse videtur, comparatione obnubilat eam, & quasi obtundit. postremò eam, in summorum Pontificum atque in Ecclesie Romane Catholicae totius injuriam sinistra, & malevola interpretatione convertit, quasi tantam auctoritatem aut usurpare ipse Augustinus, aut qui se ejus discipulos profiteri magno honori ducunt, eam proprio illius nomini & privata doctrina temerario ausu affinxerint, ac non à Sede Apostolica atque ab Ecclesia universa traditam tueantur.

Deinde passim per Apparatus sui decursum apertè affirmat inter alia summos Pontifices doctrinam S. Augustini aliquo pacto improbasse; in aliquibus Augustinum inconstantem & varium esse, nec unius labii & scientiæ; fursurosos esse aliquos ejus

libros; senioris Augustini Hipponensis nonnullas esse Propositiones etiam nunc scandalosas, & immitentes offensionem in pias aures; damnatas quasdam in Baio & Jansenio; genuinas ejus opiniones damnatas à Pontificibus & à Facultate Parisiensi; Urbani VIII. in Bulla edenda mentem non fuisse ne præjudicium doctrina S. Augustini asserret, &c.

Contra verò de Molina, ut verbo dicam, ejus doctrinam judicasse Augustino contrariam non fuisse censurâ afficere; damnatam non fuisse à Pontificibus; immò absolutorio Inquisitionis judicio esse probatam.

Audaciam & temeritatem Apparatoris retudit Scriptor doctissimus, libro quem tacito nomine publicavit Parisiis cum Regis Privilegio anno 1650. sub hoc titulo: *Quæ sit S. Augustini & doctrina ejus autoritas in Ecclesia... in quo excutitur Apparatus ad Tractatum de Gratia publicè traditus in Collegio Navarrico à M. Jacobo Poreyret Theologo & Professore Parisiensi.*

Huic Augustini adversario præiverat Lovanii Joannes Schinkelius Molinistarum extra Societatem militantium antesignanus. Is eo temeritatis prorupit, ut scribit insignis Academia Lovaniensis Theologus in manuscripta D. Augustini Apologia, ut perruptis agminibus ipsum Augustinum cominùs aggrediretur & in scholis publicis illius Universitatis non tantum viva voce injuriosissima quæque, ipsis etiam hæreticis insolita, in venerandum istum Præsulem pronunciaret, sed quo vulnera altiùs infligeret, discipulis quoque suis prælegeret & dictaret Tractatum à se compositum de auctoritate S. Augustini, in quo nihilo mitius Sanctum illum Doctorem excepit.

Recensitis nonnullis Schinkelii propositionibus, quæ infra repræsentabuntur, cum Augustino exclamat pius ejus Apologista: *Vide quantum in pejus proficiunt, cum sine limite timoris vel pudoris hac atque illac vagabunda fertur impunita garrulitas.* Hæc tamen non evasit impunita. Nam Academia Lovaniensis graviter exulcerata, quod præcipui Magistri sui nomen & auctoritatem tam impiis dentibus dilaceratam videret, hominis istius audaciam detestata, scripta quoque ipsius publico Decreto reprobavit 24. Maii 1644.

Neque his contenta, ultra ipsas Alpes remedium quæsitit quo auctoritatem Magistri sui vindicaret, & petulantes istas linguas compesceret, atque primos illos ejusdem Sancti Patris discipulos Prosperum & Hilarium imitata, qui Romam ad Cœlestinum Papam profecti aliquando

fuerunt, querelæque de Gallorum Semipelagianorum petulantia adversus S. Augustinum, deposuerunt: per binos quoque Deputatos suos Apostolicam Sedem accessit, atque exsurgentem hodie Semipelagianam in eundem Augustinum temeritatem Urbano VIII. Pontifici exposuit, auctoritatemque ipsius pro eadem retundenda instanter imploravit, hoc subjuncto supplici Libello.

SANCTISSIME PATER.

Doctrinam, quam contra inimicos Gratiæ Dei quâ Christiani sumus, excellentissimæ auctoritatis Doctor Augustinus Apostolicè asseruit, & Catholicæ Ecclesiæ dotem Prædecessor tuus Clemens VIII. appellare non dubitavit, nonnulli occasione arrepta ex Bullâ nuper in lucem emissâ, adversus Cornelii Jansenii Episcopi Iprensis Augustinum, infamare præsumunt, asserentes, *Quadam dogmata ab Augustino in terminis asserta, à Sede Apostolica in terminis esse damnata.* Hujus præsumptionis perniciosâ temeritas adversus antiquos Magistros insolenter se erigens, & in injuriam Prædecessorum tuorum Innocentis, Zozimi, Bonifacii, Cœlestini Sixti, Leonis, Felicis, Gelasii, Hormisdæ, Joannis, Gregorii, Martini, Clementis, aliorumque redundans, Academia Lovaniensis, pro suâ erga Sedem Apostolicam Religiosâ observantiâ, viscera non mediocriter conturbavit, eo vel maxime quod non privatim, aut in cubiculis, sed palàm & ex pulpitis hujusmodi calumniis præstantissimi Doctoris memoria carpatur, applaudentibus hæreticis undequaque circumjacentibus, & Augustinum (cujus auctoritate potissimum à Catholicis hætenus premebantur) exauctorari gaudentibus. Hinc est quod dicta Academia Deputatos suos, Illustrissimorum etiam Ordinum Ducatus Brabantiae Commissionariis litteris instructos, ad Sanctitatem suam ablegaverit, ut de opportuno remedio contra perniciem istam providere dignetur. In quem finem supplicant humillimè dicti Deputati, nomine suorum Deputantium, quatenus sua Sanctitas dignetur uberiores hujus causæ cognitionem Cardinalium & Theologorum Congregationi committere, qui auditis Oratoribus, plenèque informati, Sanctitatem suam competenter informet, & remedium quo prædictis incommodis tempestivè obviari possit, suggerant.

Sed Urbano VIII. paulò post è vivis sublato, remedium intermissum fuit: quod

Augustinus
Ep. 6.
nunc 29.
num. 4.

A. 1643

A. 1644

quod tamen ab ipso non frustra sperandum videbatur, quippe qui in primo istorum Deputatorum alloquio, apertè declaraverat, *Intentionis suæ neutiquam fuisse ullum præjudicium S. Augustino procreare*, (editione scilicet præfatæ Bullæ adversus Librum Jansenii) immò quicumque contrarium asserere præsumerent, cohibendos esse.

26. Nov.
1643.

5. Nov.
1644.

Itaque Innocentium decimum, Urbani in Cathedrâ Apostolicâ successorem, rursus interpellant porrecto ipsi novo Libello supplici, hîc subnexo.

SANCTISSIME PATER.

a Cælestin.
Papa Ep.
ad Epif.
Gall. c. 3.

Quemadmodum olim ex transalpina Gallia Religiosissimi Patres * Prosper & Hilarius, ad Apostolicam recurrerunt Sedem, velut fidei Magistrum, penes quam incorrupta Patrum servatur hæreditas, remedium flagitantes quo Pelagianorum reliquiis B. Augustini Antistitis doctrinam vellicantibus, adimeretur usurpata maleloquentiæ libertas: ita nuper ex inferiori Germania ad eandem recurrit Lovaniensis Universitas, suppliciter per Deputatos suos exposcens & obsecrans, ut devotissimæ Filiæ, pro manu tenenda antiquitate sollicitæ, maternis compateretur visceribus, & prostratæ dudum à Papa b Cælestino licentiosæ garrulitati, post tot secula recrudescenti, medicinalem coercionis obicem præstrueret, quem nullatenus contentiosæ linguæ transgredi præsumerent: usque adeo etenim Neotericorum quorundam adversus tot Pontificum oracula, tot Conciliorum elogia, tot Patrum ac Scholasticorum in D. Augustinum cumulata suffragia obsurdescens excrevit audacia, ut per calcatam tanti Doctoris auctoritatem ad commentorum suorum machinas solidandas prodigiosum pontem adornent. Hinc auditoribus lectoribusve suis hujusmodi superciliosa propinant prædicamenta.

b Ibid. c.
2. 3.

1. Augustini quædam dogmata, ab Apostolica Sede in terminis esse damnata.

2. Miseram fore Ecclesiam, si Augustini placitis obstricta maneret.

3. Ecclesiam à tutela & pædagogia Augustini esse vindicandam.

4. Augustini auctoritatem non plus valere, quam rationes quas allegat evincant.

5. Augustinum fuisse Doctorem perinde ac alium quempiam etiam moderorum.

6. Augustini dotes, seu naturales seu infusas, non fuisse altioris ordinis quam aliorum Doctorum etiam Scholasticorum.

7. Si post Augustinum nihil Christianæ eruditioni accesserit, Scholasticam Theologiam penitus rejiciendam fore.

8. Augustini auctoritatem interponentibus respondendum esse, Ecclesiam in suis filiis usque hodie crescere etiam eruditione.

9. Augustinum Juliani Pelagianistæ argumentis non satisfacisse.

10. Si triumphus Ecclesiæ de Pelagianis niteretur posterioribus Augustini scriptis, immeritò de iis illa triumphasset.

11. Volentem sustinere partes Juliani, non posse rationibus convinci.

12. Augustini Theologiam de originali peccati traduce esse rusticanam.

13. Ex Augustini opinione de peccato originis, cogi nos incidere in sententiam Pelagii.

14. Augustinum Sacrarum Litterarum auctoritatem sua expositione enervare, & ludibrio infidelium exponere.

15. Augustinum quasi sub caligine constitutum, ad veritatem à recentioribus inventam non attendisse.

16. Augustini sententiam fidelium non paucos turbasse, ejusque auctoritate percussos in Pelagianismum declinasse.

17. Augustini sententiam à multis duram nimis, indignamque Divina Bonitate ac Clementia judicari, non mirum.

18. Ab Augustino aliisque idem sentientibus peti posse, undenam suæ scientiæ certitudinem hauserint.

19. Augustini vestigiis non esse insistendum, sed aliter philosophandum.

20. Augustini locutiones, quamvis aliquo sensu veras, improprias tamen esse, nec passim frequentandas.

21. Utrum Augustinus contra quod sentimus sentiat, non admodum referre.

22. Non rectè dici: Illud saltem necessariò ab omnibus esse tenendum, quòd Augustinus asseruit, nec retractavit.

Hæc sunt, Beatissime Pater, specimina machinarum quibus cervicosa philautia,

contra * validissimam turrin speculæ pa-

storialis arietat; sannarum quibus novella

dicacitas venerandæ antiquitati insultat;

morsuum quibus solidissima * illa doctrina

laniatur, quâ novorum hæreticorum

commenta disjecit, & diabolicum tumorem Pelagianæ elationis elisit: doctrina ni-

mirum illa sublimis, quam * secundum

Prædecessorum tuorum inviolabile insti-

tutum, Romana sequitur & servat Eccle-

sia, quamque in deliberationibus doctrinalibus f consulendam, in obsecrationibus

c Prosp.
cont. Collat.
cap. 41.

d Ibid. c. 1.

e Joann.
Papa 2. E-
pist. ad
Senat.

f Hormisdæ
Papa Epist.
ad Posses.

^a *Cœlest. Papa Epist. ad Episc. Gall. c. 11.* ritualibus ^a exprimendam, in congregationibus synodalibus præscribit ^b decernendam: illa, inquam, doctrina cum qua non solum ^c Romanam Africanamque Ecclesiam, sed & per omnes mundi partes universos promissionis filios antiquitus congruisse compertum est. Non ergo negligenda est obrectatorum correptio, ^c *Prosp. Ep. ad Ruff. d. Prosp. lib. cont. Collat. c. 1.* in eum statum deducere causam Ecclesiæ molientium, ut dum Augustinum jactitant non veraciter pro gratia locutum, inimicos gratiæ persuadeant injustè damnatos esse, & victricis Ecclesiæ Triumphum indisciplinatis scommatibus inaniant. Qui ^e ex ipsa injuriæ magnitudine, quam in Augustino fidelibus cunctis, sed præcipuè Apostolicæ Sedis Pontificibus impunè irrogant, ab indoctis & parum cautis excellentioris scientiæ judicantur, & misero perversoque successu, facilem obloquiis consensum eliciunt, quia reverentiam sibi præsumptione pepererunt. Incredible namque apparet quamplurimis, qui autoritate eorum sine discretione ducuntur, aut ^f tarditate eos intelligentiæ, aut temeritate judicii in superciliosæ querelæ conclamationem prorupisse: ac non potius magno ingenio vehementique studio laborasse, ut subtilissimi tractatoris disputationibus comprehensis censura nunc districtior & inspectio sagacior inveniret, quod antea securus favor & benignitas incuriosa non viderat.

^g *Art. 8. hic supra.* Hac quippe ratione præsumunt ^g asserere, Ecclesiam usque hodie in suis filiis crescere eruditione: nec advertunt quòd dum eruditionem suam plus æquò extollunt, ignorantiae caliginem superiorum seculorum Ecclesiæ offundunt: atque ^h *Art. 3. ibid.* ita dum ^h Ecclesiam Augustini pedagogiæ subducere moliantur, ⁱ sectariorum hujus temporis pestilentissimum dogma stabiliunt. Ut hinc vel mediocris diligentiae indagator perspiciat, ^k ad quæ præcipitia perveniatur hisce callibus, & in istam lutulentorum rivorum cænosam ubiginem cuius voraginis humor exsudet. Tuæ igitur pastoralis providentiæ est, Pater Sanctissime, vigilanter despicere, quid facto opus sit, ut novorum Censorum superetur vel temperetur intentio. ^l Cui haud facile quispiam, præter paucos perfectæ Gratiae intrepidus amatores, audet contrariè, ^m ex quo non solum his qui eos audiunt, verum etiam ipsis qui audiuntur, cum æstimatione crevit periculum: dum & multos reverentia eorum aut inutili cohibet silentio, aut incurioso ducit assensu, & saluberrimum ipsis videtur, quòd pe-

nè nullius contradictione reprehenditur.

ⁿ Sanum enim putant esse quòd non do-ⁿ *Ibid. in fine.* let, nec vulnus superductâ cute sentiunt. Sed intelligant perventurum ad sectionem quod habuerit perseverantem tumorem. Experiantur in Sanctitate tua hæreditarium zelum, quo adversus priscos Augustini æmulos prædecessor Cœlestinus incanduit, ^o evidenter pronuntians, quantum sibi istius præsumptionis novitas ^o *Ibid. in fine.* displiceret, quâ auderent quidam adversus antiquos Magistros insolenter insurgere, & indisciplinatâ calumniâ prædicationi veritatis obstrepere. Insonet auribus Beatitudinis tuæ memoranda illa ejusdem Cœlestini parænesis; ^p *Corripiantur hujusmodi, non sit eis liberum habere pro voluntate sermonem. Desinat incessere novitas vetustatem, desinat Ecclesiarum quietem inquietudo turbare.* Insonet & illud Papæ Sixti Cœlestino succedentis edictum: ^q *Nihil ultra liceat novitati, quia nihil ad di convenit vetustati.* Quorum prædecessorum vestigiis insistens, Pater Beatissime, ^r adde eruditionem humilibus, adde increpationem superbis. ^s *Necessarium quippe & utile est, etiam quæ scripta sunt scribere, ne leve existimetur, quòd non frequenter arguitur, & plures insolescant, dum insolescentibus connivetur.* Compescatur igitur te providente temeritas, aboleatur novitas, stabiliatur antiquitas, feriat sermo iste Beatitudinis tuæ aures, quo cognominem prædecessorem tuum Innocentium primum Synodus Milevitana obtestata est, & quo Sanctitatem tuam Lovaniensis Universitas pedibus provoluta interpellat, ^t *Quia te Dominus gratia sua præcipuo munere in Sede Apostolica collocavit, talemque nostris temporibus præstitit, ut nobis potius ad culpam negligentia valeat, si apud tuam venerationem, quæ pro Ecclesia suggerenda sunt, tacuerimus, quam ea tu possis vel fastidiosè vel negligenter accipere, magnis periculis infirmorum membrorum Christi, pastorem diligentiam, quasumus, adhibere digneris. Deus &c.*

^u *LIBELLI hujus elegantia, mira eruditio & pro Sanctorum Patrum defensione ingenuus vigor, ita Pontificem Innocentium in sui admirationem rapuit, ut in Autoris quoque laudes ultrò erumperet, & post repetitam ejus lectionem, Ministro qui sibi à Secretis aderat, palam assereret; Romanam Curiam viris talibus carere, eumque mereri qui illic detineretur ac promoveretur.* Et procul dubio tot Pontificum in D. Augustinum ejusque doctrinam suffragia, tot in illius obrectato-

res fulmina, etiam Innocentii animum commoverunt ad Prædecessorum suorum imitationem. Nam Libellum supplicem ad S. Officii Congregationem misit. Sed adversariorum potentia, artes & falsæ suggestiones ita prævalere, ut tam necessariam S. Augustini defensionem exprimere tunc ab illa non potuerit solita illa & hæreditaria erga tantum Doctorem reverentia & observantia.

Et hæc Romæ gerebantur anno 1644. Post aliquos verò annos, nimirum anno 1649. alia ejusdem Universitatis legatio ad Regem Catholicum decreta est; Hanc obiêre duo ex illa selecti Theologi Dominus Recht & Dominus Gillemans, qui eodem anno Matritum advenere.

Contigit porrò anno sequenti 1650. ut per Hispanias spargeretur Libellus in quo legebantur duæ & viginti illæ Propositiones in Beatum Augustinum contumeliosissimæ. Has quippe ex Libello supplici superius descripto excerptas Pater Gonçalves Ordinis S. Dominici, Conventus Atocensis Prior, primitus miserat Patri Arragonio ejusdem Ordinis, in Academia Salmanticensi Theologiæ Professori Primario, præfixo illis hoc titulo: *Propositiones à Jesuitis prolata contra S. Augustinum*. Eisdem Arragonius exhibuit Patribus Augustinianis cæterisque illius Academiæ Theologis, quos omnes mirum in modum ea res perculit.

Senferunt Patres Augustiniani contumeliæ per illas 22. Propositiones Beato Patri illatæ atrocitatem, atque adeò statuerunt pro viribuseam propulsiare. Porro nihil ad eam proterviā reprimendam validius visum est, quàm rem ad Regem deferre, ac petere Mandatum regium ad Inquisitores fidei, quo juberentur Divi Augustini auctoritatem tueri, easque propositiones eâ quâ dignæ erant, censurâ notare. Beati Patris Augustini causam adversus eos qui ejus auctoritatem doctrinamque oppugnabant, defendendam suscepit Pater Bartholomæus de los Rios Augustiniani Ordinis alumnus, qui 25. annis in Belgio demoratus fuerat, acerbique erat Beati Patris sui Discipulus.

Hic, ut captam à se provinciam impleret, ineunte martio, Augustino Villavencio supremo in Hispaniis fidei Inquisitori, viro erudito, obtulit libellum supplicem, quo ad eum deferbat 22. illas propositiones, censuramque in eas efflagitabat, demonstrato quantum Religionis catholice interesset, ut Doctori Sanctissimo Augustino, primario Ecclesiæ columini, sua

autoritas integra & inviolata conservaretur.

Ejusdem mensis die tertio supremus Inquisitor misso è ministris suis uno ad Joannem Recht Universitatis Lovanienfis Doctorem Theologum, rei quæ agebatur ignarum, ei mandat ut ad se die insequenti veniat. Rumor quippe sparsus fuerat ab eo propositiones illas fuisse vulgatas.

Continuò vir ille quarto die martii ad summum Inquisitorem se confert; à quo ex juris formulis interrogatus de 22. illis propositionibus, de Autoribus, deque earum in Hispanias delatione, respondit non paucas ex illis in libris Jesuitarum inveniri, alias Lovanii cum ingenti totius Academiæ offensione & scandalo anno 1643. & 1644. traditas & dictatas à Joanne Schinkelio Academiæ seniore Doctore, qui, dogmata discipulis suis tradita, tueri non poterat, nisi Divi Augustini auctoritatem everteret; à Joanne Sinnichio ejusdem Facultatis Doctore atque apud Romanum Pontificem ejusdem Academiæ atque eodem titulo, quo ille Madriti esset, Oratore, summa fide eas propositiones collectas fuisse, atque insertas Libello Memoriali quem Innocentio X. obtulerat; atque adeò ex illo ipso libello, qui per prelum publicus factus erat, sine dubio excerptas esse, & in Hispanias manasse.

His rebus cognitis supremus fidei Quæsitores propositiones illas examinandas curat, iisque ad Commissarium Generalem Fratrum Minorum sigillatim missis, ejus de iis sententiam rogat. Ille, cum perlegisset, censere se respondit, omnes esse vehementissimè suspectas; è pectore hæretico sine dubio prodiisse; actum esse de Ecclesiâ si sic pedibus conculcarentur Augustini auctoritas; atque adeò eas è libris scriptisque omnibus in quibus reperirentur, expungi oportere.

Tandem die martii decimo octavo à supremo Inquisitorum fidei tribunali manavit Decretum, quo 22. illæ propositiones proscribentur tanquam respectivè falsæ, improbabilis, absurdæ, malesonantes, piarum aurium offensivæ, temerariæ, erroneæ, sapientes hæresim, & in sanctitatem, pietatem, doctrinamque Gloriosissimi Patris Sancti Augustini, inclyti Ecclesiæ Columinis, contumeliosæ. Verum illius decreti promulgatio ob causas hætenus ignotas, dilata fuit. Cæterum Inquisitores Vallisoletani Decretum ediderunt quo, eadem censurâ propositiones illas 22. notabant, promulgatumque illud decretum fuit Vallisoleti & Burgis

eodem anno 1650. uno è diebus Dominicis Quadragesimæ.

Die Martii decimo nono, nempe postridie quàm à supremis fidei Inquisitoribus Decretum editum erat, à Sancti Officii Secretario monetur Joannes Recht, è re futurum si Regi ostenderetur Libellus memorialis, qui à Sinnichio Innocentio X. oblatus fuerat, quo in Libello 22. illæ propositiones referebantur, & ad summum Pontificem defererentur.

Primo die mensis Aprilis Regni Valentia Inquisitores easdem propositiones eadem censurâ qua supremi in Hispaniis fidei Inquisitores, notaverunt, eaque in omnibus locis consuetis vulgata fuit, ut testatur Provincialis Augustinianorum apud Arragones in Epistolâ ad Patrem de los Rios data post tres à censurâ menses.

Die Primo & vigesimo mensis Aprilis cùm Joannes Recht Academia Lovanensis Orator officiosè viseret Patrem Ildefonsum Miguel Dominicanum in Universitate Complutensi Theologiæ Professore primarium, ab eo intellexit assertum fuisse à Regis Confessario, propositiones illas 22. à fidei Inquisitoribus censurâ notatas esse, seque Compluto ejus rei gratiâ venisse, ut à Patre Confessario illius censuræ exemplum peteret: sed fortè eum abesse.

Interea cùm decretum illud non vulgaretur, resque illa altissimo silentio premeretur, Patribus Augustinianorum Provinciarum Castellensis, Tarraconensis, & Andalusensis Comitibus Provincialibus mense Maio habentibus, Pater de los Rios tanta orationis vi docuit, calumnias eorum qui Sancto Augustino obrectarent ferri non debere, suumque esse Patris communis honorem defendere, ut in illis comitiis decretum fuerit, omni qua liceret ratione obrectatoribus obstandum esse; rei que illius gerendæ & communi omnium nomine persequendæ curam tres præfatæ Provinciæ Patri de los Rios demandarunt.

Item Patres Dominicani Salmanticenses Comitibus provincialibus eodem mense Maio habitis perpendentes, Beati Thomæ Aquinatis auctoritatem collapsuram, si Sancti Augustini auctoritas, qua altera nixa esset subverteretur, decreverunt ut Provincialis Regem, supremum Inquisitorem, Regisque Confessarium adiret, enixè que efflagitaret propositionum illarum censuram; deinde litteræ darentur ad alias Provincias, ut conjunctis animis & viribus resisterent iis qui Sancti Augustini auctoritatem & doctrinam everte-

re nitebantur. Hæc facta fuisse ut decretum erat, non est dubium.

Provincialis Augustinianorum Castellanus & Bartholomæus de los Rios à Comitibus Madritum reduces, continuo cœperunt exsequi quod in Comitibus captum erat consilium, atque adeò Provincialis ille die decimo mensis Junii, aut circiter eundem diem, præcepit Patri de los Rios, ut sine mora Regem adiret, doceretque quàm arroganter Jesuitæ eorumque affectu de Sancto Augustino loquerentur: ab iis de Augustino ea dici & scriptis publicis mandari, quibus non aliud ageretur quàm, ut primarii illius Ecclesiæ Doctoris auctoritas & doctrina everterentur.

Igitur Pater de los Rios ut Provincialis sui jussu faceret, unaque rem sibi à tribus Provinciis demandatam, atque in se lubentissimè receptam exsequeretur, petit ut sibi Regem remotis arbitris liceat alloqui, quòd eo facilius concessum est, quòd Regius esset Ecclesiastes. Admissus ergò ad privatum cum Rege colloquium die 18. mensis Junii tot cùm gemitibus tamque uberibus lacrymis injurias Divo Augustino à nonnullis Theologis Neotericis contumeliosè & arroganter illatas demonstravit, malaque, quæ nisi eorum audacia & protervia reprimeretur, Ecclesiæ & Religioni Catholice timenda essent, exposuit, ut Rex ejus oratione tactus & animo commotus polliceretur se ea de re ad summum Pontificem scripturum, auctoritatemque nominis sui interpositurum ad tuendum inclytum illum Ecclesiæ Doctorem Augustinum, facturumque ea omnia quæ utiliora viderentur ad comprimendam illorum audaciam, qui eam Religionem cujus ipse defensor esset, aggredierentur sub nomine illius quo tanquam firmissimo columine niteretur. Tradito deinde Regi Libello memoriali quo ea omnia quæ verbo docuerat, scripta continebantur, & in quo duæ illæ & viginti propositiones verbis propriis referebantur, promissis regiis lætissimus discessit.

Junii die 25. Pater Franciscus Gonzales Dominicanus, Conventus Atocensis Prior, supremum Inquisitorem convenit, propositionum 22. negotium commendaturus. Responditque Inquisitor, in ea re non esse opus commendatione tùm quòd id negotium ut proprium susceperet, tùm quòd propositiones illæ proscriptæ essent & censurâ jam tùm notatæ.

Eodem die Pater Bartholomæus de los Rios cùm intellexisset latum esse censuræ

Decre-

Decretum, Libellum supplicem supremo Inquisitori obtulit, quo trium Provinciarum Castellanae, Tarraconensis, & Andalusienfis nomine petebat, ut sibi Censurae exemplar authenticum tradere-
tur, facultasque fieret illud prelo subjicien-
di, mittendique ad omnes Ordinis sui Con-
ventus, in Tabulariis domesticis repo-
nendum. Deinde eum rogavit conaretur
per litteras efficere apud Pontificem, ut ad
commune Ecclesiae bonum injuriam Di-
vo Augustino per 22. illas propositiones
illatam ulcisceretur. Id in se recepit In-
quisitor: qua spe accessit animus Patri
de los Rios, libertateque dicendi usus,
demonstravit ad frangendam hostium Au-
gustini, immò potius hostium Ecclesiae
superbiam, non esse satis viginti duo illa
eorum asserta notasse; sed, quo altius sen-
tirent vulnus, è re futurum mandare, ut
ex omnibus libris scriptisque, in quibus
essent, expungerentur.

Nec satis fuit Patri de los Rios pro-
scriptas fuisse propositiones illas per In-
quisitores supremos Hispaniarum, per
Vallisoletanos & Burgeneses: dedit etiam
operam ut idem fieret ab minorum loco-
rum Inquisitoribus. Quocirca 28. men-
sis Junii à Provinciali Andalusiae per lit-
teras petiit, ut illius Provinciae Inquisito-
res suscitaret, efficeretque ut 22. illas pro-
positiones non tantum proscriberent, sed
decreto dato mandarent ut expungeren-
tur ex omnibus libris scriptisque in qui-
bus legerentur. Die verò secundo
mensis Julii litteris datis ad Patrem Tho-
mam Figuerola Provinciale Tarraconen-
sem petiit ab eo, ut causae communis
studio operam daret, ut Inquisitores novae
Carthaginis, Valentiae, atque aliarum Ci-
vitatum Regni Tarraconensis, non solum
eas propositiones proscriberent, verum
etiam edicto mandarent, ut ex omnibus
libris in quibus essent, eraderentur. Sed
in hoc Provinciali vehementer falsus est
Vir optimus Pater de los Rios: ille enim
erat non tam Augustini Filius & disci-
pulus, quam Jesuita & Molinae Sectator.

Quinto die Julii Provincialis Andalu-
sienfis litteris ab eo acceptis respondit:
multisque gratulatus summum ejus pro
causa communi studium, aiebat existimare
se Inquisitores Andalusienfes facile in sen-
tentiam supremæ ac generalis Inquisitionis
Hispanicae ituros, & propositiones de-
latas ac proscriptas etiam ex libris ex-
puncturos, si illa exemplo præiisset; ve-
rùm videri sibi non esse per se ipsos ad
eos accedendum aut instandum ut ejus-

modi censuram sententiamque ferrent,
quòd animo prævideret fore ut si id ab
iis peteretur, multæ & longæ nasceren-
tur tricæ, moræque aliæ ex aliis neckerentur.

Duodecimo die Julii Provincialis Tar-
raconensis responsum dedit Patri de los
Rios humanissimum atque officiosissi-
mum; ex quo intelligi poterat quod esset
ejus pro tuenda Patris Augustini auto-
ritate & doctrina studium. Scribebat sibi
negotium de quo agebatur, per Patris de
los Rios litteras sic esse perspectum, ut de
eo, cum iis quorum intererat (id est,
cum Jesuitis) agere posset. Deinde si-
gnificabat ab Inquisitoribus Tarraconensi-
bus jam indè primo die Aprilis manasse
decretum in publicum quo propositiones
illæ 22. proscribebantur & notabantur
tanquam falsæ, improbabilis, absurdæ,
malesonantes, piarum aurium offensivæ,
temerariæ, erroneæ, sapientes hæresim,
& in sanctitatem, pietatem, doctrinam-
que S. Patris Augustini, inclyti Eccle-
siae Columinis, perquam contumeliosæ.
Tum zelum prudentiamque extollebat
quæ elucerent in ejus cum Rege collo-
quio, libelloque nomine omnium Provin-
ciarum oblato. Ad extremum pollice-
batur se nihil omisurum eorum quæ ad-
jumento esse possent in negotio tam glo-
riosè tamque justè ab eo suscepto; ex-
hortabaturque ut eodem studio quo cœ-
pisset, rem illam apud Regem perseque-
retur; neminem enim esse qui ad id ma-
gis esset idoneus, quippe qui in Belgio
multis annis demoratus, inde rediisset re-
rum illarum scientissimus.

Sed postquam cum Jesuitis de 22.
propositionum negotio contulisset, repen-
tè mutavit, sin minus sententiam, certè
orationem. Quin etiam libello scripto
non una ratione contendebat ab ea re de-
sistendum esse, quippe quæ ad Rempu-
blicam pertinere videretur. Scriptum il-
lud 26. die Julii cum adjuncto epistolio
misit ad Patrem de los Rios: quæ res
cum vehementissimè eum perculisset, nihil
tamen motus ineptis rationibus viri illius
ignavissimi, novos animos sumpsit, seque
in proposito confirmavit. Mox eas ra-
tiones confutavit, quàmque infirmæ essent
demonstravit scripto quod invicem misit
illi Provinciali, Viro parum digno qui
in Augustiniana Familia censeretur. Si
cui lubeat & rationes illas scire, & ea-
rum videre confutationem, legat scripta
ad finem hujus narrationis posita.

Sub finem mensis Augusti Bartholo-
mæus de los Rios rursus ad Regis pedes
prostra-

prostratus alterum Libellum supplicem obtulit, quo trium Provinciarum Castellanae, Tarraconensis, & Andalusienfis nomine flagitabat ut Rex, interpositâ autoritate suâ apud Innocentium X. peteret decreto Pontificio sententiam Inquisitionis generalis Hispanienfis, jussu Regis in 22. propositiones latam, confirmari.

Sub idem tempus Pater de los Rios Libellum supplicem obtulit Inquisitori generali, quo nomine earundem Provinciarum exponebat decretum Censuræ ab eo latæ in 22. propositiones in publicum editas quibus Sancti Augustini autoritas convellebatur, neque Madriti neque in ullo Oppido Archiepiscopatus Toletani fuisse promulgatum, quamquam Censuræ exemplaria ad omnes Regni Hispaniarum Inquisitores ideò missa essent, mandatumque ut solenniter ubique promulgaretur. Quare supplex petebat ab Inquisitore generali mandari, ut Madriti, Toleti, inque Oppidis omnibus illius Archiepiscopatus Censura publicaretur, designatis & ad verbum expressis viginti illis & duabus propositionibus.

Tum postulabat ut sibi Decreti, & Censuræ exemplum authenticum traderetur, facultasque fieret ea prelo subjiciendi, mittendique ad omnes Augustinianorum Conventus, in Tabulariis domesticis asseranda.

Paucis exindè diebus publicata fuit Madriti ea Censura & ad valvas Ecclesiæ Sancti Sebastiani, inque aliis locis consuetis affixa: sed continuò detracta fuit ab emissariis eorum qui patiebantur suos Theologos impunè in Sanctum Augustinum jactare contumelias, nec ferre poterant ut adversus obtrectatores Augustinus defenderetur: eoque factum est ut vix ullis notum esset, aut editam fuisse Censuram, aut publicatam; iisque, quorum jussu & curâ detracta esset, facile foret hominibus persuadere, neque affixam uspiam, neque latam fuisse. Traditum etiam fuit Patri de los Rios exemplar Censuræ authenticum jussu supremi Inquisitoris.

Fuit è Sancti Augustini obtrectatoribus qui ausus est lingua petulantissima Censuram contemnere, scriptoque mandare, eam fortè esse censuram trium quatuorve Theologorum, cui nullus neque dies, neque mensis, neque annus adscriptus esset, quia scilicet adscripti non essent in quibusdam exemplaribus in quibus fatis visum fuerat propositiones ad verbum exprimi, adjunctâ Inquisitorum sententiâ.

Eodem hoc anno 1650. editus est in lucem à Patre Joanne Adam Jesuita Gallo cum permissione Patris Claudii Delingendes Provincialis, & approbatione trium è Societate Theologorum, liber materna lingua scriptus hoc titulo: *Calvinus à se ipso & armis S. Augustini, quæ injustè usurparat, jugulatus*, in quo Jesuita iste amplius audebat quàm omnes Collegæ sui, eorumque in Augustini autoritatem & doctrinam contumeliis addebat: adeò Jesuitæ animos ab Augustino alienos manifestabant, ut si fieri posset, tanto Ecclesiæ lumini tenebras offunderent.

Bartholomæus de los Rios intelligens eos, qui autoritatem Sancti Augustini subruere nitebantur, quo facilius sibi deindè esset ejus doctrinam aggredi, & errores suos constabilire, indies magis inolescere, nullâ habitâ ratione Censurarum quæ de cætero in paucorum notitiam venerant, sub initium anni 1651. novum Libellum supplicem Inquisitori generali obtulit, in quo memorabat I. Uti à malevolis & Augustino infensis hominibus avulsa fuissent Censuræ in 22. propositiones latæ exemplaria continuò ut affixa fuerant; quo factum esset ut paucis Censura nota esset, dubiumque foret plerisque, an decretum ejusmodi verè fuisset editum. II. Fuisse ex audacibus illis hominibus quempiam qui paulò ante de ea Censura arroganter in scripto publico dixisset: *Nolite ferre ut Decretis Pontificum opponatur censura trium fortè aut quatuor Theologorum, qui proscripserunt (quo die? quo mense? quo anno?) viginti duas propositiones, quæ ad doctrinam nihil attinent, sed eo titulo quòd æqua lance autoritatem Sancti Augustini non æstimarent.* III. Venisse in suam notitiam summâ impudentiâ Joannem Adam Jesuitam de Sancto Augustino penè ut de Calviniano loqui in libro quem anno proximè elapso ediderat. Quapropter ab Inquisitore Generali, nomine trium Provinciarum Castellanae, Tarraconensis, & Andalusienfis supplex petebat, ut ejus jussu iteratò Censuræ in 22. propositiones latæ decretum promulgaretur, eaque cura in affigendo adhiberetur, ut neque avelli neque lacerari posset; tùm sibi illius exemplar authenticum traderetur, in quo ad verbum expressæ essent viginti illæ duæ propositiones; ut eo tanquam telo uti posset adversus eos qui auderent decretum illud aut contemnere aut in dubium revocare.

Tunc demùm jussu supremi Inquisitoris

toris exemplum authenticum Decreti & Censuræ in 22. Propositiones latæ Patri Bartholomæo de los Rios datum est, Rexque à Pontifice per litteras petiit, ut eam Censuram confirmaret, arrogantiamque frangeret eorum qui tam irreverenter de S. Augustino loquerentur. Cum Regis Catholici litteras accepisset Pontifex, atque unâ Libellum Memorialem quo petebatur ut Censuram Hispaniensem confirmaret, & S. Augustini auctoritatem tueretur, Pontifex eum Libellum ad eos remisit qui ejusmodi rerum examini secreto præfecti sunt.

Verum, cum Albizius S. Officii Assessor, ejusque affectu jam à sex annis statuissent omni qua pollebant auctoritate obstare, nequid pro Augustino ejusque doctrinâ Romæ decerneretur, nisi Theologi Lovanienses, quibus faveret ea censura, illorum votis, de quibus supra, morem gererent, moniti sunt ii ad quos Libellus Memorialis mittebatur, in eo negotio nihil esse præcipitandum: atque ita nihil à Romanis Inquisitoribus pro S. Augustini adversus obrectatores illos novos defensione obtineri potuit.

Dum hæc circa XXII. Propositionum Censuram gererentur in Hispania, putavit Pater de los Rios è sua Augustinique re esse de omnibus Generalem sui Ordinis certiorum facere. Ad eum igitur Romæ, ut moris est, commorantem litteras dedit vel exeunte mense Junio, vel Julio ineunte, anno 1650. is erat R. Pater Philippus Vicecomes S. Patris Augustini genuinus filius, studiosissimusque Discipulus. Illis litteris primò docebat de Propositionibus Augustino contumeliosissimis, de capto in Comitibus Provincialibus consilio, deque partibus quæ sibi datæ essent in decreto adversus hostem communem bello: quas ut impleveret se habuisse secretum cum Rege colloquium in quo Rex pollicitus esset se de eo ad Pontificem scripturum; se pariter apud Generalem Hispaniarum Inquisitorem instituisse de coercenda obrectatorum Augustini proterviâ. Tum rogabat enixè ut eandem causam Romæ tuendam ipse susciperet, deferret ea de re querelas ad Pontificem, rogaretque etiam atque etiam, ut præsens & properatum remedium afferret malis quæ Ecclesiæ imminerent, si impunè homines audaces illius auctoritatem convellerent, à quo ea vellet ut discerent fideles quid sciendum quidve credendum esset de divina Jesu Christi gratia, mysteriorum nostrorum sanctissimo juxta

atque altissimo. Litterarum istarum exemplar in manus meas venit: sed & penes me est autographum Generalis Responsum Romæ 11. Martii 1651. datum, quo & ardens viri pro Augustino studium impensè laudat, & operam suam illi non defuturam spondet ad vindicandas tanti Doctoris injurias. Dignæ sunt utriusque Litteræ quæ non intereant, quamobrem iis inter hujus causæ instrumenta locum dabimus.

Iis receptis Pater de los Rios novos animos sumsit, ad eundemque Generalem iterum dedit Litteras 20. Maii 1651. exaratas, quibus ardentiori adversus Augustini obrectatores zelo succensum se ejus Litteris significat; easdem se cum Provinciæ Superioribus & Magistris communicaturum; paratum se ad Sedem Apostolicam Prosperi exemplo accurrere, remedia tantis malis à Summo Pontifice postulaturum; ex parte Definitorii Ordinis S. Dominici ad suum Generalem scriptum fuisse pro eadem Augustini causa. Has quoque Litteras suo loco repræsentabimus.

Tertiò ad eundem scripsit simulque misit Propositiones ab Inquisitoribus Hispaniæ confixas. Hoc discimus ex Responsione Generalis Romæ data 15. Septembris 1651. quàm exhibebimus ad calcem aliorum instrumentorum. Illa porò docet nos vix aliquid per id temporis à Romanis sperandum fuisse Inquisitoribus. Jam tunc enim fervere incipiebat causa quinque Propositionum, quarum occasione complures Galliarum Episcopi ad summum Pontificem Theologos cum litteris legaverant, qui tuendæ S. Augustini doctrinæ strenuè adlaborarent, instantque sollicitè apud Apostolicam Sedem. Constat tamen aliundè non incassum prorsus cecidisse Hispanorum Augustinianorum, Dominicanorumque conatus & litteras, suoque officio non defuisse utriusque Ordinis Generales. Nam Dominicani Ordinis Præpositus novo per illa tempora Mandato ad omnes Monasteriorum Superiores misso injunxit, ut ab omnibus sui Ordinis Concionatoribus ac Theologis S. Augustini doctrinam ubique constanter & intrepidè prædicaretur docereturque. Uterque verò Generalis conjunctim summum Pontificem convenire, enixisque precibus à sua Sanctitate postulavere, ut crescentem in dies adversus S. Augustini doctrinam auctoritatemque æmulatorum audaciam ac proterviâ Auctoritate Apostolica compelleret.

pesceret Tam æquis postulatis benignè annuit Pontifex, jussitque ut peculiari Decreto XXII. Propositiones, S. Augustini nomini & honori tam contumeliosæ sine mora proscriberentur. Sic promissa exsolvit Augustiniani Ordinis Moderator, qui ultimis illis litteris significaverat, primùm paulisper à scriptis temperandum, cedendumque ad tempus adversariis: Deinde Sanctissimo Domino ejusque ministris, quorum interest, supplicandum, ne tam perniciosam pestem diutius serpere sinerent: in quo partes nostras, inquiebat, desiderare non patiemur; verùm conatus illos jussaque Pontificis irrita fecere vafrities artesque Molinisticæ.

Post illas igitur inducias resumptis scriptorum armis ad Sanctissimi Doctoris defensionem accinxerunt se Augustiniani agminis strenui pugiles non pauci, qui magni Parentis partes acerrimè defenserunt. (Magni Norisii verba usurpo) Pater Carolus Moreau Gallus, qui Tomo I. suarum in Tertullianum Animadversionum satis prolixas vindicias pro Augustino inseruit: quòd itidem præstiterat Vir insignis Joannes Rivius Belga libro 4. de Vita Augustini. Non satis fuit Patri Moreau Augustinum à calumniis vindicare, sed insuper ad investigandam in sublimioribus profundioribusque Theologica disciplina questionibus Augustini mentem, præferentibus faciem Aegidio Romano & Gregorio Ariminensi, animum applicuit, aliisque ut idem facerent autor fuit. De utroque viri opere egregio certiores nos facit, ejusdem Reverendissimi Patris Philippi Vicecomitis Augustinianorum Generalis ad eum scripta Epistola Romæ 24. Februarii 1653. quâ illum meritis laudibus prosequitur pro defensis & illustratis S. Parentis sui scriptis, autoritate ac veneranda memoria. Hanc Epistolam pariter cum aliis excusam habebit Lector in sequentibus.

Verùm omnes illos Augustini Defensores longo post se intervallo reliquit Eminentissimus nunc Cardinalis Norisius in illo immortalis Opere quod Sanctissimi sui Patris honori vindicando consecravit, ac publicavit typis Patavinis, hoc titulo: *Vindicia Augustiniana, quibus S. Doctoris scripta adversus Pelagianos ac Semipelagianos à Recentiorum Censuris asseruntur: Autore P. M. Henrico de Noris Veronensi Augustiniano S. Theologiae Professore & S. Romanae universalis Inquisitionis Qualificatore*: cujus operis condendi primam occasionem si curiosius inquiramus, constabit eam fuisse Libellum illum supplicem

Innocentio Papæ X. à Lovaniensibus Theologis anno 1644. oblatum: ex quo decerptæ duæ & viginti illæ Propositiones Sancto gratiæ Doctori injuriæ & per Hispaniam vulgatæ, Augustinianorum animos ad sui Parentis defensionem inflammaverunt.

DECRETUM ET CENSURA

Inquisitionis Vallisoletanae in viginti & duas Propositiones.

Ex Hispano idiomate latine redditum.

SANCTO AUGUSTINO
contumeliosissimas.

Nos Inquisitores Apostolici contra hæreticam pravitatem in Regno Castellano, Legionensi & Principatu Asturienfi per auctoritatem Apostolicam &c. commorantes in hac Civitate Vallisoletana, omnibus & quibuscumque personis commorantibus aut habitantibus in omnibus Civitatibus, pagis & locis nostri districtus, qualiscumque status, gradus, dignitatis, conditionis, & præeminentiæ cujuscumque; exemptis & non exemptis: unicuique & qualicumque, qui in notitiam devenerint eorum quæ in hoc præfenti mandato continentur, Salutem & Benedictionem.

Vobis notum sit sacrae Inquisitionis Decreto revocatas esse & prohibitas viginti duas Propositiones doctrinæ Sancti Augustini contrarias, quæ insertæ fuerunt Memoriali suæ Sanctitati oblato, quarum prima est, *Augustini quedam dogmata &c. p. 232.* postrema verò hæc, *Non rectè dicitur &c. p. 233.* quia præfata Propositiones sunt respectivè falsæ, improbabiles, absurdæ, malesonantes, piarum aurium offensivæ, temerariæ, sapientes hæresim, & graviter injuriosæ Sanctitati, pietati, & doctrinæ gloriosissimi Patris Sancti Augustini unius ex Ecclesiæ columnis.

Ideo tenore præsentium mandamus omnibus & unicuique vestrum, qualiscumque sit, qui penes se habent aut scripta aut libros, sive manu-scriptos sive impressos, qui hoc nostro mandato continentur, ut posthac nemo audeat habere, legere, vendere aut imprimere, sed potius quotquot habitatis in hac Civitate, feratis nobis; ii verò qui foris habitant, ferant nostris commissariis. Atque ita facite, observate, & executioni mandate sub poena excommunicationis latæ sententiæ post tres monitiones canonicas, & viginti millium maravedis pro expensis Sancti

Sancti Officii : cum præventionem quod procedetur ad declarationem & executionem harum censurarum & poenarum, & in omni juris rigore contra non exequentes aut rebelles & inobedientes. Datum in sancto Officio Inquisitionis Vallisoletanae. 28. Martii 1650.

Signatum,

Dom HENRIQUEZ DE PERALTA
ET CARDENAS, *Doctor.*

Dom ALONSO LIANO DE BUEL-
NA, *Licentiat.*

Dominus BARTHOLOMÆUS MAR-
CHIO DE MOSCOLSO.

De mandato Sancti Officii Inquisitionis

Dom FERNANDO MARTINEZ ZU-
NIGA *Secretarius.*

Ego Commissarius sancti Officii fidem facio hoc Decreti exemplar conforme esse originali, decretumque hoc Sacri Tribunalis Vallisoletani in primaria Burgorum Ecclesia lectum fuisse per Franciscum Alvarez de Castro sancti Officii & præfatæ Civitatis Notarium quodam die Dominico quadragesimæ proximè elapsæ anni 1650. coram Decano & Canonicis, testibus Jac. de Arriaga pa. de la Mota, & Francisco Perez de Cuillar, præfatæ Ecclesiæ Janitoribus, in cujus rei fidem signavi nomine proprio appposito, Burgis Calendis Martiis 1651.

Dom PEDRO MIGUEL *Doctor.*

DECRETUM ET CENSURA

*Ex Hispano
idioma-
te latine
redditum.*

INQUISITIONIS GENER. HISPANIARUM

adversus duas & viginti Propositiones

SANCTO AUGUSTINO

perquam injurias.

Illustrissimus Dominus Episcopus Placentinus, Inquisitor Generalis cæterique sanctæ Inquisitionis generalis Consilarii Regii, deliberatione habitâ 18. Martii 1650. Decretum ediderunt, quo in forma consueta prohibent & proscribunt viginti duas Propositiones sequentes

1. *Augustini quadam dogmata &c.* p. 232.

Quia præfatæ Propositiones sunt respectivè falsæ, improbables, absurdæ,

malesonantes, piarum aurium offensivæ, temerariæ, erroneæ, sapientes hæresim & summopere injuriosæ sanctitati, pietati, & doctrinæ unius ex Ecclesiæ Catholice Columnis, scilicet Gloriosissimi Patris Sancti Augustini.

Libellus Memorialis continens nomina & loca Autorum quorum Propositiones XXII. Sancto Patri nostro Augustino contumeliose per Hispaniam disseminantur.

Ex Propositionibus XXII. suæ Sanctitati in Memoriali exhibitis, Joannes Schinkelius, Sacræ Theologiæ Lovanii Professor, docuit & discipulis dictavit 1. 2. 3. 4. 5. 6. 9. 10. 11. & 12.

Septima, octava & 22. leguntur in Libro Patris Joannis Roberti Jesuitæ, cui titulus est: An Nathanaël fuerit Bartholomæus Apostolus?

Decima tertia, 18 & 19. sunt Gabrielis Vasquesii? Prima quidem t. 1. in 1. 2. disp. 132. c. 3. n. 14. Secunda verò t. 1. in 1. p. Disp. 97. c. 3. n. 20. Tertia denique t. 2. in 1. 2. disp. 193. c. 4. n. 39

Decima quarta, 15. 16. & 17. sunt Ludovici Molinæ; prima in tractatu *De opere sex dierum.* disp. 1. Secunda in Concordiaq. 23. a. 4. & 5. disp. 1. memb. 6. Tertia ibid. memb. ult. Quarta ibid. memb. 6.

Vigesima, & 21. excerptæ sunt ex Articulis n. 12. & 20. Jesuitarum Lovaniensium, Censurâ notatis ab Universitatibus Lovaniensi & Duacensi a. 1587. & 1588. nam prior continetur in Articulis 14. & 15. in verbis, *Cum Grano salis &c.* item valde improprie: Junctis iis quæ tradit Lessius de præd. & reprobatur. sect. 4. n. 43. Posterior continetur in art. 23. his finalibus verbis: *Quod si contraria sententia esset Augustini non admodum referret.*

MEMORIALE

Regi Catholico oblatum per Reverendum Patrem

BARTHOLOMÆUM DE LOS RIOS

AUGUSTINIANUM 18. Junii. 1630.

R E X

Pater Magister Bartholomæus de los Rios apud Regiam Tuam Majestatem Verbi Divini Concionator, & Primarius in hac Castellana Provincia Ordinis

Q 2

Ordinis Sancti Augustini Definitor, ex mandato & nomine tum præfatæ, tum Andalusienfis & Tarraconenfis Provinciæ, exponit prædictas Provincias, perpenso bello pudendissimo, quod apertis signis Sancto Patri nostro Augustino quidam Ecclesiæ filii inferunt, eâ audaciâ tanto dolore affectas fuisse, ut prævidentes incendia quæ ab illis scintillistimenda sunt, mala ingentia quæ toti Ecclesiæ præfagiuntur, & pericula Reipublicæ Christianæ imminencia, existimarint officii sui esse id clavis verbis Majestati vestræ manifestare, ut remedia opportuna adferre velit tantis malis quæ Sancti Augustini Ordinem dedecorant, gloriosum ejus Patrem contumeliâ afficiunt, & in Ecclesiæ ruinam vergunt. Id manifestum faciunt tot ignominiosæ contumeliæ ab iis in sanctum Doctorem jactatæ quas hic subnectimus, nempe:

- „ Augustini quædam dogmata ab
- „ Apostolica Sede in terminis esse damnata.
- „ Miserram fore Ecclesiam, si Augustini
- „ placitis obstricta maneret.
- „ Ex Augustini opinione de peccato
- „ originis, cogi nos incidere in sententiam
- „ Pelagii.
- „ Ecclesiam à tutela & Pædagogia Au-
- „ gustini esse vindicandam.
- „ Augustinum sacrarum Scripturarum
- „ auctoritatem sua expositione enervare,
- „ & ludibrio infidelium exponere.
- „ Augustinum fuisse Doctorem perinde
- „ ac alium quempiam etiam modernorum.
- „ Augustini sententiam à multis duram
- „ nimis, indignamque divina bonitate ac
- „ clementia judicari non mirum.
- „ Augustinum Juliani Pelagianistæ ar-
- „ gumentis non satisfacisse.
- „ Non esse citandum è pulpitis Sanctum
- „ Augustinum, quia ejus nomen in odio sit.
- „ Theologiam Sancti Augustini de pec-
- „ cati originalis traduce, esse rusticanam:
- „ pluresque alias ejusdem generis contumeliæ.

Qui talia effutiunt, possunt ne, Rex, ignorare Sanctum Augustinum (Patrem nostrum) esse præcipuum Ecclesiæ firmamentum; quando ejus doctrinâ atque armis, quæ ejus scripta suppeditant, debellatæ sunt omnes hæreses, quæ ab ipsius ætate in hæc usque tempora prodierunt; atque ex doctrina, ex verbis, & sententiis ejus Ecclesia Catholica in Conciliis œcumenicis canones suos & decreta formavit. Immo Coelestinus I. Pontifex in Sancti Augustini laudem scripsit, Nec unquam hunc sinistra suspitionis rumor aspersit, sed inter Magistros opti-

mos semper est habitus. Et Joannes II. Sancti, inquit, Augustini doctrinam secundum prædecessorum meorum Statuta, Romana sequitur & servat Ecclesia. Non breve aliquod Memoriale, sed libri & volumina ingentia impleri possent laudibus & encomiis quibus summi Pontifices, Concilia œcumenica, & autores Catholici celeberrimi Sanctum Augustinum eximium Ecclesiæ Doctorem celebrant. Si verò communis omnium fidelium de eo sententia & existimatio quæeratur, omnium una erit responsio, ab eo lædi oculorum Ecclesiæ pupillam, qui de S. Augustino malè loquatur.

Et quoniam ea erat Coelestini I. mens & cogitatio, hæc verba, quorum summum momentum est, scribere non dubitavit: Benè ergò de eo omnes in commune fenserunt, utpote qui ubique cunctis & amoris fuerit & honori. Unde resistatur talibus, quos malè crescere videmus. Ne fas est hæc pati religiosas animas. Eodem animo Sanctus Prosper in eos qui malè de S. Augustino loquebantur, hæc dicit: *Non ergo negligendum est hoc malum, quod ab occultis pravisque seminibus augetur quotidie, & ab ortu suo latius longiusque distenditur; sed studendum est, in quantum Dominus adjuvat, ut fallacium calumniatorum hypocrisis detegatur, qui ex ipsa injuria magnitudine, quam in uno cunctis ac præcipue Apostolica Sedis Pontificibus, intulerunt.*

His de causis præfatæ Provinciæ, ac in primis Castellanenfis, singulari Religionis studio & ardore animata, in ultimis Comitibus Provincialibus, quæ mense Maio proximè elapso habita sunt, congregata, prævidens etiam incendium quod totum pervasurum est Ecclesiam, ingentesque tumultus qui universæ Reipublicæ imminet, statuit sine mora suscipere defensionem S. Augustini inclyti Patris nostri, qui est Ecclesiæ Catholicæ murus invictissimus, armorumque adversus hæreticos armamentarium opulentissimum. Quoniam verò visum est nullum esse remedium aut levius, aut placidius aut præsentius ad tanta mala averrenda, quam si ad Regiæ Majestatis auctoritatem confugeret, præfatus Orator supplex à Te, Rex, qua potest animi demissione efflagitat, nomine Castellanenfis Provinciæ aliarumque ante dictarum, ut tituli singularis protectoris Ecclesiæ, officiique ex eo titulo manantis memor, auctoritatem regiam apud Sedem Apostolicam interponas, datisque ad Pontificem litteris enixè postules, ne pati-

patiatum cum summo Ecclesiæ damno atque fidelium offensione labefactari aut despici Sancti Augustini auctoritatem; sed potius coerceatur eorum insolentia, qui Sancto Doctore audent contumeliam facere. Id si à Te, Rex, quem Deus sospitet, obtinuerit nomenque & auctoritatem regiam interponere volueris, ut inultæ non sint factæ Sancto Augustino injuriæ, Divus ille & universa Beatorum turba pro Te decertabunt. Quando Sanctus Augustinus præcipuus fuit defensor gratiæ, quæ teste Divo Joanne Chrysostomo, omnium bonorum parens est, impetrabit à Deo Sanctus Doctor Majestati Tuæ copiosos gratiarum thesauros, quæ Te, ubi opuserit, tueantur, & in rebus adversis protegant. Propone Tibi, Rex, in exemplar Majorum tuorum in Sanctum Augustinum amorem. Præclara in eum amoris signa edidit Margarita Austriaca Regina in Regio Incarnationis Monasterio. Quid Philippus tertius Rex piissimus? qui tanto affectu animi ac studio egit apud sanctam Sedem, ut Sancti Augustini Patris nostri festum tota Hispania celebraretur? Atque ita, Rex, non magis Regnorum ejus hæres es quam virtutum & pietatis in Sanctum Augustinum, quæ eum colas & tuearis.

Id summo studio exoptant hîc apud Te, Rex, supplices, id enixissimè & ea qua possunt maxima animi demissione efflagitant, denique id expectant Tuæ pietati religionique confisæ Provincia Castellanaensis, ceteræque &c.

SCRIPTUM

In quo proponuntur Rationes & Fundamenta quibus nititur Liber Memorialis à Patre

BARTHOLOMÆO DE LOS RIOS

REGI CATHOLICO

Nomine trium Provinciarum Castellanaensis, Tarraconensis, & Andalusensis, Ordinis Eremit. S. Augustini.

Propositiones Sancto Augustino injuriæ, quæ in Libello memoriali Regi oblato referuntur, ferè omnes ex aliis pluribus selectæ fuerunt. Viginti illæ duæ, quæ per Hispanias sparsæ sunt, & quæ in manibus multorum versantur, in meas etiam venerunt. Eas perlegi cum summa indignatione, summoque dolore, cum videremus in iis indignissimè & contu-

meliosissimè haberi Sanctum Patrem nostrum Augustinum, Ecclesiæ Solem, Doctorumque Coryphæum.

Sed cum non designarentur XXII. illarum Propositionum Autores inquisivi si fortè reperiri posset qui majorem Propositionum illarum autorumque notitiam haberet. Tandem comperi duodecim ex illis reperiri in variis variorum autorum libris, decem reliquas traditas fuisse & dictatas Lovanii à Joanne Schinkelio, illius Academiae Doctore Theologo: qui cum ferre non posset tantam à quibusdam Theologis de Sancto Augustino existimationem, tum voce tum scriptis significari, aut ei tantam auctoritatem attribui, aut eum in divinæ gratiæ doctrina arbitrum statui, putavit à se nihil fieri posse ad placita sua, quæ aliorum placitis adversa erant, tuenda opportunius, quam si ita de Augustino loqueretur. Atque ita ut quod cogitabat in Augustinum, cujus auctoritatem evertere meditabatur, perficeret, sterneretque sibi eo pacto viam ad evertendam auctoritatem eorum quos ipse adversarios, Augustinus verò defensores habebat anno 1643. & 1644. coepit discipulis suis in scholis Lovaniensibus dictare tractatum hoc titulo, *De auctoritate Sancti Augustini*, in quo tanto cum contemptu de Sancto Augustino loquebatur, ut in eo omnem hæreticorum insolentiam superaret. In eo tractatu quasdam è contumeliosis hisce & plenis offensionis Propositionibus ad verbum tradidit: alias in variis disputationibus publicis pronuntiavit, loquens de Viro illo Sancto cum despectu & fastidio coram cæteris Doctoribus, cæterisque auditorum frequentissimo: atque id arrogantiam tam inauditam ab eo factum refertur, ut Universitas Lovaniensis pro eo quo est, fuitque semper in Sanctum Patrem nostrum Augustinum, quem pro Magistro habet & veneratur, studio & amore, illius Doctoris tractatum orationemque superbam reprobarit. Verum nihil id valuit ad aliorum quorundam obrectatorum audaciam furoremque reprimendum.

Ea pestis Parisios usque grassata est, ubi Ecclesiæ famâ celeberrimo crimini datum est, quod in suggesto frequentius auctoritatem S. Augustini allegaret; monitusque est ne id deinceps factitaret, hac addita ratione, quod Augustini nomen jam in odium venisset. Tum alius quidam & scripsit & voce effudit contumelias alias quæ sine horrore referri non possunt. Porro omnes simul conjunctæ

in variis exemplaribus hic disseminantur.

Quandò autem argumentis certissimis cognovit illustrissimus Dominus Inquisitor Generalis eaquæ Lovanii gesta sunt, & de cæteris Propositionibus quæ in libris impressis leguntur, nullum est dubium, si tres Provinciæ Castellanensis, Andalusiensis & Tarraconensis à Rege petierint, ut rem illam ad Inquisitionis Tribunal remittat, præcipiatque ut Propositiones tam offensionis plenas proscribant, mandentque ut ex omnibus libris sive editis, sive manu-scriptis in quibus sint, expungantur; videtur satis fore ea quam de his habet notitiam supremus Inquisitor, adstipulante eâ quæ Regi datur per Scripta Memoriali ipsi oblato adjuncta.

Quamquàm etiam verum sit Inquisitores Vallisoletanos primos fuisse in proscribendis præfatis Propositionibus, quia nulla ratione ferri possent, quin unâ tantus Ecclesiæ Doctor Sanctus P. N. Augustinus summâ injuriâ afficeretur, universique fideles offenderentur; Castellaniensis, Tarraconensis & Andalusiensis Provinciæ censuerunt filiorum esse nomen & auctoritatem Patris communis tueri, statueruntque à Rege petere, quandoquidem sit Ecclesiæ Defensor, mandare velit, ut non solum censurâ meritâ notentur illæ 22. Propositiones, sed etiam ut ex omnibus libris tum editis, tum manu-scriptis, & ubicumque locorum sint, expungantur.

Præterea cum gliscat in dies hoc incendium, meritoque timendum sit ne magnam Ecclesiæ partem corripiat, non potuit excogitari à præfatis Provinciis præsentius remedium ad obstruenda calumniatorum ora, sistendaque unâ operâ tanta mala, quàm si supplices à Rege peterent nomen suum & auctoritatem interponere vellet apud Pontificem, ut ille antecessorum suorum exemplo, & inprimis Zozimi, Innocentii I. Bonifacii & Coelestini, quorum meminit Sanctus Prosper in libris adversus Collatorem, & ex boni Pastoris officio, hominum istorum ferocitatem & arrogantiam comprimeret coerceretque: præsertim tempore hujusmodi quo ob magnam variarum hæreseon copiam, necesse est suam Sanctis Patribus in Ecclesia reverentiam conservari; eorum enim auctoritate collapsâ nihil ferè superest quo hæretici aut confundantur, aut ad Ecclesiæ Unitatem Sedisque Apostolicæ

reverentiam revocentur.

Eo pacto dum Ecclesiæ filii Sanctorum Patrum doctrinam vilipendunt, arma ad conjuratos Ecclesiæ hostes debellandos validissima projiciunt, lataque aperitur via ad errores omnes disseminandos, dum cuilibet permittitur libertas in rebus Theologicis opinandi & docendi quæ in mentem venerint, quo nihil esse potest periculosius, quandoquidem & fides perpetuò periclitabitur, & ad omnes hæreses aditus datur potentissimus.

I. MEMORIALE

INQUISITIONI GENERALI

OBLATUM

A R. P. BART. DE LOS RIOS

25. Junii 1650.

ILLUSTRISIME DOMINE

Pater Magister Bartholomæus de los Rios, Regius Ecclesiastes, & Primarius hujus Provinciæ Castellanensis Ordinis Sancti P. N. Augustini Definitor, supplicat demississimè nomine dictæ Provinciæ, item Andalusiensis & Tarraconensis, petitque ut sibi tradi præcipias exemplum authenticum Decreti & Mandati quod à te jussu est promulgari in omnibus Hispaniarum Inquisitionibus, quo proscriptæ sunt 22. Propositiones quæ temerè & cum offensione fidelium sparsæ fuerunt ab inimicis catholicæ, sanctæque Doctrinæ Sancti Patris nostri Augustini, quæ à Sede Apostolica, à Conciliis œcumenicis & ab autoribus Catholicis probata & magnis encomiis celebrata fuit. Ea encomia tam multa sunt tamque vulgata, ut importunum esset ea à me referri: suppliciterque nomine antedictarum Provinciarum orat, non solum jubeas sibi exemplum authenticum Decreti vestri & Mandati tradi, verum etiam sibi liceat illud prelo committere, ut dictarum Provinciarum Conventus id in Tabulariis suis asservare possint. Cum enim illæ Propositiones non in Hispania procusæ sint, sed allatæ è Regionibus in quibus hujus Sacri Tribunalis Censura nullam vim habet, justa causa est meruendi, ne quas tam pulchro & sancto exemplo extinctis scintillas, eæ novo ausu accendantur. Merces vestra esto Dominus Deus noster.

EPISTOLA

R. P. BARTHO. DE LOS RIOS

AD PATREM THOMAM FIGUEROLA

Provincia Tarraconensis Provincialem

JESUS. AVE MARIA.

ADMODUM REVERENDE PATER

Cum tueri auctoritatem magni Patris nostri Augustini pertineat ad causam communem omnium Provincia- rum Ordinis nostri, quas inter Tarraconensis Virorum & sanctitate & scientia & nobilitate illustris est: huic Castellanen- si Provinciae placuit, ut suo & Andalu- siensis & Tarraconensis nomine suppli- carem Regi, Illustrissimo Domino In- quisitori Generali, aliisque Ministris quo- rum est sedare funestum bellum quod hoc miserrimo seculo Beato Patri nostro Augustino indictum est ab iis, qui ut pla- cita sua tueantur, aggressi sunt eam do- ctrinam evertere, quæ eorum consiliis ad- versa sit. Rex, quem Deus sospitet, me ad colloquium secretum admisit, in quo remotis arbitris liceret mihi magis dilu- cidè exponere ea quæ hocce Memoriali, quod cum his litteris mitto, continentur; quamvis quædam satis fusè ibi explicem, aliquas è Propositionibus ei non sine la- crymis recitavi. Princeps, ut est piis- simus, auditis iis quæ adversus gloriosum Patrem nostrum fiebant, animo commo- tus, promisit se ea de re ad Pontificem quamprimùm scripturum, petiitque sibi omnia probari certis argumentis, quæ fir- mata essent auctoritate Rectoris Acade- miæ Lovaniensis, Notariorumque pu- blicorum & Ecclesiasticorum, qui jurati affirmant se id vidisse & audisse. Hinc nobis certa spes est Regem gloriosi Pa- tris nostri partes amplexurum. Illustris- simus Dominus Inquisitor Generalis eadem pollicitus est. Porro institi ut non solum proscriberentur dictæ Propositio- nes, verum etiam ut ex libris, in quibus essent, expungerentur, quod longè acer- bius adversariis accidet, majoremque au- toritatem Censuræ conciliabit. Mitto tibi, admodum R. Pater, Memoriale quod Regi obtuli, exemplumque Me- morialis quod ab Oratore Universitatis Lovaniensis summo Pontifici oblatum est, & Judicium Inquisitionis Vallisoletanæ, Vallisoleti & Burgis promulgatum. Te verò, admodum R. Pater, obsecro at-

que obtestor ut, quando Dei Providen- tia in ea Provincia eminentissimum lo- cum tenes, novæ Carthaginis, Valentiaë & trium reliquorum Regnorum Inqui- sitores orare velis, non tantum ut Cen- surâ meritâ præfatas Propositiones no- tent, sed etiam excommunicationem in- terminando mandent, ut è libris in quibus sint, expungantur. Ea est eruditio tua, admodum R. Pater, ut existimem eas tibi esse exploratas: si tamen opus sit, nomina Auctorum, librorumque in quibus reperiuntur, transmittam. Porro si quid sit quod videatur tibi, R. P. à me posse in eo fieri amplius, jube modò, & animo libentissimo parebo. Tibi R. P. Deus Opt. Max. sit propitius. Ma- driti è Conventu Sancti Philippi 2. Ju- lii 1650.

*Reverentia tua**Servus demississimus*

F. BARTHOLOMÆUS DE LOS RIOS.

EPISTOLA

R. P. PETRI DE PERREZ

Provincialis Andalusien- sis

A D

R. P. BARTHO. DE LOS RIOS.

ADMODUM REVERENDE PATER,

Litteras tuas datas ad me 28. mensis præteriti cum scriptis adjunctis jam- jam accipio, quâ de re ago gratias. Non potui sine dolore acerbissimo intelligere quâ insolentiâ atque impietate doctrina Sancti Patris nostri impetatur. Sed co- gnito te, R. P. inter ejus filios tanto animo virum, causam ejus defendendam susce- pisse; tres hæ Provinciae atque in pri- mis nostra singulari lætitia affecta est, certa spe concepta negotium illud sic à te confectum iri, ut inde honor & gloria ad Sanctum Augustinum, ad ejus Filios summa utilitas redeat.

De iis quæ adhuc acta sunt, nihil est quod à te R. P. amplius, aut à supre- mo Inquisitionis Tribunali peti posse vi- deatur. Si eâ Censurâ, quâ dignæ sunt Propositiones illæ, notentur atque aliquæ earum quæ in libris aut ad ver- bum aut verbis æquipollentibus sunt, si quæ tamen sunt, expungantur; eo fa- cto

*Primum est
Hispanico
in Galli-
cum, tum è
Gallico in
Latinum
versum.*

eto, meâ quidem sententiâ, id quod petebamus, consecuti sumus. Quod si factum fuerit à suprema Inquisitione, non est dubium quin ejus exemplum sequantur Inquisitiones Regni Andalusienſis & Burgenſis. Si verò per nos ipsos negotium illud apud hos Inquisitores aggrediamur, metuo ne ipsi rebus nostris moram afferamus: non enim deerunt, qui clandestinis machinationibus votis nostris obſtent & negotium tardent; præſertim cum nonnullæ ex illis Propositionibus ſint in libris qui in manibus omnium ſunt. Autores enim metuentes ne proſcribantur, expunganturque è libris ſuis, contendunt ſaltem ut differatur judicium. At nulla eſt moles quæ ſuſtineat impetum torrentis qui à ſupremo Tribunali deſcendat.

Propter peſtem in quibuſdam Andaluſiæ locis graſſantem nulla eſt libertas itinerandi, nec eſt facile Conventibus inter ſe communicare. De quo te certior facio, R. P. quòd eâ cauſâ jam expediri non poſſit Librorum tuorum negotium. Si Deus velit has ſcintillas extinguere, curabitur diligenter quidquid è re tua fuerit. Quàm utiles erunt libri tui omnibus Provinciæ Religioſis! Tanti mihi ſunt quanti eſſe debent litteræ tuæ, meque per eas à te, R. P. ſingulari honore affectum eſſe judico. Velim mihi offeratur occaſio benefaciendi tibi, reque monſtrandi nihil eſſe quod tuâ cauſâ non faciam. Deus Opt. Max. te ſoſpitet. Datum 5. Julii 1650.

ADMODUM REVERENDE PATER

Manus tuas exoſculor, meque præ omnibus ſervum tuum eſſe profiteor.

F. PETRUS DE PERREZ.

EPISTOLA

R. P. THOMÆ FIGUEROLA
PROVINCIALIS TARRACONENSIS

A D

R. P. BARTHO. DE LOS RIOS

Redditæ ſunt mihi & perlectæ litteræ tuæ, R. P. quas per novam Carthaginem ad me dediſti poſtridie Kalendas

hujus menſis, miſeriamque cognovi eorum qui temerè & insolenter Sancti Patris noſtri Auguſtini doctrinæ contumeliam fecere. Si antea res illæ ſingulatim non erant mihi perſpectæ, jam ita ſunt ut cum iis quorum intereſt agere poſſim. Te ſolùm certior facio ab hujus Inquisitionis (Tarraconenſis) Tribunali datum eſſe Decretum ad Kalendas Aprilis, & in locis omnibus ſolitis promulgatum, quo viginti duæ Propositiones proſcribuntur tanquam falſæ, improbabilis, abſurdæ, male-ſonantes, piarum aurium offenſivæ, temerariæ, erroneæ, ſapientes hæreſim, & in ſanctitatem, pietatem, doctrinamque glorioſiſſimi Patris noſtri Auguſtini, Inclyti Eccleſiæ Columinis, perquam contumelioſæ. Quod ex nomine omnium Provinciarum Hiſpanienſium à Rege precatus es, ut autoritatem ſuam apud Pontificem interponeret ad eam cauſam defendendam, quam tot titulis in Memoriali tuo commemoratis tueri debet, à te prudentiſſimè factum eſt. Ea eſt enim cauſa communis totius Eccleſiæ, quam & ſocietates omnes, & privatus quiſque adverſus calumniam tam exſecrandam defendere teneatur. Curabitur hic diligentiffimè quòd opus erit, ut quod cceptum eſt negotium adverſus tantos fidei, Sanctique Patris tot meritis conſpiciui hoſtes, benè geratur. Obſecro te, R. P. ut quantum in te erit eam rem curare pergas, quemadmodum filium, cujus intereſt, decet; præſertim cum proximus fonti ſis è quo haurienda ſit aqua ad extinguendas tam pernicioſarum hæreſum flammas idonea; nec tibi novum ſit aut inſolitum res ejusmodi agere, in quibus te jam dudum in Belgio exercuiſti. Precor à Deo Opt. Max. ut tibi, R. P. animum viresque ſuppeditet ad perficiendum id quod Eccleſiæ Catholiciæ ſtudio & amore ſuſcepisti; tum integram valetudinem, diuturnam vitam, honorem pro tuis meritis votisque meis largiatur. Vale. 3. Idus Julii 1650.

R. PATER

Manus tuas exoſculor, ſumque addictiſſimus tibi Servus

F. THOMAS FIGUEROLA *humilis Provinc.*

EPIS-

EPISTOLA R. P. THOMÆ FIGUEROLA

Provincialis Tarraconensis

AD R. P. BARTHOLOM. DE LOS RIOS.

Mitto hoc scriptum ad te, R. P. ex quo intelliges causas quas putavi tibi à me esse exponendas, quæque venerunt mihi in mentem postquam de his rebus conferre contigit. Videtur certè mihi ad Rem publicam pertinere quod R. T. propono, deinde ad materiam de qua agitur, & ad Religionis auctoritatem firmandam conducibilis. Te, R. P. Deus Optimus Maximus in multos annos saluum & incolumem servet. Sic voveo Valentie VII. Kal. Aug. 1650.

REVERENDE PATER

Manus tuas exosculor, sumque addictissimus tuus famulus

F. THOMAS FIGUEROLA Provinc. humilis.

CAUSÆ ET RATIONES,

Ob quas supersedendum sit denunciatione & expostulatione apud Tribunal Inquisitionis, omnique alia testificatione doloris de Propositionibus à R. T. productis cum in Memoriali summo Pontifici anno 1644. oblato nomine Universitatis Lovaniensis, tum in eo quod à R. P. T. Regi, quem Deus sospitet, oblatum est nomine Provinciarum Hispanensium, tanquam Sancto P. N. Augustino ejusque doctrinæ adversis, sunt hæc sequentes.

Prima, quod manifestum sit querelas, quas quidam vellent nomine totius Ordinis deferri, proficisci ab Universitate Lovaniensi, cujus Doctores & Professores signis apertis Societati Jesuitarum bellum inferunt, palàm se illorum hostes professi, propterea quod ægrè ferant proscriptas fuisse Propositiones Michaëlis Baii in istâ Academiâ Doctoris & Professoris, existimantes Jesuitas esse præcipuos illius Judicii Autores, quod eorum sollicitationibus & impulsu esset latum: ut item Censuram multarum aliarum Propositionum à supremis Pontificibus Pio V. & Gregorio XIII. proscriptarum, ut videre est in Bullis super eo editis & insertis Bullæ Urbani VIII. an. 1641. cujus infra mentionem faciam.

Ad hæc novum odium in Societatem Jesuitarum conceperunt ex proscriptione Libri Cornelii Jansenii Episcopi Yprensis; qui liber posthumus erat, & ab executoribus Testamenti præfati Cornelii Jansenii in lucem editus sub hoc titulo: *Augustinus*. Is liber proscriptus fuit, quia illius Autor inter multa dogmata quæ ut propria tuebatur, innovabat multas Propositiones Michaëlis Baii, quæ in eo proscriptæ fuerunt, quamquam jam ante Censurâ notatæ fuissent à summis Pontificibus Pio V. & Gregorio XIII. ut videre licet in Bulla Urbani VIII. edita 5. Martii anno 1641. Has ille Propositiones confirmabat quibusdam Sancti Augustini sententiis perperam acceptis, eo consilio ut demonstraret doctrinam Jesuitarum contrariam esse Sancti Patris nostri Augustini placitis, atque ea ratione eos in invidiam vocaret.

Theologi Lovanienses altum servarant silentium dum vixit Urbanus VIII. post proscriptum librum Jansenii. Illo verò è vivis sublato & Innocentio X. in locum ejus successore, continuò 4. Novembris anno 1644. obtulerunt ei Memoriale quod à R. T. mihi transmissum est, quod adhuc à Pontifice contemptum fuisse, nobis compertum est, ea sine dubio de causa quod non ignoraret eam accusationem & conquestionem à Theologis Lovaniensibus profectam esse, ortumque ducere ex simultate quæ inter eos & Jesuitas jam dudum intercessit: quod certo argumento est, eas esse plenas fraudis & calumniæ. Si enim ita se reshabuissent, ut ipsi aiebant, à Pontifice sine dubio edictio emanasset pro Sancto Patre nostro Augustino, qui tam præclare de Ecclesia meritus sit. Itaque si per sex annorum spatium post oblatum ipsi præfatum Memoriale, id ab eo factum non est, certissime hinc conficitur, Pontificem id quod in eo continebatur habuisse pro fallacia; quæ adornata esset à Jesuitarum adversariis: quâ suspitione laborant vehementissime Theologi Lovanienses.

Dum jam vident inutiles fuisse fraudes suas tentaverunt iisdem Memorialibus, iisdemque Propositionibus Sancti P. N. Augustini filios adducere, ut ejus doctrinæ defensionem susciperent, quippe quorum maximè interesset: atque ad hanc rem Patres Dominicani administratos adhibent, qui alios religiosos Ordines sibi adjungere omni cura & labore student, ut universi in unum veluti corpus adunati fortius Jesuitarum impetum sustineant, eo-

R

rumque

rumque doctrinam & Scriptores in invdiam adducant. Revoca in memoriam, R. P. ea quæ eo consilio abhinc paucis annis ab iis facta sunt. Missus est ab Universitate Lovaniensi Doctor legatus ad Universitates Hispanienses, qui peteret ut facto foedere vires jungerent, & in unum corpus coirent: idque re ipsa factum est, & adversus Jesuitas eorumque doctrinam inita societas; sed inceptum ad optatum finem perducere nequirit. Eò etiam recident quæ jam agitantur consilia; certum enim mihi est meras esse fallacias, quibus id unum fiet, ut manifestum evadat quàm iniquo animo sint in Jesuitas.

Altera quæ me movet ratio est hæc, quòd Propositiones quæ in Memoriali referuntur, ad nullum tribunal deferri possint, nisi de autoribus deque locis unde descriptæ sunt, antè compertum sit. Ipsa quæ Pontifici oblata fuere Memorialia id non declarant. Fortè etiam, si in quibusdam Autoribus reperiantur, dum diligenter res examinabitur, deprehendetur alias esse ab iis quæ in Memorialibus referuntur, aut ea ratione esse expressas, ut ad bonum sensum inflecti possint: non rarò enim usu venit aut ut confingantur Propositiones & falsò attribuantur, aut ut sic mutilatæ & truncatæ proferantur, ut dum loca unde sumptæ sunt, consuluntur, diversæ sint ab iis quæ fuerint denunciatae: adeoque designandi essent Autores, locaque unde dicuntur excerptæ. Et certè dum id non fit, meritò licet suspicari, rem aliter se habere, quàm Libelli accusatorii memorant.

Tertia ratio hæc est, quòd ad rem tantam incipiendam, id est ad denunciandum eas Propositiones contra RR. PP. Societatis, ad faciendam à Reverendis iisdem Patribus disjunctionem & alienationem, accedendumque ad Patrum Dominicanorum doctrinam, adduci debeamus maximis & urgentissimis rationibus, quæ certissimæ sint & compertissimæ; quas hac in re non tantum adesse non video, sed est etiam cur suspicer, judicemque omninò diversas. At verò discedere ab arctissima quæ nobis cum Patribus Jesuitis conjunctio est sine causa certissima, id esset & animi levissimi & nimium creduli judicium.

Quarta ratio. Sint illæ Propositiones, quamquam id nondum damus, à quibusdam Auctoribus Jesuitis assertæ, aut illæ typis mandatæ sunt, quod facile comprobare est, eas in libris eorum demonstrando; aut in disceptationis ardore, vel colloquiis

familiaribus, vel sermonibus publicis ab iis pronunciatae, quod difficillimè probari possit. Nec reperta est facilior ratio rem componendi, quàm si dicatur eas in disceptationis ardore elapsas esse imprudentibus: sed quacumque id ratione factum sit, tantum inesse judico Patribus Societatis officii sui amorem, ut, si amicè de eo monerentur, nostro Ordini ex omni parte facerent satis, eorumque Generalis juberet eas è libris expungi, aut in bonum sensum explicari, aut ab autoribus revocari. Non enim minus interest Jesuitarum, ad opiniones suas tuendas, quàm nostrà ad doctrinam nostram defendendam, ut sua S. P. nostro Augustino fama & autoritas integra conservetur.

Itaque existimo, utrum libet è duobus verum sit, monendos esse amicè Jesuitas potius quàm ab eorum amicitia discedendum: mihi enim compertum est eo illos esse amore in Sanctum Augustinum, in Doctrinam ejus, & Religionem, ut sperem eos nobis honorificè satisfacturos.

Quinta ratio hæc est, quòd si à Patribus Societatis discedamus, præter ea incommoda, quæ, ut dictum est, inde nascuntur, alia longè maxima timenda sint, quæ cujuslibet prudentiæ considerata relinquo. Contrà, si ad Patres Dominicanos accedimus, non potest inter nos vera esse animorum consensio, quòd illi in omnibus dominari velint; verèorque ne eam conjunctionem non alio consilio ambiant, quàm ut tentent, an, qui soli Societatem vincere nequierint, eam non possint superare adjunctis sibi aliis Ordinibus, suamque doctrinam, quam indies delabi vident, in pristinum statum restituere. E contrariò in hac Tarraconensi Provincia summa semper fuit nobis cum Societate consensio; animadvertimusque Jesuitas nusquam non laudi sibi ducere Sancti Patris nostri Augustini discipulos se haberi, dareque operam ut sua placita cum Sancti Doctoris placitis ex omni parte concordent: quod Reverentiæ tuæ ex ipsorum Autoribus & Scriptoribus compertum esse arbitror. Porro doctrina Societatis & nostra jam sic concordant, ut ad placita Patrum Dominicanorum accedere nequeamus, quin eadem operâ reprobemus Autores nostros & Scriptores tam veteres, Ægidium Romanum &c., quàm recentiores Marquezium, Antonilezium, Corneium, Basilium Pontium & cæteros qui cum Jesuitis per omnia opinionibus consentiunt.

Postremò, si fortè apud Jesuitas privati

vati aliqui imprudentius & irreverentius locuti sint, existimo, non continuo universum Ordinem accusandum, nec ab eo discedendum, sed petendum esse ut ii qui deliquerint, jubeantur corrigere & emendare quod imprudentius & inconsideratius aut dixerint aut scripserint.

Denique mecum perpendo quo in pretio Patres Societatis, qui ferè soli jam libros scribunt, habeant doctrinam Sancti Patris nostri, & quam sibi eam laudi ducant: decorumne esset & urbanum ob unius alteriusque noxam omnia quæ tam multi Autores in ejus laudem dixerunt dare oblivioni?

*R. P. manus tuas exosculor, sumque
tui studiosissimus Famulus*

F. THOMAS DE FIGUEROLA
Provinc. humilis.

RESPONSIO

R. P. MAGISTRI

BARTHOLOM. DE LOS RIOS

In Provincia Castellana Ordinis
S. P. N. Augustini Primarii Definitoris, & Concionatoris Regii

AD CAUSAS ET RATIONES

R. P. MAGISTRI

THOMÆ DE FIGUEROLA

In Provincia Tarrconensi ejusdem Ordinis
S. P. N. Augustini Provincialis

Certè vehementer miror, te, R. P. Causis & Rationibus allatis agere, ut apud sacrum Inquisitionis Tribunal superfedamus accusatione & expostulatione de Propositionibus, quarum Censuram & proscriptionem ad verbum retulisti in litteris ad me datis 12. Julii, quatuordecim diebus antequam illas Rationes transmitteres, quibus litteris me certiore fecisti Censuram illam jam inde à primo die Aprilis Valentiae fuisse publicatam. Eò factum est ut suspicarer eas Rationes profectas esse ab aliquo eorum ad quos hæc res spectat, quibuscum velle te de eo negotio conferre, superioribus tuis litteris scripseras. Idque mihi satis compertum videtur multis de causis quas jam commemorare nihil attinet. Id unum agam, ut præcipua confutem Rationum illarum capita, quibus illi nos eludi potuisse sperant; quamquam omnes unâ

operâ refellere possem dicendo, nullam Jesuitarum factam esse mentionem, neque in Memoriali Innocentio X. Pontifici à Lovaniensibus oblato, neque in eo quem Regi nomine Provinciarum obtuli.

Quæ una responsio evertit omnem illam Causarum & Rationum machinam, quæ cum non nisi ad defensionem Societatis excogitatæ videantur, suspicionem creare possent eos in re summi momenti parum amico in nos esse animo, quandoquidem per te, R. P. defensionem & excusationem adhibeant in eo in quo nemo eos accusat. Sed illis omis, cum Propositiones illæ sint in S. P. N. Augustinum contumeliosissimæ, hîcque in vulgi manibus versentur, aio id unum, quicumque demum earum autores sint, satis esse, ut ne supersedeamus omni testificatione doloris, & quod officium à nobis exigit, Patris nostri defensionem suscipiamus defendendo Propositiones illas ad sacrum Inquisitionis tribunal, ut ab eo censurâ meritâ notentur, uti olim aiebat in re non absimili Gelasius Pontifex: *Non putavimus ullatenus differendum, quo minus hæc diligentius inquirentes aut si fortasse subreperant, de proximo sanarentur, aut anxietatem nostram, si falso probarentur iactata, releverent; æstimantes melius nos videri impatientius talia investigare voluisse, quam crescere dissimulando perniciem: neque enim vel silentio premere causas hujusmodi, vel deferendo fovere deberemus, cum dicente Magistro gentium, Sollicitudine non pigri; atque iterum, Qui præest, in sollicitudine: Reos procul dubio nos, nisi continuo quæreremus, etiam si inaniter essent vulgata, convincerent. Nec interest per quos ad aures nostras eadem pervenissent, dum quomodolibet ista referentibus, postquam nostram conscientiam penetrarent, in iis veraciter indagandis pastorales excubias esse non oportuerit negligentes, quatenus vel e vestigio posset lupis inhiantibus obviari, vel nullis existentibus feris ovium custodia secunda persisteret.*

Jam ad rationes alias venio. & ad primam dico, neminem aut fuisse aut futurum, quo autore Ordini nostro opus sit, ut ad auctoritatem Sancti Patris nostri Augustini defendendam incitetur, quando per se sufficiunt viri tam sancti & Doctoris tam eximii præclara merita; atque ad id satis esse nobis debet, quod nos ejus filios professi, ipsius habitu cinguloque utamur. Sed detur quempiam nobis fuisse autorem causæ Patris nostri suscipiendæ, num ideo rejiciendum erit consilium, aut non potius animo grato

accipiendum, quando nullo etiam autore fortiter tueri debemus quem sibi Pater noster peperit honorem & existimationem.

Quod attinet ad Universitatem Lovaniensem, mihi pro certo compertum est, propositiones illas ad Inquisitionis Tribunal antè delatas fuisse quàm sciret. Quòd si illa accusatio ab ea profecta esset, nihil ab ea factum foret quod à Theologis ab ortu & fundatione ejus, diuque ante institutam Jesuitarum Societatem factum non sit, quippe qui se diligentissimos Sancti Patris nostri Augustini discipulos, ejusque doctrinæ & autoritatis defensores strenuissimos professi sunt. Hæc affirmo ut testis oculatus, utque Doctor & Lovaniensis & Duacenus, postquàm ea longo experimento didici, quippe qui quinque supra viginti annos in Belgio demoratus viderim eo loci quo amore quaque reverentia Lovanienses Sanctum Patrem nostrum Augustinum prosequantur. Porro si Doctores & Professores Universitatis Lovaniensis signis apertis bellum inferunt, palamque se hostes profitentur eorum omnium qui dogmata à doctrina Sancti Augustini Patris nostri atque eorum Magistri aliena sive in libris, sive in disputationibus, sive alia ratione docent, ipsi quidem, quod mihi compertissimum est, faciunt quod sui officii est.

Illud etiam mihi compertum est Jesuitas illius dissensionis quæ dudum fuit, & etiamnum est inter eos & illam Universitatem, autores esse. Vix enim eo pedem intulerant, cum coeperunt opiniones à Sancti Augustini placitis alienissimas publicè docere. Quare nihil mirum est, si illius Universitatis Theologi ea re commoti, existimarint officii sui esse palàm se Magistri sui, quem à quibusdam Jesuitis appeti videbant, defensores profiteri. Eo factum est, ut quasdam propositiones temerarias & falsas, à quibusdam Jesuitis Theologiæ Professoribus assertas, censurâ notarent: quod tamen ab iis factum non fuit nisi postquàm Jesuitas amice monuerant, ut eas opiniones dimitterent.

In præfatione Censuræ suæ quatuor rationes adferunt, quibus adducti ad eam ferendam fuerant, primamque efferunt per hæc verba maxime notanda, & genuinis viri tam sancti Doctorisque tam eximii discipulis dignissima: *In primis quod D. Augustini de gratia & Libero arbitrio, deque prædestinatione & reprobatione doctrinam, in qua tuenda, explicanda ac illustranda tot annis, tot editis libris, tantâ diligentia, atque instantiâ vir tanto ingenio, tantâ sapientiâ, tot Dei do-*

tibus tam excellenter ornatus, jam ævum ac senex pro Dei Ecclesia desudavit, non in aliqua, ut dicitis, sui particula, sed totam propemodum ex proposito oppugnari, funditusque destrui ac everti videmus.

Adeoque dum sese Theologis Societatis opposuerunt inprimis & ante omnia Sancti Augustini, quem ipsi ut Magistrum, nos ut Patrem veneramur & colimus, gloriam, auctoritatem, & doctrinam spectarunt: quod quàm æquum sit, tu judica. Vellem ego, R. P. ut Censuram Lovaniensium, ejusque Justificationem haberes, ex ea intelligeres, quibus rationibus moti, non sancto Societatis Instituto, sed quorundam filiorum ejus opinionibus adversentur.

Non sola Lovaniensis Universitas neotericis quorundam Jesuitarum opinionibus sese opposuit. Duacensis eadem sub idem tempus censurâ notavit; idque fecerunt rogatæ ab Archiepiscopis & Episcopis Belgii, quos non minùs opiniones illæ offenderant. Porro Universitatum illarum Censuræ prelo datæ sunt, uti omnibus innotesceret, esse homines, qui indies magis incumberent ad destruendam auctoritatem S. P. N. Augustini ejusque doctrinam evertendam. Nemo verò ignorat quo in pretio sint Censuræ illæ, quæve sit earum æquitas ac momentum.

Non sine omnium nostrum pudore fatendum est, & nos & universam Ecclesiam Theologis Lovaniensibus omnino debere, quòd S. P. N. Augustini scripta in pulvere sepulta non jaceant, aut in Bibliothecarum angulos abjecta. Ipsi enim summo & singulari studio illius doctrinam adversus ejus adversarios & calumniatores propugnarunt: ipsi labore immenso & summo in religionem amore, omnia ejus Opera cum ducentis & amplius exemplaribus collata emendarunt, præcepto nobis pulcherrimo illo & honore & præmio. Profectò agenda sunt Deo Optimo Maximo gratiæ, quòd ea recognitio atque emendatio antè sit facta, quàm id curæ sibi sumerent Jesuitæ, atque inprimis Joannes Martinez de Ripalda, malè enim multatus & mutilatus ex ejus manibus prodisset Sanctus Augustinus, ut infra demonstrabimus.

Cardinalis Baronius Theologorum Lovaniensium in S. Augustinum Annotationes & Observationes commendans, illam Universitatem, doctissimam Lovaniensium Scholam appellat. * Ipsen Vas-

* In I. 2.
disp. 190.
gustino C. 17.

gustino esse addictissimos.

Jam igitur, R. P. tibi perspectum erit Theologos Lovanienses non ea de causa Jesuitis obstitisse, quod existimarent illis præsertim autoribus Michaëlis Baii Propositiones proscriptas fuisse, aut ab iis petitam fuisse Censuram non enim ignorant quàm ea falsa sint, reique illius autores sigillatim norunt. Nondum eò potentia devenerat Jesuitarum Societas, ut de hoste quamvis parvo se vindicare posset; vixque in Lovanium pedem intulerat cum in ea Urbe publicata fuit Bulla in Baium lata, quod anno 1567. factum est. Jam verò quis credat Societatem statim ab ingressu suo in eam Urbem, ac eo tempore quo Universitatis egebat auxilio, voluisse ejus in se odia concitare?

Immo verò tantum abest, ut Theologi Lovanienses ægrè tulerint prohibitam & notatas fuisse Michaëlis Baii Propositiones, ut religiosissimè Bullam illam revereantur & observent, nemoque in ea Universitate laurea doctorali decoretur, nisi qui se Sacramento solenni ad eam servandam obstrinxerit.

Verum non possunt non ægerrimè ferre quod vident à Jesuitis quibusdam Bullam istam ad sensum trahi planè alienum ab eo in quo ab aliis intelligitur, eaque ad commoda sua abutantur. Vaquez, Turrianus aliique Societatis Scriptores nonnullas ex iis Propositionibus quæ in Bulla Pii V. expressæ sunt, propugnant, aiuntque eas neque ut hæreticas, neque ut falsas notatas esse, sed tantum ut scandalosas & malesonantes, dum accipiuntur in quemdam sensum quem habere videntur ut in Bulla expressæ sunt; aut ob censuram acerbiorē quam continent: adeo ut si censura tollatur, aut alio sensu intelligantur tūc verissimæ sint & propugnari queant.

Affirmat & contendit in rem suam privatam Ripalda Jesuita in postremo Opere ab eo edito, omnes Propositiones quæ in Pii V. Bulla leguntur, esse proscriptas, sin minus ut hæreticas, certè ut falsas; quod cum aliorum è Societate Scriptorum sententia non concordat: cujus rei multa alia exempla proferri possent.

Nec dici potest (quod dicunt ii quorum interest) Pontificem, id quod in Memoriali sibi ab Oratore Lovaniensi oblato continebatur, habuisse pro fallacia quæ adornata esset à Jesuitarum adversariis, quâ suspitione maximè laborarent Theologi Lovanienses: nam si ita esset,

& falsò ea Jesuitis objecta fuissent, procul dubio Pontifex in gratiam Societatis accusatores castigasset, ut digni fuissent tanto admisso crimine, quippe qui celeberrimæ, & illustrissimæ Jesuitarum Societati in ipsis oculis & manibus Pontificis calumniam intulissent, & falsa crimina imposuissent.

Cæterum nec calumnia est, nec id nomen usurpari potest, dum nemo nominatur, nec ullus adversus privatum quemquam, aut Societatem suspicioni locus datur: quod neque in Memoriali Theologorum Lovaniensium, neque in nostro factum est. Adeoque, ut jam supra dixi, mirum mihi videtur Jesuitas id sentire quod eos non tangat. An verò quod in Memoriali refertur fallacia sit, æstimare licet tūc ex certissimis quæ & in manibus sunt, quæque ante supremum Inquisitionis Tribunal lata sunt, argumentis; tūc ex libris qui quotidie in Gallia & aliis locis in lucem eduntur, contumeliarum & calumniarum in S. P. N. Augustinum plenissimis.

Dum jam vident (aiunt nostri isti homines) *inutiles fuisse fraudes suas* &c. Reverende Pater, verum & sincerum veritatis studium fraus vocandum non est. Si à Te, R. P. attentè lectum & perpensum est Memoriale Pontifici à Lovaniensium Legatis oblatum, necesse est te fateri in eo nihil aliud deprehendi quàm ardorem illum singularem eundemque animum, quo primi S. P. N. Augustini Filii & Discipuli Sanctus Prosper, Sanctus Fulgentius, aliique, ejus doctrinam propugnarunt adversus illorum temporum hæreticos qui ejus famam calumniis appetebant.

At verò quod esset Theologorum Lovaniensium crimen, si Memorialibus illis ac Propositionibus exhibitis, conati fuissent S. P. N. Augustini Filios commovere, eosque inducere, ut ejus doctrinæ defensionem susciperent, quippe quorum maximè interesset? Agendæ illis à nobis sunt gratiæ, quod nos veluti ex somno excitavit, demonstrarintque contumelias & calumnias, quibus quidam S. P. N. Augustini nomini & gloriæ tenebras offunderentur; quodque nos monuerint illius Divique Thomæ Discipuli ejus doctrinam jamjam eversum iri, nisi in partes veniremus, & ad eam defendendam erigeremus caput. Quod illi demonstrant honoris nostri atque famæ studium, id singularis beneficii loco habendum à nobis est.

Nemo enim non miratur Sancti Augustini Filios, ad quos hæc res omnis imprimis pertinet, in tantis periculis altum filere.

Si Theologi Lovanienses ad hanc rem Patres Dominicanos ministros adhibent, tanto majus crimen nostrum erit, si, dum tot homines dant operam ut nos excitent, dormire pergimus. Non existimo tamen hos ab iis adhiberi, nedum Patres Dominicanos studere, ut alios Religiosos Ordines sibi adjungant eo consilio ut in unum veluti corpus adunati fortius Jesuitarum impetum sustineant, eorumque Doctrinam & Scriptores in invidiam adducant: Sed (si id agunt) id eos facere arbitror eo uno consilio, ut defendant & sustineant doctrinam S. P. N. Augustini, cujus Patres Dominicani sunt ante omnes genuini discipuli. Id toti Orbi notum est; id ipsi demonstrarunt, dum tam prompto & forti animo novis dogmatibus quæ Societatis Theologi invehebant, Sancto Augustino contrariis, obstiterunt, rem illam soli in Congregatione de auxiliis persecuti sunt; ubi imprimis agebatur ut sciretur quæ esset Divi Augustini doctrina, atque ut ea adversus hostes tam formidandos sustineretur. In quo nos Ordinis Illustris Sancti Dominici Patres longo intervallo post se relinquunt.

Optimè memini eorum, R. P. quæ me jubes in memoriam revocare; sed non ita ut refers illa se habent.

En tibi veram rerum gestarum historiam. Sub annum circiter 1623. Patres Societatis omnibus viribus conati sunt sibi in Universitatem Lovaniensem adiuturum patefacere, atque in ea publicè docere. Ea re coacti fuerunt Lovanienses Cornelium Jansenium Doctorem & Collegam suum huc delegare, qui Regi, quem Deus sospitet, exhiberet quæ timenda essent incommoda, si Jesuitis in Universitate locus daretur. Atque ita quæ dicebat probavit, ut à Philippo IV. ea omnia quæ petebat obtinuerit, ut constet ex edicto in eam rem Madridi dato 3. die Octobris anno 1624. missoque ad Serenissimam Principem Isabellam: quod etiamnum vim omnem suam retinet quandoquidem Patres Societatis ad corpus Universitatis nondum sint aggregati. Hinc rursus intelliges, R. P. quibus dolis tibi imponere studeant homines isti quorum res agitur; nam falsissimum est missum esse Lovanio Doctorem Legatum ad Universitates Hispanienses, qui peteret ut facto fœdere vires jungerent, & in unum

veluti corpus coirent, seque mutuis auxiliis adversus Societatem ejusque opiniones tuerentur. Item falsum est eos ad optatum finem cepta perducere nequisse; sed sperant se id quod modò aggrediuntur non minùs feliciter perfecturos, quodque contendunt consecuturos, ut tùm temporis consecuti sunt quod petebant.

Ad secundam rationem aio jam, tùm sciri Autores Propositionum, locaque unde excerptæ sunt. Id quoque scit supremus Inquisitionis Senatus, certisque argumentis omnia probata habet. Porro si de iis edoceri cupis, R. P. ipsi Molinæ Sectatores etiam nunc tractatus adversus Sancti P. N. Augustini doctrinam & auctoritatem & componunt & publicè dictant, ut mox R. T. demonstrabo. Si quæ Pontifici Regique oblata fuere Memorialia, neque Autores, neque loca, unde exscripta sunt, indicant, id effecere eorum qui duces in eo negotio fuerunt, & in proximum charitas & veritatis amor, alienusque ab ulciscendi libidine animus, cui dum alii, quos non nomino, obsequuntur, contemptis Superiorum mandatis & præceptis, viros probos designatis nominibus infamare student. Satis compertum est quosdam Societatis Theologos Propositiones quorundam autorum sic truncatas & mutilatas referre, ut dum cum archetypis conferuntur omnino diversa sint ab iis quæ proferuntur & denunciantur.

Ne longus sim, ad hæc comprobanda unicum exemplum, idque novum & recentissimum adferam. Anno proximè elapso 1649. prodiit in lucem alterum Opus posthumum Joannis Martinez de Ripalda Jesuitæ, in quo proferuntur loca tam turpiter mutilata, truncata, & adulterata, ut in eo omnem ipsorum hæreticorum superet audaciam. Sæpenumero binas sententias procul à se distitas ut ad rem suam accommodet, in unam colligit: modò particulam negantem, ubi nulla est, adjicit, quod sensum maximè contrarium diversum efficit: modò pro sanctorum sententiis suas profert: nonnumquam ea quæ obijciuntur, hæreticorumque argutationes, quod cæcus, ut ita loquar, etiam advertere potuisset, pro Sanctorum Patrum placitis accipit. Librum suum implevit innumeris locis eum in modum depravatis & adulteratis quæ in libello qui inscribitur, Joannes Martinez de Ripalda Vulpes capta, palàm facta sunt: animadversumque est supra viginti unius Sancti Augustini sententias ab eo esse adulteratas. Quod

Quod ad 3. rationem attinet, non jam agitur ut à Patribus Societatis discedamus; nec ut privatam cum Patribus Dominicanis conjunctionem ambiamus: at id unum studemus, ut Patrem nostrum Sanctum Augustinum adversus hostes, quicumque illi sint, defendamus.

Porro si ad eam defensionem suscipiendam necessarium esset ut cum Ordine aliquo Religioso societatem iniremus, an non existimas R. P. satius fore socium habere S. Dominici Ordinem celeberrimum juxta & eruditissimum, qui & Regulam & Doctrinam Sancti Augustini profiteretur, quam lis nos sociare quineutrum ex his faciant? Antè natam Societatem nulla erat nobis cum Patribus Dominicanis similitudo, sed contrà, summa erat inter eos & nos & doctrinæ & animorum consensio. An non animi levissimi & nimium creduli esset veteri illà necessitudine ac conjunctione dissoluta, novam cum Patribus Societatis arctissimamque jungere. Sin ita est, profer, si lubet, R. P. rationem illam gravem, urgentem, certam & compertam, quare id à nobis fieret. Si quidem in Provincia vestra tanta sit cum Societate conjunctio, id nescio; id scio nullam neque in hac Provincia neque in Andalusensi esse nobis cum illis aut necessitudinem, aut similitudinem.

Ad quartam rationem id unum respondeo, nobis, id quod jam supra dixi, certis argumentis de Propositionibus, de earum Autoribus deque locis unde exscriptæ sunt, compertum esse.

Porro quid sperandum foret, si amicè moniti fuissent Patres Societatis, æstimare licet ex eo quod ab iis factum est, dum à veritate discedere cœperunt. Nam, ut supra memoratum est, cum à Theologis Lovaniensibus anno 1585. moniti fuerunt Professores Societatis de novitate viarum quas ingrederentur, non solum non ab iis recesserunt, verum ultra progressi animum in novis suis opinionibus tuendis obstinarunt. Sed juvat ipsa quibus Theologi Lovanienses rem omnem referunt, verba memorare; digna sunt quæ legantur.

Cum autem quæ notanda putarant Collegii nostri Magistri, quibus datum erat negotium dictata Professorum vestrorum perlegendi, lecta nobis fuissent, quamquam cum iis quæ perlata initio fuerant, valde consentire viderentur, ne quid tamen diligentia aut humanitatis prætermisum à nobis videri posset, decrevimus ut selectiora quæque Reverendis Paternitatibus vestris offerrentur, num ea

pro vestris agnosceretis, aut si quid non satis dextrè excerptum, aut obscurius fortassis minusve consideratè dictum foret, id supplere, illustrare, ac emendare dignaremini.

At verò usque adeo de priorè sententia discessum non est, ut pauculis tantum mutatis verbis, oblatis articuli seu assertiones pro vestris agnoscerentur, approbarentur, & adjecto passim scholio pluribus etiam rationibus confirmarentur.

Tum pro Præfationis suæ epilogo sic loquuntur: Quod autem superest, Reverendi Patres, obsecramus vos in Christi visceribus, ut rem hanc totam, seposito paulisper anticipata opinionis præjudicio, liberis animis inuerti, serioque expendere dignemini, ut si fieri queat, in tam magno fidei nostræ de gratia Christi ac Dei Prædestinatione negotio unum idemque concorditer sapiamus, eò magis quod (ut idem de Massiliensibus queritur Prosper) eadem aliquando nobiscum melioraque senseritis.

Quæ charitati conformior excogitari possit oratio? nec tamen eo factum est ut hætenus Patres Societatis ab opinionibus illis discesserint.

Profectò verosimile est eos nobis non magis facturos fuisse satis, si 22. Propositionum S. P. N. Augustino contumeliosarum Autores aut Defensores admoniti fuissent.

Atque ita etsi eorum Generalis eas jubere & libris expungi, aut in bonum sensum explicari, aut ab Autoribus retractari, certè nescio an obtemperaturi essent.

Atqui ratio cur de eo dubitem hæc est, quod Claudius Aquaviva Jesuitarum Generalis, ut narrat disp. 6. q. 2. d. 5. de gratia Tannerus è Societate Scriptor, decretum ediderit quo Theologi Societatis in exponenda Divinæ Gratiæ efficacia jubentur sequi sententiam quæ coram summis Pontificibus Clemente VIII. & Paulo V. in congregatione de Auxiliis explicata & propugnata fuerat, quamque Viri sapientes & eruditi Sanctis Augustino & Thomæ conformiorem censuerant. Judicent, qui rerum scientes sunt, an Theologi Societatis decreto illi obtemperent.

Quod de Patrum Societatis in S. P. N. Augustinum Ordinemque nostrum animo dicis, R. P. satis manifestum est ex libris quos antè ediderunt & indies edunt in quibus de S. P. N. Augustino Doctorum Coryphæo & primario Ecclesiæ columine irreverentissimè & contemtissimè loquuntur. Quo fuit in D. Augustinum animo is qui dicere ausus est, Sanctum

etum illum Doctorem, dum de Divina gratia & libero arbitrio scripsit, fuisse oblitum densa caligine, qua prohibitus fuerit videre aut intelligere eas veritates quas ipse jam detexisset; Sancti Augustini sententiâ obfirmatos fuisse in errore Pelagianos & Semipelagianos, & ad eorum partes abductos complures Catholicos; Lutherum & Calvinum ex ejus doctrina hæreseon suarum coepisse semina &c. Quando istæ assertiones atque aliæ multæ non absimiles, in S. P. N. Augustinum tam manifestè contumeliosæ, à tot annis in publicum sparsæ, librique in quibus habentur, toties typis editi fuerunt, quid causæ est cur eorum *Generalis non jubeat eas ex istis libris expungi aut ab Autoribus revocari, cum homines isti fateantur, non minus interesse Jesuitarum ad opiniones suas tuendas, quam nostrâ ad doctrinam nostram defendendam, ut sua S. P. N. Augustino fama & auctoritas integra conservetur.* Fuerunt enim sine dubio Viri spectabiles non solum extranei, sed ex ipsa Jesuitarum Societate qui eos de audacia illa sua amicè monuerint.

Quid dicam de Joanne Adam, recente è Societate Scriptore, qui hoc ipso anno 1650. cum Provincialis sui licentia, in lucem edidit librum, cujus penes me exemplar est, in quo de S. P. N. Augustino contemtiùs loquitur, quàm locuturus esset de quovis recentiore ullius nominis Scriptore. Postquàm sæpius dixit; *Doctrinam Sancti Augustini justò obscuriorem esse, & secum pugnantem, impeditam pluribusque erroribus obnoxiam, ejusque libros tenebris ac nubibus ita esse obductos, ut non absque profunda meditatione distingui possit, quid doceat uti dubium, & quid tradat ut indubitabile, quidve dicat adversarios impugnans & quid doceat sua defendens; sæpe oppositas sibi ab adversariis objectiones in eosdem retorquere, eos in absurditates miras conjiciens; instantiam instantiâ solvere; inconveniens refutare difficultate longè majori: ulterius, inquit, non clarè exponi, num objectiones ad suos hostes impugnandos proponat, vel quid in eos cum iisdem conveniat.* Ex quibus mihi licitum est concludere, noluisse Augustinum suos sensus clarè exponere, vel in illis explicandis non ita felicem fuisse, ut nullus de ejus mente dubitandi supersit locus: quare immeritò volunt ipsum esse oraculum gratiæ & Concilii Tridentini interpretem: Capite tandem septimo dicit, Sanctum Augustinum, dum Pelagii errorem impugnaret, disputationis æstu abreptum in errores oppositos abiis-

se; aliasque ejusdem generis calumnias effutit, quas, ne longior sim, omitto.

Hinc jam æstima, R. P. an ea sit hominis D. Augustino aut doctrinæ ejus addicti oratio, aut à Patribus istis integra & æqua satisfactio sperari posse videatur. Si quæ affirmat Scriptor iste Joannes Adam, vera sunt, nihil in S. P. N. Augustini doctrina certum est, nec in eamuti possumus. Atque is scopus est quo collimant, id unum quod contendunt Sancti Doctoris nostri inimici, quo faciliùs tueri queant dogmata sua nova ex adverso pugnantia cum ejus doctrina, quæ iis solis obscura est, qui ejus splendorem ferre non possunt. Dionisius Petavius Scriptor item recens è Societate, postquàm contrà opinionem temerariam Joannis Adam Socii sui lassus est, * *Omnium Latino- rum quorum in hac controversia major rem dixi auctoritatem esse, Princeps est consensu Theologorum Augustinus, cujus de gratia sententiam quotquot deinde consecuti sunt Patres ac Doctores, tum vero Ecclesia Presules, Presulumque Conventus aliorum, ratam & Catholicam esse judicarunt, ut hoc satis magnum putarent veritatis argumentum, quod ab Augustino positum ac decretum esse constaret: tandem Patrum omnium Principem Augustinum, ipsiusque auctoritatem, quam ipse met teste reverentur & sectantur alii omnes Sancti Patres & Doctores, turpiter deserit: & ut sententiam cum S. Augustini placitis pugnantem stabiliat, audet dicere: Seposita magnorum Virorum auctoritate, causa cum causa, res cum re, rationes cum rationibus comparanda sunt, ex eoque solo judicandum est, utra sit opinio verisimilior.* Sic hoc tempore Autores quidam, contrà veterum omnium sententiam & judicium, suamque ipsorum confessionem, Sancti Augustini P. N. auctoritatem vilipendunt.

Quamquàm hæc exempla, quæ fictitia dici nequeunt, produxisse sufficit, ad-jicere tamen lubet, R. P. quod perquàm celebris ex Academia Parisiensi Scriptor in libro qui hocce anno 1650. editus est hoc titulo, *Qualis sit auctoritas Sancti Augustini in Ecclesia*, refert de quodam ejusdem Academiae Doctore Jacobo Pereyret. Hæc de eo habet capite ultimo. *Quod abjectis & calcatis aliorum Pontificum sanctionibus, quibus S. Augustini auctoritatem & doctrinam stabilitam videt, solas Bullas Pii V. & Urbani VIII. observandas in suo Apparatu moneat & inculcet, nullo adductus aut amore veritatis aut desiderio disciplinae aut*

* Theol. dogm. Tom. I. lib. 9. cap. 6.

vero

vero in Sedem Apostolicam cultu, sed solo Molinisticarum partium affectu, & opera sua, quam addixit, præstanda studio. Estimavit nimirum homo acutus, illis posteriorum Pontificum Bullis labefactari auctoritatem S. Augustini, damnari doctrinam, & Molinistarum dogmata muniri. Huic scena servire voluit, & Molinismi ruentis famam quovis Sanctorum Patrum, Pontificum, Sedis Apostolica, Conciliorum, Ecclesiaeque universa dispendio sustinere.

Narrat idem Scriptor, Concionatorem Jesuitam ex Aquitania nuper eò profuisse, ut publice de suggestu in S. Augustinum sit debacchatus ea levitate & inscitia, immo contumacia & impietate, ut erubescere non solum Socii, sed ipse quoque, quamvis summe petulans, indignantibus & adversantibus bonis omnibus, coactus sit. Quo autem mentis fervore in Augustinum, eodem in Prophetas, in Apostolos, maximeque in Sanctum Paulum invehitus est, omnes prorsus caeco naturæ impetu astuque abreptos, veritatis & fidei limites transiluisse, non veritus affirmare.

Hæc exempla recentia sunt; at ultra ibunt si nemo cohibeat. Veniamus ad 5. rationem quæ ad rem publicam & politicam pertinet. Repeto quod supra dixi, jam non agi neque de discessione à Patribus Jesuitis facienda, neque de societate arctiori ineunda aut cum Patribus Dominicanis, aut cum alio aliquo Religiosorum Ordine; sed unum hoc nobis esse negotium, ut nobis adjungamus filios & discipulos genuinos S. P. N. Augustini, id est eos qui ex animo ejus doctrinam sequuntur & aliis sequendam tradunt, sive ii Dominicani sint, sive Jesuitæ, sive alii quicumque. Is maxime noster erit qui pro Patris nostri doctrina, & auctoritate fortius pugnaverit.

Quod veretur R. T. ne Patres Dominicani Societatem nostram ambient hoc uno consilio, ut tentent an Jesuitas superare non possint adjunctis sibi aliis Ordinibus, vanum mihi quidem videtur. Nam non arbitror eos de Jesuitis velle triumphare, sed de ea quæ apud eos traditur doctrina, quæ Sanctis Patribus, præcipuisque veterum Autorum contraria est. Quamvis autem tibi videatur, R. P. aut tibi ab aliis persuasum sit, Patres Dominicanos aliorum auxilio destitutos non potuisse Theologos Societatis superare: certè aliud constat ex Actis Congregationis de Auxiliis, & ex Idea Bullæ Pauli V. Pontificis continuò post illam Congregationem apparatæ, in qua quinquaginta circiter Molinæ assertiones ut Sancto Augustino contrariæ reprobantur.

At nihil est quod magis mirer, quàm quod à te dicitur, R. P. Doctrinam Patrum Dominicanorum, quæ Divi Thomæ est, in dies delabi. Quis enim ignorat eam ab universa Ecclesia, & ab omnibus bonis verisque Theologis, qui animi impetu propriisve opinionibus non ducuntur, pro secura & genuina Theologiæ norma haberi? Qui diversum aut affirmat aut sibi persuadet, eum oportet ineptissimè sentire de recentioribus Theologis, qui per invidiam Divi Thomæ gloriam & æstimationem ferre non possunt. Quid quod hodièque Ordinis nostri in Universitate Salmanticensi Professores, Pater Magister Gamboa, Pater Magister Oviedo, Pater Magister Aguilar, ac Illustrissimus Episcopus Gaditanus, meri Thomistæ sunt: similiter & Ordinis de Mercede & cæteri celebriores hujus Academiæ, aliarumque scholarum Hispaniensium Theologi prævalent, quod cuiusvis notum est. Siqua schola est quæ Divo Thomæ non adhæret, in contemptu est. Quis nescit in Gallia Universitatem Parisiensem S. Thomæ doctrinam profiteri, Tolosanam etiam Sacramento ad eam tuendam se adstringere? Quis nescit eam in omnibus partium septentrionalium Academiis florere? Lovaniensis D. Thomam secundum post Sanctum Augustinum Magistrum habet: Duacena illum sequitur. In Colonienfi omnes in ejus sententiam jurant. Jam verò rerum sit ignorantissimus, qui nesciat eam in omnibus Italiæ Universitatibus teneri: Neapolitanos Divum Thomam & pro scholarum Magistro & pro Patriæ Patrono ac præcipuo Ornamento venerari. Ut paucis absolvam, Sancti Thomæ doctrinam omnes Europæ Academiæ amplectuntur & venerantur: quo mihi spes certa nascitur omnem dæmonum vim atque artes nihil adversus eam valituras.

Sed id ipsum quod contendimus ex verbis tuis conficio. Nam si verum est, doctrinam Sancti Thomæ in dies delabi, necesse est unà pessumdet S. Augustini Patris nostri doctrina quacum altera, utpote merum ejus compendium, firmissimè cohæret. Id fateri debent qui tantillum operæ binis illis Viris Sanctis dede-

* Citatur S. Augustinus circa 1500 in Summa D. Thomæ

runt. * Vix enim in Divi Thomæ Summa Articulum reperias, in quo S. Augustinum non citet, suasque responsiones ejus auctoritate confirmet. Cur ergò non judices, R. P. in tanto periculo jungendas

das esse dexteram ad auctoritatem ac doctrinā gloriosissimi Patris nostri defendendam?

Fortassis verum est, & per me credatur licet, *Jesuitas nunquam non laudi sibi duxisse, Sancti Augustini gnaros discipulos se haberi*: sed jam supra in responsione mea ad quartam tuam rationem demonstratum est, quodnam illi genus discipuli Sancti illius Doctoris sint. Et certè præclarum illius rei argumentum dederunt, dum Universitatis Salmanticensis jurijurando, cui constituendo nostri ac Dominici Ordinis Professores Theologi adlaboraverant, intercesserunt.

Nec memini in eorum Autoribus ac Scriptoribus advertisse eos multum esse sollicitos, ut suæ opiniones cum S. Augustini placitis concordent: hæc intelligo de divinæ gratiæ & liberi arbitrii, prædestinationisque materia, quæ sunt præcipua doctrinæ ejus capita. Immo verò S. Augustini discipuli de iis omnino diversa quotidie demonstrant. Et ut primum coeperunt in eum injuriosi esse, eo crimine præsertim in Congregatione *de auxiliis* coram summo Pontifice palam convicti fuere.

Verum est eos, ab eo tempore, postquam Clemens VIII. Pontifex dixerat ut in illis atque aliis omnibus de prædestinatione, de gratia & libero arbitrio disputationibus Sancti Augustini doctrina pro judiciorum norma haberetur, coepisse in S. Augustini doctrinam paulò reverentiores esse. Sed major eis cura fuit, ut Sancti Viri doctrinam ad suam aptarent, quàm ut suam illius placitis conformarent. Viderisque id sentire R. P. dum post affirmas, Autores nostros cum Autoribus Societatis sententiis concordare, veluti si non Sancti Augustini sed Jesuitarum placita norma essent ad quam doctrinam nostram exigere teneremur.

Cæterum quod scribis, R. P. *doctrinam Societatis & nostram sic concordare*, per me licet, sint ex omni parte conformes, modo legitimæ sint ejusdem Patris, id est Sancti Augustini, filia; si verò ejusdem Patris sint filia, oportet eas ex omni parte concordare esse cum doctrina Divi Thomæ, quippe qui sit S. P. N. Augustini filius, & discipulus fidelissimus. Atque ita tantum aberit ut autores nostros, qui semper lubenti animo Sanctum Thomam secuti sunt, improbemus, ut contra eos eâ causâ prædicemus. Ægidius Romanus non solum discipulus, sed etiam auditor Divi Thomæ fuit, & ex ejus ore didicit quidquid subinde scriptis manda-

vit. Pater Magister Guevara, Bannezii competitor, sacer D. Thomæ Sectator erat, & tanta necessitudine competitori conjunctus, ut cum eo convivari eo die non dubitaverit, quo ei alter in cathedræ petitione antelatus fuerat. Non minori studio Sanctum Thomam secutus est Pater magister Cornejo, ut ejus scripta declarant. Isque ex iis fuit qui Salmanticensis juris-jurandi negotium sollicitaverunt, quique libello apologetico in eam rem edito subscripserunt. Quis verò nescit Patrem Magistrum Basilium Pontium Legionensem fuisse illius consilii de instituendo jure-jurando autorem & ducem.

Hæc sunt R. P. quæ rationibus tuis summo animi candore respondenda putavi. Adeoque pro ea qua polles prudentia singulari, & pietatis studio, ut dignum decet Patris nostri filium, spero fore ut fortiter in defensionem honoris ejus incumbas, & quantum in te erit adjuves cœpta nostra, quibus nihil aliud quærimus quàm majorem Dei Gloriam, gloriosi Patris nostri Augustini honorem, & Sancti Ordinis nostri existimationem. Sic habeto, R. P. me semper futurum observantissimum tui Filium, sincerissimum amicum, & ad officia omniaparatissimum famulum.

F. BARTHOLOMÆUS DE LOS RIOS.

ALTERUM MEMORIAL E

A REVERENDO PATRE MAGISTRO
BARTHOLOMÆO DE LOS RIOS
OBLATUM

INQUISITORI GENERALI
Sub initium mensis Septembris 1650.
ex Hispanico in latinum versum.

ILLUSTRISIME DOMINE

Pater Magister Bartholomæus de los Rios Regius Ecclesiastes, & primarius hujus Provinciæ Castellanensis Ordinis S. P. N. Augustini Definitor, nomine dictæ Provinciæ, item Andalusiensis & Tarraconensis exponit, quòd etsi dignatus sis Decretum tuum ad omnes Inquisitiones mittere, jussis que mandatis solennibus in locis omnibus jurisdictioni tuæ subje-

ctis

etis publicari Censuram & Judicium à te latum in 22. Propositiones, quas homines audaces in Hispania sparserunt, contrarias Doctrinæ Catholicæ & Sanctæ Divi Augustini Patris nostri, ejusque autoritati, quæ & summa & firmissima est; tamen necdum publicata sint neque in hac civitate Regia, neque in ullo alio loco hujus Archiepiscopatus Toletani; quod mirum videatur: quia quemadmodum ad primi mobilis motum cætera omnia moventur, ita dùm hoc sacrum & supremum Tribunal sancta sua Decreta edidit, ipsius exemplum omnes hujus Monarchiæ Inquisitiones sequi & solent & debent. Quæ de causa te suppliciter & demississimè orat, ut jubeas Madriti, Toleti, & in aliis omnibus hujus Archiepiscopatus locis publicari Censuram dictarum Propositionum, insertis in Decretum, & sigillatim designatis singulis illis 22. Propositionibus, ut evitetur incommodum quod aut temporis omnia ferentis diuturnitas, aut malitia eorum qui Propositionum illarum autores sunt, adferre posset, si solum referrentur prima & postrema earum, quæ in Libello supplice Pontifici oblato exprimuntur. Cum enim in paucissimorum manus libellus ille venerit, fluxu temporis fieri posset ut astuti & maligni homines cæterarum, quæ inter primam & postremam comprehensæ sunt, memoriam abolere, primamque ultimæ connectere, ut hac ratione persuadeant, cæteras proscriptas non fuisse, sed eas solummodò quæ primo & ultimo jacent.

Item petit ut sibi tradi præcipias exemplum authenticum Decreti tui & mandati, fiatque facultas illud typis excudendi mittendique ad omnes trium Provinciarum Conventus, in Tabulariis domesticis asservandum, in quibus erit instar armorum quæ in promptu sint ad facram Doctrinam S. P. N. Augustini defendendam: Augustini, inquam, qui certum in te habet præsidium illud atque tutamen, quod nunquam non præstatur à te ubicumque Religionis, fidei Catholicæ, & Sanctæ Matris Ecclesiæ utilitas postulat, quemadmodum à Vincentio Lirinensi dictum est: *Quo quisque religiosior est, eo promptius novellis adinventionibus contradicit.*

Gelasius I. Pontifex summo illo studio adferendi malis prompta remedia, illisque occurrendi sub ipsa initia, incitatus, præclarè dixit: *Æstimantes melius nos videri impatientius talia investigare voluisse, quam crescere dissimulando perniciem: neque enim vel si-*

lentio premere causas hujusmodi vel differendo fovere deberemus, dicente Magistro gentium, Sollicitudine non pigri; atque iterum, Qui præest in sollicitudine: reos procul dubio nos, nisi continuo quæreremus, etiam si inaniter vulgata convincerent. Nec interest per quos ad aures nostras eadem pervenissent, dum quomodolibet ista referentibus, nostram conscientiam penetrarent in his veraciter indagandis, Pastorales excubias esse non oportuerit negligentes, quatenus vel è vestigio posset lupis inhiantibus obviari, vel nullis existentibus feris ovium custodia secunda persisteret.

II. MEMORIALE

REGI HISPANIARUM

OBLATUM

R. P. BARTHOL. DE LOS RIOS

Ordinis Eremitarum S. AUGUSTINI

Religioso.

R E X

Pater Magister de los Rios apud Regiam tuam Majestatem Verbi Divini Præco, & primarius in hac Castellanenfi Provincia Ordinis S. Augustini Definitor, exhibet se abhinc duobus circiter mensibus ad Majestatis tuæ genua prostratum ex nomine & mandato hujus Provinciæ, item Andalusiensis & Tarraconenfis, obtulisse Libellum supplicem, quo V. M. suppliciter, & demississimè orabat, ut pro honorifico Defensoris Ecclesiæ titulo, quo jure merito ante omnes Christianos Reges gaudet, quemque à majoribus fortibus factis promeritum hæreditario jure accepit, autoritatem suam, apud summum Pontificem interponere dignaretur, datisque litteris enixè flagitaret, ne pateretur labefactari autoritatem S. Augustini Doctorum Ecclesiæ Coryphæi, in quem quidam ejusdem Ecclesiæ filii multa temerè & insolenter dixerunt, quorum nonnullæ assertiones in Memoriali primùm oblato relatæ sunt: ne si scintillæ illæ negligentur magnum in universa Ecclesia excitetur incendium. Hoc enim summi momenti negotium est, atque adeò ejusmodi, ut non solum de S. Augustini aut Ordinis nostri honore, sed de totius Ecclesiæ eversione agatur. Quæ causa est cur Orator tam ardenti & sollicito studio id beneficii flagitat.

Fretus igitur benignitate & benevolentia Vestra, Rex Clementissime, tituloque Defensoris Ecclesiæ & Sanctorum ejus, quo meritò ornatus es, iterum pedibus Majestatis Vestræ advolutus te Regem fidei & Religionis studiosissimum suppliciter orat, ne diutius differat V. M. ad Pontificem scribere. Nam quò majus est illius in Ecclesiam Religionemque Catholicam studium, eò certior est spes illam sine mora auctoritatem Regiam interposituram, ut novitates tantæ tamque perniciosæ comprimantur. Qua de re Vincentius Lirinensis olim hæc pronunciavit, Quò quisque Religiosior est, eò promptius novellis adinventio-nibus contradicit. Item quod Innocentius Pontifex in re simili dixit, hic in rem nostram facit: *Sanandum ergo celerius ne longius exsecrandus animis morbus inserpat: sicut medicus cum viderit hujus terreni corporis aliquem esse languorem, magnum sua artis æstimat documentum, si citò quis, illius interventu, desperatus evadat; vel cum putre vulnus adspexerit, adhibet fomenta vel cætera quibus illud possit, quod natum fuerat, vulnus obducere. At si id manens sanari non potuerit, ne corpus reliquum sua tabe corrumpat, ferro amputat quod nocebat, quo reliquum integrum servet & intactum. Præcidendum id ergo est, quod velut puro sanoque nimium corpori vulnus obrepit, ne cum tardius abstergitur, in ipsis penè visceribus hujus mali non exhausti post sentina considat. Et paulò post: *Avellendi sunt longius & ab Ecclesia procul removendi visceribus, ne diutius multa occupans, insanabilis post error increseat. Si enim diu sub hac fuerint impunitate versati, necesse est multos in hanc suæ pravitatem mentis inducant, decipiantque innocentes, vel potius imprudentes, qui fidem Catholicam non sequuntur. Putabunt enim eos rectè sentire quod adhuc viderint in Ecclesia perdurare. Separetur ergo à sano corpore vulnus insanum, remotoque morbi sævienti afflatu, cautius quæ sunt sincera perdurent, & grex purior ab hac mali pecoris contagione purgetur.**

Eadem mente Episcopi Africani à Trasimundo Vandalorum Rege in Sardiniam Insulam relegati, omnes ferè S. P. N. Augustini Institutum professi, dixerunt. *Quantum membra Ecclesiastici corporis per Christi gratiam in unitate fidei compages retinet caritatis, tantum necesse est ut pro invicem sollicita sint membra: ut repulso cujuslibet pravi dogmatis verbo, non solum servanda, sed & reparanda sanitati jugis atque indefessa tam sermonis quam orationis impendant instantia: quia sicut ipsam dilectionem*

doneo gratia spiritalis accipimus, ita dum pro fratribus solliciti sumus, non solum Divinam inesse nobis gratiam demonstramus, verum etiam quanto magis à nobis puritas caritatis impenditur, tanto magis gratia nobis divina restitutionis augetur.

Et certè in hac occasione, tres Provincie, ex quarum nomine & mandato pedibus Majestatis tuæ hic advolor, Rex, videntur posse Majestati tuæ proponere hæc Gelasii Pontificis verba. *Non putavimus ullatenus differendum quominus hæc diligentius inquirentes, aut si fortè subrepsissent, de proximo sanarentur, aut anxietatem nostram, si falsa probarentur jactata, relevarent. Estimantes melius nos videri impatientius talia investigare voluisse, quam crescere dissimulando perniciem: neque enim vel silentio premere causas hujusmodi, vel differendo fovere deberemus, dicente Magistro gentium, Sollicitudine non pigri: atque iterum, Qui præest in sollicitudine: reos procul dubio nos, nisi continuo quæreremus, etiam si inaniter essent vulgata, convincerent. Nec interest per quos ad aures nostras eadem pervenissent, dum quomodolibet ista referentibus postquam nostram conscientiam penetrarent in his veraciter indagandis, Pastorales excubias esse non oportuerit negligentes, quatenus vel è vestigio possit lupis inhiantibus obviari, vel nullis existentibus feris ovium custodia securus persisteret.*

Ad extremum, Rex, nihil ad rem nostram accommodatius esse, aut Majestati tuæ convenientius dici poterat, quam hæc S. Fulgentii Episcopi Ruspensis Toletæ oriundi, viri Sanctissimi atque Sapientissimi Ordinis S. P. N. Augustini Religiosi oratio: *Magis, inquit, Christianum regitur ac propagatur Imperium dum Ecclesiastico statui per universam terram consuliur, quam cum in parte quacunque terrarum pro temporali securitate pugnatur.*

Has ob causas, Rex, atque imprimis ob eximiam pietatem tuam, & singulare studium in universæ Ecclesiæ, & præsertim in harum trium Provinciarum bonum, quæ dotes tuæ toti orbi notissimæ, omnium Ecclesiæ filiorum amorem & reverentiam tibi pepererunt; trium harum Provinciarum Religiosi servi tui confidunt, fore ut non vana spe fiduciam posuerint in amore eximio summaque tua pietate in sanctum Patrem Nostrum Augustinum, quem summi Pontifices, Synodi œcumenicæ, sancti Patres, & Scriptores Catholici multis & pulcherri-mis laudibus celebrarunt: qua de re li-

bri etiam scripti sunt, atque alii scribi possent. Adeoque manifestum est sacram, supremam atque universalem Inquisitionem pro jurato suo in Ecclesiam studio jure meritissimo 22. illas Assertiones ex mandato tuo proscripserit & notaverit tanquam respectivè falsas, improbabilis, absurdas, male-sonantes, piarum aurium offensivas, temerarias, sapientes hæresim & contumeliosissimas sanctitati, pietati, & Doctrinæ S. P. N. Augustini inclyti Ecclesiæ columinis.

Ex his conficitur, has Provincias jure merito & optimis rationibus nixas à te, Rex sapientissime, supplices orare, ut datis ad summum Pontificem litteris ab eo peras, ut in universa Ecclesia fieri jubeat quod ab Inquisitione generali, & hujus jussu ab aliis ipsi subjectis Inquisitionibus tum Hispaniæ tum aliorum locorum factum est: quando quò malum latius grassatur, eò latius extendendum est remedium. Nec videtur quidquam convenientius fieri posse, quàm si ad supremum Pastorem confugiatur, petaturque, quod ab eo expectandum est, necessarium malis remedium.

Hæc, Rex, jam indè semel atque iterum ad pedes Majestatis tuæ demississimè prostratus quanta maximâ potui contentione & reverentia petii, idque ipsum rursus peto. Sic te Christus Jesus in multa secula salvum & incolumem servet.

III. MEMORIALE

INQUISITORI GENERALI HISPANIÆ

O B L A T U M

A R. P. BARTHOL. DE LOS RIOS.

ILLUSTRISIME DOMINE

Pater Magister Bartholomæus de los Rios Ecclesiastes Regius, & primarius in Provincia Castellanensi Ordinis S. Augustini Definitor, ex nomine & mandato hujus Provinciæ, item Tarraconensis & Andalusienensis exhibet oblato à se Libello supplice Magnitudini tuæ, ex nomine earundem Provinciarum, quo tibi supplicabat, opemque tuam & præsidium implorabat adversus assertiones quasdam auctoritati & doctrinæ Sancti Patris nostri Augustini Doctorum Ecclesiæ Coryphæi contumeliosissimas; te, Illustrissime Domine, pro eo quod in te est fidei conser-

vandæ studio, proque tua rerum Ecclesiæ Catholicæ promovendarum vigilantissima sollicitudine, & summo in auctoritatem & Doctrinam SS. Patrum affectu, proscripserit assertiones illas, censuræque meritâ notatas prohibuisse Decreto publico. Sed quoniam Decretum istud paucissimis notum aut visum fuit, eo quod à quibusdam hominibus, qui ægrè ferunt Sanctum Augustinum coli & æstimari, ab Ecclesiis ubi affixum fuerat, detractum sit: (quod constat in hac civitate Regia Madritensi, & Salmanticæ fuisse factum, itemque in aliis locis factitatum fuisse verosimile est) multi dubitant fueritne censura illa publicata, aut editum illud Decretum. Quod cum ita sit, desperandum est fructus qui expectabatur à remedio quod tantis malis Magnitudo tua attulerat. Immo verò fuit nuper qui insolenter Decretum illud contempsit, & in Scripto typis excuso hanc orationem petulantissimam effudit: *Nolite ferre, ut decretis Pontificum opponatur Censura trium forte aut quatuor Theologorum qui proscripserunt (quo die? quo mense? quo anno?) viginti duas Propositiones, quæ ad Doctrinam nihil attinent, sed eo titulo quod aqua lance Doctrinam Sancti Augustini non æstimarent.*

Malum jam inveteratum esse indicat, cum id quod jam narratum est, tum ea audacia qua decreta vestra detrahuntur ab iis locis in quibus affixa fuerant ut essent publica, quæque in scripto publico vilipenduntur.

Ad hæc à viris fide dignis accepi editum fuisse in Gallia anno superiori librum autore quodam Joanne Adam, in quo Scriptor ille impudentissimè & contumeliosissimè Doctrinam & auctoritatem P. S. N. Augustini destruit & evertit.

His de causis Orator Pietatem tuam rursus implorans exhibet Principes & Judices non esse timori boni operis, sed mali, nec sine causa eos gladium portare, leges verò & sanctiones publicas esse lucernas quæ non sint ponendæ sub modio, sed super candelabrum, ut luceant omnibus qui in domo sunt.

Quare à te, Illustrissime Domine, ex nomine trium dictarum Provinciarum qua debet reverentiâ flagitat, ut manifestes & notius reddas tuum illud studium amoremque fidei & Ecclesiæ Catholicæ (quæ in summo periculo versatur, præsertim dum ejus columnæ principes & validissimæ subruuntur) aut mandando, ut rursus Decretum tuum publicetur, & curando ne detra-

hatur, aut tradendo Oratori exemplum authenticum illius Censuræ, in quo ad verbum expressæ sint illæ viginti duæ assertiones, ut eo uti valeat adversus eos qui eam in dubium revocant aut arroganter despiciunt: aut efficiendo ea ratione quæ Magnitudinituæ convenientior videbitur, ut mandata tua & Censura omnibus sic innotescant, ut de iis neque dubium ullum remaneat, neque ulla controversia sit.

Quod si faciat Magnitudo tua, de Ecclesia Catholica, de Sanctis Patribus atque imprimis de S. P. N. Augustino & de Ordine nostro optime merebitur.

EPISTOLA

R. P. BARTHO. DE LOS RIOS

AUGUSTINIANI

A D

R. P. PHILIPPUM VICECOMITEM

Augustiniani Ordinis Generalem.

Circa 20. Junii 1650.

REVERENDISSIME PATER

AVE MARIA. Litteras R. P. V. 28. Januarii Romæ ad me datas nonis Martii recepi: verum, siue quod Aulæ Concionibus tunc occurrentibus detinerer, siue quod Tabellarii copia destituerer, siue denique quod ad hujus Provinciæ Capituli iter me accingerem, curisque in eam rem necessariis distraherer, hætenus tanto favori quo me tam benignè & liberaliter prosequi dignata est R. V. P. gratias, ut par erat, habere non potui. Nunc ergo mihi quodammodo restitutus ex intimo cordis manum R. P. V. exosculans, quo possum cultu & observantia gratias habeo, tantæque benevolentia gratam memoriam æternum conservabo, confidens quod quo me affectu excipere cepit, posthac etiam complecti non dedignabitur.

Detrectabam ob ætatem graviolem Capitulo Provinciæ hujus præsentem me exhibere: verum desideriis & precibus R. P. M. Gamboa (cujus curâ & vigilantia res ibi promovebatur) victus obtemperavi. Egerunt ut totius Provinciæ sarcinam susciperem; sed quia multis jam annis in Belgio commoratus, minùs hic innotueram, gravesque præterea difficultates in variis Conventibus superandæ erant, quas infelicitis & cariosi seculi licentia invexit, discolisque non paucis

ferro & igne medendum erat; abnuendum duxi. Non potui tamen effugere quin oneris saltem particula in me derivaretur: coactus ergo sum primum inter Definidores locum admittere: Utinam qualis qualis opella ista mea Provinciæ & Ordini utilis ac Deo grata esse queat. Nihil interim prætermittam, quo precibus & suffragiis meis, Deo, Ordini & bono publico satisfiat: jucundissimumque semper fuerit promptissimè & alacriter R. P. V. inservire; ejusque purpuræ (Deus audiat) aliquando flexo poplite advolvi & exosculari.

Reverendissime Pater, non me contineo, quin gemitus cordis mei apud R. V. P. filialiter eructem, confidenterque deponam. Redierunt scilicet Prosperi tempora: quibus licentiosa garrulitas in S. P. N. Augustinum voces & calamos maledicos insolenter armavit: Gratiam Dei (ut cum eodem Prospero contr. Coll. c. 1. interruptis singultibus eloquar) qua Christiani sumus, quidam dicere audent à S. memoriæ Augustino Episcopo non rectè esse defensam, librosque ejus contra errorem Pelagianum conditos, immoderatis calumniis impetere non quiescunt. Quibus ibi non tam suæ ætatis effigiem, quam seculi nostri infelicitatem, ad vivum representare videtur. Pro sui gravitate, tantæque licentiæ indignitate res ista Definitorium nostrum adeo exulceravit, ut pro opportuno remedio S. Majestati Catholico Regi nostro supplicandum censuerit, quatenus Regiæ suæ Autoritatis interventu apud S. Sedem, quod olim Prosper & Hilarius à Cœlestino, hodie ab Innocentio X. impetret petulantia istius necessariam coercionem. Hæc mihi provincia demandata est: & jam cœpi nomine Provinciarum Castiliæ, Aragoniæ & Andalusie, & ex earumdem commissione, tum apud Catholicam suam Majestatem, cum apud Generalem nostram Inquisitionem insistere, ut de remedio adversus tam perniciosum quod serpit incendium, dignarentur cogitare. Impetravi à S. Majestate secretam audientiam, ut tanto liberiùs confidentiùsque justissimas querelas nostras pro rei gravitate dolenter exponerem, porrexique hunc adjunctum libellum. Addixit verò sua Majestas, pro solita sua clementia & in Divum Augustinum P. Patris affectu, patrociniū suum apud S. Sedem, efficacesque litteras in eam rem daturum se adpromisit. Ordinem S. Patris Dominici imminens quoque incendium similiter ex-

citavit

citavit, magnamque in hac causa operam conferunt; immo (ad verecundiam nostram dico) ardentiores nobis sunt. Jungo quædam scripta, quæ lucem aliquam & instructionem dare possunt. Memoriale hoc S. Sanctitati præsentatum, typis evulgatum, accepi ex Belgio: reliqua duo impressa & excerpta sunt ex libris in Gallia impressis. Non dubitamus quin R. P. V. autoritate etiam sua præsens in curia ista totius S. Ordinis nostri, immo totius Ecclesiæ causam promovere dignabitur.

Pervenit ad nos rumor propediem nobis adfuturam R. P. V. utinam! utinam! de hoc si constaret, animos Magnatum & principum Ministrorum suæ Majestatis pro debito cultu, & reverentia, & veneratione exhibendis studiosè prævenirem; immo si quid ulterius desiderari videbitur, sum etenim ex animo & toto corde

R. P. V. *Minimus Servus & Filius*

F. BARTHOLOMÆUS DE
LOS RIOS.

EPISTOLA

R. P. PHILIPPI VICECOMITIS

AUGUST. ORDINIS GENERALIS,

A D

R. P. BARTHOL. DE LOS RIOS

eiusdem Ordinis.

REVERENDE PATER

Filiorum est Patris conservare hæreditatem, custodire depositum, tueri honorem, & Augustini sanam, catholicamque doctrinam defendere, lætamurque te inter alios hunc à Domino consequutum spiritum, ut plurimum cupias doctrinam ejus à quibusdam nescio ventilatam, & ad certamen vocatam pro viribus defendere: & cum à nobis nostram quoque operam implores, etiam ita spondemus, ut cum reliquo religioso coetu, nullum desiderandum relinquamus majus studium pro communis Patris honore. Quamquam causa potius publica sit totius Catholici nominis, & hujus in primis S. Sedis: tamen & nostros quoque calamos, linguasque acuendas exigit pietas, ut tanti Patris vindicemus injurias. Porro pro certò habemus, quòd qui volunt ad pugnam exhumare, sanctosque cineres

profana manu ventilare, ossa corrodere, in hoc adamantino Viro suos fracturos effedentes: & si mortuos insultaverint vel timidos lepores, ex nostra Eremita non deerunt leunculi, qui leonem hunc emortuum, semper tamen victurum, defendant, & ex ejus ore mel suavissimum prodire ostendant. Tametsi ex ejus collisis offibus etiam scintillæ profiliant, quibus vel excitentur mentes ad agnoscendam veritatem, vel stipulæ adversantium veritati comburantur. Vale P. T. R.

Roma 2. Martii 1651.

Amantissimus

F. PHIL. VICECOMES *Gener.*

EPISTOLA

EJUSDEM

R. P. BARTHOLO. DE LOS RIOS

ad eundem suum Generalem.

REVERENDISSIME PATER

AVE MARIA. Ut non desint Eremita nostræ cervo fugaciores leporèque timidiore homines; pauci, inquam, prout olim Prosperi nostri ætate, supersint fortasse intrepidi perfectæ Gratiæ amatores, qui tantis contradictoribus audeant contraire; nonnullis spe, ambitu, metu enervatis (licebitne addere quod probro nobis non parum vertitur) etiam ipso circa P. N. S. Augustini doctrinam, in plerisque nimis supino studii neglectu, qui relicto fonte aquæ vivæ, fodiunt sibi cisternas dissipatas; Leone tamen duce, qualem ex ungue & litteris R. P. V. esse dignoscimus, strenuum videlicet & non degenerem S. P. nostri Successorem, non deerit unquam generosus Leuncolorum manipulus, Catulive leonum rugientes ut rapiant; qui inverecundæ obrectatorum audaciæ, viriliter generositatem suam opponant. Etsi verò auscultare & obtemperare proclivius sit devotissimis tuis Filiis, Reverendissime Pater, promptosque & alacres ad ejusdem R. P. T. jussu capescenda accinctos semper reperies; si quid tamen, communicatis iis quas ad me dirigere dignata est, harum Provinciarum Superioribus ac Magistris visum fuerit pro feliciore causæ istius directione & patrocínio S. P. N. suggerere, veracundè ac reverenter audebimus. Certè

tam altè impressa est omnium nostrum medullis S. P. N. veneratio, ut si ita necesse judicabitur, non dubitabunt ad S. Sedem, dicti Prosperi nostri exemplo provocati, consimilique zelo succensi (bona cum R. P. V. licentiâ) accurrere, querelas suas deponere, remedia tantis malis deprecari: neque Sanctitatem suam dimittent, donec benedixerit eis. Quid quod vel laicum hominem, Hilarium, olim in S. P. N. jactata contumelia (longè tamen minor quàm quæ hodie, si circumstantias omnes attentius pensiculemus) tantum potuit exulcerare, ut se Prospero ad sanctam Sedem properanti, non dubitarit gemebundum comitem adjungere? An fortè à Religiosis Viris, Augustini discipulis ac filiis, Ecclesiæque Ducibus, minus aliquid expectandum? Vestem prius ac nomen Augustinianum abjicient.

Audio, felici & grato nuntio, ex parte Definitorii Religiosissimi Ordinis Sancti Dominici, cujus Fratres, tanquam fidissimi canes ad Ovile Dominicum adversus lupos tam diligenter excubant (qui Pastorem ovium lædere vult, lupo est; canebat olim in hac eadem causa Prosper) scriptas in hanc rem nostram, seu veriùs Ecclesiæ, litteras ad ipsorum Generalem, quas ab eis dolor & zelus expressit. Fortè offeret sese occasio R. P. V. cum eo sermones miscendi, & de mediis ac remediis consulendi. Deus mentem bonam inspiret, animos confortet, vires & salutem conservet. Dabam Madridi in Regali Conventu S. Philippi 20. Maii 1651.

Reverendissima P. V.

*Devotissimus & obedientissimus
in Christo Filius*

F. BARTHOLOMÆUS DE LOS RIOS.

EPISTOLA

EJUSDEM R. GENERALIS

AD EUMDEM.

REVERENDE PATER

Ex litteris tuis, annexisque Propositionibus, & laudabilem tuum pro communis nostri Parentis honore zelum, & obrectatorum ejus impudentem vesaniam cognovimus. Et hanc quidem ad stuporem usque sumus demirati. Si enim, ut antiquorum Patrum quispiam dixit,

Ille se ore proprio hæreticum esse convincit, qui Augustinum in aliquo putaverit reprehendendum esse eloquio: quo tandem nomine censendi sunt perdit illi tenebriones, qui ad splendidissimum tanti solis fulgorem caligantes, non solum maculas in ejus limpidissima puritate nituntur ostendere, verum etiam ejus lucem ægris suis oculis odiosam moliantur infuscare? Illum verò, hoc est, zelum tuum, probavimus laudavimusque: decet enim filios, haud degeneres in sui parentis contumelia commoveri. Quia tamen Spiritu S. per Scripturam monente, non est respondendum stulto juxta stultitiam suam; & quia S. Augustinus non solum Instituti nostri autor & parens est, verum etiam Catholice universalis Ecclesiæ Doctor & Magister, cujus doctrinam tum per summos Pontifices, tum per sacra oecumenica Concilia toties approbavit, & quodammodo consecravit, non existimamus nisi signo ab ipsa dato, nobis esse contra furentes ejusmodi grassatores arma assumenda. Quos ipsa fortasse sperat facilius ad bonam mentem redituros, si eorum furori ad tempus cedatur, ipsique interea cœlesti medico, qui solus eos sanare potest, ferventibus assiduisque precibus commendentur. Quo spirituum armorum genere ipsum etiam Augustinum, dum viveret, insultantium impetus fregisse, gestorum ejus monumentis edocemur. Hoc igitur ejus exemplo cum primis faciendum est: deinde Sanctissimo Domino, ejusque ministris quorum interest, supplicandum, ne tam perniciosam pestem diutius serpere sinant: in quo partes nostras desiderari non patiemur. Vale. Romæ die 15. Septembris 1651.

P. T. R.

Amanissimus

F. PHILIPPUS VICECOMES GENE.

EPISTOLA

EJUSDEM P. GENERALIS

AD

P. CAROLUM MOREAU

GALLUM, EJUSDEM ORDINIS.

REVERENDE PATER

Quod Cræsi Filium historiis celebrem imitatus diuturnum silentium viso Patris periculo perrupisti, quodque præferentibus

tibus facem Ægidio Romano & Gregorio Ariminensi ad investigandam in sublimioribus profundioribusque Theologiæ disciplinæ quæstionibus Augustini mentem, animum applicuisti, aliisque ut idem facerent autor fuisti, id verè pergratum nobis perque jucundum accidit: decet enim filios non degeneres ad parentis contumeliam commoveri; & cum eundem Augustinum habeamus, non solum vitæ morumque Doctorem, verum etiam doctrinæ christianæ atque Apostolicæ Magistrum, ad ejus potissimum normam nos in utroque convenit adaptari ac dirigi. Porro tutius longè ac securius in hac temporum conditione antiquorum illorum quàm modernorum vestigiis insistitur, quoniam adversariorum artibus factum est, ut qui nuda profert Augustini sensa, is Jansenianum aliquid personare clamiteretur, adeoque sub odioso nomine, veritatis assertores vapulare cogantur. Hinc est etiam,

quòd iidem aliquas earum Propositionum, quas olim Augustino & Prospero Massilienses objiciebant, non ut Augustini aut Prosperi, verum ut Jansenii fraudulenter promulgarunt, quatenus ab eis propugnandis veritatis amatores hac larva perterriti prohiberentur. Quidquid tamen moliantur & quantascumque tenebras Augustino Soli offundere nitantur (non enim Deus Ecclesiam suam deseret, aut permittet ut Augustini dogmata, quæ prius ipsa consecravit, & approbando collaudandoque sua fecit, improbentur) nos certè pro modulo nostro adlaborabimus, ut sua illis dignitas & autoritas facta tecta Conservetur, & ut circa erudiendam juventutem antiquæ Ordinis constitutiones ubique à Professoribus observentur. Vale. Romæ 24. Febr. 1653.

Reverende Pater

Amantissimus

F. PHILIPPUS VICECOMES GEN. IND.

AUCTARIUM

DE PECCATO PHILOSOPHICO

Ad Caput XLVIII. Libri III. in Addendis pag. 82.

Quàm intentis animis incumbant Societatis Patres in peccatum Philosophicum denuò instaurandum, monueram illius Capitis initio, referre contentus quam nuper scenam Germantus Becheferius Societatis in Parisiensi Collegio Theologus explicuerat, ut hoc scholæ suæ placitum novam in lucem ederet. Sed cum ad illud consilium exsequendum alii aliis viarum diverticulis progrediantur, operæ pretium putavi duobus vel tribus aliis, iisque recentissimis, exemplis Sociorum mentem certiore lectori facere, præsertim cum eorum nonnulli dum Philosophici peccati errorem abjicere se simulant, pejus aliquid in ejus locum substituant: in hoc unum omnes intenti, ut peccatores à peccati reatu æternaque, vel etiam temporali omni pœna, securos faciunt.

Principium illis omnibus commune hoc est, eum peccati culpâ carere Deumque non offendere, cui nullum sufficiens gratiæ actualis auxilium præsto fuerit, quo illius mens illustretur, exciteturque voluntas. Ex illo principio deduxerat Becheferius pravum istud dogma: Peccatori planè obcæcato & indurato peccata

non imputari; qui secus sentirent, errare.

*Thesis Jesuitarum Lugdunensium
ejusque Censura.*

Jesuitæ Lugdunenses Theses Theologicas propugnaverunt 26. Augusti anni 1697. inter quas hæc de peccatis quarta legitur. *Dari non potest peccatum merè Philosophicum. Verum etsi esset possibile, falsum est, ut nonnullis crasso errore placuit, hac opinione excusari posse omnia scelera perditissimorum hominum.*

* Enimverò Professor ille fingit sibi suisque collegis impossibile haberi peccatum merè Philosophicum, ut securius illudat Decreto quo Alexander PP. VIII. infustum illud & erroneum dogma proscriptum voluit cum suis consequentiis. Sed juvat hic inferere doctissimi è Sancti Thomæ Schola Theologi celeberrimique simul Scriptoris censuram, qua non ita pridem Thesim illam publicè notavit.

† Hæc Propositio, inquit ille, quatenus negat ex peccato merè Philosophico sequi, ut excusentur omnia scelera perditissimorum hominum qui Deum vel ignorant, vel de Deo actu non cogitant, falsa est: illudat Decreto Alexan-

Lion.

V. Lib. cui
titul. The-
ses Theo-
log. Jesui-
tar. Lug-
dun. die
26. aug.

1697. pro-
pugnatae
Censoriis
notis dis-
punctæ &
confixæ.

De pecca-
tis propos.
4. habentur in Col-
lectione
Gallica
pro De-
fensione
Moralis
& Gratia
Christia-
næ. Tomo
2. pag. 30.

dri † Censura.

dri VIII. Pontificis Optimi Maximi die 24. Augusti 1690. edito, quo peccati Philosophici confectarium illud damnatur: viam aperit ad propugnandam erroneam & temerariam peccati Philosophici doctrinam, cum eam innoxiam esse, & à perniciosâ scandalosâque consequentiâ divulsam contendit. Opinionem præterea vocat Propositionem quæ ab Ecclesiâ damnata est ut erronea: Hac opinione, &c. Excusari denique posse omnia scelera perditissimorum hominum hac (ut loquitur) opinione negat: excusari posse plurima, vel certè aliqua, non diffitetur, quæ scilicet ab eo fiunt qui Deum vel ignorat, vel de Deo actu non cogitat. Vel eatenus excusari negat ut gravia peccata non sint, quamvis eatenus excusari fortè velit ut non sint offensæ Dei, neque peccata mortalia, & æternâ pœnâ digna, ut peccati Philosophici Vindices locuti sunt.

Secunda Propositio ab Alexandro VIII. damnata.

Probatio
Censura.

Peccatum Philosophicum seu Morale, est actus humanus disconveniens naturæ rationali, & rectæ rationi: Theologicum verò & mortale, est transgressio libera divinæ Legis. Philosophicum quantumvis grave, in illo qui Deum ignorat, vel de Deo actu non cogitat, est grave peccatum; sed non est offensæ Dei, neque peccatum mortale dissolvens amicitiam Dei, neque æternâ pœnâ dignum.

Secundam hanc Propositionem Summus Pontifex declaravit scandalosam, temerariam, piarum aurium offensivam esse, sicuti damnat & prohibet: ita ut quicumque illam docuerit, defenderit, aut de ea etiam disputaverit publicè seu privatim, nisi forsan impugnando, ipso facto incidat in excommunicationem, à qua non possit ab alio (præterquam in articulo mortis) nisi à Romano Pontifice absolvi.

Actio vel omissio, quæ non est libera transgressio divinæ Legis, ad peccatum non imputatur, nec æternæ damnationis reum hominem constituit. Peccatum usque adeo voluntarium est malum, ut nullo modo sit peccatum, si non sit voluntarium: & hoc quidem ita manifestum est, ut nulla hinc doctorum paucitas, nulla indoctorum turba dissentiat. Quare aut negandum est peccatum committi, aut fatendum est voluntate committi; utique liberâ. Unde à S. Augustino alibi definitur, Voluntas retinendi vel consequendi quod iustitia vetat, & unde liberum est abstinere. Itaque si possibile esset pec-

catum quod merè Philosophicum appellant, actus scilicet humanus disconveniens naturæ rationali & rectæ rationi, qui tamen non esset transgressio libera divinæ Legis; non esset offensæ Dei, neque hominem faceret æternæ pœnæ obnoxium.

Thesis itaque illudit Pontificio Decreto, cum id sequi negat, etiamsi peccatum merè Philosophicum asseratur; & systema erroneum, temerarium, & scandalosum peccati Philosophici, à Sede Apostolica damnatum, innoxium esse oblique propugnat, & ad quæstionem duntaxat metaphysicam, de possibili, pertinere innuit. Huc usque Viri Clarissimi Censura.

Dictata & Thesis Autissiodorensium Jesuitarum.

Auxerre.

Verùm à Theologorum adytis ad Philosophorum Scholas descendamus. Nam peccatum Philosophicum ab illis malè exceptum ad Philosophica Gymnasia velut ad natale solum confugit, amicam sedem ac tutiores latebras in adolescentium mentibus inventurum se confidens. Pro nis enim auribus auscultant, suspiciunt, mirantur, ac tenaci memoria retinent rudiores illi sapientiæ candidati quæcumque sibi à loquacibus magistris confidentius traduntur, velut certiora instituendæ moralis vitæ principia. Illorum pars maxima prona ad vitia, Legi divinæ parum intenti, ad peccati malitiam vix aliquando animum advertentes, ab agenda de admissis pœnitentia abhorrentes, avidè accipiunt ea morum præcepta quæ liberiori indoli ac lubricæ ætati gratificantur, impunitatem promittunt, ab importunis de pœnitentiæ necessitate cogitationibus liberant, ac peccandi libertatem omnis reatus vacuum, nullique pœnæ obnoxiam, tantò ampliorem indulgent, quanto minùs de Deo, ejusque Lege, aut de peccati malitia ac turpitudine miseri discipuli cogitant. Denique cum plerique ejusmodi Philosophiæ studiosi ad Theologicam palæstram inde non transeant, sed alii aliud in seculo vitæ genus fortiantur à Theologia alienum, iisdem præceptis quibus malè imbuti sunt à Philosophiæ Professoribus, ad seram plerumque ætatem retinent, & ad illa vitam moresque componunt.

Hujusmodi est doctrina quam discipulis suis tradidit Pater Debar Augustodunensis in Autissiodorensi Societatis Collegio, anno proximè elapso 1700. Philosophiæ Professor. Sic ille in disputatione 1. de Moralitate actuum humanorum in genere.

Quæres 1. Quid sit actus moralis? Respondeo actum moralem definiri posse eum qui fit liberè & cum advertentia ad rationes æternas, hoc est ad honestatem aut ad turpitudinem.

Dicitur 1. is qui fit liberè, quia per actum moralem eum communiter intelligimus qui est imputabilis ad laudem aut ad vituperium. Solus autem actus liber potest esse talis.

Dicitur 2. qui fit cum advertentia ad honestatem aut turpitudinem: nam si fiat cum advertentia ad rationem commodi aut incommodi, poterit quidem esse liber, sed non erit moralis. Unde vides omnem actum moralem esse liberum; sed non vicissim omnem actum liberum esse moralem.

Quam in scholastico pulvere auditoribus suis explicuerat doctrinam, eandem in publica urbis luce propugnavit idem Professor Autissiodorensis mense Augusto ejusdem anni. Hæc sunt Thesis defensæ verba: *Est in homine libertas arbitrii ad meritum morale sufficiens, cujus essentia consistit in activa contradictionis indifferentia. Finis ut finis non est libertatis objectum. Sedem habet in voluntate libertas, radicem in intellectu. Exercitium libertatis vel positivum est vel negativum: istud est actus positivus; hoc, omissio actus. Actus moralis dicitur ille qui fit non solum cum libertate, sed etiam cum advertentia ad regulas morum.*

Reims

Dictata & Thesis Remensium Jesuitarum.

Eundem errorem in adolescentium Remensium animos intulavit eodem anno Pater de Briel Philosophiæ Professor in Remensi Jesuitarum Collegio, nec dubium quin pariter in Sedanensi & Carolopolitano Collegiis idem error disseminetur à Sociis illic Philosophiæ Magistris.

En excerptum damus Scriptorum Remensis Professoris, quæ ex dictantis ore excepta sunt, & à tribus illius discipulis repræsentata ac diligentissimè cum diversis illorum exemplaribus sunt collata.

ASSERTIO V.

Moralitas actûs est denominatio extrinseca actui, ducta ab advertentia agentis ad regulam morum.

Probatur. Positâ præcisè advertentiâ agentis ad regulam morum, actus fit moralis; sublata, actus non est moralis: ergo moralitas actus petitur extrinsecè ab illa advertentia.

Consequentia patet. Antecedens pro-

batur; quia in tantum actus dicitur moralis, in quantum agens advertit utrum actus à regula morum imperetur, aut prohibeatur, aut permittatur.

Res illustratur exemplo. Fac enim, V. G. Petrum die veneris comedere carnes, ita tamen ut primo quadrante ad nullam omnino regulam advertat, neque prohibentem, neque permittentem; sequente quadrante advertat, tunc actus ille primo quadrante non erit moralis, sed purè naturalis, perinde ac si dormiendo comederet; secundo verò quadrante idem ille actus fiet moralis & quidem malus, si advertat ad regulam prohibentem. Idem porro dici debet de omni alio actu.

RESOLVUNTUR DIFFICULTATES.

Objicies. Moralitas est aliquid intrinsecum actui: ergo non est denominatio purè extrinseca. Respondeo, nego antecedens. Probatur. Moralitas actûs est dependentia actûs ab advertentia agentis ad regulam morum: sed hæc dependentia est intrinseca actui, sicut omnis alia relatio: ergo moralitas est aliquid intrinsecum actui.

Respondeo. Nego majorem. Nam moralitas dependet quidem ab advertentia, sed non est ipsa dependentia; sicut denominatio visi in pariete dependet quidem à visione, sed non est dependentia à visione.

Instabis 1. Atqui moralitas non est tantum denominatio ducta extrinsecè ab illa advertentia. Ergo est ipsa formalis dependentia actûs à tali advertentia.

Respondeo, nego subsumptum.

Probatur. Plures actus independenter ab advertentia sunt morales; ergo moralitas non est denominatio ducta extrinsecè ab illa advertentia. Respondeo, nego antecedens.

Probatur; ille actus est moralis, qui habet vim inducendi bonos aut malos mores; sed plures actus independenter ab advertentia habent hanc vim: ergo plures actus independenter ab advertentia sunt morales.

Respondeo. Distinguo majorem. Qui habet vim inducendi bonos aut malos mores formaliter concedo: fundamentaliter tantum, nego maj. & distinguo minorem. Plures actus independenter ab advertentia habent hanc vim, id est, habent vim inducendi bonos aut malos mores fundamentaliter, esto; formaliter, nego minorem & distinguo consequens. Ergo plures actus independenter ab advertentia

tia sunt morales : fundamentaliter ; esto, formaliter, nego consequentiam. Dico itaque eo modo actum esse moralem quod inducit bonos aut malos mores. Prædicti autem actus quamdiu fiunt sine advertentia inducunt tantum mores fundamentaliter bonos aut malos : unde sunt etiam tantum fundamentaliter morales.

Instabis 2. Atqui non potest intelligi moralitas actus nisi per aliquid intrinsecum actui : ergo nulla solutio.

Respondeo, nego subsumptum. Probatur : Bonitas & malitia sunt quid intrinsecum actui, ergo & moralitas. Respondeo, concedo antecedens, nego consequentiam. Probatur. Bonitas & malitia sunt differentiae specificæ, quarum moralitas est genus, nam actus dividitur in moralem & in non moralem, & moralis in bonum & malum ; atqui ubi species sunt intrinsecæ, genus est etiam intrinsecum ; ergo si bonitas & malitia sunt quid intrinsecum actui, etiam moralitas est quid intrinsecum.

Respondeo, distingo majorem. Bonitas & malitia sunt species, quarum moralitas est genus, prout genus significat partem essentiali speciei, nego ; prout significat quemcumque terminum superiorem licet accidentalem & extrinsecum : permitto majorem, & distingo minorem. Ubi species sunt intrinsecæ etiam genus est intrinsecum, si per genus significatur pars essentialis, concedo ; si significatur tantum terminus superior, licet extrinsecus & accidentalis, nego minorem & consequentiam. Certè determinatio visi potest dici genus respectu hujus vel illius coloris visi ; non tamen est propterea denominatio intrinseca, sicuti est denominatio colorati. Permisi supra majorem : Ratio est, quia sicut actus moralis dividitur in bonum & malum, sic posset etiam actus de se vel bonus vel malus dividi in moralem & non moralem : unde sunt termini excedentes & excessi ; quare neuter est genus respectu alterius.

Inst. 3. Moralitas actus est principium meriti quod est in actu ; ergo est aliquid intrinsecum actui. Respondeo : nego ant. est enim tantum conditio sine qua actus non esset in actu secundo meritorio ; quod si aliquandò dicitur principium meriti, tunc tō principium-latè sumitur pro quocumque requisito ad meritum.

Inst. 4. Libenter quærerem, an deno-

minatio moralis sicut & liberi æquè primario conveniat actui externo ac interno, Respondeo, primario & immediate convenire actui interno, actui verò externo mediatè & secundario. Ratio est quia in tantum actus externus est liber & moralis, in quantum imperatur ab interno. Ergo prius est internum esse liberum & moralem, quàm externum.

Hactenus Patris de Briel verba in scriptis privatim dictatis. Idem nunc audiendus eandem doctrinam publicè propugnans in Thesibus publicæ disputationi expositis 23. & 24. die mensis Augusti anni proximè elapsi 1700. In secundâ ergo Columna, è tribus in quas Theses dividuntur, hæc Propositio habetur : *Moralitas actus humani nihil aliud est quàm denominatio extrinseca actui, ducta ab advertentia agentis ad regulam morum, unde actus moralis appellatur.* Hucusque Professor.

Infinitus sim, si omnes ejusmodi Propositiones è publicis Jesuitarum Thesibus referre velim. En tamen adhuc aliam quam 27. Julii anni 1697. propugnavit Aginnense Societatis Collegium : *Actum humanum & moralem distinguimus ; aliud à libertate est precise ; aliud à libertate quidem, sed cum advertentia ad aliquam regulam morum ; unde admittimus posse dari aliquos actus indifferentes, etiam in individuo, & non tantum in specie. In actibus autem moralibus, actui interno efficaci nihil per se loquendo, bonitatis vel malitiae actus externus addere potest.*

CLARA sunt verba nec interprete indigent, sed Episcopali autoritate, quæ in tam pestilentem doctrinam Ecclesiasticæ Censuræ gladium exerat, recidatque repullulantes excisæ nuper malæ arboris furculos, Philosophici, inquam, peccati ab Apostolica Sede proscripti : quod frustra à Theologorum confessibus eliminatum fuerit, si tamen eliminatum, quamdiu per Philosophiæ scholas impunè grassari, adolescentium mentes inficere, lethaleque virus longè latèque spargere sinitur. Plura non addam, ne Illustrissimorum Antistitum sententiam antevertere videar. Servorum est Patrisfamilias de superfeminatis in ejus agro zizaniis monere ; illius est Messoribus suis seu autoritatis suæ Vicariis præcipere ut zizania colligant & alligent in fasciculos ad comburendum.

I N D E X A D D E N D O R U M.

ADDENDA suis locis in *Historia Congregationum de Auxiliis* sub summis Pontificibus Clemente XIII. & Paulo V. celebratarum, Anno 1700. edita. pag. 1

ADDENDA in *Historia*. II

CAP. XV. *Molina Concordia* malè à multis habita, ut quæ errores Petri de Rivo à Sixto IV. proscriptos, denuò suscitabat. 18

Excerptum ex *Censura & Declaratione* Conventus Generalis Cleri Gallicani Congregati in Palatio Regio San-Germano anno millesimo septingentesimo, in materia Fidei & morum, ejusdem generalis Conventus jussu publicata, & typis edita. 25

CAP. XIX. *Molinam*, ejusque recens inducta *Paradoxa*, pari zelo exagitant Galli è Societate Professores, ut antiqua Patrum Traditioni, maxime verò D. Augustino injuria. 33

CAP. XX. *Privata Molina causa*, communibus votis à Societate suscipitur, adversus FF. Prædicatorum oppugnationes. 41

ADDENDA in *Libro secundo Historia Congregationum de Auxiliis*. 43

CAP. X. Stat Pontifex in incepto: *Tertium Causa* hujus examen, seu verius novam primi examinis recognitionem edicit. Interea multa festina moluntur, ut litem implicent. 51

ADDENDA in *Libro tertio Historia Congregationum de Auxiliis*. 61

CAP. VIII. *Distincta quinti hujus examinis Historia* textitur. Quis in celebrandis Congressibus servatus ordo: quæ lex à Clemente VIII. antiquæ Traditionis Hærede, disputantibus data; ut videlicet ad S. Augustini mentem Controversia omnes exigenterentur. 56

CAP. IX. *Argumenta disputationum quinti Examinis*, à Clemente VIII. pro nata difficultate, identidem designata. 77

CAP. XLVIII. *Bastida commentum*, à Germano Becheferio Societatis Theologo nuper Parisiis instauratum, de peccatis obduratorum non imputandis, cumulatissime confutatur. Peccati Philosophi si nuperrimè recusis error exploditur,

I. Ex hoc effato: Ut peccatum imputetur nullam supernaturalem mentis illustrationem, aut excitationem voluntatis esse necessariam. 82

CAP. XLIX. *Ejusdem insulsi systematis falsitas* demonstratur ex altero hoc *Christiane Moralis Theologiae axioma*: A culpa non excusare impotentiam voluntariam seu propria iniquitate contractam. 96

ADDENDA in *Libro quarto Historia Congregationum de Auxiliis*. 115

CAP. III. *Nova arte Pontificem à resumenda lue* debortantur: quod quaestiones in controversiam vocata nihil ad fidem attingant; earumque numero sine habenda, quas nec contemnendas nec adstruendas censuit Cælestinus. ibid.

CAP. IV. *Superior Molinianorum expositulatio*, à nonnullis nuper instaurata confutatur: *Quaestiones in jus vocatas*, Cælestini Capitulis arctissime coherere, multis ostenditur. 121

CAP. V. *Petita ex Brevis Pontificio Innocentii XII. Theologis Lovaniensibus inscripto*, difficultas eliditur. 134

Instrumentum Academiae Ingolstadiensis. 150

Instrumentum Academiae Græcensis. ibid.

Instrumentum Academiae Dilinganae. 151

Instrumentum Academiae Wirceburgensis. ibid.

Instrumentum Academiae Moguntinae. 152

Instrumentum Academiae Trevirensis. 153

Instrumentum Academiae Viennensis. 157

Instrumentum Academiae Mussipontanae in Lotharingia. ibid.

CAP. XIX. *Paulus V. inito finienda Controversia consilio Bullam Pontificiam Consultoribus delineandam committit*: quam illi, diligenti studio elaboratam, Sanctitati suæ tradunt. 159

CAP. XXVI. *Objecta Thomæ de Lemos, aliisque nonnullis Thomistis palinodia* confutatur. 169

CAP. ULT. *Quadragesima in gratiam Scholæ Augustino-Thomisticae, adversus Molinianam Prajudicia*, ex superiori *Auxiliorum Historiâ* derivata. 178

ADDENDA in *Appendice Historia Congregationum*
T 3

I N D E X

- gregationum de Auxiliis. 184
- Epistola Joannis Antonii Bovii ad Paulum V. quâ suam, de finiendâ Auxiliorum Controversiâ sententiam dicit, à cæteris Censoribus dissentientem. ibid.
- DE JURAMENTO quo Academia Salmanticensis S. Augustini Doctrina & S. Thoma Conclusionibus docendis se addixit: nec non de ejusdem Juramenti Apologia Excerptum è quibusdam MSS. Doctrina Augustiniana Vindictis. 206
- Monitum Typographi de subsequenti Opusculo. &c. 228
- NARRATIO rerum gestarum in negotio Censura ab Hispanicis Inquisitionibus lata adversus XXII. Propositiones à Jesuitis eorumque affectis assertas contra S. Augustinum. ibid.
- Decretum & Censura Inquisitionis Vallisoletana in viginti & duas Propositiones S. Augustino contumeliosissimas. 247
- Decretum & Censura Inquisitionis generalis Hispaniarum adversus duas & viginti Propositiones S. Augustino perquam injurias. 248
- Memoriale Regi Catholico oblatum per Reverendum Patrem Bartholomæum de los Rios. 249
- Scriptum in quo proponuntur Rationes & Fundamenta quibus nititur Liber Memorialis à Patre Bartholomæo de los Rios Regi Catholico, nomine trium Provinciarum Castellanae, Tarraconensis, & Andalusensis, Ordinis Eremit. S. Augustini. 252
- I. Memoriale Inquisitori generali oblatum à R. P. Bartholomæo de los Rios. 255
- Epistola à R. P. Bartholomæo de los Rios ad P. Thomam Figuerola Provincialis Tarraconensis Provinciale. 256
- Epistola R. P. Petri de Perrez Provincialis Andalusensis ad R. P. Bartholomæum de los Rios. 257
- Epistola R. P. Thomæ Figuerola Provincialis Tarraconensis ad R. P. Bartholomæum de los Rios. 258
- Epistola R. P. Thomæ Figuerola Provincialis Tarraconensis ad R. P. Bartholomæum de los Rios. 260
- Causæ & Rationes, &c. ibid.
- Responsio R. P. Magistri Bartholomæi de los Rios in Provincia Castellanae Ordinis S. P. N. Augustini Primarii Definitoris, & Concionatoris Regii ad Causas & Rationes R. P. Magistri Thomæ de Figuerola in Provincia Tarraconensi ejusdem Ordinis S. P. N. Augustini Provincialis. 264
- Alterum Memoriale à R. P. Magistro Bartholomæo de los Rios oblatum Inquisitori generali sub initium mensis Septembris 1650. ex hispanico in latinum versum. 280
- II. Memoriale Regi Hispaniarum oblatum à R. P. Bartholomæo de los Rios Ordinis Eremitarum S. Augustini religioso. 282
- III. Memoriale Inquisitori generali Hispaniae oblatum à R. P. Bartholomæo de los Rios. 285
- Epistola R. P. Bartholomæi de los Rios Augustiniani ad R. P. Philippum Vicecomitem Augustiniani Ordinis Generalem. 287
- Epistola R. P. Philippi Vicecomitis Augustiniani Ordinis Generalis ad R. P. Bartholomæum de los Rios ejusdem Ordinis. 289
- Epistola ejusdem R. P. Bartholomæi de los Rios ad eundem suum Generalem. 290
- Epistola ejusdem R. P. Generalis ad eundem. 291
- Epistola ejusdem R. P. Generalis ad P. Carolum Moreau Gallum ejusdem Ordinis. 292
- AUCTUARIUM de peccato Philosophico ad Cap. XLVIII. Libri III. in Addendis pagina 82. 293
- Lugdunensium Jesuitarum Thesis cum ejusdem Censura. 294
- Autissiodorensium Jesuitarum dictata & Thesis. 296
- Remensium Jesuitarum dictata & Thesis. 297

C E N S U R A.

INfra scripti testamur, à nobis accuratè lecta ac recensita fuisse quædam Auctaria, seu, ut præfert titulus, *Addenda suis locis in Historia Congregationum de Auxiliis, sub Summis Pontificibus Clemente VIII. & Paulo V. celebratarum Anno 1700. edita*; nihilque in illis occurrissè quod Fidei Catholicæ dogmatibus, morumque Christianorum legibus adversum nobis visum fuerit. In cujus Fidem subscripsimus.

ARN. EYBEN Cath. Antverp. Can. Theolog. Librorum Censor. Antverpia 12. Julii 1701.

H. DENIS S. Th. Licentiatus, Ecclesiæ Cathedralis Leodiensis Canonicus Theologus. Leodii 29. Junii 1701.

J. M. DE HONDT Presbyter, S. Th. in Academia Lovaniensi Licent. Ex-Præpositus Congregationis Oratorii D. Jesu. Bruxellis 4. Julii 1701.

FR. HENRICUS A S. TO IGNATIO Vicarius Provincialis Carmelitarum Wallo-Belgarum, S. Theologia Professor emeritus. Bruxellis 4. Julii 1701.

FR. PHILIPPUS VERDIN Ord. FF. Minimorum S. P. Francisci de Paula per Belgium & inferiorem Germaniam Provincialis, & S. Theol. Lector. Leodii 29. Junii 1701.

FR. PHILIPPUS DURAND S. Th. Doctor Ordinis FF. Præd. Ex-Provincialis & Prior. Brannia-Comitis 22. Junii 1701.

ERRATA IN ADDENDIS.

Pagina	Linea	Errata	Correctio
P. 30.	L. 19.	antiqui ora	antiquiora
p. 54.	l. 39.	& Rufino	ad Rufinum
p. 58.	l. 26.	abfuit	obfuit
p. 66.	l. 46.	quod uti	uti
p. 81.	l. 27.	dirimisset	diremisset
p. 109.	l. 48.	quod	quot
p. 122.	l. 11.	eoque	eaque
p. 151.	l. 50.	nullo omninò demto	Eucharìo demto
p. 164.	l. 4.	ac	at
p. 168.	l. 34.	oppignoravit	oppigneravit

In Historiæ Præfatione pag. 35. ad calcem Paragraphi 10. dele tres lineas ab iis scilicet verbis, *una enim*, usque ad *minimè constare*.

LOVANI,

Apud ÆGIDIUM DENIQUE, M D CCL

Historia addenda in historiam Congregationum de Auxiliis Sub Clemente VIII
et Paulo V celebratarum

Lovanii 1701

2 J.can.p. 97 c

urn:nbn:de:bvb:12-bsb10488971-3